




আরও দাঁও প্রাণ

সায়ন্তনী পূততুণ্ড



আরও দাও প্রাণ—উপন্যাসটি তিন

কবির মন ও মানসিকতা, সমস্যা, প্রতিকূলতা, প্রেম—বিচ্ছেদের কাহিনি। আসলে, এই উপন্যাস মূলত কবিতার কথাই বলে! কেন্দ্রীয় চরিত্রে আছেন গহন দত্তগুপ্ত নামে এক প্রতিভাশালী কবি, যিনি সৃষ্টির তাড়না হারিয়ে ফেলেছেন। অন্যদিকে এক হারিয়ে যাওয়া কবি শুটকি আর অদ্ভুত এক স্বপ্নকে আঁকড়ে ধরে বাঁচে। এ ছাড়াও মন্দার নামের এক উঠতি কবি, নাগরিক জীবনের যন্ত্রণায়, দৈনন্দিন জীবনচর্যায় ব্যতিব্যস্ত হয়ে ভাবতে শুরু করে—আদৌ কি কবিতা লিখে কোনো লাভ আছে? এই তিনজনের তাড়না বিভিন্ন হলেও তারা একটি মাত্র উপায়েই নিজেকে যাচাই করে নিতে চায়। কবিতা ডট নামক একটি কবিতার সাইটে ছদ্মনামে কবিতা পোস্ট করে জেনে নিতে চায় নিজেদের দৌড়। ইন্টারনেট কাব্যজগৎও এই উপন্যাসের আর-একটি উল্লেখযোগ্য চরিত্র যা শেষপর্যন্ত তিন কবিকে পৌঁছে দেয় নিজেদের পরিণতিতে। সমস্ত ভালোমন্দ নিয়ে তাই ওয়েব-কবিতা জগৎ এই উপন্যাসে একটি গুরুত্বপূর্ণ ভূমিকা পালন করেছে।

আরও দাঁও প্রাণ

সায়ন্তনী পূততুণ্ড

শ্রদ্ধা

প্রতিভাস □ কলকাতা

প্রচ্ছদ সুদীপ্ত দত্ত

প্রথম প্রকাশ বইমেলা, জানুয়ারি ২০১৫

© সায়ন্তনী পুততুণ্ড

প্রতিভাস-এর পক্ষে বীজেশ সাহা কর্তৃক ১৮এ, গোবিন্দ মণ্ডল রোড
কলকাতা- ৭০০০০২ (দূরভাষ : ২৫৫৭-৮৬৫৯) থেকে প্রকাশিত এবং
বইপাড়া পাবলিকেশনস্ (প্রিন্টিং বিভাগ), ১৮এ, গোবিন্দ মণ্ডল রোড
কলকাতা- ৭০০০০২ (দূরভাষ : ৬৫৪৪-৪৮৯৮) থেকে মুদ্রিত।

প্রকাশক এবং স্বত্বাধিকারীর লিখিত অনুমতি ছাড়া এই বইয়ের কোনো অংশরই
কোনো রূপ পুনরুৎপাদন বা প্রতিলিপি করা যাবে না, কোনো যান্ত্রিক উপায়ের
(গ্রাফিক্স ইলেকট্রনিক বা অন্য কোনো মাধ্যম, যেমন ফোটোকপি, টেপ বা
পুনরুদ্ধারের সুযোগ সংবলিত তথ্য-সঞ্চয় করে রাখার কোনো পদ্ধতি) মাধ্যমে
প্রতিলিপি করা যাবে না বা কোনো ডিস্ক, টেপ, পারফোরেটেড মিডিয়া বা কোনো
তথ্য সংরক্ষণের যান্ত্রিক পদ্ধতিতে পুনরুৎপাদন করা যাবে না। এই শর্ত লঙ্ঘিত
হলে উপযুক্ত আইনি ব্যবস্থা গ্রহণ করা যাবে।

ISBN : 978-93-84265-47-2

ARO DAO PRAN

A book of novel in bengali

by Sayantani Putatunda

Published by Prativash

18A, Gobinda Mondal Road, Kolkata 700002

দাম ২০০টাকা Rs.200 \$ 10

আমার জেঠিমা সবিতা পূততুঙ-র
করকমলে

BOOKS IN PDF

To get free e-books

Step 1

Click here

Step 2

Click here

Request or suggest book

জলের সাথে আমার ছায়া বলছে আমার কথা
 জল বোঝে না কোনটা কথা, কোনটা প্রগলভতা।
 ছপছপিয়ে আতুর বিরাম আসল এখন কাছে,
 হলছলিয়ে ভাসিয়ে নিল খাতার শেষের পাতা।
 জল জানে না কোনটা কথা, কোনটা প্রগলভতা।

বাইরে তখন অঝোরে বৃষ্টি পড়ছে। বন্ধ কাচের জানলার ও প্রান্তে ঝাপসা প্রেক্ষাপট। বর্ষান্নাত প্রকৃতি আশ্তে আশ্তে যুবতি হচ্ছে। জলের স্বচ্ছ ফোঁটা পাতায় পাতায় দ্যুতি ছড়িয়ে হাসছিল। প্রচণ্ড গরমের ক্লাস্তিকর ঘামের দাগ নিশ্চিহ্ন করতেই এই ধারান্নানের উদ্যোগ! যেন সারাদিনের কাজকর্ম সেরে গৃহিণী সান্ধ্যস্নান করছেন। তার অনিন্দ্য সুন্দর মুখ চুইয়ে ফোঁটায় ফোঁটায় পড়ছে ঝরে জলবিন্দু।

গহন ক্লাস্ত দৃষ্টিতে বন্ধ জানলার দিকে তাকিয়েছিলেন। বৃষ্টি নয়। দ্রষ্টব্য বিষয় নিজের মুখের প্রতিচ্ছবি। কাচের জানলায় তার নিজের মুখেরই প্রতিবিশ্ব পড়ছিল। সেই প্রতিবিশ্বের ওপর দিয়ে বৃষ্টির জল সরলরেখা টেনে টেনে চলে যাচ্ছে। তিনি আপনমনেই গুনছিলেন, কটা সরলরেখা দাগ ফেলে গেল তার মুখে!

তার মধ্যেই কানের কাছে কে যেন উচ্ছ্বসিত হয়ে কবিতার কয়েকটা লাইন আউড়ে গেল। সে বেচারারও দোষ নেই। ছোকরা উঠতি কবি। বেশ কয়েকটা লিটল ম্যাগাজিনে তার লেখা বেরিয়েছে। একেই অত্যাৎসাহী তরুণ কবি, তার ওপরে এমন সুন্দর বর্ষণমুখর পরিবেশ। সবমিলিয়ে রোমান্টিসিজমের চূড়ান্ত। ধাক্কাটা সামলাতে পারেনি। উচ্ছ্বসিত হয়ে বলে গেল কবিতার কয়েকটা লাইন—‘জলের সাথে আমার ছায়া বলছে আমার কথা। জল বোঝে না কোনটা কথা কোনটা প্রগলভতা...।’

পনেরো ...ষোলো...সতেরো...আঠারো...। গহন তখনও একমনে জলের সরলরেখার সংখ্যা গুনে যাচ্ছিলেন। হঠাৎই অন্ধের মধ্যে ড্রাম্ করে আছড়ে পড়ল কাব্য। কবিতার গুঁতোয় খেই হারিয়ে ফেলেন তিনি। গভীর চোখদুটো জানালার দিক থেকে ফিরল আবৃত্তিকারের দিকে। অবিমিশ্র বিরক্তি ভেসে উঠছে চোখদুটোয়।

আবৃত্তিকার সেই চাউনি দেখেই থতোমতো খেয়ে চুপ করে গেল। গহন মুখে কিছু বলেননি।

কিন্তু তার চোখদুটো আদ্যন্ত ভাষাময়! সেই চোখই যেন বিরক্তিমিশ্রিত কণ্ঠস্বরে বলে উঠল—
'চুপ করো'।

উঠতি কবি কাব্যে ক্ষান্ত দিল। তার পিছনে একটা ছোটো খাটো ভিড়ও বসেছিল। সদ্য গৌফ দাড়ি গজানো কবি, কিংবা পোড় খাওয়া, জুতোর শুকতলা খইয়ে ফেলা কবি, অথবা লিটল ম্যাগাজিনে দুর্বোধ্য প্রেমের দুর্বোধ্যতর কবিতা লেখা কবি—সব নমুনাই পাওয়া যাবে সেই ভিড়ে। সপ্তাহান্তে ছুটির দিনে ওরা এসে আড্ডা জমায় গহনের বাড়িতে। গহন ওদের আসতে বলেন না। তবু ওরা আসে। ওদের সবাইকে চেনেনও না। কিন্তু ওরা সবাই তাকে চেনে। নিজেদের চেনাতেও চায়। এককথায় ওরা 'ভক্তবন্দ'।

অথচ গহনের কাছে ওরা 'ভিড়'। যখন দলবেঁধে আসে তখন মনে হয় 'কী জ্বালাতন'! যখন কলকণ্ঠে তার কবিতার প্রশংসা করে আর ক্ষণজন্মা কলমটা এখন থেমে গেছে বলে আক্ষেপে মাথা নাড়ায়, কেন লিখছেন না সে বিষয়ে বারবার প্রশ্ন করে, তখন ভাবেন—কতক্ষণে 'যাবে!' আর যখন বেশ কিছুটা সময় নষ্ট করে সদলবলে তাকে প্রণাম করে বিদায় নেয় তখনই তাঁর আত্মা কানে কানে বলে ওঠে 'বাঁচা গেল'।

তবে এই সবকটা বাক্যই থাকে মনের ভেতরে। মনের গণ্ডি পেরিয়ে কখনও মুখে আসে না। ভক্তবন্দরা ভিড় জমিয়ে প্রশংসাবাক্যে ভরিয়ে দিতে শুরু করলেও তার মুখ নির্লিপ্তই থাকে। যেন ওরা গহনের কথা নয়, কোনো থার্ড পার্সন সিঙ্গুলার নাম্বারের কথা বলছে! আস্তে আস্তে সেই প্রশংসা যখন 'অতিশয়োক্তি'র রাস্তা ধরে 'স্বতি' হয়ে 'চাটুকারিতায়' পৌঁছায় তখনও গহন মুখে কিছু বলেন না। বরং নির্লিপ্ত দৃষ্টিতে মাথার ওপরে ঘুরন্ত পাখাটার দিকে তাকিয়ে বসে থাকেন। যেন এ যাবৎ যত নারীদের নিয়ে তুমুল প্রেমের কবিতা লিখেছেন—সেই নিশিগন্ধ, শ্রেয়সী, প্রিয়ম্বদাদের কেউ মাথার চুল ধরে ফ্যানের ব্লেডের সঙ্গে বেঁধে দিয়েছে! অনুরাগীরাও অগত্যা সেই ফ্যানের দিকেই তাকিয়ে থাকে। তাদের অনুমান যখন এই 'প্রাস্ত', 'আদ্যোপান্ত ইনটেলেকচুয়াল' বিখাত কবিটি মাথার ওপরের তিন ব্লেডওয়লা পাখাটার প্রতি এত মনোযোগ দিয়েছেন, তখন নিশ্চয়ই ওটার মধ্যেও কোনো বিশেষ কাব্যিক অনুপ্রেরণা আছে। বলা যায় না—কোনোদিন হয়তো আবার তার থেমে যাওয়া কলম থেকে বেরিয়ে আসবে যুগান্তকারী কোনও কবিতা, যার নাম 'প্রাত্যহিক পাখার গুজরান!'

মোদ্দা কথা হল, কাব্যিক রূপকের বাইরের বাস্তব ঘটনা—যাকে ফ্যাক্ট বলে, সেটাই কেউ বুঝে উঠতে পারে না। কবি গহন দত্তগুপ্ত যে ওদের তাড়াতে পারলে বাঁচেন এই সত্যিটা কাব্যময় কল্পনায় ধরা পড়ে না। অগত্যা প্রায় মিনিট পঁয়তাল্লিশ কবি ও তাঁর ভক্ত-উভয়পক্ষই ফ্যানের দিকে তাকিয়ে নীরব হয়ে থাকে। অবশেষে একসময় তারা নিজেরাই অস্বস্তি বোধ করে। কবির ভাবতন্ময়তাকে ভেঙে দেওয়া উচিত নয়—একথা বিবেচনা করে সদলবলে গাত্রোত্থান করে। গহন শাস্তভাবে ওদের বিদায়পর্ব দেখেন, এবং বলাই বাহুল্য হাঁফ ছেড়ে বাঁচেন।

এই গোটা ঘটনায় কিন্তু কবির নিজস্ব সংলাপ বিশেষ থাকে না। এমনিতেই তিনি অস্তুমুখীন মানুষ! 'হ্যাঁ', 'হুঁ', 'না', 'উইঁ'র বেশি কিছু বলতে চান না। যা বলার বা তা তাঁর অনুরাগীরাই বলেন।

কিন্তু আজ নিয়মের ব্যতিক্রম হল। তার প্রতিচ্ছবির ওপরে জলের সরলরেখার সংখ্যা গোণায় ব্যাঘাত ঘটায়, আক্ষরিক অর্থেই রেগে গেলেন গহন। তার চোখে বিরক্তির পাশাপাশি এবার রাগও ফুটে উঠেছে। যে বেচারী উচ্ছ্বসিত হয়ে কবিতাটা আবৃত্তি করছিল, সমস্ত ক্ষোভ গিয়ে পড়ল তার ওপরেই।

শান্ত অথচ বিরক্ত কণ্ঠে বললেন—‘কে লিখেছে এ কবিতাটা? তুমি?’

আবৃত্তিকার টোক গেলে। আশপাশের ভিড়টাও স্তম্ভিত হয়ে পরস্পরের দিকে চাওয়া-চাওয়ি করছে। কী বলবে যেন ভেবে পাচ্ছে না।

গহন অবশ্য বলার অপেক্ষাও করেননি। সংযত অথচ উদ্ভ্রামিশ্রিত গলায় বলেন—‘অর্থহীন যত প্রলাপ। কেন যে এসব লেখো!’

কথাগুলো ঠিক কাব্যিক শোনাল না! ভিড়টা সচকিত হয়ে ওঠে। এতক্ষণের ভাবজগৎ থেকে একধাক্কায় তাদের বাস্তবে ফিরিয়ে এনেছেন কবি স্বয়ং। এবার বুঝতে অসুবিধা হল না যে গহন বিরক্ত হয়েছেন।

—‘কবিতা ছাড়া তোমাদের কি আর কোনো বক্তব্য নেই?’ অশান্ত কণ্ঠস্বরে চাপা রাগ ঝরে পড়ল। বোধহয় সেই রূঢ়তার আঁচ তিনি স্বয়ংই উপলব্ধি করেন। আস্তে আস্তে পুঞ্জীভূত ক্ষোভকে নিয়ন্ত্রণে আনেন। মানুষের কাছে কবি গহন দস্তগুপ্ত ‘জেন্টলম্যান’। বহুদিনের ইমেজটাকে একদিনেই ভেঙে ফেলার ইচ্ছে নেই।

তিনি এবার অপেক্ষাকৃত শান্ত গলায় বললেন—‘আমি দুঃখিত, কিছু মনে কোরো না। আজ আমায় একটু বেরোতে হবে। ইফ ইউ প্লিজ অ্যালাউ মি...।’

—‘নিশ্চয়ই দাদা ... নিশ্চয়ই ...।’

মুহূর্তের মধ্যে ঘর ফাঁকা হয়ে গেল। তিনি স্বস্তির নিশ্বাস ফেললেন। কাচের জানালার দিকে দৃকপাতও না করে উঠে গেলেন বেডরুমের দিকে। এই মুহূর্তেই বিরক্তিতা ঝেড়ে ফেলা দরকার। নয়ত সারাদিন আপনমনেই খুঁতখুঁত করে বেড়াবেন। যাকে তাকে খিঁচিয়ে উঠবেন। সেটা কাম্য নয়।

বেডরুমে তখন গহনের সহধর্মিণী স্মৃতিকণা বালিশে ভর দিয়ে শুয়ে বাইরের বৃষ্টি দেখছিলেন। এই মহিলা অতীতে রীতিমতো সুন্দরী ছিলেন। এখন সেই সৌন্দর্যের সিংহভাগই কেড়ে নিয়েছে দূরারোগ্য ক্যান্সার! গত দু-বছর ধরেই রোগটার সঙ্গে লড়তেলড়তে একেএকে বিসর্জন দিয়েছেন যাবতীয় সৌন্দর্য। শুধু কাঠামোটাই বাকি আছে।

নারীর সবচেয়ে বড়ো সৌন্দর্য তার মাথার ঘন চুল। কেমোথেরাপির সৌজন্যে এখন তা -ও নেই। তবু কণার মুখখানা ভারি মায়াবী! যৌবন, সৌন্দর্য, সুস্থতা—সব গেছে। কিন্তু অন্তরের মায়া, মমতা, স্নেহ কেড়ে নিতে পারেনি দুর্দান্ত রোগটা। সেই মায়াবী চোখদুটোই বৃষ্টির দৃশ্যপট থেকে সরে গিয়ে ন্যস্ত হল স্বামীর ওপর। তার প্রেমিক পুরুষ! চিরকালই বড়ো মুখচোরা, লাজুক প্রকৃতির। এখন ও এমন লাজুক লাজুক ভঙ্গিতে বেডরুমে ঢুকছেন, যেন সদ্যপরিণীতা স্ত্রীর কাছে সবাইকে লুকিয়ে-চুরিয়ে আসছেন। কেউ দেখে ফেললেই কেলেকারির একশেষ!

কণা গহনের দিকে তাকিয়ে মুচকি মুচকি হেসে বলতে শুরু করলেন, ‘জলের সাথে আমার

ছায়া, বলছে আমার কথা/ জল বোঝে না কোনটা কথা, কোনটা প্রগল্ভতা...।’

গহন এগিয়ে এসে বিছানার ওপর বসতে যাচ্ছিলেন। কিন্তু তার আগেই থমকে গেছেন। স্ত্রী আরও কিছু বলার আগেই অ্যাভাউট টার্ন মেরে বাইরের দিকে পা বাড়ালেন।

কণা এমন পরিস্থিতির জন্য আগেভাগেই প্রস্তুত ছিলেন। শীর্ণ হাতটা বাড়িয়ে খপ করে চেপে ধরেন স্বামীর হাত -‘পালাচ্ছ কোথায়?’

রাগতন্ত্রের উত্তর এল—‘যেখানে প্যান-প্যানে বৃষ্টি আর এই অপদার্থ কবির অপদার্থ তর কবিতাটা নেই।’

কণা মনে মনে হাসছেন। যদিও মুখে নিপাট গান্ধীর্ষ —‘কবি অপদার্থ — এইটুকু তথ্যেই খুশি? বাকি তথ্যগুলো জেনে যাবে না?’

গহন ঘুরে দাঁড়িয়ে ভাসা ভাসা চোখজোড়া স্ত্রীর চোখের ওপরে রেখেছেন। তার দৃষ্টি সপ্রসন্ন।

— ‘কবিতার নাম জলসই’। কাব্যগ্রন্থের নাম ‘শিশিরের শব্দ’। প্রকাশিত হয়েছে ২ জুন ২০০৬-এ। প্রায় হট কেকের মতোই বিক্রি হয়েছে। এখনও মাঝেমাঝে বেস্ট সেলারের লিস্টে দেখতে পাই। লিখেছিলেন এক সুদর্শন রোমান্টিক কবি। ঘটনাচক্রে তাঁর নামও গহন দস্তগুপ্ত। এবং আরও কাকতালীয় ব্যাপার যে তিনিও আমারই স্বামী।’ কণা ফিক করে হেসে ফেলেছেন—‘আবৃত্তিকার বেচারী খামোকাই ধমক খেল।’

গহন দীর্ঘশ্বাস ফেললেন। তারপর অনুতপ্তভঙ্গিতে স্ত্রীর হাতদুটো নিজের হাতের মধ্যে নিয়ে নিলেন।

—‘আই অ্যাডমিট কণা।’ বিছানায় বসে পড়ে বললেন তিনি—‘অন্যায় হয়েছে। আগেই বোঝা উচিত ছিল, এই জাতীয় অর্থহীন, অপদার্থ, কবিতা একমাত্র আমি ছাড়া আর কেউই লিখতে পারে না।’

কণা বড়ো সন্তোষে সর্গর্বে তাকান স্বামীর দিকে। গহন সদ্য সদ্যই সাতচল্লিশ পেরিয়েছেন। কিন্তু এখনও মানুষটাকে চল্লিশ বলে অনায়াসেই চালিয়ে দেওয়া যায়। গায়ের রং এতটাই কালো যে বাবা-মা আদর করে নাম রেখেছিলেন ‘গহন’। কালো হলেও মুখখানা ভারি লাভণ্যময়। সবচেয়ে সুন্দর তার চোখদুটো।

দৃষ্টির গভীরতাতেও ‘গহন’ সার্থকনামা।

তাদের কোনো সন্তান-সন্ততি নেই। গোড়ার দিকে তা নিয়ে আপশোশ থাকলেও এখন আর দুঃখ করেন না কণা। স্বামী আর সন্তান এই দুই সত্তাই একসঙ্গে গহনের মধ্যে খুঁজে পেয়েছেন। তাই যখন স্বামীর দিকে তাকান তখন সেই চাউনিতে স্ত্রীর প্রেম আর মায়ের বাৎসল্য — দুই-ই মিশে যায়।

বেড়রুমের খোলা জানালা দিয়ে উত্তাল হাওয়ার ঝাপটায় বৃষ্টির ছাঁট এসে পড়ছিল কণার চোখে। বিন্দু বিন্দু জল মহা আহ্লাদে গড়াগড়ি দিচ্ছে তার কপালে, গলায়, গালে। তিনি বৃষ্টির খামখেয়ালিপনাকে প্রশ্রয় দিচ্ছিলেন। তার ভালোই লাগছিল। কিন্তু গহনের ভালো লাগল না। তিনি সপাটে জানলা বন্ধ করে দিয়েছে।

কণা ব্যথিত হলেন— ‘এ কী ! জানালা বন্ধ করলে যে!’ সশব্দে জানালা বন্ধ করতে করতে বললেন গহন—‘আই হেট রেন...আই জাস্ট হেট ইট... ।

‘সে কী। কবির বৃষ্টি পছন্দ নয়।’ তিনি বিস্মিত— ‘বরং কবিরাই তো বৃষ্টি বেশি পছন্দ করেন। কবিগুরুও করতেন...।’ — ‘কবিগুরু পছন্দ করতেন বলে আমাকেও করতে হবে?’ গহনের কণ্ঠস্বর এখনও মোলায়েম। এটাই তার টোন। এর বেশি রুঢ় বা উচুস্বরে তিনি কথা বলেন না। কিন্তু তার মধ্যেই ফুটে উঠেছে প্রবল বিরক্তি— ‘কবিগুরু তো একহাত লম্বা দাড়িও রাখতেন, জোকাও পরতেন। তাই বলে কি আমিও ওইরকম দাড়ি রেখে জোকাধারী হয়ে বসে থাকব? তা ছাড়া গুরুপত্নীর সর্দি-কাশি-জ্বর হলে তিনি দাদুরি, ময়ুর, ঝিল্লিকে ছেড়ে— প্যারাসিটামল, থার্মোমিটার, আর ভিক্স ভেপোরার নিয়ে চর্চা করতেন কিনা জানা নেই। কিন্তু আমাকে করতে হয়।’

— ‘হঁ’, কণা দীর্ঘশ্বাস ফেললেন - ‘ভুলেই গিয়েছিলাম যে আধখানা ফুসফুস নিয়ে বেঁচে আছি।’

গহন তার দিকে তাকিয়েছেন। এবার তার দৃষ্টিতেও অপরিসীম বেদনা— ‘আমি কি তাই বলেছি?’

— ‘না তুমি বলোনি!’ তিনি ম্লান হাসলেন— ‘আ ফ্যান্ট, কান্ট বি ডিনায়েড। আমার থিম সং হওয়া উচিত ‘সমুখে শান্তি পারাবার, ভাসাও তরণি...।’

— ‘চোপ’! কবির চোখে-মুখে রাগ ফুটে উঠেছে - তুমি ক্যান্সার পেশেন্ট নও। ক্যান্সার কিয়োরড। এ নিয়ে আর-একটাও বাজে কথা বলবে না। যতসব ডেইলি সোপের নায়িকা মার্কা ডায়লগ।

‘হুম্’। কণা গহনকে আরও রাগিয়ে দিতে চাইছিলেন। রেগে গেলে কবিবরকে ভারি চমৎকার লাগে। তিনিও মজা পান।

— ‘দিস্ ইজ নট দ্য হোল্ টুথ।’ গোবেচারার মতো স্বরে বললেন— ‘আমার রোগের ঠ্যালায় — তোমার নিশিগন্ধা, শ্রেয়সীরা সবাই পালিয়ে গেছে। দিনরাত বউয়ের সেবা করছ। তাই সরস্বতী অবহেলিত।’

— ‘ডোন্ট বি সিলি।’ তিনি সত্যিই রেগে গেছেন— ‘কে বলেছে তোমার জন্য আমি লেখা ছেড়েছি? আমার লাস্ট বই— ২০০৬-এ প্রকাশিত। তারপর থেকে আর-একটি কবিতাও লিখিনি। তোমার রোগ ধরা পড়েছে ২০০৯-এ। আমার লেখা ছেড়ে দেওয়ার তিন বছর পর! একটা বাচ্চা ছেলেও বুঝতে পারবে যে, তোমার অসুস্থতার সঙ্গে আমার লেখা ছাড়ার কোনো সম্পর্ক নেই।’

— ‘তাহলে কীসের সঙ্গে সম্পর্ক আছে? কেনো উদ্ভিন্নযৌবনার সঙ্গে পরকীয়ায় ব্যর্থ হয়েছ?’ রাগতে গিয়েও এবার ফিক করে হেসে ফেলেছেন গহন। হাসতে হাসতেই বললেন— ‘ইউ আর সিম্পলি ইম্পসিবল্ কণা। গান শুনবে? বলো কী চালাব?’

— ‘শীলা কি জওয়ানি! আছে?’

প্রখ্যাত কবি তির্যক দৃষ্টিতে সহধর্মিণীর দিকে তাকিয়েছেন।

— ‘কণা নির্লিপ্ত মুখে জানালেন— ‘তোমার কথামতো আমি ক্যান্সার কিয়োরড। তাই এখন ডেইলি সোপের নায়িকার মতো ডায়লগ দেওয়া অ্যালাউড নয়। অন্তত আইটেম নাশ্বারের সঙ্গে নাচতে তো পারিই।’

—‘না । তাও পারোনা ।’ তিনি হাসছেন—‘তাতে হাড় ভাঙার প্রবল সম্ভাবনা । বরং আমার পছন্দের গান শোনো ।’

—‘বেশ ।’

ডি.ভি.ডি প্লেয়ারে বেজে উঠল রবীন্দ্রসংগীত । কণা চোখ বুজলেন । তার প্রিয় গানটা চালিয়েছেন গহন । বর্ষার প্রগল্ভ মুখরতাকে ছাপিয়ে গমগম করে উঠল কবিগুরুর গান ।

তিনি স্বামীর বুকে মাথা রেখেছেন । যে প্রশ্নটা দিনরাত আজকাল তাকে তাড়া করে বেড়ায়, যে প্রশ্নের উত্তর খুঁজতে গিয়ে নিজেকেই বারবার কাঠগড়ায় তুলেছেন , সেটাই ক্রমাগত মনের মধ্যে ফিরে আসছিল । গহনের বুক মুখ গুঁজে প্রশ্নটা স্তিমিত কণ্ঠে করে ফেলেন কণা—

—‘একটা কথা বলবে ? উ ?’

গহন অন্যমনস্কভাবে বলেন—‘কী ?’

—‘তুমি আর কবিতা লেখো না কেন ?’ অদ্ভুত স্বচ্ছ চোখজোড়া তুলে অতিপ্রিয় মানুষটার দিকে তাকিয়েছেন তিনি । কণ্ঠস্বরে ব্যাকুল বেদনা—‘গহন, তোমার তো ক্যানসার হয়নি ! তবে?’

গহন দীর্ঘশ্বাস ফেলেন । আলগোছে স্ত্রীর মাথাটা বুকে চেপে ধরেছেন । এ কথার কোনো জবাব হয় না । ক্যান্সারের চেয়েও যে গভীর অসুখে আক্রান্ত তিনি, সে কথা কণাকে কী করে বোঝাবেন !

তার বুকভাঙা দীর্ঘশ্বাসের সঙ্গে বৈপরীত্য সৃষ্টি করে, মিউজিক সিস্টেমে তখনও বাজছে উচ্ছ্বসিত সুর—

—‘প্রাণ ভরিয়ে , তৃষা হরিয়ে , মোরে আরো আরো আরো দাও প্রাণ... ।

‘আবার জীবন পেলে দেখাতাম কাশ ভাঙা টেউ
বেরং দেয়ালে চাপা পড়ে গেছে জীবনের সোঁতা
আবার কখনও যদি হয়ে আসি আমি আর কেউ
তোমায় দেখাব ফের পরিশেষে বড় হয়ে ওঠা ।’

চশমার শোরুমের মালিক তন্ময় হয়ে কবিতার লাইন আওড়াচ্ছিল । তার সামনের ক্রেতাটির তখন করুণ দশা । চোখের ডাক্তারের প্রেসক্রিপশনের আধখানা তার হাতের মুঠোয় , বাকি আধখানা লোকটার উপড় করা তালুতে আটকে আছে । একান্ত ইচ্ছে গোটা প্রেসক্রিপশনটাই হাতিয়ে নিয়ে এখান থেকে চম্পট দেওয়ার । কিন্তু কাগজটা ছিঁড়ে যাওয়ার ভয়ে বেশি টানাটানিও করা যাচ্ছে না । অগত্যা ক্রেতাটি বাধ্য হয়েই মিউমিউ করে বলে—‘দাদা ... আপনি বুঝতে পারছেন না । আমার চশমাটা ভীষণ দরকার । আ- জে - ন্ট ।’

‘আর্জেন্ট’ শব্দটার দীর্ঘায়িত উচ্চারণও শোরুমের মালিকের ভাবান্তর ঘটায় না । বরং উলটে সে ক্রেতাটিকে এক ধমক দিয়ে বলে—‘ধুর মশাই, চশমা পরে হবে, আগে কবিতা শুনুন । গহন দস্তগুপ্তের কবিতা পড়েছেন কখনও ?’

—‘কিন্তু আমার চশমা ।’

—‘চশমার নিকুচি করেছে।’ লোকটি ভয়াবহ রেগে গিয়েছে —‘কবিতা পড়েন না,

শোনাতে চাইলে শোনে না। জানেন, এই কবিতাটা কোন ছন্দে লেখা? মিশ্রকলাবৃত্ত। সবচেয়ে সুবেলা আর মিষ্টি ছন্দ। জীবনানন্দ এই ছন্দে গুচ্ছ গুচ্ছ কবিতা লিখে গেছেন। জানেন এসব? জানেন না। জানার ইচ্ছেও নেই। খালি তখন থেকে ‘চশমা...চশমা’ করে লাফাচ্ছেন। কী হবে মশাই চশমা দিয়ে, যদি কবিতাই না পড়লেন!’

কবিতার সঙ্গে চশমার যে কী সম্পর্ক, বলাই বাহুল্য ক্রেতাটির মাথায় ঢুকল না। সে অসহায় দৃষ্টিতে শোরুমের অন্যান্য কর্মচারীদের দিকে তাকায়। হয়তো করুণ সাহায্য প্রার্থনাও ছিল সে দৃষ্টিতে। কিন্তু আবেদন রাখবে কোথায়? কর্মচারীরাও তস্য অসহায়ভাবে তারই দিকে তাকিয়ে আছে।

ক্রেতাটির জানার কথা নয় যে, এই নাটক এখানে প্রথমবার অভিনীত হচ্ছে না। শোরুমের মালিক এখানে নিজে উপস্থিত না থাকলে সবকিছুই শান্তিপূর্ণভাবে হয়ে যেতে পারত। এমনকি তার চশমাটাও সঠিক পাওয়ারের লেলে সেজেগুজে দৃষ্টিশক্তিকে আরও সবল করে তুলত নিঃসন্দেহে। কিন্তু মালিক উপস্থিত থাকলেই বিপদ। কবি হওয়ার স্বপ্ন বুকে নিয়ে শেষ পর্যন্ত যে লোকটা সাধারণ চশমার দোকানি হয়েই থেকে গেল, তার বেদনা বোঝার জন্য ব্যস্ত মহানগরীতে বিশেষ কেউ নেই। আর সেটাই হয়েছে যত নষ্টের গোড়া। সুযোগ পেলেই সে চশমার বদলে কবিতা বিতরণ করতে বসে। ক্রেতার আঁজকাল তাকে দেখলেই পালিয়ে যায়। কারণ এ চতুরের সবাই জেনে ফেলেছে যে এ শোরুমে চশমার অর্ডার দিতে গেলেই প্রথমে শুনতে হবে সাগ্রহ প্রশ্ন—‘চশমার কথা পরে বলছি, আগে বলুন কবিতা-টবিতা পড়া হয়? কার কার কবিতা পড়েছেন?’

সদ্য আগত ক্রেতাটি এতসব জানত না। বাধ্য হয়েই সে প্রায় কাঁদো কাঁদো মুখে বলে - ‘স্যার, চশমা লাগবে না। প্লিজ আমায় ছেড়ে দিন।’

—‘বেশ, চশমা থাক।’ বিক্রেতা তাকে প্রেসক্রিপশনটা ফেরত না দিয়েই বলে—‘কিন্তু কবিতা না শুনিয়ে আপনাকে ছাড়ছি না।’

অগত্যা বেচারাকে নিমের পাঁচন গেলার মতো মুখ করে কবিতা শুনতে হল। শুধু কবিতাই নয়, তার পিছন পিছন এল মিশ্রবৃত্ত, কলাবৃত্ত, দলবৃত্তের খিসিস। নানারকম বৃত্তের ঠালায় যখন সে প্রায় চারকোনা হতে চলছে, ঠিক তখনই ঈশ্বর দয়াপরবশ হয়ে দেবদূত পাঠিয়ে দিলেন। শোরুমের কাচের দরজা ঠেলে এক দারুণ সুদর্শন পুরুষ ঢুকলেন। তাকে দেখেই কাব্য বিশারদ হইহই করে উঠেছে— ‘কী কাণ্ড! একশো বছর বাঁচবি দেখছি। এই মাত্রই তোর কথা হচ্ছিল।’

ক্রেতাটি একঝলক তার রক্ষাকর্তার দিকে দেখল। পবক্ষণেই তার নজর গেল প্রেসক্রিপশনটার দিকে। এতক্ষণ ওটা বিক্রেতার হাতের তলায় চাপা পড়েছিল। এখন অসতর্কভাবেই লোকটা হাত তুলে নিয়েছে। এই সুযোগ। এবং সে সম্পূর্ণ সদব্যহার করল। ক্ষিপ্রগতিতে প্রেসক্রিপশনটা তুলে নিয়ে এমন দৌড় মারল যে-অলিম্পিকের দৌড়বীরও লজ্জা পাবে।

গহন সন্ধ্যাতুকে লোকটির ড্রামাটিক টেম্পোয় প্রশ্নানপর্ব দেখলেন। তারপর মুচকি হেসে বললেন -‘এ মাসে এই নিয়ে কটাকে ভাগালি?’

—যাঃ, পালিয়ে গেল!’ কাব্যবিশারদ আমসির মতো মুখ করেছে—‘এই নিয়ে সাড়ে পাঁচ’।

—‘সাড়ে পাঁচ !’

— ‘এদের মধ্যে একটা হাফও ছিল তো ! আই মিন বাচ্চা’

গহন সবিস্ময়ে বন্ধুর দিকে তাকিয়েছেন—‘শুটকি, তুই আজকাল—বাচ্চাদেরও ছাড়ছিস না!’

‘বাচ্চা আবার কী!’ শুটকির চেহারাটা সত্যিই শুটকি মাছের মতো । শুকিয়ে প্রায় নারকেলের দড়ি হয়ে গেছে। শিরা বের করা শীর্ণ হাত নাড়িয়ে সে বলে—‘ওটা বাচ্চা নয়, চৌবাচ্চা। চোখের পাওয়ার কত জিনিস ? মাইনাস ফাইভ! দুনিয়ার সবকিছু জানে। ইংরেজি কবিতা গড়গড় করে বলে। রা-ওয়ানের হিরোইনের নাম থেকে শুরু করে ফেসবুক, টুইটার অবধি হেন জিনিস নেই যা জানে না ।

‘তাতে কী !’ তিনি আশ্চর্যে আশ্চর্য বলেন— ‘আজকালকার বাচ্চারা অনেক অ্যাডভান্স। ওরা অনেক কিছুই জানে। তাতে অন্যায়টা কী হয়েছে?’ — ‘অন্যায় কিছু হয়নি,’ শুটকি এবার ভেটকি মাছের মতো ভাবলেশহীন মুখ করেছে— ‘সব জানে বলেই জানতে চেয়েছিলাম ‘প্রশ্ন’ কবিতাটা কার লেখা ? আমার ধারণা ছিল সেটাও জানবে ।’

গহনের ঠোঁটে একটা স্মিত হাসি ভেসে উঠল -‘উত্তর কি পেলি ?’

সে কয়েক মুহূর্ত স্থির দৃষ্টিতে গহনের দিকে তাকিয়ে থাকে। তারপর শুকনো মুখে উত্তর দেয়—‘চেতন ভগৎ’।

তিনি হো হো করে হেসে উঠেছেন। দোকানের কর্মচারীরাও মুচকি মুচকি হাসছে।

—‘তুই হাসছিস’! শুটকি উত্তেজিত -‘বাঙালির বাচ্চা হয়ে রবি ঠাকুরের নাম জানে না। এটা তোর খুব মজার জিনিস মনে হচ্ছে ?

তিনি হাসতে হাসতেই বলেন—‘না, মজার কেন হবে? তারপর নিশ্চয়ই তুই রবি ঠাকুরের নাম জানাতে বসলি।’

‘হ্যাঁ বসলাম।’ তার মুখে বিরক্তির ছাপ — ‘জানিয়েও দিতে পারতাম, যদি না ওর মা এসে ওকে টেনে নিয়ে চলে যেত।’

গহন আর-একবার উচ্চস্বরে হেসে উঠতে যাচ্ছিলেন। কিন্তু শুটকির করুণ মুখের দিকে তাকিয়ে চেপে গেলেন।

—‘এরা জীবনে কখনও শঙ্খ, শক্তি, সুনীল পড়বে? কখনও জানবে যে জীবনানন্দ বলে একটা লোক নিঃসঙ্গতার তাড়নায় কাঁ সব কবিতা লিখে গেছে!’ তার কঠস্বরে হতাশার প্রাবল্য—‘শুধু একটা জিনিসই জানতে পারে। যখন কলকাতায় ট্রাম আর থাকবে না, যাদুঘরে ট্রামের মডেল দেখিয়ে ইতিহাস বলা হবে, তখন এক লাইনে জীবনানন্দের সম্পর্কে একটাই তথ্য জানবে এরা। ওই নামে একটা বিশ্বট্যালা কবি ছিল। লোকটা চাপা পড়ার জন্য ট্রেন, বাস, ট্যাক্সি, মেট্রো— কিছুই খুঁজে পায়নি। অগত্যা ওই টিকটিকে ট্রামের তলাতেই তাকে চাপা পড়তে হল! বাঙালির পরবর্তী প্রজন্মের এই অবস্থাই হবে গহন, আমি স্পষ্ট বুঝতে পারছি।’

শুটকির দু-চোখে অপরিসীম বিষণ্ণতা । গহন দীর্ঘশ্বাস ফেলে চুপ করে থাকেন । শুটকি বোধহয় খুব একটা ভুল বলেনি । বিশ্বায়নের দাপট আর ইংরেজি মিডিয়ামের দৌলতে হয়তো এমনই একটা ভয়াবহ ভবিষ্যৎ আসতে চলেছে । এখনই তরুণ প্রজন্ম বাংলা সাহিত্য এড়িয়ে চলতে শুরু করেছে । সাহিত্য বলতে রাউলিং, চেতন ভগৎ, বা বুস্পা লাহিড়ী অবধিই বোঝে । তারপর আর কিছু নেই ।

—‘ছাড় ওসব কথা ।’ শুটকি বলল—‘যত ভাবব ততই ভয় করবে । তোর খবর বল । এবার কিছু লেখার কথা ভাবছিস?’

—‘নাঃ.’

—‘কেন?’

এ প্রশ্নের উত্তরে কা বলবেন গহন ভেবে পেলেন না । এই প্রশ্নটা শুনতে শুনতে তিনি ক্লাস্ত । কেন লিখছেন না, কবে আবার লিখবেন, আদৌ আর লিখবেন কিনা — এসব প্রশ্ন রোজই চতুর্দিক থেকে ফনা তোলে । কোনোমতে ভুজুং ভাজুং দিয়ে প্রসঙ্গ এড়িয়ে যান ।

কিন্তু শুটকির সামনে সেসব যুক্তি ধোপে টিকবে না । সে তার অনেকদিনের বন্ধু । দু-জনে একসাথে স্কুলে, কলেজে পড়েছেন । একসাথে গাঁজা খেয়েছেন । এবং মধ্যরাত্রের কলকাতাকে নেশাজড়িত উচ্চকণ্ঠে কবিতা শোনাতে শোনাতে বাড়ি ফিরেছেন । শুটকি তাকে হয়তো তার নিজের থেকেও ভালো চেনে । ওর কাছে মিথ্যে বলার উপায় নেই । তবু একটু ইতস্তত করে বললেন—‘আসলে বয়েস হচ্ছে তো । এখন আর শিং ভেঙে বাছুর হয়ে গদগদ প্রেমের কবিতা লিখতে ইচ্ছে করে না ।’

শুটকি তার দিকে অগ্নিদৃষ্টিতে তাকায়—‘তুই শালা চিরকালে এসকেপিস্ট । সমস্যার সামনে পড়লে পিঠ দেখিয়ে পালাস । আমায় ওসব গল্প দিস না । এমন কিছু বয়েস হয়নি তোর । এই তো সুবিমল বিশ্বাসকে দেখ । প্রায় আশি বছর হতে চলল বুড়োর । এখনও প্রেমিকার কাঁচুলিতে জমা ঘাম নিয়ে চর্চা করছে । বয়স দেখাস না আমায় । তা ছাড়া প্রেমের কবিতাই লিখতে হবে—এমন মাথার দিব্যি কে দিয়েছে ? অন্য কিছু নিয়ে লেখ ।’

গহন চুপ করে তার দিকে তাকিয়ে আছেন । শুটকিও তার চোখের দিকে নিম্পলকে দেখছে । একমিনিট সে চুপ করে গহনকে জরিপ করল । তারপর বলল—‘অ, তুই তো আবার রোমান্টিক কবিতা ছাড়া লিখবি না, টিপিক্যাল এসকেপিস্ট । চল ।’

—‘কোথায়?’

—‘পেটে দু-পান্তর না পড়লে তোর মুখ খোলাতে পারব না । আর আমিও সহজে ছাড়ছি না ।’

—‘শুটকি’ গহন নিরাপায় ভাবেই বলেন—‘আজ থাক্ ।’

—‘কিছু থাকবে না ।’ শুটকি প্রায় গর্জন করে উঠেছে,—‘ভালোয় ভালোয় যাবি ? না সবার সামনে নর্দমা থেকে নর্দমা হব ।’

এই কথাটার অর্থ খুব ভালোই বোঝেন গহন । অর্থাৎ শুটকি এবার ভালো ভালো শব্দ ছেড়ে শ-কার, ব-কার, ম-কারের প্যাটরা খুলবে । ও একবার মুখ খুললে ম্যানহোলও লজ্জা পায় । তিনি ঝুঁকি নিলেন না । লক্ষ্মী ছেলের মতো শুটকির পিছন পিছন পা বাড়ালেন ।

—‘আয়’। শোকুমের বাইরে একটু দূরত্বেই শূটকির স্টিল কালারের জেন দাঁড়িয়ে আছে। গহনের চোখে পড়ল একটি বছর বারো-তেরোর বাচ্চা ছেলে গাড়িটার পাশেই অপেক্ষারত। ছেলেটাকে দেখলে ভিখিরি বলেই মনে হয়। পরনে একটা শতছিন্ন নোংরা শার্ট, এবং তার চেয়েও নোংরা একটা হাফপ্যান্ট। মাথার চুল রাস্তার ধুলোয় প্রায় সাদা, চোখে একগাদা পিঁচুটি নিয়ে পরম আগ্রহে তাকিয়ে আছে শূটকির দিকেই।

গহন বুঝতে পারলেন না যে বাচ্চাটা এত আগ্রহ ভরে এদিকেই দেখছে কেন। শূটকি বুড়ো বা অথর্ব লোক ছাড়া আর কাউকে ভিক্ষে দেয় না। বাচ্চাদের তো একেবারেই নয়। অথচ ছেলেটার দৃষ্টি স্পষ্ট জ্ঞানান দিচ্ছে যে শূটকিকে সে চেনে। এবং তার আগ্রহ নিতান্তই অযৌক্তিক নয়।

ব্যাপারটা অবশ্য একটু পরেই স্পষ্ট হল। শূটকি ড্রাইভিং সিটে বসতেই সে জানলার কাছে ঘনিয়ে এসেছে। গহন কৌতূহলী হয়ে ব্যাপারটা দেখছিলেন। ছেলেটা জানলার কাছে এসে মাথা ঝাঁকিয়ে বলে—‘বাবু, হয়ে গেছে।’

শূটকি তার দিকে তাকিয়েছে—‘পুরোটা?’

—‘হ্যাঁ।’

—‘বল দেখি।’

ছেলেটা একটু যেন থমকাল। তারপরই যেন মঞ্চে উঠে আবৃত্তি করছে, এমন ভঙ্গিতে হাতজোর করে বলল—‘নমস্কার, কবিগুরু রবীন্দ্রনাথ ঠাকুরের ‘জুতা আবিষ্কার’—কহিলা হবু, শুনগো গবুরায়,/ কালিকে আমি ভেবেছি সারারাত্র / মলিন ধূলা লাগিবে কেন পায়/ ধরণী মাঝে চরণ ফেলা মাত্র।’

গহন সবিস্ময়ে দেখেছিলেন তাকে। যাকে ভিখিরি ভেবেছিলেন সে রীতিমতো গড়গড়িয়ে ‘জুতা আবিষ্কার’ মুখস্থ বলে যাচ্ছে। কিছু অমার্জিত উচ্চারণ ছাড়া বাদবাকিটা একদম ঠিকঠাক। কোথাও কোনো ভুলচুক নেই। এমনকি যেখানে সেখানে যতির ব্যবহার প্রয়োজন, সেখানে সেখানেই থামছে। এ কী কাণ্ড!

‘সেদিন হতে চলিল জুতাপরা/ বাঁচিল গবু রক্ষা পেল ধরা.....।’ ছেলেটা একনিশ্বাসে কবিতাটা শেষ করে ফেলল। শেষ লাইনটা বলে সে সাগ্রহে শূটকির দিকে তাকায়।

—‘ভেরি গুড!’ শূটকি তার মাথায় হাত রেখে আদর করে—‘খুব ভালো হয়েছে। শুধু উচ্চারণটা আর-একটু ঠিক করতে হবে। রবীন্দ্রনাথ ঠাকুর নয়, রবীন্দ্রনাথ ঠাকুর। বল র-বী-ন্দ্র-না-থ.....।’

বেশ কিছুক্ষণ উচ্চারণের তালিম চলল। গহন অবাক হয়ে ব্যাপারটা দেখছিলেন। একটা ভিখিরি ছেলে রবীন্দ্রনাথ আওড়াচ্ছে! গোটা ব্যাপারটাই তার অবিশ্বাস্য ঠেকছিল! মনে হচ্ছিল স্বপ্ন দেখছেন।

—‘ঠিক আছে’, তালিম শেষ করে শূটকি পকেট থেকে নোট বের করে এগিয়ে দেয় ছেলেটার দিকে। গহন আড়চোখে দেখলেন—সেটা পঞ্চাশ টাকার নোট!

—‘নে’ সে স্মিত হেসে বলে—‘এটা দিয়ে মাংস-ভাত খাবি। খবরদার, ফেভিকল, ডেনড্রাইটের চক্রে পড়বি না। যদি বুঝতে পারি যে ওসব কিনে খাচ্ছিস....।’

—‘না বাবু’। ছেলেটি একশো আশি ডিগ্রি মাথা নাড়ল — ‘ওসব খাইনে কো’।

—‘ভালো। এখন যা’। শুটকি গাড়িতে স্টার্ট দিয়েছে—‘আবার কাল-পরশু নাগাদ আসিস। নতুন কবিতা দেব।’ ছেলেটা মাথা নেড়ে চলে গেল। গহন স্তম্ভিত হয়ে ব্যাপারটা দেখছিলেন। এবার মৃদু অথচ বিস্মিত স্বরে বলেন—‘শুটকি! এসব কী হচ্ছে!

শুটকি অ্যান্ড্রিলেটরে চাপ দিয়েছে—‘আমার নবতম আবিষ্কার। ছেলেটার নাম গোপাল। বাপ-মা আদর করে ওই নামই দিয়েছিল। আমার শোরুমের উলটোদিকের ফুটপাথে থাকে। আয়লা ঝড়ে গাছ ভেঙে পড়ে বাপ-মা দুটোই ফৌত হয়ে গেছে। এখন ছেলেটা ফুটপাথে ভিক্ষা করে।’

—‘সে তো বুঝলাম। কিন্তু ‘জুতা আবিষ্কার’!’

—‘ওটা আমিই ওকে শিখিয়েছি।’ সে নির্লিপ্ত গলায় বলে—‘ছেলেটার মেমোরিটা খুব শার্প। যাকে বলে শ্রুতিধর। বুঝলি, একবার আমার শোরুমে ভিক্ষে চাইতে চুকেছিল। তখন আমি এক ব্যাটাকে ‘রূপসী বাংলা’ আবৃত্তি করে শোনাচ্ছিলাম। লোকটা দু-মিনিট পরেই অবশ্য পালিয়ে বাঁচল। আর এ ছোঁড়া আমাকে একবারে চেপে ধরল। তিন দিন ধরে নাকি খায়নি। টাকা দিতেই হবে। জানিসই তো, বাচ্চাদের আমি ভিক্ষে দিই না।’ শুটকির মুখে মুচকি হাসি—‘কিন্তু হতভাগা একবারে নাছোড়বান্দা। তাই ভাগানোর জন্য বলেছিলাম, একটু আগেই বলা কবিতার একটা লাইনও যদি ঠিকঠাক বলতে পারে, তবে দশটাকা দেব’।

‘তারপর?’ রুদ্ধশ্বাসে শুনছিলেন গহন।

—‘তারপর আর কী?’ সে হাসতে হাসতে বলে—‘সবাইকে অবাক করে দিয়ে ব্যাটা একেবারে চারটে লাইন ঠিকঠাক বলে দিল। একবার শুনেই মোটামুটি মাথায় তুলে নিয়েছে। খুশি হয়ে চল্লিশ টাকা দিয়ে দিলাম। তারপর থেকেই চলেছে এই ট্রেনিং। রোজ সকালে এসে একটা করে কবিতা শোনে। পরদিন মনে করে আমাকে শোনায়। কবিতা ছোটো হলে একবার শুনেই মনে রাখতে পারে। বড়ো হলে তিন-চারবার শোনাতে হয়।’

গহন গোটা বৃত্তান্ত শুনে কী বলবেন ভেবে পেলেন না। শুধু অবাক হয়ে বড়ো বড়ো চোখে শুটকিকে দেখছিলেন। লোকটাকে তার মাঝে মাঝে দুর্বোধ্য ঠেকে। একি তার খামখেয়ালিপনা, না অদ্ভুত শখ!

—‘এ ছেলে ভালো ঘরে জন্মালে জজ ম্যাজিস্ট্রেট হত’। শুটকি বিমর্ষ মুখে মাথা নাড়ে—‘ভাগ্যের দোষ! যাক গে। তুই তোর কথা বল। কবিতা লেখাটা ছাড়লি কেন?’

আবার সেই এক প্রশ্ন। ভবি ভোলবার নয়। গহন বিব্রত বোধ করেন। এই প্রশ্নটার সামনে এলেই কেমন যেন অসহায় মনে হয়। ভেতরে ভেতরে একটা অস্থিরতা টের পান। একটা স্কোভের মেঘ জমাট বাঁধে বুকে।

—‘সকলেই কবি নয়, কেউ কেউ কবি’। সে স্টিয়ারিংয়ে আলতো করে একটা চাপড় মারে—‘তুই সেই কেউ কেউ এর একজন। অথচ এমন কেঁড কেঁউ করছিস কেন বুঝতে পারছি না।’

—‘কী হবে কবিতা লিখে?’

—‘কবিতা লিখে কিছু হয় নাকি?’ শুটকি জোরে হেসে উঠেছে—‘হয় শুধু হয়ের অভ, আই মিন—ঘোড়ার ডিম! কিছু হওয়ার জন্য তুই কবিতা লিখিস বুঝি! বাজে কথা ছেড়ে সত্যি কথাটা বল। আজ আর পালাস না প্লিজ।’

—‘ঠিক তা নয়।’ গহন আশ্বে আশ্বে বলেন—‘আসলে ঠিক বুঝতে পারি না।’

—‘কী?’

তিনি ব্যথিত ক্লান্ত দৃষ্টিতে বন্ধুর দিকে তাকিয়েছেন—‘আমি কি আদৌ কবিতা লিখি শুটকি?’

—‘হো-য়া-ট!’

শুটকি বিশ্বয়ের ধাক্কাটা সামলাতে না পেরে সজোরে ব্রেক কষল। ড্যাশবোর্ডের ওপর থেকে সিগারেটের প্যাকেট ছিটকে পড়েছে গহনের কোলে। ঝাঁকুনির চোটে লকারটাও খুলে গেছে। তার ভেতরে পানীয়ের বোতলও চোখে পড়ে। শুটকি সবসময়ই এ জিনিসটা স্টকে রাখে। মদ খাওয়ার জন্য বারে যাওয়া সে পছন্দ করে না। তা ছাড়া বিকেলের পর থেকে তার যতটা মদ লাগে, তা সাপ্রাই দিতে কলকাতার যে-কোনো বার ফেল পড়বে। মিছরির পানা খাওয়ার মতো সে মদ খায়। এই নিয়ে অনেক অশান্তি হয়েছে দুই বছর মধ্যে। শুটকির লিভারে আজকাল ব্যথা হয়। তবু সে ডাক্তার দেখাবে না। মদ খাওয়াও ছাড়বে না। গহন কিছু বললেই বলে—‘ডাক্তার আর সুরা দুটোকে একসাথে রাখা যায় না। তাই ডাক্তারকেই স্যাক্রিফাইস করতে হল’।

আজ অবশ্য বিকেল অবধি অপেক্ষা করতে হল না। গাড়ি থামিয়েই উদ্বেজিত ভঙ্গিতে পানীয়ের বোতল খুলে গলায় ঢেলে দিয়েছে। উগ্র ঝাঁঝালো একটা গন্ধ গহনের নাকে ঝাপটা মারল। বেশ খানিকটা তরল গলায় ঢেলে যেন একটু শান্ত হল সে।

—‘তুই কি আমার সঙ্গে ঠাট্টা করছিস! প্রায় ত্রিশ বছর ধরে কবিতা লিখে, প্রতিষ্ঠা—খ্যাতির এভারেস্টে উঠে, হাফ - ডজন পুরস্কার পেয়ে—আজ জিজ্ঞাসা করছিস যে তুই আদৌ কবিতা লিখিস কিনা! এটা কি নতুন ধরনের কোনো রসিকতা! লেটেষ্ট আমদানি করেছিস?’

গহন ক্লান্তভাবে গাড়ির সিটে শরীর এলিয়ে দিয়েছেন। এই জন্যই অন্তরের গোপনতম কথাটা কাউকে বলতে চান না। কারণ গোটা ঘটনাটাই সবার কাছে অবিশ্বাস্য ঠেকবে। কী করে বলবেন যে সত্যিই এই আত্মজিজ্ঞাসা তাকে কুরে কুরে খাচ্ছে। অদ্ভুত লাগলেও এ কথাটা আদ্যোপান্ত সত্যি। তিন দশক ধরে কবিতা লেখার পর আজ গহন দস্তগুপ্ত ভাবছেন—তিনি কি আদৌ কবিতা লিখেছেন? সত্যিই কি তার কবিতারা, কবিতা হয়ে উঠেছে!

—‘তুই বিশ্বাস না করলে আমার কিছু করার নেই।’ গহন আশ্বে আশ্বে বলেন—‘কিন্তু এটাই ফ্যাক্ট। সত্যিই বুঝতে পারছি না যে, আদৌ আমি কবিতা লিখি কিনা!’

—‘বাঃ!’ শুটকি বোতলে আরও কয়েকটা চুমুক দেয়—‘আশ্চর্য আবিষ্কার! এই আবিষ্কারের জন্য তোকে একজোড়া নোবেল দেওয়া উচিত। এনকোর....এনকোর!’

—‘ইয়ার্কি নয়। আমি সিরিয়াসলি বলছি। তুই যদি শুনতে না চাস, তাহলে বলতে ইন্টারেস্টেড নই।’

সে তখনই কথাটার কোনো প্রত্যুত্তর না দিয়ে অনিমেষে তাকিয়ে আছে গহনের দিকে।

মুখ গভীর। শাস্ত ভঙ্গিতে দু-একমিনিট দেখল গহনকে। যেন বুঝতে চাইছে যে, তিনি কতটা সিরিয়াস। তারপর আস্তে আস্তে বলল—‘বল, শুনছি’।

গহনের বোধহয় সত্যিই কোনো মনোযোগী শ্রোতার প্রয়োজন ছিল। তিনি মনে মনেই অনুভব করেছিলেন ক্রমাগতই মনের খোলা জানালাগুলো বন্ধ হয়ে আসছে। বুকের ভেতরে এই অসহ্য চাপ যে একা একা বেশিদিন বওয়া যাবে না তাও বুঝতে পেরেছিলেন। বহু দিনের বন্ধুত্ব আজ তাকে হালকা হওয়ার সুযোগ এনে দিল।

তার চোখ দুটো বিষণ্ণতায় ছেয়ে আছে। আস্তে আস্তে বললেন—‘জানি না, প্রবলেমটা তুই কতদূর বুঝবি। কিন্তু আমি ক্রমাগত বিভ্রান্ত হচ্ছি।’

—‘কেন?’

তিনি অন্যমনস্ক—‘তুই তো জানিস, একসময় রীতিমতো লড়াই করেই আমাকে আজকের জায়গায় পৌঁছাতে হয়েছে। প্রতিভাবান কবি সে সময়ে কম ছিল না। তার ওপর সমালোচনার লাল চোখ! অনেক প্রতিকূলতা ঠেলে আজ এখানে এসে দাঁড়িয়েছি। কিন্তু এখন মনে হচ্ছে, এ সবার মানে কী!’

—‘যাচলে! মানে?’

—‘মানে, আজ আমি যেখানে এসেছি সেখানে কোনো লড়াই নেই। কোনো সমালোচনা নেই। সর্বোপরি কোনো চ্যালেঞ্জ নেই।’ গহন বলতে বলতেই উত্তেজিত হয়ে ওঠেন—‘অষ্টপ্রহর কানের কাছে একদল ভক্ত আমার গুণকীর্তন করছে। যা-ই লিখি সেটাই নাকি মাস্টারপিস! একই লাইন পাঁচবার লিখে, শেষে ‘এখানেই শেষ হোক’ লিখে তিনটে ডট মেরে দিলাম। সেটাই নাকি শতাব্দীর সেরা কবিতা! ওই তিনটে ফুটকির ব্যঙ্গনা নিয়ে আলোচনার ঝড় উঠল। অথচ কেউ বুঝলই না যে ওই ডটগুলো আর কিছুই নয়। কবি আর কী লিখবেন ভেবে পাননি, তাই ডট বসিয়ে দিয়েছেন। রাবিশ!’

এতদিনের পুষে রাখা রাগটা এবার বিস্ফোরণ হয়ে বেরিয়ে এল। শূটকির মুখে একটা স্মিত অথচ করুণ হাসি ফুটে ওঠে। সেদিকে না তাকিয়েই গহন বলতে থাকেন—‘বড়ো’ ‘বড়ো’ পত্রিকার লেখা পাওয়ার জন্য হা-পিত্যেশ করে বসে থাকে। আমার ওঁচা লেখাগুলো পর্যন্ত ধরে ধরে ছাপে। মিডিয়া, স্তাবক, সমালোচক—সকলে মিলে আমার কবিতাগুলোকে শতাব্দীর শ্রেষ্ঠতম কবিতা আর আমাকে প্রায় ভগবান বানিয়ে ছেড়েছে। যখন আমার কবিতাই শ্রেষ্ঠ আমি ঈশ্বরত্ব পেয়েই গিয়েছি তখন লিখব কেন? নতুন করে কিছু তো প্রমাণ করার নেই! কোথাও যাওয়ার নেই! নিজের লেখাকেই অতিক্রম করার চ্যালেঞ্জ নেই। কারণ সবই তো মাস্টারপিসকে কি টপকানো যায়?’

শূটকি মন দিয়ে গহনের কথা শুনছিল। তিনি নেহাত মিথ্যে বলছেন না। বাংলা সাহিত্যের বাজারটাই আজকাল এরকম হয়ে দাঁড়িয়েছে। বড়ো বড়ো পত্রিকা, মিডিয়ার প্রচার, ভক্তবৃন্দ কবি-লেখকদের গায়ে গ্রেডেশনের ট্যাগ লাগিয়ে দিয়েছে। উনি এ গ্রেডের লেখক বা কবি। তাই ওঁর সব লেখা চমৎকার হতেই হবে! ইনি ‘বি’ গ্রেডের। এঁর ফিফটি পারসেন্ট লেখা ভালো, ফিফটি পারসেন্ট মোটামুটি। ভক্তবৃন্দ তৈরি হয়েই থাকে ‘বাঃ...বাঃ বলার জন্য। এই বাহবার পিছনে কতটা যে আন্তরিক প্রশংসা, আর কতটা চাটুকারিতা তা বোঝা মুশকিল।

পুরস্কারের তালিকায়, মিডিয়ার ফ্ল্যাশের বলকানিতে, প্রচারে, বিজ্ঞাপনে, বড়ো বড়ো পত্রিকার পৃষ্ঠপোষকতার চটকদারিতে স্রষ্টা যত গুরুত্বপূর্ণ হয়ে ওঠেন, তাঁর সৃষ্টি ততই গুরুত্ব হারায়। এ যেন হলমার্কেটের স্ট্যাম্প! যে সোনার গায়ে লাগানো আছে সেটাই খাঁটি! স্ট্যাম্পটাই শেষ কথা—সোনা নয়!

—‘লিখতে হলে ষিঁদে চাই। প্রেরণা চাই।’ গহন হতাশভাবে মাথা নাড়লেন- ‘আমি দুটোই হারিয়ে ফেলেছি। আমার পক্ষে আর লেখা সম্ভব নয়।’

শুটকি অর্ধনির্মীলিত দৃষ্টিতে কী যেন ভাবছে। তার চোখে কী যেন একটা ভাবনার ছায়া ঘুরে বেড়াচ্ছিল। অস্থির আঙুলগুলো স্টিয়ারিংয়ে তবলা বাজাচ্ছে।

—‘তোমার বাড়িতে নেট আছে গহন?’

গহন নির্জীবের মতো চোখ বুঁজেছিলেন। এই অপ্রাসঙ্গিক কথার আকস্মিকতায় ঘাবড়ে গেলেন—‘নেট!’

—‘হ্যাঁ। ইন্টারনেট। আছে?’

—‘ইন্টারনেট!’ তিনি অবাক হয়ে কিছুক্ষণ হাঁ করে তাকিয়ে থাকলেন শুটকির দিকে। যেন প্রশ্নটার অর্থ বুঝতে পারছেন না—‘হ্যাঁ... আছে। মানে ... আমার তেমন দরকার পড়ে না। কিন্তু কণা বাড়িতে বসে বসে বোর হচ্ছিল বলে.....।’

তার মুখের কথা কেড়ে নিয়ে সে বলে— ‘ইন্টারনেট এনেছিস। বেশ করেছিস। কণা ইউজ করছে, এবার তুইও করবি।’

গহন তার কথার মাথা-মুন্ডু কিছুই বুঝে উঠতে পারেন না। এমনিতেই তিনি কম্পিউটার, ইন্টারনেট—এসব এড়িয়েই চলেন। উন্নততর প্রযুক্তির প্রতি বিতৃষ্ণায় নয়। আসলে ওই জিনিসটার সঙ্গে ঠিক সড়গড় হয়ে উঠতে পারেননি।

শুটকি তার হতভম্ব ভাব লক্ষ্যই করেনি। সে তখন সিগারেটের প্যাকেটের ভেতর থেকে রাংতা বের করে এনে কী যেন খসখস করে লিখছে।

—‘ব্যাপারটা একটু খোলসা করে বলবি?’ বাধ্য হয়ে তিনি প্রশ্নটা করেই ফেলেন।

লিখতে লিখতেই সে উত্তর দেয়—‘খোলসা করার কিছু নেই। তুই নিজেই একটু আগে বললি যে, মাথায় কিছু আসছে না বলে যেখানে-সেখানে একগুচ্ছ ডট বসচ্ছিস। তোমার ডট বেশি হয়েছে। তাই ডট কম করার চেষ্টা করছি।’

—‘মানে?’

—‘মানে এই।’ কাগজটা এগিয়ে দিয়েছে সে। তিনি দেখলেন রাংতার পিছনের দিকে লেখা আছে— ‘ডব্লু ডব্লু ডব্লু ডট কবিতা ডট কম।’

—‘কবিতা ডট কম!’ তার চোখ প্রায় ব্রহ্মাতালুতে উঠেছে—‘আজকাল কবিতারও ডট কম বেরিয়েছে!’

শুটকি এবার মৌজ সে সিগারেট ধরায়—‘তুই এখনও সত্যযুগে পড়ে আছিস! পুথিতে কাব্য করার দিন আর নেই বাচ্চা!’ এখন লোকে ইন্টারনেটে কাব্যচর্চা করছে। ওয়েবজিন, ব্লগ, কম্যুনিটি, গ্রুপ—এমনকি সোশ্যাল নেটওয়ার্কিং সাইটগুলোতে গেলে দেখবি লোকে নিজের অ্যালবামে কবিতা স্টে রেখেছে।’

গহন চোখ গোল গোল করে ব্যাপারটা বোঝার চেষ্টা করেন, যদিও পুরো ব্যাপারটাই তার মাথার ওপর দিয়ে যাচ্ছে। তবু কোনোমতে বললেন—

—‘এটাও কি সোশ্যাল নেটওয়ার্কিং সাইট?’

—‘নাঃ’ সে সিগারেটের ছাই ঝেড়ে বলে— এটা শুধু কবিতার একটা ওয়েবসাইট। ভারত-বাংলাদেশের অনেক কবি—অকবি, অ্যামেচার কবি এখানে কবিতা পোস্ট করে। কোনো সেন্সর-টেন্সর নেই। বাছাবাছির বালাই নেই। যে কেউ এখানে কবিতা দিতে পারে। এর অনেকগুলো সুবিধাও আছে।’

—‘যেমন?’

—‘যেহেতু এটা অনলাইন কবিতার সাইট সেহেতু রেসপন্স অনেক তাড়াতাড়ি পাবি।’ সে এক মুখ ঝোঁয়া ছাড়ল—‘প্রিন্টেড ম্যাগাজিনে তুই একটা কবিতা লিখবি, দু-মাস পরে সেটা পাবলিশড হবে। তারও একমাস পরে পাঠকের চিঠি আসবে—তবে তুই জানতে পারবি কবিতাটা কেমন লেগেছে। এখানে সে-সব ঝামেলা নেই। যে মুহূর্তে কবিতাটা পোস্ট করছিস, ঠিক সেই মুহূর্তেই হয়তো দশ-পনেরোটা লোক—অনলাইন হয়ে বসে আছে। কম্পিউটারের পর্দায় এক মিনিটের মধ্যেই কবিতাটা পড়ে ফেলবে। দু-মিনিটের মধ্যেই বি-অ্যাকশন পেয়ে যাবি। একদম ইনস্ট্যান্ট রি-অ্যাকশন’।

গহন এক মুহূর্ত ভাবলেন—‘হুঁ’।

—‘দ্বিতীয়ত এখানে তোর পরিচয় কেউ জানতে চাইবে না। যে-কোনো ছদ্মনামে তুই কবিতা পোস্ট করতে পারিস। মানেটা বুঝতে পারছিস?’ শুটকি রহস্যমাখা হাসি হাসে—‘এখানে তোর কবিতার পাশে গহন দত্তগুপ্ত—এ ওয়ান কবি’র নেমপ্লেটটা থাকবে না। বড়ো বড়ো পত্রিকার রেফারেন্সও থাকবে না। তোর আইডেন্টিটি ক্যারি করবে শুধু তোর কবিতা। কবিতাটা কেমন হল সে সম্পর্কে একদম খাঁটি আর আনবায়াস্‌ড রেসপন্স পাবি।’

তিনি শুটকির কথা শুনে সংশয়াঙ্কিত হয়ে পড়েছিলেন। এরকম আবার হয় নাকি! এমন কথা আগে কখনও শোনেননি।

—‘অত ভুরু কঁচকানোর কিছু হয়নি। তোকে ঠিকানা দিয়ে দিলাম। অ্যাপ্লাই করে দ্যাখ। কয়েক মিনিটেই জবাব পেয়ে যাবি—যে সত্যিই তোর কবিতা, কবিতা হচ্ছে কিনা।

গহন তখনও সংশয় কাটিয়ে উঠতে পারেননি। তার মনে একটা অদ্ভুত সন্দেহও ঘনিয়ে আসছিল।

—‘শুটকি, তুই এই সাইটটার খোঁজ পেলি কী করে?’

সে হাসল। মাঝেমধ্যেই সে এরকম অদ্ভুত একটা হাসি হাসে। হাসিটাকে গহনের, হাসি কম, কান্না বেশি বলে মনে হয়।

—‘সে প্রসঙ্গ থাক।’ শুটকি হাসতে হাসতে বলে—‘অমলকান্তি রোদ্দুর হতে পারেনি। আমি শেষমেশ চশমার দোকানি হয়েছি। কিন্তু স্বপ্নটা মরেনি, জানিস। বেশিদিন বাঁচব না জানি। কিন্তু মরার আগে একবার কবি হতে চাই আমি... শুধু একবারের জন্য কবি হতে...।’ গহনের বুক ভেঙে দীর্ঘশ্বাস পড়ল।

তোমার খোঁপা এলো হলেই বাদলা নামে
 মেললে দু-চোখ লজ্জাহত সূর্য পালায়,
 মনের কথা লিখছি রোজই মেঘের খামে
 বন্ধ আখর শুমরে মরে বন্দিশালায়।
 বুকের ভিতর আঁকছি নদী কল্পজালে,
 তোমার মতোই অলীক বুঝি আমার চাওয়া
 যতই ভাবি পৌঁছে যাব পা বাড়ালে
 অনেক চলার শেষেও তোমায় যায় না পাওয়া!

উশ্রী অবিকল বনলতা সেনের মতো চোখ তুলে তাকিয়ে বলল—‘এটা আমাকে নিয়ে লিখেছ?’
 —‘হ্যাঁ... তোমাকে নিয়ে। শুধু তোমাকেই নিয়ে উশ্রী।’

উশ্রীর চুল আজ খোলা। রেশমের মতো একটাল ঘন চুল ফুরফুরে হাওয়ায় উড়ছে।
 মন্দারের খুব ইচ্ছে করছিল ওই ঝাঁপিয়ে পড়া মেঘের প্রপাতের নীচে শুয়ে থাকতে। নরম,
 মসৃণ সুগন্ধি কালো, ছায়ায় মুখ ডুবিয়ে ঘ্রাণ নিতে। এমন চুল নিয়ে খেলা করতে না জানি
 কেমন লাগবে!

কালো কুচকুচে ধনুকের মতো ভুরু ঝাঁকিয়ে বলল উশ্রী—‘কেন? আমাকে নিয়ে কেন?’
 মন্দার উশ্রীর মুখোমুখি ঘন হয়ে দাঁড়াল। দু-হাতে তার মোম রঙের সুডৌল মুখ স্পর্শ
 করে। গাঢ় স্বরে বলে—‘আমি তোমায় খুব ভালো...’

‘ভালোবাসি’ শব্দটাই বোধহয় বলতে চেয়েছিল সে। হয়তো বলতে ও পারত। কিন্তু তার
 আগেই গালে সপাটে একটা বিরশি সিক্কার চড়! পেন্নায় হাতের এক মোক্ষম চড়ে তার মাথা
 ঝিমঝিম করে উঠল। চোখের সামনে সরষেফুলের দিগন্ত বিস্মৃত খেত! সে তখনও ভেবে
 পায়নি যে উশ্রী তাকে এমন প্রলয়ংকর থাপ্পড় মারল কী করে! অমন নরম-সরম পুতুলের
 মতো মেয়ের এমন বাঘের থাবার মতো হাত! উশ্রী কি রোজ ডান্বেল ভাঁজে!

সে কোনোমতে মাথা ঝাঁকিয়ে ধাতস্থ হওয়ায় চেষ্টা করে। কানের ভেতর ঢুকে যেন
 একডজন চড়ুই পাখি ঝগড়া লাগিয়ে দিয়েছে। চোখ ঝাপসা! তার মধ্যেই কোনোমতে উশ্রীর
 দিকে সবিস্ময়ে তাকায় মন্দার। কিন্তু উশ্রী কোথায়! তার জায়গায় লম্বা চওড়া কালো একটা
 লোক দাঁড়িয়ে আছে! কয়লা লোকটার চেয়ে কালো, না লোকটা কয়লার চেয়ে কালো—তা
 নিয়ে ডিবেট হতে পারে। ভুরু দুটো ঠিক যেন একজোড়া শূন্যোপোকা। সবচেয়ে ভয়ংকর
 চোখদুটো! মহাভারতের কংসের বোধহয় এমন চোখ ছিল। সাজপোশাকও পৌরাণিক
 সিরিয়ালের ভিলেনের মতো! মাথায় মুকুট, কানে দুলা, কবচ, গলায় নীল পাথরের হার!—
 যেন এইমাত্র রামানন্দ সাগরের সিরিয়াল থেকে নেমে এল!

—‘হা-রা-ম-জা-দা!’ লোকটা দাঁত খিঁচিয়ে বলে—‘বামুনের ছেলে হয়ে উলটো-পালটা
 মন্ত্র পড়ে! সংস্কৃতের ‘স’ ও জানে না। ভুল-ভাল উচ্চারণ করে জীবন অতিষ্ঠ করে ছেড়েছে!
 আর প্রেম করার সময়ে একেবারে মদন! মাথায় একশো কুড়ি ডাঙস না মেরেছি!’

বলতে-না-বলতেই আর এক পেন্নায় থাপ্পড়! মন্দারের মাথা তিনশো ষাট ডিগ্রিতে ঘুরে
 গেল।

সে চেচিয়ে ওঠে—‘বাঁচাও বাঁচাও....’

‘কী হল! অমন বাঁড়ের মতন চ্যাচাচ্ছিস কেন?’

কানের কাছে থায় কয়েকশো ডেসিবেলের একটা বাজখাঁই গলার আওয়াজ শুনে ধড়মড় করে উঠে বসল মন্দার। সদ্য ঘুমভাঙা চোখে কণ্ঠস্বরের মালিককে দেখে আঁতকে উঠেছে! এ কী! এতো সেই লোকটা! কুচকুচে কালো! ভাঁটার মতো চোখ! শূঁয়োপোকা ভুরু! শুধু ‘জয় হনুমান’ মার্কা পোশাকটা ছেড়ে সাদা পাজামা-পাঞ্জাবি পরে এসেছে।

সে অস্ফুটে বিড়বিড় করে বলে—‘সর্বনাশ! শনিদেব!’

—‘কী বিড়বিড় করে বকছিস!’ লোকটা রেগে গিয়ে বলে—‘ন’টা বাজে। স্নানে যাবি না!’

মন্দার এতক্ষণে ধাতস্থ হয়। নাঃ, লোকটা স্বপ্ন থেকে নেমে আসেনি। বরং ভীষণ রকম বাস্তব। ভদ্রলোক অন্য কেউ নন—স্বয়ং তার বাবা! দশটা নয়, পাঁচটা নয়, একমাত্র পিতৃদেব!

ব্যাজার মুখে বিছানা ছাড়ল সে। মনমেজাজ খারাপ হয়ে গেছে। কেমন সুন্দর একটা রোমান্টিক স্বপ্ন দেখছিল। কিন্তু তার মধ্যেও টপকে পড়তে হল পালোয়ানটাকে! লোকটা কিছুতেই তার পিছন ছাড়বে না। স্বপ্নে মাধুরী দীক্ষিতের সঙ্গে প্রেম করুক কি উশীর সঙ্গে — ঠিক কোনো-না-কোনো ভাবে এসে বাগড়া দেবেই! আগে তবু দাঁত খিঁচিয়েই ক্ষান্ত হত। এখন দুমদাম হাত চালাচ্ছে।

টয়লেটের দিকে যেতে যেতেই রান্নাঘরের ফ্যাচফেঁচ শব্দ পেল সে। হাতা খুস্তিগুলো আজ একটু বেশিই শব্দ করছে। বাটি গ্লাসগুলোও ক্রমাগত বনবন আওয়াজ দিচ্ছে। মন্দার বুঝতে পারে, পরিস্থিতি আজ গরম! রান্নাঘরে এত শব্দ-কল্ল-ক্রমের অর্থ একটাই! মা বলতে চাইছেন—‘আমি রেগে আছি’।

উশী কিন্তু কখনও রাগ করে না। সে ভারি মিষ্টি স্বভাবের মেয়ে। ডাইরেক্টর তাকে বকাবকি করলেও শান্ত হয়ে সব কথা শোনে। সবসময়ই প্রোডাকশনের লোকদের সঙ্গে খুনশুটি করছে। একটা মিষ্টি রহস্যময় হাসি তার ঠোঁটে সবসময়ই লেগে থাকে।

ভাবতেই মন্দারের মুখেও মুচকি হাসি ভেসে উঠল। উশী এ বাড়ির বউ হয়ে এলে রান্নাঘরের ছড়ম-দুড়ম কমবে।

—‘কী ব্যাপার রে?’

তার ছোটো বোন টিকলি ডাইনিং টেবিলে বসে কর্নফ্রেন্স খাচ্ছিল। দাদাকে দেখে টিপ্পনী কাটল—‘কাল রাত্রে ইসবগুল খেয়েছিস নাকি!’

মন্দার তার দিকে চোখ গোলগোল করে তাকিয়েছে—‘ইসবগুল! মিল!’

—‘না! দিব্যি মোনালিসা’-স্মাইল দিতে দিতে টয়লেটে যাচ্ছিস কিনা!’ টিকলি ফিচ ফিচ করে হাসল—‘রোজ সকালে তোর মুখে উঃ কী চাপ!’ গোছের এক্সপ্রেশন থাকে। আজ ‘আঃ কি আরাম’ মার্কা হাসি দিচ্ছিস। তাই জিজ্ঞেস করছি—লুবাড়ির বন্দোবস্ত করেছিস কি না।’

সে কিছুক্ষণ বোনের দিকে জ্বলন্ত দৃষ্টিতে তাকিয়ে থাকে। টিকলি হায়ার সেকেন্ডারিতে লজিক নেওয়ার পর থেকেই হঠাৎই যুক্তিপূর্ণ কথা বলতে শুরু করেছে! এমনকি দাদার ওপর ‘দিদিগিরি’ করতেও ছাড়ছে না।

— ‘শ্রী রামকৃষ্ণের সামনের দাঁতের পাটিতে ফাঁক ছিল, মায়েরও আছে। তাহলে মা, রামকৃষ্ণ নয় কেন?’ মন্দার হাসল — ‘খিঙ্ক ইট

টিকলি ঠোট ফুলিয়েছে, কর্নফ্রেন্সের বাটি সরিয়ে মুহূর্তের মধ্যেই ছুটে গেল রামাঘরের দিকে। বাধরুমে ঢুকতে ঢুকতেই মন্দার শুনতে পেল সে মায়ের কাছে নাকি সুরে নালিশ জানাচ্ছে— ‘দ্যাখো মাঁ, দাঁদাভাই কি বলছে। বলো কিনা তোমার দাঁতেও ফাঁক আছেরামকৃষ্ণের দাঁতেও

দড়াম করে টয়লেটের দরজাটা বন্ধ করে দিল মন্দার। টিকলির নালিশের প্রত্যুত্তর শুনতে চায় না। কমোডের ওপর চেপে বসে সে আজকের স্বপ্নটার কথাই ভাবছিল। উশ্রীকে আজ কী অপূর্ব লাগছিল! ওকে খুব চুমু খেতে ইচ্ছে করছিল তার। হয়তো একটা-দুটো চুমু খেয়েও ফেলতে পারত। কিন্তু ওই লোকটা সব ভেঙে দিল।

ভাবতেই তার রাগ হয়ে গেল। কী কুক্ষণে গ্যাস খেয়ে পইতে নিতে গিয়েছিল! বামুনের ছেলে হওয়ার এই শাস্তি! সবার ধাক্কা-টাক্কা খেয়ে এই দামড়া বয়েসে যদিও-বা পইতে নিল, তাতেও শাস্তি নেই। পইতে নিলে নাকি একটা পুজো করতেই হয়। অন্তত একবার পুরুতের আসনে বসে ‘অং বং চং’ করাটা মাস্ট। এ পর্যন্ত সব ঠিকই ছিল। কোনোমতে ‘চাঁদ সদাগর’ হয়ে পুজোটাও নির্বিঘ্নে করে ফেলতে পারত সে। কিন্তু তেত্রিশ কোটি দেবদেবীর মধ্যে আর কাউকে খুঁজে পাওয়া গেল না! শেষ পর্যন্ত শনিদেব! কেন? হাতের সামনেই তো দিবি ভোলেভালা মহাদেব ছিলেন! ঠাকুমার কাছে শুনেছে তিনি নাকি গাঁজা-ভাং খেয়ে ভোম হয়ে বসে থাকেন। একটা-দুটো ভুলভাল মন্ত্র পড়লেও বিশেষ পান্তা-টান্তা দিতেন না। আর যিনি আগেই বিঘ খেয়ে নীলকণ্ঠ হয়ে বসে আছেন, সেখানে ‘মহেশ্বর’ ভুলক্রমে ‘মহাষাঁড়’ হয়ে গেলেও এমনকি ক্ষতি হত।

কিন্তু না, মন্দারকে বিশেষ করে বাঁশ দেওয়ার জন্যই সবাই মিলে শনিদেবকেই খুঁজে পেল! পুজো দেওয়ার সময় কি আর জানত যে এই দেবতা কানখাড়া করে সব শুনছেন! আর তাকে কুস্তীপাক দেওয়ার জন্য তৈরি হচ্ছেন! যেদিন থেকে শনিপুজো করেছে, সেদিন থেকেই নিজের কপালে শনি নিয়ে ঘুরছে সে! যা-ই করতে যায় তাতেই ‘আছোলা বাঁশ!’ মনের আনন্দে একটা মেগা সিরিয়ালে স্ক্রিপ্ট লিখছিল। মেইন স্ক্রিপ্ট-রাইটার দেবুদা বেশ ভালো মানুষ ছিলেন। সামান্য ভুল-ত্রুটি হলেও মাথা ঘামাতেন না। কিন্তু কপালে সে সুখ সইল না! দুম করে স্ক্রিপ্ট-রাইটার চেঞ্জ হয়ে গেল! ভালোমানুষ দেবুদার জায়গায় এলেন অজয় পান্তা ওরফে পান্তাদা! সে আর এক রকম মূর্তিমান শনি! যেন কালো ষাঁড়ের মতো চেহারা, তেমনি তার হাঁকডাক। পায়ে আর্থ্রাইটিস—তাই হাঁটার সময় ডানদিকে-বাঁদিকে সমান অ্যাঙ্গেলে বেঁকে হাঁটে। ডাইনে-বাঁয়ে ক্রমাগত হলে হাঁটার জন্য অনেকেই তাকে পেছনে ‘পান্তা’র বদলে ‘পেড্ডুলাম’ বলে। কিন্তু কী মেজাজ? পান থেকে চুন খসলেই রদ্দা বাগিয়ে তেড়ে আসে।

অ্যাসিস্ট্যান্ট স্ক্রিপ্ট-রাইটারের কাজ করলেও মন্দার আসলে মনেপ্রাণে কবি। নেহাত বাবার ঠালা খেয়ে কাজটা নিয়েছে। আর ওই কবি কবি ভাবই হয়েছে যত নষ্টের গোড়া! মেগা সিরিয়ালের সংলাপও মাঝেমাঝে কাব্যিক হয়ে পড়ে। পেড্ডুলাম খেপে গিয়ে খিস্তি দেয়—‘এসব কী ন্যাকা ন্যাকা সংলাপ। কবি হবি নাকি! কাব্য করতে চাইলে—দাড়ি রেখে

আগে আঁতেল হ। তারপর ঝোলা কাঁধে নিয়ে নন্দনে বসে থাক। সিরিয়াল মাড়াচ্ছি কেন বে?’

মাথায় রক্ত চড়ে গেলেও কোনোমতে মেজাজ ধরে রাখে মন্দার। পান্ডা, তথা পেণ্ডুলামের কথার যে কোনো মা-বাপ নেই তা ইন্ডাস্ট্রির সবাই জানে।

--‘হঁ,কবি হবে!’ পেণ্ডুলাম একখানা বাংলা দৈনিকের পাতা টেনে এনেছিল। তার ওপর ভান্নুকের মতো একখানা থাবা রেখে বলে—‘কবিতা লেখা কী এমন শক্ত! খবরের কাগজের একটা পেজ খোল। তারপর হাতের পাতা দিয়ে চাপা দে। আঙুলের ফাঁক দিয়ে যে সব অক্ষর উঁকিঝুঁকি মারবে, সেগুলোকে এক লিখে দিলেই হয়ে গেল কবিতা! যত দুর্বোধ্য তত অনবদ্য’। বলেই সে ভুড়ি কাঁপিয়ে অশ্লীলভাবে হেসে উঠল। মন্দার প্রথমে রেগে গেলেও পরে তাকে মনে মনে ক্ষমা করে দেয়! অশিক্ষিত লোকজন! কবিতার মাহাত্ম্য কে বুঝবে! কী করে বুঝবে যে মন্দার পাতি কবি নয়। তার কবিতা ‘সৌরভ’, ‘বিশ্ববঙ্গ’, ‘জলচ্ছবি’র মতো লিটল ম্যাগাজিনে ছাপা হয়। কবিতা ডটকমের লোকজনও তার কবিতা পড়ে উচ্ছ্বসিত প্রশংসা করে!

কবিতা ডট কমের কথা মনে পড়তেই তার কপালে ভাজ পড়ল। সেখানেও আজকাল শনির দৃষ্টি পড়েছে। ‘কুবলাশ্ব’ ছদ্মনামের একটা লোক তাকে জ্বালিয়ে খাচ্ছে। যাই লেখে, লোকটা তার মধ্যে খুঁত ধরবেই। তার পোস্ট করা একটি কবিতার লাইন ছিল- -‘প্লিহার বেদনাতেও তোমার প্রেমের ব্যথা কমে না।’ কুবলাশ্ব সেটা পড়ে মতামত দিল—‘সবই তো বুঝলাম। কিন্তু প্লিহার ব্যথা উঠলে তো লোকে মা-বাপের নামই ভুলে যায়। অথচ আপনার দেখছি প্রেমিকার নামও মনে থাকে! আশ্চর্য!’

বিলো দ্য বেন্টপাঞ্চ খেয়ে সে মনে মনে দাঁত কিড়মিড় করেছিল। কিন্তু বিজ্ঞ বিজ্ঞ ভাব বজায় রেখেই টাইপ কবে—‘এসব রোমান্টিসিজিমের ব্যাপার। যে-কোনো ব্যথাই আদতে রোমান্টিক।’

কুবলাশ্ব সঙ্গে সঙ্গেই উত্তর দেয়—‘প্লিহা,মানে পিলের ব্যথায় আবার রোমান্টিসিজিম আছে নাকি! আমার এক পিসেমশাই তো প্রায়ই পিলের ব্যথায় ভোগেন। কই,তাকে তো বিন্দুমাত্রও রোমান্টিক বলে মনে হয় না। বরং সবসময়ই খিটখিট করেন। আপনার কাছে সব ব্যথাই রোমান্টিক বুঝি! দাঁতের ব্যথায় ভুগেছেন কখনও?’

সে আর বলতে! আক্কেল দাঁত ওঠার সময়ই হাড়ে হাড়ে টের পেয়েছে ‘আক্কেল গুড়ম’ হওয়া কাকে বলে।

অগত্যা, কুবলাশ্বকে আর মুখের মতো জবাব দেওয়া যায়নি। নিষ্ফল আক্রোশে দাঁত কিড়মিড় করেছে মন্দার, আর মনে মনে ভেবেছে ‘এইসা দিন নেহি রহেঙ্গা’। তারও দিন আসবে।

কমোডের ওপর চেপে বসে এই সবই ভাবছিল সে। হঠাৎ বাইরে থেকে বাবার উত্তেজিত চিৎকার—

—‘ওঃ ভগবান,তুই এখনও টয়লেটে!’

—‘বাবা.....’! সে বাবার উত্তেজনাকে বিশেষ পাণ্ডা দেয় না—‘ভগবান টয়লেটে নেই। আমি আছি’।

— ‘কতক্ষণ লাগবে তোর?’ বাবা আরও জোরে চেঁচিয়ে ওঠেন— ‘একেই নিম্মচাপ, আর্জেন্ট কেস। তার ওপর গ্যাভিটেশনের দুরস্ত ডাক! পারছি না।

— ‘অন্য টয়লেটটায় যাও না।’

— ‘ওটাতে টিকলি ঢুকেছে’। বাবার গলা ফুল ভলিউমে— ‘তাড়াতাড়ি কর।’

বাধ্য হয়েই পবের কাজগুলো যত তাড়াতাড়ি সম্ভব সেরে ফেলল মন্দার। পাঁচ মিনিট পরে যখন সে তৈরি হয়ে দরজা খুলে বেরিয়ে এল, ততক্ষণে বাবা মেঝের ওপর চেপে বসে পড়েছেন। সম্ভবত মাধ্যাকর্ষণের বিরুদ্ধে প্রবল লড়াই চলছে।

— ‘যাও’।

বাবা তার দিকে এমনভাবে তাকালেন যেন সে ‘কোন বনেগা ক্রোড়পতি’র অমিতাভ বচন! এবং তিনি পাঁচ কোটি টাকা পেয়ে গেছেন।

রান্নাঘরের ঢং ঢং-ঠং ঠং এখন অনেকটাই কম। তার মানে এখন মায়ের রাগ কমে দিকে। সম্ভবত সকালেই কর্তা গিল্লির মধ্যে একচোট রোঁয়া ফেলানো হয়ে গেছে। ফলস্বরূপ এবেলা দুজনের বাক্যালাপ বন্ধ। বাবাকে দূরদর্শী লোক বলতে হবে। তিনি আগেভাগেই কিচেনের দেয়ালে নীরব একটা ব্ল্যাকবোর্ড স্টেটে রেখেছেন। রান্নাঘরে ঢুকতে ঢুকতেই মন্দার দেখল ব্ল্যাকবোর্ডের ওপরও খড়ির দাগে বাবা-মায়ের ঝগড়া চলেই যাচ্ছে।

প্রশ্ন — কোন শার্টটা পড়ে যাব?

উত্তর — যেটা খুশি।

প্রশ্ন — নু রঙের টাইটা খুঁজে পাচ্ছি না।

উত্তর — বেডরুমের নীচের কাবার্ডে সাইডে ভাঁজ করে রাখা আছে।

প্রশ্ন — আমার শর্টস কোথায়?

উত্তর — আমি পরে বসে আছি।

শেষ উত্তরটা পড়ে কোনোমতে হাসি চাপল সে। মা তখনও একমনে হাতাখুস্তি নাড়িয়ে চলেছেন। মুখে গলায় ফোঁটা ফোঁটা ঘাম। ব্লাউজের পিছনটা ঘামে ভিজ্জে জ্বজ্ববে। পিছনে না ফিরেই বললেন — ‘পাঁচ মিনিট, ডিমের বোলটা নামিয়েই খেতে দিচ্ছি।’

— ‘ঠিক আছে।’

আর কথা না বাড়িয়ে নিজের ঘরে চলে এল মন্দার। তাড়াতাড়ি ল্যাপটপটা অন করল। মা যতক্ষণে খেতে ডাকবেন, ততক্ষণে ‘কবিতা ডটকমের’ একটা চক্র মেরে নেবে। রোজ সকালে, বিকেলে, সময় পেলেই অনলাইন হয়ে ‘কবিতা ডটকমের’ কবিতাগুলো পড়ে ফেলা তার নেশা। নতুন কে কা লিখল, তার নিজের কবিতায় কটা কমেন্ট পড়ল—সব খুঁটিয়ে খুঁটিয়ে দেখে।

ল্যাপটপটা অন হতেই স্ক্রিনে উশীর ছবি ভেসে উঠেছে। দেখেই মন ভালো হয়ে গেল। একমাথা ঘন চুল এলিয়ে কেমন ছেলেমানুষের মতো হাসছে। উশীর স্থির হাসির প্রত্যুত্তরে মন্দারও হাসল। তারপর অভ্যস্ত হাতে ব্রাউজার খুলে ‘কবিতা ডটকমে’ চলে গেল।

কবিতা ডট কমে আজ সকাল থেকে কবিতার ভিড়। প্রথম পাতায় একের-পর-এক কবিতা। তার নিজের কবিতাটা সম্ভবত দ্বিতীয় বা তৃতীয় পাতায় চলে গেছে। ‘অগ্রদূত’,

‘যাযাবর’, ‘আকাশনীল’, ‘জোনাকি’ প্রত্যেকেই লিখেছে। একটাই শুধু নতুন নাম,—‘একা মেঘ’।

কবিতাপাড়ায় নতুন কবির আমদানি হয়েছে। সে নিতান্তই কৌতূহলবশত কবিতার নামের ওপর ক্লিক করল। এটাই এখনও পর্যন্ত লাস্ট পোস্ট। কোনো কমেন্ট পড়েনি। মাত্র এক মিনিট আগেই কবিতাটা জমা পড়েছে।

মন্দার পেজটা খুলে কবিতার থ্রেডে চোখ রাখল। ক্লিক সংখ্যা এক। অর্থাৎ সেই-এ কবিতার প্রথম পাঠক। কবিতার নাম —‘নোনা রোদ’।

বালির রেতে দফন প্রাচীন শামুক
অঙ্ককার ও সমুদ্র ডাক নিয়ে।
টেউ চলে যায় একলা দ্বীপান্তরে—
পুরোনো স্মৃতির টিলায় মাথা রোদ
নোনা ধরা জলে আরশিটা মেলে ধরে
আর পিছু টানে জংলি হাঁসের ডাক।
উড়ে যাক
উড়ে যাক
উড়ে যাক.....।

কবিতাটা পড়ে তার ফের মাথা ঝিমঝিম করে উঠল। শনিদেবের থাপ্পড় খেয়েও এমন অনুভূতি হয়নি। সে প্রথমে লাইন-বাই-লাইন পড়ল। তারপর গোটা কবিতাটা! একেবারে অর্থহীন নয়। কিন্তু সব মিলিয়ে কি! ‘বালির রেত’ আবার কীরকম শব্দ। বালি মানেই তো রেত! না অন্য কিছু? শব্দের চাতুরী মানেই কি কবিতা! অত সহজ!

মন্দার নিজের ছদ্মনামে মন্তব্য পোস্ট করল — ‘কবিতা না অ্যাটম বোমা ঠিক বুঝলাম না! ‘উড়ে যাক ... উড়ে যাক ...’ বলতে বলতে শেষ পর্যন্ত মাথার ওপর দিয়ে উড়েই গেল। উড়িয়েও দিল। এসব কি বিটকেল ফ্যান্টাসি। বুলস্য বুল!’

তার একটু রাগই হয়। এরা কীভাবে! কতগুলো সুন্দর সুন্দর শব্দ পরপর বসিয়ে দিলেই কবিতা হয়ে গেল! এদের জন্যই পেডুলামের মতো পার্লিকগুলো কবিতার নামে হাসে। একবার এই কবিতা ডটকমেই ‘কালকেতু’ নামের এক কবি লিখেছিল— ‘শুকরের মাথা যেন এক ঝুড়ি লুচি!’ কুবলাশ্ব তাকে এমন ঝেড়ে কাপড় পড়িয়েছিল যে পালাবার পথ পায়নি। তারপর থেকে তাকে আর এ পাড়ার ত্রিসীমানায়ও দেখা যায় না।

মন্দার নিজেই কুবলাশ্ব-র ওপর চটে থাকলেও মনে মনে স্বীকার করল যে বিশেষ বিশেষ ক্ষেত্রে তার মতো পাঠকেরও প্রয়োজন আছে! এরা খোঁচা না মারলে এইসব শূন্যকুস্তুরা নড়েচড়ে বসবে না। কবিতা লিখতে গেলে যে, কিছু পড়তেও হয় তা বোঝানোর জন্যই কুবলাশ্ব-র মতো তে এঁটে লোক দরকার। আস্ত থিসিস্ না থাকলেও কিছু কিছু কবির কবিতা তো পড়তেই হবে।

মন্দারের ফেভারিট কবি অবশ্যই একমেবাদ্বিতীয়ম গহন দত্তগুপ্ত! কীসব অমানুষিক কবিতা লিখেছে লোকটা! পড়লেই গায়ে কাঁটা দেয়। বুকের ভেতরটা কেমন করে।

ভাবতেই আবার মন খারাপ হয়ে গেল। গহন দত্তগুপ্তের কবিতাকে এত ভালোবাসে বলেই না স্বয়ং কবির বৈঠকে সটান হাজির হয়েছিল। এমনিতে ভদ্রলোক ভারি শাস্তিশিষ্ট। কথা বলার চেয়ে ফ্যানের দিকেই তাকিয়ে থাকেন বেশি। নীচু স্বরে ছাড়া কথা বলেন না, বকা তো দূর! অথচ সেই মানুষটিও মন্দারকে এক মোক্ষম দাবড়ানি দিয়ে বসলেন। দোষের মধ্যে সে বৃষ্টিম্নাত দিনে কবির লেখা ‘জলসই’ কবিতাটা উচ্ছ্বসিত হয়ে আবৃত্তি করে ফেলেছিল। তাতেই ভদ্রলোক এমন খাঁক খাঁক করে উঠলেন, যেন মন্দার তার লেখা কবিতা নিজের নামে চালিয়ে দিয়েছে!

নাঃ, গহন দত্তগুপ্ত-র দোষ নয়। দোষ তার নিজের কপালের। কা কুক্ষণেই যে শনিপুজোটা করতে গিয়েছিল!

ঝুলস্য ঝুল!

গহন নিজের চোখকেও বিশ্বাস করতে পারছিলেন না। তার কবিতাকে ‘ঝুলস্য ঝুল’ বলেছে কেউ! গহন দত্তগুপ্ত-র কবিতাকে.....।

হঠাৎ করে রক্তচাপ বেড়ে গেল। মাথাটা দপ করে গরম হয়ে গেছে। এ যাবৎ জীবনে অনেক কঠিন সমালোচনার মুখোমুখি হয়েছেন। অনেক কঠোর বাক্যবাণ সহ্য করতে হয়েছে তাকে। কিন্তু তার কাব্যপ্রতিভাকে কেউ এভাবে নস্যাৎ করে দেয়নি। অথচ কোথাকার কে এই ‘রামহনু’ ছদ্মনামধারী ব্যক্তি, একেবারে সপাটে বলে দিল—‘কবিতা না অ্যাটম বোমা ঠিক বুঝলাম না। উড়ে যাক.... উড়ে যাক বলতে বলতে শেষ পর্যন্ত মাথার ওপর দিয়ে উড়েই গেল। উড়িয়েও দিল। এসব কি বিটকেল ফ্যান্টাসি। ঝুলস্য ঝুল।’

অক্ষরগুলো যেন তার চোখে লংকার গুঁড়ো ছিটিয়ে দিয়েছে। সমালোচনা সহ্য করতে পারেন না এমন দুর্নাম তার অতিবড়ো শত্রুও দেবে না। কিন্তু এই ভাষায় সমালোচনা রীতিমতো অপমানজনক! একজন প্রবীণ, প্রতিষ্ঠিত কবির পক্ষে হজম করা কঠিন। এর চেয়েও অপমানজনক পরের কমেণ্টটা। জনৈক ‘কুবলাশ্ব’ লিখেছে—‘দাদা, এমন কবিতা লেখার চেয়ে তেলেভাজা খেয়ে অ্যাসিড বাঁধিয়ে বসে থাকুন না! তাতে অন্তত আমরা রক্ষা পাই।’

গহন উইন্ডোটা ক্লোজ করে রীতিমতো সশব্দেই মাউসটাকে সরিয়ে রেখেছেন। বজ্রাহতের মতো চেয়ারেই বসে থাকলেন কিছুক্ষণ। কা করবেন ভেবে পাচ্ছেন না। ইচ্ছে করছিল শোকেসে সাজানো স্মারকগুলোকে ডাস্টবিনে ফেলে দিতে। যত বই আজ পর্যন্ত লিখেছেন সব আঙনে পুড়িয়ে ফেলতে পারলেই হয়তো স্বস্তি পান তিনি।

আরও কতক্ষণ ওভাবেই বসে থাকতেন কে জানে। কিন্তু পিছন থেকে সুললিত কণ্ঠ ডাক এল—‘কবিবর’.....।

গহনের রাগ তখনও পড়েনি। বিষবাক্যের জ্বালায় তখনও চিড়বিড় করে জ্বলছিলেন। জ্বলন্ত দৃষ্টিতে কণার দিকে তাকালেন।

—‘এ কী!’ কণার মায়াবী চোখদুটোয় চাপা কৌতুক—‘এখনও বসন্তকাল আসেনি।

আমিও তপোভঙ্গ করতে আসেনি। তাহলে এই তেজোদীপ্ত অগ্নিদৃষ্টির কারণ?’

মৃদু অথচ রাগতস্বরে বললেন তিনি—‘ওই নামে আমায় ডাকবে না।’

—‘কেন?’ কণার শীর্ণমুখ হাসিতে বললেন করে ওঠে—‘তুমি কবিও বটে। এবং আমার বরও নিঃসন্দেহে। তাহলে ‘কবির’ শব্দটা কি দোষ করেছে?’

একটু খেমে আবার দুই দুই হেসে যোগ করলেন—‘নাকি একা আমারই বর কিনা সে বিষয়ে সন্দেহ আছে!’

—‘সে বিষয়ে সন্দেহ নেই।’ গহনের মেজাজও খানিকটা ঠান্ডা হয়ে আসে। অপেক্ষাকৃত শান্তস্বরে বলেন—‘তবে কবি কিনা তাতে সন্দেহ আছে।’

—‘যাক, তবে তোমার ওপর আমার অনন্ত মৌরসি।’ তিনি কণ্ঠস্বরে ছদ্ম অভিমান মাখিয়েছেন—‘তাহলে এই অসময়ে বিছানা ছেড়ে তোমায় কষ্ট করে ডাকতে এলাম কেন, সে কথা জানতে চাইছ না যে!’

এতক্ষণে খেয়াল হল তার। এখন কণার বিশ্রামের সময়। খাওয়াদাওয়ার পাট চুকিয়ে ঘণ্টাখানেকের জন্য একটু গড়িয়ে নেন তিনি। খুব প্রয়োজন না পড়লে বিছানা ছেড়ে এ সময়ে সচরাচর ওঠেন না। অথচ আজ নিয়মভঙ্গ হয়েছে।

গহনের চোখে সপ্রশ্ন কৌতূহল। কিছু জিজ্ঞাসা করার আগেই কণা জবাব দিয়ে দিলেন—‘যুঁটু এসেছে। তোমার সঙ্গে কথা বলতে চায়। অসিতদা খুব অসুস্থ হয়ে পড়েছেন।’

শেষ বাক্যটা বলার সময় তার মুখে আন্তরিক উদ্বেগের ছাপ পড়ল। গহন তার দিকে অপলকে বেশ কিছুক্ষণ তাকিয়ে থাকেন। তারপর চিন্তিত, মছুর স্বরে বললেন—‘তুমি যাও, আমি দু-মিনিটের মধ্যেই আসছি।’

কণা আর কথা না বাড়িয়ে চলে গেলেন। গহন চেয়ারে বসে কী যেন চিন্তা করছেন। অসিতদার কথা মনে পড়তেই চোখ ঝাপসা হয়ে এসেছে। বৃকে স্মৃতির উকিঝুকি। অসিতদা, তথা অসিতবরণ চৌধুরী একসময়ে তাদের হিরো ছিলেন। চেহারাটা এখনও স্পষ্ট মনে আছে। তপ্ত কাঞ্চনবর্ণ বলতে যা বোঝায় তার গায়ের রংটা ঠিক তাই। লম্বা একহারা চেহারা। সাদা ধবধবে পাটভাঙা ধুতি-পাঞ্জাবি, ব্যাকব্রাশ করে আঁচড়ানো চুল, ক্লিন শেভ করা নীলচে গাল, সবসময়ই পান খেয়ে ঠোঁট দুটো লাল করে বসে থাকতেন। শিরায় জমিদারি রক্ত ছিল। তার ওপর কট্টর কমিউনিস্ট। অসম্ভব আদর্শবাদী তাই হয়তো চিরকালই অদ্ভুত, খামখেয়ালি। সাহিত্যের ওপর প্রতিষ্ঠানের প্রভাব মানতেই চাইতেন না। রীতিমতো ভীষ্মের প্রতিজ্ঞা করে বসেছিলেন, যে বড়ো বড়ো নামকরা পত্রিকায় কিছুতেই লিখবেন না। এ প্রসঙ্গে অনুযোগ করলেই বলতেন—‘কেন, ওরা ছাড়া দেশে কোনো পত্রিকা নেই নাকি? আমি বুর্জোয়াদের জন্য কবিতা লিখি না। সাহিত্য করলেই কয়েকটা মুষ্টিমেয় প্রতিষ্ঠানের বশ্যতা স্বীকার করতে হবে? অসম্ভব! পারব না.....।’

গহন দীর্ঘশ্বাস ফেলেন। তেজ আর জেদ— দুটোই ছিল অসিতদার। নিজের সর্বস্ব দিয়ে জন্ম দিলেন এক নতুন পত্রিকার। জন্ম নিল ‘নকশীকথা’। সমস্ত তরুণ উদীয়মান কবি সেখানে লিখতে শুরু করল। তাদের মধ্যে গহন ছিলেন অন্যতম। অসিতদা তাকে একটু বেশিই ভালোবাসতেন। বলতেন ‘আমার অর্জুন’। বেশি ভালোবাসতেন বলেই বোধহয় বেশি ঘৃণাও

করতে পেরেছিলেন। পশ্চিমবঙ্গের সবচেয়ে বড়ো সাহিত্য পত্রিকা—‘স্বদেশে’-র শারদীয়া সংখ্যায় যখন গহনের দীর্ঘ কবিতা ছাপা হল তখন অসিতদার ফরসা মুখ রাগে লাল হয়ে গিয়েছিল। প্রচণ্ড রাগে চিৎকার করতে করতে বলেছিলেন—‘শেষ পর্যন্ত তুইও প্রতিষ্ঠানে যোগ দিয়েছিস। তোর মধ্যে লোভ আছে। লোভী! বিশ্বাসঘাতক! বেরিয়ে যা...এই মুহূর্তে বেরিয়ে যা। তোর মুখ আর কোনোদিন দেখতে চাই না। বেরিয়ে যা...।’ তার তর্জনী নিষ্ঠুরভাবে দেখিয়ে দিয়েছিল দরজাটা। মাথা নীচু করে সেই দরজা দিয়েই বেরিয়ে এসেছিলেন গহন।

‘নকশীকথা’র দরজা তার জন্য হয়ে গিয়েছিল। অসিতদার ওপর নিবিড় অভিমানে তাকে আর কোনোদিন মুখ দেখাননি তিনি। অথচ এই অসিতদাই গহনের বিয়ের সময় বাবার জায়গা নিয়েছিলেন। কণাকে আশীর্বাদ করে বলেছিলেন—‘কবির বউ হয়েছ মা, স্বামীর ভালোবাসা ছাড়া আর সবকিছুই ঘরে বাড়ন্ত থাকবে। শাঁখা, সিঁদুর আর জলজ্যাস্ত পতিদেব ছাড়া অন্য কোনো অলংকার পাওয়ার সম্ভাবনাও কম। কষ্ট করতে পারবে তো?’

ভাবতেই বুক খাঁখাঁ করে উঠল। সেই মানুষই কী নির্মমভাবে তাড়িয়ে দিয়েছিলেন তাকে। ‘নকশীকথা’র আর ফিরে যাননি গহন। কিন্তু খবর রেখেছিলেন। প্রায় দশ বছর ধরে উদয়াস্ত খেটে, ম্যাগাজিনটাকে দাঁড় করিয়ে দিয়েছিলেন অসিতদা। তারপর আচমকাই ‘নকশীকথা’ থেকে সরে দাঁড়ালেন। প্রথম প্রথম ছোটোখাটো কয়েকটা লিটল ম্যাগাজিনে তার কবিতা নিয়মিত ভাবেই ছাপা হত। তারপর আস্তে আস্তে কবে যে বিস্মৃতির আড়ালে চাপা পড়ে গেলেন তার খবর আর কেউ রাখে না।

চোখে বাষ্প জমে এসেছিল। আলগোছে চোখ মুছে নিলেন। তারপর উঠে গেলেন বসার ঘরের দিকে। ঘুঁটু ওরফে অধীর তরফদার তাকিয়ায় ঠেস দিয়ে বসেছিল। নকশীকথার আমল থেকেই দুজনের আলাপ। দুজনেই প্রথমে অসিতদার আদর্শে অনুপ্রাণিত হয়ে চলতে শুরু করেছিল। ঘুঁটু ডাকনামটা অসিতদারই দেওয়া। গহনকে তাড়িয়েছিলেন অসিতদা। আর ঘুঁটু নিজেই সরে গিয়েছিল।

বর্তমানে সে একটা বিরাট সাহিত্য প্রতিষ্ঠানের সম্পাদকীয় বিভাগে চাকরি করে। কবিতা বিভাগটা দেখে। মোটা টাকা মাইনে পায়। সেই গ্রামের গোবেচারা ঘুঁটুকে এখন আর চেনাই যায় না! এখন সে দস্তুরমতো সম্মানীয় শ্রীযুক্ত অধীর তরফদার।

ঘুঁটু এই ক-বছরে বহুরে প্রায় দ্বিগুণ হয়েছে। অতিরিক্ত মেদবাঙ্কল্য আর উত্তেজনার যুগপৎ আক্রমণে সে ঘামছিল। গহনকে দেখে রুমালে মুখ মুছতে মুছতে হাঁসফাঁস করে বলল— ‘শুনেছিস?’

গহন শান্তভাবেই তার মুখোমুখি চেয়ারটাতে বসে পড়েন— ‘কী হয়েছে?’

—‘সেরিব্রাল’ ঘুঁটুর ডাবল চিন্ নড়ে ওঠে— ‘গত বৃহস্পতিবার রাত্রে বাথরুমে যেতে গিয়ে পড়ে গিয়েছিলেন। সঙ্গে সঙ্গেই হাসপাতালে আই.সি.ইউতে অ্যাডমিট করতে হয়েছিল। শরীরের ডানদিকটা একদম পড়ে গেছে বুঝলি! তবে ডাক্তাররা বলেছে প্যারালিসিস হওয়া একদিক দিয়ে ভালোই। প্রাণের আশঙ্কা নেই। এখন অবশ্য জেনারেল বেডে দিয়েছে....।’

ঘুঁটু আরও কত কি বকবক করে বলে গেল কে জানে। গহন কিছুই শুনেছিলেন না। তিনি ভাবছিলেন অসিতদার ডানহাতটা অসাড় হয়ে গেছে। আর কবিতা লেখা হবে না তার।

—‘দাজি কাল তোর কথা খুব বলছিলেন।’ সে একটু কুণ্ঠিত স্বরে বলে— ‘একবার দেখতে যাবি?’

তার কথা শুনে ভেতরে ভেতরে কঁকড়ে গেলেন গহন। এতদিন বাদে অসিতদার মুখোমুখি হতে পারবেন কি! যে পথ দিয়ে তিনি হেঁটে গিয়েছিলেন, গহন সে পথে কোথায়? আজ তিনি অসিতদার চেয়ে অনেক উঁচুতে উঠে গেছেন। সে উচ্চতা থেকে মানুষটাকে দেখাও যায় না।

অথচ সেই মানুষটার মুখোমুখি দাঁড়াতে ভয় পাচ্ছেন আজকের প্রতিষ্ঠিত কবি! এ কি ভয়, না লজ্জা! আদর্শচ্যুত হওয়ার লজ্জা কি প্রতিষ্ঠার চেয়েও বড়ো!

—‘দ্যাখ’ ঘুঁটু তার কাঁধে হাত রেখেছে—‘আমিও জানি দাজি তোর সঙ্গে অন্যায় করেছেন। একটা সামান্য ব্যাপারে তোকে অপমান করেছিলেন। কিন্তু এখন ওসব মনে রাখার সময় নয়...।’

সত্যিই কি অসিতদা অন্যায় করেছিলেন! ন্যায়-অন্যায়, মান-অপমান মনে পুষে রাখার লোক নন গহন। তবু কোথায় যেন একটা কুণ্ঠা, একটা আত্মগ্লানি তাকে চেপে ধরে।

তার আত্মনিমগ্ন চোখদুটোর দিকে তাকিয়ে যেন হতাশ হয়ে পড়ল ঘুঁটু। কাতরস্বরে বলে— ‘একবার যাবি না গহন?’

বুকের ভেতরে কঁচ করে কী যেন একটা বিঁধল। একটা সুস্বল্প অথচ তীক্ষ্ণ ব্যাখ্যা টের পেলেন। ঘুঁটুর দিকে তাকাতে গিয়েই চোখ পড়ল আয়নায়। দামি কাচে কণার প্রতিচ্ছবি। দরজার আড়ালে দাঁড়িয়ে সব কথা শুনছেন তিনি। দু-চোখে জলভরা মেঘ নিয়ে তাকিয়ে আছেন স্বামীর দিকেই। যেন জানতে চাইছেন ‘আর কত পালাবে?’

গহন একমুহূর্তের জন্য চোখ বুজলেন। জোরালো একটা শ্বাস টেনে বললেন—‘চল’।

‘এখন চারদিকটা কেমন যেন কালো কালো ঠেকে!

যেদিকেই হাতড়াই, খালি অশরীরী ছায়া টেনে ধরে নির্বাক,

একটা কালো নদী খোলস পালটেছে—

কালোকে মাঝেমধ্যে লাল দেখি।

নদীটা হাত ফসকে মিলিয়ে গিয়েছিল

ডালিম গাছের পাতার ফাঁকে—পাখির ঠোঁটে টুপ করে

ঝরে পড়ে দুটো—একটা দানা চুনী চুনী।

এখন চতুর্দিকে শুধু ভাঙাভাঙির শব্দ,

কাচ ভাঙছে। তার পিছনে ঝাপসা ঝাপসা মুগ্ধ

বেঁকেচুরে ভেঙে যাচ্ছে। প্লেট টেকটনিক

তত্বই আসলে সত্যি। আমাদের পায়ের তলায়,

মাটি ভেঙে টুকরো টুকরো প্লেট হয়ে যায়।

তারপর ধাক্কাধাক্কি ভাঙাভাঙি।

ভেঙে যায়... ভেঙে যায়

ছড়িয়ে ছিটিয়ে পড়ে গুঁড়ো গুঁড়ো হয়ে।

তারপরও আমাদের বুড়ো বটগাছটা
 কালো ভূতের মতো চূপ করে দাঁড়িয়ে থাকে।
 শিমশিম করে দুলে ওঠে প্রাচীন শিরা।
 ব্রহ্মদত্তির ভয় দেখাতে চাওয়া
 লাল-লাল চোখ নিরস্ত হয়ে মিশে যায়
 মাটিতে। গভীর শিকড়ে গুঁড়ো গুঁড়ো ঘামের মতো মাটি আঁকড়ে,
 গ্রাম আঁকড়ে, দেশ আঁকড়ে, বিশ্ব আঁকড়ে
 দাঁড়িয়ে থাকা চারকোল ছবি দেখতে চাই।
 অন্ধকার কি নেমেছে বসুন্ধরা?’

হাসপাতালের বেড়ে একটা কঙ্কাল শুয়েছিল।

অসিতদা নয়, অসিতদার কঙ্কাল। অত লম্বা মানুষটা যেন ককড়ে ছোটো হয়ে গেছেন। এখন দেখলে আর কেউ বলবে না, যে- কোনোদিন তার নায়কের মতো চেহারাও ছিল। কোথায় সেই পুরুষালি সৌন্দর্য! তার বদলে যেন কেউ একটা প্রাচীন ঐতিহাসিক ফসিলকে শুইয়ে রেখেছে। ডান হাতটা নিঃসাড় হয়ে আছে বুক ঘেঁষে। মুখের একদিক বেঁকে গেছে। বাঁ হাতটা বেডের সঙ্গে দড়ি দিয়ে বাঁধা! অস্মিজেনের নল, স্যালাইনের বোতল, ক্যাথিটার, — আরও কত উপসর্গ ছুঁচ ফুটিয়ে রয়েছে গোটা শরীরে।

গহন স্তম্ভিতের মতো একদৃষ্টে তাকিয়েছিলেন অসিতদার মুখের দিকে। সদাব্যস্ত নার্স এদিক-ওদিক ঘুরে তদারকি করছিল। তাকে জিজ্ঞাসা করলেন — ‘ওঁর হাত বেঁধে রেখেছেন কেন?’

নার্স বিরক্ত হয়ে উত্তর দেয়—‘কী করব? সুযোগ পেলেই অস্মিজন, স্যালাইন, চ্যানেলগুলো ধরে টেনে খুলে ফেলার চেষ্টা করছেন। তাই বাধ্য হয়েই হাত বেঁধে রেখেছি।’

অসিতদার কথা বলতে কষ্ট হচ্ছিল। শব্দগুলো স্পষ্ট নয়—ক্রমাগতই জড়িয়ে যাচ্ছে। তার মধ্যেই কোনোমতে বললেন—‘গহন, আমি শিউলির গন্ধ নিতে চাই। এখানে শুধু মেডিসিনের উৎকট গন্ধ!’

শিউলি! এই গরমের মরশুমে শিউলি কোথায়! গহনের স্পষ্ট মনে পড়ে, অসিতদার বাড়ির সামনে একটা শিউলি গাছ ছিল। শরৎকাল এলেই বাড়ির সামনের পথ, উঠোন অবধি সাদা হয়ে থাকত। রোজ ভোরে অসিতদা ফুল কুড়িয়ে নিয়ে একটা বাটির মধ্যে জলে ভিজিয়ে রাখতেন। সেই মিষ্টি গন্ধটা আজও যেন টের পান তিনি। গলার কাছে অদ্ভুত ব্যথাবোধ জমাট বেঁধেছিল। অসিতদার দিকে চোখ তুলে তাকাতেও পারছিলেন না। অপরাধবোধ তাকে একটু একটু করে গ্রাস করছিল।

—‘আমি আপনাকে শিউলি ফুল এনে দেব দাজি’।

শীর্ণ মুখটায় শিথিল হাসি ফুটল। একটু চূপ করে থেকে যেন দম নিয়ে নিলেন। তারপর ফের অস্পষ্ট জড়ানো কণ্ঠস্বরে বলেন—‘তোর কাছে কাগজ-কলম আছে?’

গহনের কাছে সবসময়ই একটা রাইটিং প্যাড থাকে, তিনি ব্যাগ থেকে সেটাকে বের করে এনেছেন। নার্সটি তীক্ষ্ণচোখে গোটা ব্যাপারটাই দেখছিল। এবার খনখনে গলায় বলে—‘বেশি কথা বলবেন না। ডাক্তারবাবুর বারণ আছে।’

অসিতদা হাসলেন। মুখটা বেঁকে যাওয়ায় হাসিটাও বাঁকা ঠেকল। গহন কাগজ-কলম নিয়ে তৈরি। অসিতদা চোখ বুজে কিছুক্ষণ কী যেন ভাবেন। তারপর আন্তে আন্তে স্বলিত উচ্চারণে একের-পর-এক লাইন বলে গেলেন। গহন যেন বাধ্য ছাত্রের মতো ক্লাসনোট নিচ্ছেন। মাথা নীচু করে লিখে গেলেন, পঙ্ক্তির পর পঙ্ক্তি।

—‘অঙ্কার কি নেমেছে বসুন্ধরা!’ শেষ লাইনটা অতিকষ্টে বলে চুপ করে গেলেন তিনি। পাঁজর সর্বস্ব বুকটা হাঁপরের মতো উঠছে নামছে। মানুষটাকে ভীষণ ক্লান্ত লাগছিল। শরীরটা হাসপাতালের ময়লা চাদরের সঙ্গে একবারে মিশে গেছে।

গহন চুপ করে তাকিয়েছিলেন তার দিকে। অসিতদা একসময়ে লিটল ম্যাগাজিনে দাপিয়ে বেড়াতেন। কবিতা-অন্ত-প্রাণ এই প্রচারবিমুখ কবি অনেক প্রতিষ্ঠিত নামী কবির চেয়েও ভালো লিখতেন। আত্মাভিমানী মানুষটার আজ আর কবিতা লেখার উপায় নেই! লিখতে চাইলেও অন্য কারুর শরণাপন্ন হতে হবে।

—‘কবিতাটা তুই বড়ো ভালো লিখতিস গহন।’ শ্বাস টানতে টানতে বললেন তিনি—
‘তবে আমি তোর থেকেও ভালো লিখতাম।’

সেই অহংকার! এ অহমিকা গহনের পরিচিত। তিনি অসিতদার চোখে এই প্রথম চোখ রেখেছেন। গর্তে ঢুকে যাওয়া চোখদুটোয় এক অমানুষিক দীপ্তি!

—‘কিন্তু তুই ঠিক রাস্তাটা ধরেছিলি। আই ওয়াজ রং!’

তিনি বিস্মিত হলেন! এ কী কথা বলছেন অসিতদা! এমন কথা কখনও তার মুখ দিয়ে উচ্চারিত হবে তা দুঃস্বপ্নেও ভাবেননি। নির্বাক, বিহুল দৃষ্টিতে দেখেছেন তাকে।

—‘অনেকক্ষণ কথা বলছেন দাজ্জি। এবার একটু রেস্ট...।’

—‘ভাবছিস বুড়োকে ভীমরতিতে ধরেছে! খুব কষ্ট করে বাঁকা হাসিটা হাসলেন অসিতদা। একটু দম নিয়ে ফের বলেন —‘সারাজীবন প্রতিষ্ঠানের বিরুদ্ধে স্লোগান তুলে জেহাদ করে এলাম। প্রতিষ্ঠানের পোষা কবি বলে তোকে তাড়লাম, নকশীকথার পিছনে সবকিছু ব্যয় করেছি আমি। অথচ...।’

—‘দাজ্জি, এখন ওসব কথা থাক...।’

—‘নাঃ, বলতে দে।’ হাঁফাতে হাঁফাতে বললেন তিনি—‘কনফেশনের দরকার আছে। হয়তো সময় পাব না...।’

কি বলবেন গহন! অসহায় দৃষ্টিতে শীর্ণকায় মানুষটির দিকে তাকিয়ে আছেন। সেরিব্রাল অ্যাটাকে আক্রান্ত রোগীর এত কথা বলা উচিত নয়। কিন্তু অসিতদাকে সে কথা কে বোঝাবে!

—‘নকশীকথা আমার সন্তানের মতো ছিল। প্রতিষ্ঠানের বিরুদ্ধে প্রতিবাদের হাতিয়ার। ভেবেছিলাম খুব প্রতিবাদ করছি। বুর্জোয়াগুলোকে দেখিয়ে দেব সাহিত্যের ক্ষেত্রে গোষ্ঠীই শেষ কথা নয়। কিন্তু...।’ রুগ্ণ মানুষটার চোখদুটো জলে ভরে এসেছে—‘কয়েকবছর পরে বুঝলাম আসলে আমিও আর-একটা ফ্র্যাঙ্কেনস্টাইন তৈরি করেছি! প্রতিষ্ঠান, গোষ্ঠীর বিরুদ্ধে যেতে গিয়ে নিজের অজান্তেই কখন যেন আর-একটা প্রতিষ্ঠান তৈরি করে ফেলেছি। আমারই হাতে তৈরি হয়েছে আরও একটা বুর্জোয়া গোষ্ঠী—সেই লবি-অ্যান্টিলবির ঘণিত গল্প! যা আন্তরিক ভাবে চিরকাল ঘৃণা করে এসেছি—আমিও সেই গোষ্ঠীবাদেরই জনক।’

গহন নির্বাক শ্রোতা। এত যন্ত্রণা অসিতদার মধ্যে ছিল! যে লোকটা কোনোদিন কোনো পরিস্থিতিতেই হার মানেনি, আজ সে কী বলছে! তার একান্ত পরাজয়ের গ্রানিময় ইতিহাস এতদিন নৈঃশব্দ্যের পিছনেই লুকিয়ে ছিল। আজ বুকফাটা হাহাকার হয়ে বেরিয়ে এসেছে।

—‘আজ তুই কোথায়, আর আমি...।’ অসিতদা যেন ভেতরে ভেতরে কাঁদছেন—‘আমাকে কেউ চিনল না গহন....কেউ জানল না আমার কথা...আমি হারিয়ে গেলাম....হারিয়েই গেলাম...।’

অসিতদার দিকে তাকিয়ে হঠাৎ পিতামহ ভীষ্মের কথা মনে পড়ে গেল গহনের। নিজেরই প্রতিজ্ঞার ফাঁদে জড়িয়ে পড়া পৌরাণিক বীরটিও কি গোপনে গোপনে এমনই কেঁদেছিলেন? অস্তিম মুহূর্তে তার মনেও কি আপশোশ কামড় বসায়নি?

বাদবাকি সময়টা নীরবেই কাটল। অসিতদা অবসন্নের মতো বিছানায় পড়ে রইলেন। এরপর আর একটা কথাও বলেননি। গহনও ভারাক্রান্ত মনে, সজল চোখে তার মুখের দিকে তাকিয়েছিলেন। অপরাধবোধটা দ্বিগুণ বেড়েছে। সবচেয়ে বিড়ম্বনা, এ বেদনার কোনো নিদান নেই। সান্ত্বনা, ভরসা, স্তোকবাক্য—কোনোটাতেই এ যন্ত্রণা কমানো সম্ভব নয়।

ভিজিটিং আওয়ার্স শেষ হতেই তিনি ঘর থেকে বেরিয়ে এলেন করিডোরে। একরকম পালিয়েই এলেন। তার দেহও যেন অবসন্ন হয়ে আসছে। কোনোমতে সামনের একটা কাঠের চেয়ারে ধপ করে বসে পড়েন। মনে কোনো অনুভূতিই আর দাগ কাটছে না। দুঃখ, কষ্ট, রাগ, অভিমান—কিছুই না! শুধু খাঁখাঁ শূন্যতা।

ঘুঁটু এতক্ষণ বাইরে দাঁড়িয়ে ডাক্তারদের সঙ্গে কথা বলছিল। এবার গহনকে দেখতে পেয়ে এগিয়ে আসে। তার কণ্ঠস্বরে নিশ্চিততার প্রলেপ।

—‘দাজি এখন আউট অফ ডেঞ্জার। ডাক্তাররা বলছে— আপাতত কয়েকটা দিন খুব সাবধানে...। বলতে বলতেই থেমে গেল সে। গহনের ফ্যাকাশে মুখের দিকে তাকিয়ে আশঙ্কিত গলায় বলল— ‘গহন! কি হয়েছে!’

গহন তখন ভাবছিলেন, অসিতদাও ইচ্ছামৃত্যুর বর পেলেন না কেন!

‘আমরা কেউ মাস্টার হতে চেয়েছিলাম, কেউ ডাক্তার, কেউ উকিল।

অমলকান্তি সে-সব কিছু হতে চায়নি।

সে রোদ্দুর হতে চেয়েছিল!

ক্ষান্ত বর্ষণ কাক-ডাকা বিকেলের সেই লাজুক রোদ্দুর,

জাম আর জামরুলের পাতায়।

যা নাকি অল্প-একটু হাসির মতন লেগে থাকে।’

—‘অমলদা...।’

শুটকি আপনমনেই এককোণে বসে মদের গ্লাসে চুমুক দিচ্ছিল। এমনিতে সে বারে আসতে চায় না। কিন্তু আজ দায়ে পড়ে আসতে হয়েছে। জিনিসটা স্টকে রাখতে ভুলে গিয়েছিল সে। আজকাল প্রায়ই গুরুত্বপূর্ণ কাজের কথা মনে থাকছে না। কে জানে অ্যালঝাইমার হল কিনা!

অ্যালঝাইমারকে ভয় পায় না শুটকি। বরং যে মানুষ সবকিছু ভুলে যেতে পারে তার

চেয়ে সুখী আর কেউ নেই। স্মৃতি মানেই শুধু মৃত্যু, বেদনা, আঘাত। আজ পর্যন্ত স্মৃতির অন্য মানে জানতে পারল না সে।

শুধু একটাই দুঃখ। অ্যালঝাইমার হলে রুমার জন্য কবি হওয়ার স্বপ্নটাও ভুলে যাবে। সারাজীবন ধরে ওই একটা স্বপ্নই তো দেখছে। একদিন সে-ও কবি হবে। অমলকান্তি রোদ্দুর হতে পারেনি। কিন্তু শটকি কবি হয়েই ছাড়বে।

—‘ও অমলদা’।

পিছনের ডাকটা এবার জোরালো হয়েছে। শটকির হঠাৎ মনে পড়ে গেল যে তার পিতৃপ্রদত্ত নামটাও অমলকান্তি। শীর্ণ, কাঁকলাসের মতো চেহারার জন্য শটকি নামটা এমনই বহুল প্রচলিত, যে নিজের খানদানি নামটাই ভুলে গিয়েছিল। আজ মনে পড়তেই বেদম হাসি পেয়ে গেল তার। জীবনে ব্যর্থ হওয়ার জন্য বেছে বেছে এই নামটাই রাখতে হয়েছিল বাবা-মাকে!

—‘কোন শালা রে?’

ঘাড় ঘুড়িয়ে পিছনের লোকটাকে দেখার চেষ্টা করে শটকি। লোকটা এবার তার মুখোমুখি চেয়ারটাতে এসে বসেছে।

—‘খামোখা মুখ খারাপ করছ কেন? আমি স্বর্ণাভ।’

বিরক্তিতে নিজের অজান্তেই মুখ বিকৃত হয়ে আসে তার— ‘তুই এখানে কি করছিস? এখনও নোবেল দেওয়ার জন্য তোকে ডাকেনি?’

স্বর্ণাভ গুপ্ত এখনকার উঠতি তরুণ কবিদের অন্যতম। কী যে মাথামুগ্ধ কবিতা লেখে তা শুধু ও-ই জানে। অথচ হাস্যগ দি গ্রেট। কথায় কথায় বোদলেয়, চম্ক্ষি, এলিয়ট ভ্যালেরি আওড়ায়। বাংলা কবিতার নাম শুনলেই নাক সিঁটকানো এদের স্বভাব। শটকির ভীষণ বিরক্ত লাগে। যদি এত বড়ো সাহেবই হয়েছিস তো চানা-মটর চিবিয়ে ফরাসি বা ইংরেজিতে কবিতা লিখিস না কেন? কলম ধরলেই তো সেই ‘দীনা হীনা পিঁচুটি নয়না’ বঙ্গভাষার কথাই মনে পড়ে! যতসব হারামজাদার দল!

শটকির বক্রোক্তিকে পাত্তা না দিয়েই স্বর্ণাভ বলে— ‘তুমি এখানে যে! এ পাড়ায় তো তোমাকে দেখাই যায় না। ভুল করে চলে এসেছ বুঝি?’

—‘ঠিকই বলেছিস।’ সে উঠে দাঁড়ায়— ‘সত্যিই খুব ভুল হয়ে গেছে। চলি।’

—‘আরে...।’ স্বর্ণাভ তার হাত টেনে ধরেছে— ‘এখনই কোথায় যাচ্ছ? সবে তো কলির সঙ্কে। বোসো, আরও পাঁচ-ছ পেগ মেরে যাও। আমার ট্রিট।’

—‘পাঁচ-ছ পেগ!’ শটকি হেসে ফেলল— ‘ধূঁস, ওতে কি হবে? পাঁচ-ছ পেগে আমার ব্রেকফাস্টও কমপ্লিট হয় না!’

—‘ঠিক আছে, যত খেতে চাও, খাও।’ সে হাসছে— ‘বিল আমি দেব’।

শটকি ভুরু কঁচকে সন্দিক্ধ দৃষ্টিতে তাকে দেখে— ‘কেসটা কী বল তো! কখনও তো একটা বরফের গোলাও খাওয়াসনি! আজ একেবারে মাল! সত্যি সত্যিই নোবেল পেয়েছিস নাকি!’

স্বর্ণাভ কোলগেট হাসি হাসল— ‘নোবেল পাইনি বটে, তবে বেলতলায় যাচ্ছি, আই মিন, ছাঁদনাতলায় দাঁড়াচ্ছি’।

সে সরুচোখ করে ছেলেটাকে দেখছে। জগতে এমন মেয়েও আছে যে এই ফ্রেঞ্চলিশ গাধাটাকে বিয়ে করবে! এমনতেই তো আঁতেলের শিরোমণি। তার ও পর চেহারারও কী বাহার! মেয়েদের মতো পনিটেল রেখেছে। মুখ ভরতি উলুবনে চোখ নাক সবই ঢেকে গেছে। তার ওপর যা দশাসই একখানা পেটমোটা বপু! মেয়ের বাপ জগতে আর মানুষ খুঁজে পায়নি! শেষ পর্যন্ত এই গোরিলাটাকেই পেল।

—‘কী ভাবছ?’

—‘এই মুহূর্তে একটা কবিতা মাথায় সুড়সুড় করছে।’ শূটকি খলখল করে হেসে উঠেছে—
‘হি প্রিয়তম,/ যদি হাতে দিলে তোমার ছবি/ হৃদয়ে দিলে প্রেম/ তোমার ওই হতকুচ্ছিত দাড়ি
কেন/ ছাড়িয়ে গেল ফ্রেম!’

—‘এটা কার কবিতা?’

—‘তোর বউয়ের!’ হাসতে হাসতে তার চোখে জল এসে পড়ে— ‘এখনও লেখনি। তবে তোকে বিয়ে করার পর শিয়োর লিখবে’।

—‘ধুস্!’ স্বর্ণাভ বলে—‘তোমাকে বলাটাই ভুল হয়েছে। ফ্রাস্ট লোকদের সুখবর শোনাতেই নেই।’

—‘ঠিক বলেছিস। ফ্রাস্ট লোকদের ফরাসি আর ইংরেজি কবিতা শোনাতে হয়’। শূটকি চোখ টিপল—‘আছে নাকিস্টকে?’

ব্যাস! স্বর্ণাভকে আর পায় কে! সে প্রথমে ফরাসি সাহিত্য নিয়ে একচোট বক্তৃতা দিতে শুরু করল। শূটকি খুব বাধ্য ছাত্রের মতো তাকিয়ে আছে ঠিকই। কিন্তু আদৌ লেকচার শুনছে না। তার লক্ষ্য বিনা পয়সায় আরও কয়েক পেগ মদ খাওয়া। এমন সুযোগ পেলে কেউ ছাড়ে?

ও প্রান্তে শিক্ষক তখন ফরাসি ছেড়ে বাংলা সাহিত্যের সঙ্গে ইংরেজি সাহিত্যের তুলনামূলক আলোচনা চালাচ্ছেন। যথারীতি বুম্পা লাহিড়ী, ভি.এস.নৈপল, অরশ্বুতী রায়, অরবিন্দ আদিগা—সমস্ত ঝলমলে নামগুলো উঠে আসতে শুরু করেছে। সে চিরকালই প্রমাণ করতে চায় যে তার মতো পণ্ডিত ব্যক্তি খুব কমই আছে। দুনিয়ার সব লেখক ও তাঁদের সমস্ত সৃষ্টি তার ঠোঁটস্থ।

—‘আচ্ছা, তুই ভর্না শ-এর লেখা পড়েছিস?’ আচমকা প্রশ্ন করল শূটকি— ‘শুনেছি ভদ্রমহিলা দারুণ লেখেন। একটুর জন্য বেচারির বুকারটা ফসকে গেল।’

—‘ঠিকই শুনেছ। অসাধারণ লেখিকা। আমি গুঁর অনেকগুলো লেখা পড়েছি’ স্বর্ণাভ আবার বক্তৃতা দিতে শুরু করেছে। সব পুরস্কারই যে যোগ্যতম ব্যক্তিকে দেওয়া হয় না, বরং এর পিছনে অন্য কোনো কেমিস্ত্রি কাজ করে, তার রীতিমতো ইতিহাস, স্ট্যাটিসটিক্স, রাজনীতি সহ যুক্তিনিষ্ঠ প্রমাণ দিয়েও ফেলল।

শূটকি ভাবলেশহীনভাবে গ্লাস শেষ করল। এটাই তার শেষ পেগ। আর এই কচকচি ভালো লাগছে না। কী কুক্ষণে যে, বারে এসেছিল! এই লোকটার পাল্লায় পড়তে হবে জানলে বোধ হয় কষ্ট করেও নির্জলা থাকতে পারত!

গ্লাসটা ঠক করে টেবিলের ওপর রেখে দাঁড়াল সে। স্বর্ণাভর কাঁধে হাত রেখে নেশাজড়িত আন্তরিক গলায় বলে—‘থ্যান্কস্ ভাই। তোর কাছ থেকে অনেকতথ্য পেলাম। বলতে পারিস

ঋদ্ধ হলাম। অনেস্টলি, স্পিকিং, ভর্ণা শ নামে কোনো মহিলা লেখালেখি করেন তা দশ মিনিট আগেও জানতাম না, বুকারের গল্পো তো দূর! এটা জাস্ট আমার বানানো একটা নাম। স্বর্ণাভ-র উলটো সংস্করণ। স্বর্ণাভ থেকে ভর্ণা শ। ভেবেছিলাম বোধহয় ওখানেই থামবি। কিন্তু তুই তো দেখছি মহিলার অনেকগুলো লেখাও পড়ে ফেলেছিস! কি আর বলব। ইউ আর রিয়েলি জিনিয়াস! এ ছেলে বাঁচলে হয়।’

কথাগুলো বলেই স্তম্ভিত স্বর্ণাভকে পিছনে ফেলে হনহন করে করে এগিয়ে গেল শুটকি। দরজার দিকে এগোতে এগোতেই গুনতে পেল স্বর্ণাভ বিড়বিড় করে বলছে— ‘শালা ঢ্যামনা’।

ফিচ করে হেসে ফেলল সে। লোকে রেগে গেলে তাকে ‘ঢ্যামনা’ই কেন বলে কে জানে। নেশা নেশাও হয়েছিল তার। সেইজন্যই বোধ হয় হাসিটা থামতেই চাইছে না। আপনমনেই ফিচমিচ করে হাসতে হাসতে শুটকি বারের বাইরে এসে দাঁড়ায়।

—‘স্যার।’ দারোয়ান তাকে স্যালুট ঠুকতে সে পকেট থেকে একটা নোট বের করে তাকে দেয়। তার সন্ধানী চোখ তখন নিজের গাড়িটা খুঁজছে। সারি সারি গাড়ির মধ্যে স্টিল কালারের জেনটা কোথায়! এখানেই পার্ক করেছিল? না অন্য কোথাও? নাকি বেশি নেশা হয়ে গেছে, তাই নিজের গাড়িটাকেই খুঁজে পাচ্ছে না!

তার রকমসকম দেখে দারোয়ানের সন্দেহ হয়। সে একটু কুণ্ঠিত স্বরে বলে—‘স্যার, স্টিল কালারের জেনটা কি আপনার ছিল?’

—‘হ্যাঁ আমারই।’ কথাটা অন্যমনস্ক ভাবে বলেই চমকে ওঠে শুটকি—‘ছিল মানে!’

—‘আপনাকেই একটু আগে আমি খুঁজছিলাম স্যার। কিন্তু খুঁজে পাইনি।’ দারোয়ান মাথা হেঁট করেছে—‘আপনি নো পার্কিং জোনে গাড়ি পার্ক করছিলেন। তাই পুলিশের গাড়ি ওটাকে তুলে নিয়ে গেছে!’

কেউ যেন ধড়াম করে একটা মস্ত গদা তার মাথায় বসিয়ে দিল। কথাটা বুঝতে কিছুক্ষণ সময় লাগল। কোনোমতে হতবিহ্বলভাবে বলে সে— ‘তুলে নিয়ে গেছে!’

—‘হ্যাঁ...স্যার।’

—‘হা-রা-ম-জা-দা!’ শুটকি অদ্ভুত আক্রোশে ছুটে গেল বাইরের দিকে। মেইন রোডের ওপর দাঁড়িয়ে চ্যাচাতে চ্যাচাতে হারা উদ্দেশ্যে অশ্রাব্য গালিগালাজ দিতে শুরু করল।

—‘শালা, বাধেগাত....বোকাচোদা...তুলে নিয়ে যাওয়ার জন্য তোরা আমার গাড়িটাই পেয়েছিলি! ... যতসব ভুঁড়িওয়ালা ঘুসখোরের দল...’

আরও কিছুক্ষণ শ-কার, ব-কার, ম-কারের বন্যা বইয়ে শেষ পর্যন্ত শান্ত হল শুটকি। গালাগালি দেওয়ার চোটে তার মুখে ফেনা জমে গেছে। আস্তে আস্তে উত্তেজনা প্রশমিত হয়। রাস্তায় দাঁড়িয়ে লম্ফঝম্প করে যে বিশেষ লাভ নেই, দেরিতে হলেও একথা মাথায় ঢুকেছে। এখন সমস্যা একটাই। বাড়ি ফিরবে কী করে!

বাড়ির কথা মনে পড়তেই শুটকি নিজেকেই নিজে ভেংচি কাটে। বাড়ি কাকে বলে? ইট কাঠ পাথরের একটা নির্বোধ আশ্রয়। মাথার ওপর একটা ছাত আর চারদিকে মজবুত দেয়াল থাকলেই বাড়ি হল! আহা! বাড়ির কী ছিরি! অমন বাড়িতে ফেরার কী দরকার!

সে মনে মনে সিদ্ধান্ত নেয়, আত্ম আর বাড়ি ফিরবে না। এখন রাত প্রায় পৌনে বারোটো। যানবাহন পাওয়া যাবে না। ট্যাক্সিগুলোও বসে থাকে রিফিউজ করার জন্যই।

অতএব আত্ম আর ঘরে ফেরা নয়। কলকাতার রাস্তাতেই ঘুরে বেড়ানো যাক।

ভাবতেই মনে বেশ রোমাঞ্চ হল তার। রহস্যে ডুবে থাকা কলকাতার পথঘাট। কন্ট্রোলিনীর একদিকে হয়তো এত রাতেও আলোর উৎসব। এ শহর কখনও ঘুমোয় না। বরং গুটিকির মনে হয় মটকা মেরে পড়ে থাকে। যখন মধ্যবিশ্বের ঘরের আলো নেভে, তখনই অন্য কোথাও রহস্যময় আলো জ্বলে ওঠে। অন্ধরি-কিন্নরীর জমায়েত হয়,—স্বাভাবিক ভাবেই ‘দেবতা ঘুমালে তাহাদের দিন, দেবতা জাগিলে তাহাদের রাত’।

ইচ্ছে করলে গভীর রাতে রহস্যময় দিনটার খোঁজে যেতে পারত। কিন্তু ‘অমলকান্তি’দের সবই উলটো। তাই পথের দিকেই পা বাড়াল সে।

মেইন রোড প্রায় শুনশান হয়ে এসেছে। দু-পাশের সারসার ল্যাম্পপোস্টের আলোর ঔজ্জ্বল্যে যেন খানিকটা ম্লান। পিচের রাস্তার ওপর পিছলে পড়ে ক্ষীণ আভা তৈরি করেছে। একটা দুটো ল্যাম্পপোস্ট আবার অন্ধ! আলোর সারির মধ্যে ফোকলা দাঁতের মতো তাদের ব্যঙ্গাত্মক উপস্থিতি।

ফুটপাথের ওপর চাদর বিছিয়ে ভিথিরিরা গভীর ঘুমে কাদা। হলুদ আলোর পিঙ্গল আভায় শায়িত যেন তামাটে মূর্তি। কেউ একা, কেউ বা সপরিবারে। একপাশে দুটো ছোটো ছোটো বাচ্চাকে নিয়ে বাচ্চাদের বাপ ঘুমন্ত। তুলনামূলক বড়োটা পাশে। একেবারে চুন্মুন্মুটা বুকে। পাশের শিশুটিকে বড়ো সম্বন্ধে, সতর্কতার সঙ্গে অপেক্ষাকৃত নিরাপদ জায়গায় শুইয়েছে তার বাবা। যদি কোনো মদ্যপের বেসামাল গাড়ি কোনোভাবে ফুটপাথে উঠে পড়ে, তখন তার গাড়ির চাকা বাবার বুকেই আটকে যাবে।

গুটিকি কখন যেন অজান্তেই থমকে দাঁড়িয়ে গেছে। নিদ্রিত পরিবারটির দিকে তাকিয়ে কেমন যেন কান্না পেয়ে গেল। মাথার উপরে ছাত নেহ। নেই নরম বিছানার ওম্। তবু ঘুম আছে! ছাতওয়াল, দেওয়াল যুক্ত চৌকানো বাস্ফটা নেই। তবু বাড়ি আছে।

সে আরও অনেক কিছুই ভাবতে যাচ্ছিল। তার আগেই বুক পকেটের মোবাইল বেজে উঠেছে। গুটিকি তাড়াতাড়ি খানিকটা এগিয়ে গেল। মোবাইলের শব্দে বাচ্চাদের ঘুম ভেঙে যেতে পারে। প্রযুক্তির চিৎকারে সহৃদয় ঘুমের সর্বনাশ হোক্, তা চায় না।

‘সেলফোনের ডিসপ্লেতে গহনের নাম!’

—‘বল’

কলটা রিসিভ করতেই ও প্রান্তে বিষণ্ণ স্বর— ‘বিরক্ত করলাম না তো!’

—‘ফ্যাট শালা!’ গুটিকি ঝাঁপিয়ে ওঠে— ‘প্রেমিকাকে ফোন করছিস নাকি!’ ওসব কার্টেসি মেয়েদের দেখাস। গহন হেসে ফেলেন- ‘আর পালটালি না বাচ্চা!’

—‘আমি পলিটিশিয়ান না গিরগিটি!’ গুটিকির পায়ের কাছে একটা কোন্ড্রিংকে খালি বোতল পড়েছিল। সেটাতে একটা শট্ মেরে বলল সে- ‘তা ছাড়া তুই বা পালটেছিস কই? শালা যথারীতি এসকেপিষ্ট। কঠিন বাস্তবের সামনে পড়লেই ন্যাজ তুলে চৌ চা দৌড়! একদিকে লম্বা লম্বা দার্শনিক-ডায়লগ ঝাড়ুছিস ‘সমালোচনা চাই, হ্যানো চাই, ত্যানো

চাই, নইলে লিখতে পারছি না'...। অথচ উদ্মা বাড় খেলেই কুঁইকুঁই করতে করতে ব্যাকটু প্যাভিলিয়ন।

টেলিফোনের ও প্রান্তে গহন কতটা চমকে উঠলেন তা বোঝা গেল না। কিন্তু তার কণ্ঠস্বরে নিখাদ বিস্ময়— 'তুই জানলি কী করে?'

—'মধ্যরাত্রে এমন 'বা-জে কর্শ সুরে' মার্কা ভলিউম শুনলে জানার বাকি কি থাকে?' সে ভারি মজার খেলা পেয়েছে। গহনের সঙ্গে কথা বলতে বলতেই বোতলটা নিয়ে ফুটবল খেলছে। ফাঁকা বোতল কিক্ খেয়ে গড়গড় করে এগিয়ে গেল। পিছন পিছন এলোমেলো পায়ে শুটকি।

—'কুঁই কুঁই করছি না।' একটু চূপ করে থেকে বললেন গহন- 'কিন্তু এটা তো ঠিক, যে আমি কবিতা লিখতে পারছি না।'

—'কে বলল?' সে একটা লম্বা কিক্ মেরে বোতলটাকে সাইড করে— 'কেউ তো বলেনি যে ওটা কবিতা হয়নি। যদি বলতও তাহলেই বা কী হত? কোনটা কোনটা কবিতা নয়—তা ডিসাইড করার ধক সুপ্রিম কোর্টেরও নেই।'

—'তবু...।'

—'দ্যাখ গহন। তবু, যদিও এখানে কোনো সিন্ নেই।' শুটকি বলল... 'কবিতা তুই লিখিস কি লিখিস না—সেটা এখানে বড়ো কোনো ইস্যু নয়। আসলে তোর কবিতাটা কাউকে স্পর্শ করতে পারেনি। ইনফ্যাক্ট কারুর ভালো লাগেনি। সেটাই তারা অনেস্টলি বলেছে। তোর যদি খারাপ লাগে, তবে ওটার পাশে 'গহন দত্তগুপ্ত' ট্যাগ লাগিয়ে মাঠে নামিয়ে দে। ঝুড়ি ঝুড়ি ভুরি ভুরি প্রশংসা পাবি'। সে হাসে- 'তবে সেটা কবির নামের মাহাত্ম্য। কবিতার নয়।'

—'যারা আমার কবিতার সমালোচনা করছে তাদের কি আদৌ সে যোগ্যতা আছে শুটকি?' গহন উদ্বেজিত—'এককথায় যে একটা কবিতাকে 'বুলস্য বুল' বলে দেয়—সে কতটা পড়াশোনা করেছে, আদৌ করেছে কিনা, সে বিষয়ে সন্দেহ আছে। সে কি কবিতার সমালোচনা করার যোগ্য?'

—'হয়তো যোগ্য, হয়তো নয়। তাতে কি এল গেল?' বলতে বলতেই সে খিলখিল করে হেসে উঠেছে।

—'হাসছিস কেন?'

—'তোমার ইগো দেখে।' হাসতে হাসতেই বলল শুটকি—'এত ইগো থাকলে ইগো ধুয়ে খা। সমালোচনা চাই— সমালোচনা চাই' বলে দেয়ালা করছিস কেন?'

—'শুটকি!'

—'শুনতে যতই খারাপ লাগুক, কথাটা সত্যি।' বোতলটাকে ট্যাকল করতে করতে সে বলে —'যাঁরা বিজ্ঞ, বিশেষজ্ঞ এবং যোগ্যতম মানুষ— তাঁরা আদৌ কবিতার বই কিনে পড়েন না। এইসব অযোগ্য, নির্বোধ লোকগুলোই কলেজস্ট্রিটে গিয়ে ভিড় করে তোর কবিতার বই কেনে। এই লোকগুলোর জন্যই তোর ঘরে মোটা রয়্যালটি আসে। বই বেস্ট সেলার্সের লিস্টে জায়গা পায়। যাদের তুই সবচেয়ে অপ্রয়োজনীয় ভাবিস, সেই লোকগুলোই আসলে সবচেয়ে বেশি প্রয়োজনীয়। কবিতার টেকনিক্যাল চুলচেরা বিশ্লেষণ করে হাড়, মাংস, কঙ্কাল ঘেঁটে ঘেঁটে আঁতলেমি করার ক্ষমতা হয়তো তাদের নেই। কিন্তু অনুভব তারাই বেশি

করে। টেকনিক্যাল নয়, কবিতার নিটোল সার্বিক আবেদনটাই তাদের কাছে বড়ো কথা।’

ও প্রান্তে গহন কিছুক্ষণ চুপ করে থাকেন। তার নীরবতার কারণ বুঝতে পারল শুটকি। মুচকি হেসে বলে— ‘তোর ধারণা ঠিক। আমিও আছি ওই আকাট মুখ্য লোকগুলোর দলে। তোর কবিতাটাও পড়েছি। মাইরি বলছি। ‘বুলস্য বুল’ একদম পারফেক্ট বিশেষণ।

কবির কণ্ঠস্বর সন্দিক্ধ ‘কী নামে আছিস?’

—‘সেটা ক্রমশ প্রকাশ্য।’

তিনি বিরক্তিতক্ত কণ্ঠস্বরে বলেন— ‘আর এখানে কবিতা দিতে ইচ্ছে করছে না। কে— কোথাকার একটা ‘রামহনু’ ফের এসে লিখে দিয়ে যাবে ‘বুলস্য বুল কবিতা’

—‘কেন লিখবে? রামহনু’র তোর সঙ্গে কোনো পার্সোনাল স্কার নেই। তাহলে সে খামোখা কথায় কথায় বাজে মন্তব্য করবে কেন? ভালো লিখলে ভালো কমেট্টই দেবে। অবশ্য সত্যিই যদি তুই ‘বুলস্য বুল’ লিখিস তাহলে আর কী করা!’

বোতলটাকে একটা দূরপাল্লার শট মারতেই সেটা ড্রেনে গিয়ে পড়ল। হতাশ হল শুটকি। যাঃ ...এমন মজাদার খেলাটা ভেসে গেল!

—‘তুই কচি খোকাটি নোস। সমালোচনা, চ্যালেঞ্জ চেয়েছিলি, পেয়েছিস। যদি চ্যালেঞ্জটা নেওয়ার সাহস না থাকে তাহলে বৃথা কান্নাকাটি কেন?’

—‘কীসের চ্যালেঞ্জ?’

—‘নো ওয়ান’ থেকে ‘বেস্ট ওয়ান’ হওয়ার চ্যালেঞ্জ। ‘বুলস্য বুল’ থেকে ‘কুলস্য কুল’ হওয়ার চ্যালেঞ্জ। যেটা বৃহত্তর ক্ষেত্রে করেছিস, সেই লড়াইটাই একটা ছোটো জায়গায় করতে হবে। সে হাসল— ‘মাস্টার্সে ফাস্ট-ক্লাস-ফাস্ট পাওয়ার পর যদি মাধ্যমিক পরীক্ষা দিতে ভয় করে, তবে তুই কোথাকার ফাস্ট ক্লাস ফাস্ট? আর কেনই-বা তুই গহন দত্তগুপ্ত? গঙ্গু তেলি আর তোর মধ্যে পার্থক্য কোথায়?’

বলতে বলতে এবার হঠাৎই বিরক্ত হয়ে বলল সে — ‘শোন, আমি এখন রাস্তায় হাঁটছি। জব্বর হিসি পেয়েছে। আর চাপতে পারছি না। ছাড়ছি।’

লাইনটা কেটে গেল। শুটকি একটু এদিক-ওদিক দেখে নেয়। আশপাশে কেউ নেই। রাস্তার পাশে একটা গাছের তলায় হালকা হওয়ার জন্য দাঁড়িয়ে পড়ল সে। লোকে দেখলে খিস্তি দেবে। পুলিশ দেখলে রুল উঁচিয়ে তাড়া করবে। কিন্তু অন্যান্য কি করেছে? গাছের গোড়ায় সামান্য ইউরিয়াই তো ঢালছে। তেমন হলে কালকে না হয় এখানে আরও একটা গাছের চারা লাগিয়ে যাবে।

—‘অ্যাই শালা।’

পিছনে একটা বাইকের শব্দ। আর পরক্ষণেই একটা চাপা অথচ রুঢ় স্বর শুনে ঘাবড়ে গেল শুটকি। পুলিশে ধরল নাকি! এতরাত্রেও ব্যাটারা চরে বেড়াচ্ছে!

সে পিছনে তাকায়। পুলিশ নয়, দুটো ছেলে। মুখ কালোকাপড়ে বাঁধা। একটার হাতে উদ্যত ভোজালি। বিদ্যুতের মতো সামনে এসে তার গলায় ঠেকিয়ে বলল— ‘একদম চিল্লামিল্লি নয়। লোচা করলেই এই চিক্‌নি তোর গলা কাটবে! দামি জিনিস সঙ্গে যা যা আছে সব দে।’

ও! পুলিশ নয়! বরং উলটোটাই। যাক তাহলে ভয়ের কিছু নেই। শুটকি বিনাবাক্য ব্যয়ে

ওয়ালেটটা এগিয়ে দিল। দ্বিতীয় ছেলেটা এবার এগিয়ে এসে সেটা কেড়ে নিয়েছে। আস্তে আস্তে হাতের ঘড়ি, সোনার আংটি, সোনার চেন, দামি মোবাইল সবই শান্তভাবে দুর্বৃত্তদের হাতে তুলে দিল সে। ছেলেদুটো বোধহয় এরকম বামেলাহীন শান্তিময় সহযোগিতা অপর পক্ষের কাছ থেকে আশা করেনি। যে ভোজালি ধরেছিল সে ভ্যাবাচ্যাকা খেয়ে অল্পটা নামিয়ে নিয়েছে। দ্বিতীয় ছেলেটাও অবাক।

সমস্ত দামি দামি জিনিস হস্তান্তরিত করে এবার হঠাৎই শার্ট খুলতে শুরু করেছে সে।

—‘আবে- শালা ...কী করছিস ...?’

ছেলেদুটো হতভম্ব। শটকি শান্তভাবেই বলে—‘কেন? তোমরাই তো বললে দামি জিনিস সঙ্গে যা যা আছে সব দিতে।’

বলতে বলতেই প্যান্টও খুলে ফেলেছে — ‘সব দামি জিনিস তো দিতে পারব না। যেটুকু দিতে পারি দিলাম। নাও।’

ছেলেদুটো তখনও স্তম্ভিত। তাদের অবস্থা দেখে করুণা হল তার। সে আকাশের দিকে তাকিয়ে— ‘যে স্বপ্নটা আমি একদিন রেখে যাব ভাবছি সেটাই সবচেয়ে দামি...সেটা তো দিতে পারব না ভাই। তার চেয়ে বরং আমার জুতোদুটো, গেঞ্জি আর আন্ডারওয়্যারটাও...।

—‘সান্‌কি মাল! ... পুরো সান্‌কি!’

বলতে বলতেই প্রায় উর্ধ্বশ্বাসে দৌড় মেরেছে ছেলেদুটো। বাইকে স্টার্ট দিতে দিতেই দেখল, পাগল লোকটা ইতিমধ্যেই জুতো আর গেঞ্জিও খুলে ফেলেছে!

— ‘...শালা ফুলটু স্কু টিলা...।’

বাইকটা হুঁশ করে বেরিয়ে গেল। এমন করে তাড়াতাড়ি পালিয়ে গেল যেন একটা ভয়াবহ ডাইনোসোর তাদের তাড়া করেছে।

ফুটপাথবাসী দুটি বাচ্চার বাপ সেদিন মধ্যরাত্রে আচমকা ঠ্যালা খেয়ে ঘুম ভেঙে উঠে বসল। বিশ্বয়মাখা দৃষ্টিতে দেখল একটা কালো সিঁড়িঙ্গে চেহারার লোক শুধু একটা আন্ডারওয়্যার পরে সামনে দাঁড়িয়ে আছে। গায়ে বিলিতি মদের গন্ধ। সদ্য ঘুমভাঙা অবস্থায় এটা স্বপ্ন না বাস্তব বোঝার আগেই সে শুনতে পেল একটা কুণ্ঠিত স্বর। লোকটা সংকুচিতভাবে বলছে—

—‘তোমাদের পাশে একটু শোওয়ার জায়গা হবে ভাই?’

‘কবিতা ডটকম’ আজ সকাল থেকেই সরগরম! এককথায় বলতে গেলে রীতিমতো বাওয়াল শুরু হয়েছে এখানে! ঘটনাটা আর কিছুই নয়। মগনলাল নামের এক কবি ভয়াবহ একটা কবিতা পোস্ট করেছেন। আর সেটা—

নিয়েই শুরু হয়েছে টানা হাঁচড়া।

কবিতাটা অনেকটা এইরকম—

পাহাড়ের মাথা থেকে

জংলি বাইসনের নিতম্ব বারান্দায়—মস্তিষ্কে বরফ প্রলেপ!

জরায়ু যখন হেঁটে বেড়ায়, তখন

নগ্নতার একশো কুড়ি ডেসিবেলকে ঘৃণা করি।
 যে যৌনরমণী ঘুমন্ত পুরুষের দণ্ডটি নেড়েচেড়ে
 দেখেছিল, শাস্তিনিকেতনে তার ভিতরের উষ্ণতারস পাইনি।
 এখন শুধুই আঙুলে টিপে মারি অসহ্য উকুন।
 আর দিনগত পাপক্ষয়।

এখানেই বিতর্ক ও চাপানউতোরের শুরু।

শ্বেডের প্রথম কमेंটটাই ‘ফ্রাস্ট কবি’র। সে লিখেছে— ‘দাদা, আপনি মগনলাল না নগনলাল? কবিতাটা যে বুঝেছি তা বলতে পারছি না। কিন্তু কবিতা কাকে বলে তাও বেমালুম ভুলে গেছি।’

ঠিক তারপরেই ‘আকাশনীলের’ ফোড়ন— ‘হায় কবিতা কাহারে কয়?/ সে কি শুধুই যৌনতাময়?’

‘মুমতাজ’ বেশ সরল সাদাসিধে মিষ্টি পাঠিকা। সে বেচারি বলেই ফেলেছিল— ‘কবিতাটা ঠিক বুঝতে পারিনি। কেউ বুঝিয়ে দেবেন?’

তার উত্তরেই ‘কুবলাশ্ব’র বিস্ফোরক ভাবসম্প্রসারণ। সে বিশেষ অন্যান্য কিছু করেনি। শুধু ‘মুমতাজ’কে কবিতাটা বুঝিয়ে বলেছে।

অনেক ভেবেচিন্তে নিজের মতো করে যা মানে বের করেছে তা অনেকটা এইরকম—
 কবি পাহাড়ের মাথায় থাকা একটি সমকামী বাইসনকে নিজের প্রেমিকারূপে কল্পনা করেছেন। সেই সমকামী বাইসনের নিতম্বকে বারান্দা ভেবে তিনি বোধহয় পায়চারি করতে গিয়েছিলেন। সেইজন্য বাইসনটা খেপে গেছে। তাই পাহাড়ি লোকেরা তার মাথায় বরফের প্রলেপ দিয়ে রেখেছে, যাতে মাথা ঠান্ডা থাকে এবং কাউকে গুঁতিয়েও না দিতে পারে।

যেহেতু বাইসনটা সমকামী, সেহেতু তার জরায়ু থাকা-না-থাকা দুই-ই সমান। অগত্যা বিরক্ত হয়ে জরায়ুটা একা-একাই ইভনিং ওয়াকে বেরিয়েছে। বাইসনটা নগ্ন ছিল। স্বাভাবিক! তাকে জামাকাপড় বা মোজা কে পরাবে? সে নগ্ন অবস্থায় দাঁড়িয়ে একশো কুড়ি ডেসিবেলে গাঁ গাঁ করে জরায়ুকে ডাকছে। সেই ডাক কবির অসহ্য ঠেকছে।

সেই চিৎকার শুনতে শুনতেই তিনি বাইসনটিকে প্রেমিকার মতো করে কল্পনা করেছেন। যে মেয়েটি কবি ঘুমিয়ে পড়লে তার দাদুর লাঠিটা নেড়েচেড়ে দেখত এবং ভাবত, সেটা দিয়ে বাড়ি মারলে কবির মাথার ভিতরের জিনিসপত্তর বাইরে আসবে কিনা! আর এইরকম গাঁক গাঁক করে ঠেঁচিয়ে বলত— ‘আমি পেপসি খাব...পেপসি খাব।’ একেই কোম্পর্ড্রিংক তার ওপর বরফের প্রলেপ! তাই তার ভেতরে উষ্ণতারস পাননি কবি। অগত্যা তিনি মাথার উকুন বেছে বেছে মারছেন। অর্থাৎ টাইম পাস করছেন, যার এক্সপ্রেশন শেষ লাইনটা — ‘আর দিনগত পাপক্ষয়’।

কবিতাটা ভয়ংকর নিঃসন্দেহে। কিন্তু তার ভাবসম্প্রসারণটা আরও ভয়াবহ। মন্দার অনুভব করল ‘কুবলাশ্ব’-কে সে মনে মনে পছন্দ করতে শুরু করেছে। লোকটার এলেম আছে। এই কবিতাটার এমন ভয়ংকর ব্যাখ্যা বোধহয় একমাত্র তার পক্ষেই সম্ভব।

বলাই বাহুল্য মগনলালের সেটা বিশেষ পছন্দ হয়নি। সে এতক্ষণ অন্যান্য পাঠক ও কবিদের মস্তব্য কোনোরকমে দাতে দাত চেপে হজম করছিল। কিন্তু এবার আর সহ্য হল

না। সে চটে গিয়ে দশটা বেজে তিন মিনিটে মস্তব্য করল— ‘আপনি আমাকে অপমান করেছেন।’

কুবলাশ্ব’র উত্তর দশটা বেজে চার মিনিটেই কম্পিউটার স্ক্রিনে ভেসে উঠেছে— ‘আপনি কবিতার অপমান করেছেন’।

—‘মানে?’

—‘এরকম আপাদমস্তক হিজিবিজিকে আপনি কবিতা বলেন?’

—‘আমি যা-ই বলি। আমার কবিতার এরকম বিকৃত অর্থ করার অধিকার আপনাকে কে দিয়েছে? এ তো কবির স্বাধীনতায় হস্তক্ষেপ! কবির অপমান!’

কুবলাশ্ব একটা বত্রিশপাটি বার করা স্মাইলি দিল।

—‘আমি যদি বিকৃত অর্থ করে থাকি তবে আন্তরিক ক্ষমাপ্রার্থী। মুমতাজ ‘কবিতার অর্থ জানতে চেয়েছেন। আপনি যদি স্বয়ং কবিতাটির অর্থ জানিয়ে দেন তবে বাধিত হই।’

‘মগনলাল একটু থতোমতো খেয়ে গিয়ে উত্তর দেয়— ‘কবিতার কোনো মানে হয় না। কবিতা বোঝার জিনিস নয়, বাজার জিনিস।’

—‘সে আবার কী! কবিতা কি হারমোনিয়াম না—পাখোয়াজ, যে বাজবে! তা ছাড়া যখন লিখেছিলেন তখন নিশ্চয়ই কিছু ভেবে লিখেছেন। কী ভেবে লিখেছেন সেটাই অস্তুত শুনি। ছাত্রবন্ধু লিখতে বলছি না। শুধু একটু ক্ল হলেই চলবে।’

দিব্যি ‘ওয়ান-টু-ওয়ান’ তর্ক চলছিল। কিন্তু এর মধ্যে আবার স্বর্ণাভ গুপ্ত এসে টপকে পড়লেন। ইনি স্বনামেই লেখেন।

বুকনির চোটে টেকাই যায় না। সামনা-সামনি কখনও না-দেখলেও স্বভাব চরিত্র বুঝতে বাকি নেই মন্দারের। কথায় কথায় বাতেলা দেওয়াই তার স্বভাব। কিচ্ছু মানুষ আছে যারা ‘দেখ আমি কত জানি’ গোছের সাইনবোর্ড টাঙিয়ে বেড়ায়। স্বর্ণাভ গুপ্ত তাদের মধ্যে অন্যতম।

তিনি বোধহয় এতক্ষণ গোটা ব্যাপারটাই দেখছিলেন। এবার উড়ে এসে জুড়ে বসে গ্রাণ্ডারি মস্তব্য করলেন— ‘তার আগে একটা সিদ্ধান্ত নেওয়া যাক। কবিতা আসলে কার? কবির না পাঠকের?’

এরকম আলটপকা দার্শনিক মস্তব্যে ব্যোমকে গেল মন্দার। সে এতক্ষণ এই বিতর্কে কোনোভাবেই যোগদান করেনি। শুধু চুপ করে তামাশা দেখছিল। কোথাকার জল কোথায় গড়ায় সেটাই দ্রষ্টব্য।

কুবলাশ্বও ছেড়ে দেওয়ার পাত্র নয়। তার সপাট উত্তর— ‘কবিতা ততক্ষণ কবির, যতক্ষণ না সেটা পাঠকের দরবারে আসছে। মগনলাল যদি তার কবিতাকে ব্যক্তিগত সম্পত্তি বলে চালাতে চান, তবে খাতায় ভরে রাখলেই পারেন। অনলাইনে পোস্ট করার দরকার কী? যে মুহূর্তে ওটা পোস্ট হয়েছে, সেই মুহূর্তেই পাঠকও কবিতাটার সঙ্গে ইনভলভড হয়ে গেছে। এখন তাদের বক্তব্যও কবিকে শুনতে হবে বই-কি!’

—‘কাদের বক্তব্য? কোন পাঠকের? কবিতা অনুভবী ও শিক্ষিত পাঠকের জন্য। যারা কবিতার মানে জানতে চায় এমন লে-ম্যানদের জন্য নয়।’

পুরোপুরি 'বিলো দ্য বেস্ট' আক্রমণ। এতক্ষণ কবিতাটা নিয়েই কথা চলছিল। এবার স্বর্ণাভ গুপ্ত তর্কটাকে ব্যক্তিগত পর্যায়ে নিয়ে গেছেন। এতে আশ্চর্য হওয়ার কিছু নেই। উনি প্রায়শই এরকম করে থাকেন। আসলে ভদ্রলোক কবিতার চেয়ে লবিবাজিটাই বেশি পছন্দ করেন।

নিজের অজান্তে দীর্ঘশ্বাস ফেলল সে। কবিতার অন-লাইন সাইট হলেও এমন ভাবার কোনো কারণ নেই যে এখানে লবিবাজি নামক বস্তুটি অনুপস্থিত! বরং প্রিন্টেড মিডিয়া থেকে এখানে খামচাখামচি আরও বেশি। প্রকাশ্য জগতে মানুষগুলোকে চোখে দেখা যায়। তাই চক্ষুলজ্জাও থাকে। এখানে সেসব বালাই নেই। ছদ্মনামের আড়ালে তাই চামচাগিরি, লবিবাজি, লেঙ্গি মারামারির প্রবল সুযোগ। যারা প্রিন্টেড মিডিয়ায় বিশেষ কলকেটলকেপান না, তারাই এখানে বাঘ সেজে বসে থাকেন। আর সেইসব মহান দাদাদের গুণধর ভাই-বোনেরা পদলেহন শিল্পে কামসূত্রকেও টেকা দেয়।

আর লবিরও কী রকমফের। প্রবীণ কবি — নবিশ কবি, মহিলা কবি—পুরুষ কবি, শিক্ষিত কবি—অশিক্ষিত কবি। দাড়িওয়ালা কবি—দাড়ি ছাড়া কবি, প্রেমিক কবি—ব্যর্থপ্রেমিক কবি...উফফ! কবির থেকেও বোধহয় লবির সংখ্যা বেশি!

সেক্ষেত্রে মগনলালের হয়ে স্বর্ণাভ গুপ্ত মাঠে নামবেন—এতে আর আশ্চর্যের কী আছে। মগনলাল স্বর্ণাভ-র খাস চামচা। পরস্পরের পিঠ চুলকানো আর সাবাশি দেওয়াই ওদের কাজ। মন্দার জানে এবার খেলা জমে যাবে। স্বর্ণাভ-র অ্যান্টিলবি আকাশনীলও ঢাল তরোয়াল নিয়ে মাঠে নামল বলে। থ্রেডে পোস্টের সংখ্যা কয়েকশো ছাড়িয়ে যাবে। দিন গড়িয়ে রাত হয়ে যাবে। তবু মারপিট থামবে না। 'আমি তোর থেকে বড়ো কবি টিসুম' 'আমি তোর থেকে বেশি শিক্ষিত কবি গুদুম'...এই চলবে।

মন্দার এতকিছু ভাবতে ভাবতেই দেখল কুবলাশ্ব উত্তর দিয়ে দিয়েছে। পেজটা রিফ্রেশ করতেই স্ক্রিনে ভেসে উঠল তার জোরালো জবাব—'তাই নাকি? কিন্তু দাদা, কয়েকদিন আগেও তো আপনি এইসব লে-ম্যানদের জন্যই লিখেছেন। প্রশংসাও পেয়েছেন। ইনফ্যান্ট, শঙ্খ ঘোষ, শক্তি চট্টোপাধ্যায়ের কবিতাও আমরা অল্পবিস্তর বুঝতে পারি। তাহলে উক্ত কবিরাও লে-ম্যানদের জন্যই কবিতা লিখেছেন! সেক্ষেত্রে কী প্রমাণিত হয়? হয় মগনলাল তাঁদের থেকেও বড়ো কবি! নয় আস্ত একটি গান্ধাট অপদার্থ!

পুরো বাউন্সার! কুবলাশ্ব মেয়ে হলে বোধহয় তার প্রেমে পড়ত মন্দার। এই মুহূর্তে তাকে জড়িয়ে ধরে চুমু খেতে ইচ্ছে করছিল। একদম উপযুক্ত জবাব দিয়েছে ব্যাটা। কিন্তু একা কতক্ষণ যুদ্ধ করবে? কয়েকমিনিটের মধ্যে স্বর্ণাভ-র লবির লোকেরা হুড়মুড় করে এসে পড়ল বলে। কতজনের সঙ্গে তর্ক করবে কুবলাশ্ব!

সে ভাবছিল কুবলাশ্বকে ব্যাক-আপ দেওয়ার জন্য 'রামহনু' হয়ে মাঠে নেমে পড়বে কিনা। কিন্তু তার আগেই বাধা পড়ল।

আর্ট ডাইরেক্টর শাস্বত মুখখানা পুরো ট্রাকের তলায় চাপা পড়া প্লাস্টিকের ঠোঙার মতো করে এসে বলল— 'তুই এখানে বসে খুটখুট করে ল্যাপটপে কবিতা মাড়াচ্ছিস! ওদিকে হারামি পেডুলাম ঝাঁড়ের মতো চেপাচ্ছে।'

মন্দারের চোখের সামনে সঙ্গে সঙ্গে অদ্ভুত একটা দৃশ্য ভেসে উঠল। একটা কালো বাইসন একশো কুড়ি ডেসিবেলে গাঁক গাঁক করে ডাকছে!

সে ল্যাপটপ অফ করে ব্যাগের মধ্যে ভরে রাখল। ওয়্যারলেস কানেকশনের মডেমটাও যথাস্থানে চলে গেছে। ধীরেসুস্থে ব্যাগ গুছিয়ে বলে—‘চ্যা চাচ্ছে কেন? পুরো সিন তো কমপ্লিট করে দিয়েছি।’

—‘গাঁড় মারা গেছে সিনের!’ শাস্বত বিরক্ত —‘গোটা সিন ফের পালটাতে হবে। এক্ষুনি চল। শুয়োরের বাচ্চা কানের মাথা খেয়ে ফেলেছে। ওই তো বালের গল্পে লেখে! তার কি রোয়াব!’

মন্দার লক্ষ করে দেখেছে, এখানে কেউ খিস্তি না দিয়ে কথা বলতে পারে না। এত খিস্তি দেওয়ার কি আছে! শালীন ভঙ্গিতে কথা বললে কী এমন মহাভারত অশুদ্ধ হয়! গালাগালি খেয়ে এখানকার লোকেদেরও এমন অভ্যাস হয়েছে যে ভালো কথা ওদের পোষায় না। একবার এক স্পটবয়কে বলেছিল—‘ভাই, একটু চা হবে?’

তার পরিপ্রেক্ষিতেই স্পটবয়টির উত্তর — ‘শান্তিনিকেতনী মাল নাকি!’

—‘আমাদের কি লাইফ বল।’ শাস্বত আপশোশের সঙ্গে বলে— ‘শালা সব ঝাড়খন্ডি মাল। দিনরাত ঝাড় খেয়ে খণ্ড খণ্ড হয়ে মরছি। বাপের বড়ো মিষ্টির দোকান আছে শ্যামবাজারে। মাঝেমধ্যে ভাবি সব ছেড়েছুড়ে মিষ্টির দোকানেই বসি। এই ট্যামনাগুলোর খিস্তি খাওয়ার চেয়ে বরং বাপের ঝাড় হজম করা সহজ।’

মন্দার তার কথা শুনে দীর্ঘশ্বাস ছাড়ে। তার বাবা আবার ব্যাংকের ম্যানেজার। মিষ্টির দোকানও নেই যে-সব ছেড়েছুড়ে দিয়ে দোকানে বসবে! অগত্যা ঝাড় খাওয়াই তার কপালে আছে।

সেটের ভেতরে পেড্ডুলাম সতিই একটা খ্যাপা বাইসনের মতো ভাঁস ভাঁস করে যথারীতি ডাইনে-বাঁয়ে বেঁকতে বেঁকতে পায়চারি করছিল। দেখে মনে হল ওর নিতম্বে ও মস্তিষ্কে বরফ ঘষা দরকার। তাকে দেখেই এমন লাফিয়ে উঠল যেন পাছায় পিন ফুটেছে।

— ‘এই যে ক্যালানে কার্তিক!’ স্ক্রিপ্ট-এর গোছটা তার দিকে প্রায় ছুড়ে দিয়েছে পাশাদা— ‘এটা কী লিখেছিস শুয়োরের বাচ্চা? মাত্র একটা চুমু খেয়েই সেকেন্ড ভিলেন মরে যাবে। এটা স্ক্রিপ্ট না আমার শ্রদ্ধ?’

পেড্ডুলামের পাশেই বসেছিলেন সিরিয়ালের ডিরেক্টর আশুদা। তিনি অপেক্ষাকৃত ঠান্ডা মাথার মানুষ। সামান্য মাথা নেড়ে বললেন—‘মরার আগে অন্তত দু-মিনিটের ফুটেজ লাগবে। একটা চুমুতে দশ সেকেন্ডও কাটবে না। স্ক্রিপ্ট আরও একটা-দুটো সেক্সি সিকোয়েন্স নামিয়ে দে। অন্তত অল্পস্বল্প আদর-টাদব, অল্প ফস্টিনস্টি।’

মন্দার আড়চোখে দেখল, সেটে সুইমিং কস্টিউম পরে ভিজে গায়ে টাওয়াল জড়িয়ে দাঁড়িয়ে আছে তার স্বপ্নসুন্দরী উশ্রী। সেকেন্ড ভিলেন শুভাশিস সুইমিং পুলের পাশে পায়চারি করছে। সিকোয়েন্সটা বেশ উত্তেজক। সেকেন্ড ভিলেন নায়িকাকে এক্সপ্লয়েট করার প্ল্যান করে তাকে নিজের বাগানবাড়িতে এনেছে। কিন্তু নায়িকা আগেই সে প্ল্যানের কথা জেনে যায়। তাই সুইমিংপুলে নামার আগে কায়দা করে ভিলেনের মদের গ্লাসে বিষ মিশিয়ে দিয়েছে। তারপর নায়িকাকে জড়িয়ে ধরে একটা চুমু খেয়ে সে মরে যাবে।

এই তো সিন! একেবারে জলের মতো সহজ। কিন্তু সেখানেও ঝামেলা। মরার আগে দু-মিনিটের ফুটেজ চাই।

সে পেডুলামের দিকে তাকায়— ‘কিন্তু পাণ্ডা দু-মিনিট কোথা দিয়ে আসবে?’

পেডুলাম খ্যাক খ্যাক করে উঠল— ‘সেটাও আমি বলব পাগলা...।’ ফের একটা গালাগালি। মন্দারের কান-মাথা ধক করে গরম হয়ে ওঠে। তবু সে শাস্ত গলায় বলে— ‘আরে, কি বিষ দিয়েছ সেটা তো আগে দেখবে। পটাশিয়াম সায়ানাইডের একটা আস্ত অ্যাম্পুল! আমি তো তবু চুমু খাইয়েছি। লোকে তো পটাশিয়াম সায়ানাইড জিভে ঠেকিয়ে খাবি খাওয়ারও সময় পায় না! সেখানে দু-তিনটে চুমু! ইম্পসিবল্!’

—‘হোয়াট ইম্পসিবল্!’ পেডুলাম আরও জোরে চ্যাচাচ্ছে —‘তোকে কি ফরেনসিক সায়েন্সের ক্লাস নিতে বলা হয়েছে গান্ডু? আরও দু-মিনিটের ফুটেজ না হলে চলবে না, ব্যস্!’

কী আশ্চর্য! পটাশিয়াম সায়ানাইডের একটা গোটা অ্যাম্পুল খাওয়ার পরও দু-মিনিট বাঁচতে হবে লোকটাকে! সেকেন্ড ভিলেন তো অগ্যস্ত্য মুনি নয়, যে ইম্বল-বাতাপি-পটাশিয়াম সায়ানাইড, সব হজম করে মেরে দেবে!

কিন্তু সে কথা পেডুলামকে কে বোঝাবে? সে প্রায় হিড়িম্বা নৃত্য করতে লেগেছে— ‘বাস্তব-অবাস্তব বুঝি না! মেগা সিরিয়ালে বাস্তব বলে কিছু নেই। যদি বাস্তব কিছু থাকে তা হল ওই দু-মিনিটের ফুটেজ আর তিনটে চুমু। যদি পারিস তো করে দে। না পারিস তো কবি হয়ে পেছন মাড়া!’

শেষ কথাটা শুনে সেটের সকলেই কেমন তাচ্ছিল্যভরা হাসি হেসে উঠল। উশ্রীও কেমন গায়ে জ্বালা ধারানো হাসি হাসছে! রাগে স্কোভে মন্দারের চোখে এই প্রথম জল এসে পড়ল। উশ্রী অমন ব্যঙ্গাত্মক হাসি হাসছে কেন? সে কি কবিতা পড়ে না? একজন কবি যে একজন স্ক্রিপ্ট-রাইটারের চেয়ে বেশি মর্যাদার পাত্র তা কি সে বোঝে না!

—‘আর শোন’ পান্ডা খরখরে গলায় যোগ করে— ‘নায়িকার মাকে কিছুদিনের জন্য কাশী, গয়া বা হরিদ্বারে পাঠিয়ে দে। নেক্সট সিনে উশ্রীর মুখে ডায়লগ থাকবে— মা কয়েকদিনের জন্য হরিদ্বারে গেছে’—বুঝেছিস?’

মন্দার মাথা নীচু করে চোখের জল আড়াল করেছে। কোনোমতে মাথা নাড়ল।

অ্যাসিস্ট্যান্ট ডিরেক্টর জাভেদ একবার ক্ষীণ স্বরে প্রতিবাদ করে— ‘তা কী করে হয় দাদা! তাহলে তো শুরুর এপিসোডগুলোর সঙ্গে কন্টিনিউইটি থাকছে না! শুরু থেকেই দেখানো হচ্ছে যে নায়িকার মা, আই মিন বৈজয়ন্তীদি দস্তুর মতো জাঁদরেল ও আধুনিকা। তিনি ম্লিভলেস পিঠকাটা ব্লাউজ, শিফনের শাড়ি পরেন। বব্ কাট চুল। মদ, সিগারেট খান, পার্টিতে নাইট ক্লাবে যান। যিনি এমন আধুনিকা, তিনি কাশী, গয়া বা হরিদ্বারে মরতে যাবেন কেন?’

—‘কেন? মানুষের মনের কি পরিবর্তন হয় না?’ পেডুলাম জাভেদকে এক রামধমক দিয়ে থামিয়ে দিয়েছে— ‘আর যদি পরিবর্তন না হয় তবে নায়িকার মায়ের রোলটা কি তুই করবি? বৈজয়ন্তীদির চিকুনগুনিয়া হয়েছে জানিস না? শুটিঙে আসবেন কী করে?’

পাশ থেকে কে একজন ফোড়ন কাটল— ‘তবে অনির্দিষ্টকালের জন্য আন্দামানে পাঠিয়ে দাও না দাদা। একেবারে দীপান্তর।

সকলে আর-একবার গা জ্বালানো হাসি হেসে ওঠে। মন্দার মাথা নীচু করে ভাবছিল, কি নির্বোধ এরা! নির্বুদ্ধিতার কি শেষ নেই?

সে আস্তে আস্তে সেখান থেকে সরে এল। তার ভীষণ কান্না পাচ্ছে। উশ্রী এমন বোকার মতো হাসছে কেন? ওদের সঙ্গে থাকতে থাকতে কি সে-ও অনুভূতিহীন নির্বোধে পরিণত হয়েছে!

আর থাকতে পারল না মন্দার। স্টুডিয়ার টয়লেটে ঢুকে হাউ হাউ করে কেঁদে ফেলল। এখানে কী করছে সে? কতগুলো নিম্নমেধার লোকের ভিড়ে তার অবস্থান কোথায়? তার কাজ কি শুধু এই গালিগালাজ গুলো খেয়ে, পাতার-পর-পাতা অর্থহীন মেলোড্রামা লিখে যাওয়া! এই জন্যই জন্মেছিল মন্দার! এই করেই মরবে!

হঠাৎ করে মনে পড়ে গেল বাবার বলা কঠিন শব্দগুলো— ‘সাহিত্য পড়ে কোন্ রাজকার্যটা করবি? কবিতা লিখে কি পেট ভরবে! বাপের হোটেল চিরকাল খোলা থাকবে না চাঁদু! এটাই বাস্তব!’

সত্যিই কবি হয়ে পেট ভরানো যায় না। বিয়ে করা যায় না উশ্রীর মতন মেয়েকেও। সেইজন্যই তো এত কষ্ট সহ্য করেও এখানে টিকে আছে। আস্তে আস্তে পয়সা জমিয়ে দামি দামি গিফট দিয়েছে উশ্রীকে। কখনও জুয়েলারি, কখনও ফ্রেঞ্চ পারফিউম, কখনও বা দামি লেডিস হ্যান্ডব্যাগ। উশ্রী লাজুক মুখে সেগুলো নিয়ে ছুড়ে দিয়েছে মোহিনী হাসি। ওই হাসিটা দেখার জন্য বহুবার মরতে পারে সে!

আস্তে আস্তে মন্দার চোখের জল মুছে ফেলল। তার চোয়াল শক্ত হয়ে উঠেছে। নাঃ, টিকে থাকতেই হবে। এগারোশো স্কোয়ার ফিটের একটা ঝকঝকে ফ্ল্যাট, একটা গাড়ি, কিছু ব্যাংক ব্যালেন্স—আর উশ্রী। সবকটা পেতে হলে লেগে থাকতেই হবে।

সে চোখমুখে জল দিয়ে এসে বসল চেয়ারে। এখন মনটা অনেকটাই শান্ত। স্ক্রিপ্টের গোছটা নিয়ে দু-তিনটে চুমুর সিকোয়েন্স আর গোটা কয়েক ডায়লগ বসাতে যাবে, এমন সময় একটা মেয়েলি গোলগাল হাত সামনে এসে পড়ল। হাতে ধরা একটা রুমাল।

—‘ছেলেদের কাঁদলে ভালো লাগে না।’ একটা মিষ্টি রিনরিনে স্বর বলে ওঠে—‘আপনার চোখে এখনও জল লেগে আছে। মুছে নিন।’

মন্দার অবাক হয়ে পিছনে তাকায়। উশ্রীর বোন উর্মি ঠিক তার পিছনেই দাঁড়িয়ে আছে। এই মেয়েটিকে রোজই দেখে। দিদির সঙ্গে শুটিংয়ে আসে। বোধহয় দিদিকে পাহারা দেয়। শুটিং চলাকালীন সবসময়ই গভীর মুখে ল্যাপটপে খুটুর খুটুর করে কাঁ যেন করে।

কোনোদিন মেয়েটাকে ভালো করে দেখেনি। আজ দেখে মনে হল, উর্মি উশ্রীর বোন হতেই পারে না। দুই বোনের চেহারা আকাশপাতাল তফাত। উশ্রী তন্বী, সুন্দরী। চোখে সবসময়ই দুষ্টুমি চিকমিক করছে। কালো কুচকুচে ঘন ভুরুর নানা বিভঙ্গে, লম্বা চুল ঝাপটে, ছেলেমানুষি হাবেভাবে পুরুষের বুকো ঝড় তোলে। নিজেকে কী করে মোহিনী সাজিয়ে তুলতে হয় তা সে জানে। সেইরকমই আউটফিট পরে।

তুলনায় উর্মি বেশ খানিকটা মোটাসোটা। এমন ঢিলেঢালা একটা সালোয়ার সুট পরে আছে যে হাঁটলেই মনে হয় থলির ভেতরে বিড়াল লাফাচ্ছে। সম্পূর্ণ প্রসাধনহীন মুখ। শান্ত

চোখ। একখানা দিদিমণি মার্কা চশমা নাকের ওপর। মোটা ফ্রেমের দৌলতে ভুরু দেখাই যায় না। আর সবচেয়ে মজার ব্যাপার, সে সবসময়ই মাথায় একটা ওড়না পরে থাকে।

—‘আমি কাঁদছি না।’ মন্দার প্রতিবাদ করে—‘চোখে জলের ঝাপটা দিয়েছি।’

উর্মি মুচকি হাসল। তারপর রুমালটা তার দিকে এগিয়ে দেয়। সে বুঝতে পারে এ মেয়ে একটু আলাদা। এর চোখে ধুলো দেওয়া মুশকিল।

—‘কবিতা-টবিতা লেখা হয়?’

রুমাল দিয়ে চোখ মুছতে মুছতে থমকে গেল মন্দার।

—‘আপনাকে কে বলল?’

—‘আমি একটু আগেই সেটের ভেতরে ছিলাম।’

ওই একটা বাক্যেই সবকথা বলা হয়ে গেল। মন্দার মাথা নেড়ে সম্মতি জানায়।

—‘এখানে এসে একজন কবির, দেখা পাব ভাবিনি।’ উর্মির কণ্ঠস্বরে সন্ত্রম ও সহানুভূতি।

—‘কোথায় লেখেন?’

—‘বেশ কয়েকটা লিটল ম্যাগাজিনে।’ উর্মির সঙ্গে কথা বলতে তার ভালো লাগছিল।

এই মেয়েটা হয়তো কবিতার মর্ম বোঝে। অন্যদের মতো অনুভূতিহীন নয়। বরং বেশ সহৃদয়। সে মৃদু স্বরে বলল—‘একটা ওয়েবসাইটেও লিখি।’

—‘ওয়েবসাইট! ইন্টারেস্টিং।’ উর্মির চোখে কৌতূহল—‘কোন ওয়েবসাইট?’

—‘কবিতা ডটকম।’ সে রুমালটা ফেরত দিয়ে বলল—‘ওখানে অবশ্য ছদ্মনামে কবিতা দিই।’

—‘ছদ্মনাম। কীরকম?’

মন্দার এবার সামান্য হাসে—‘নামটা মোটেও শোনার মতো নয়।’

—‘তবু শুনি।’

—‘সে ফিক করে হেসে ফেলেছে—‘রামহনু’।

উর্মি কিছুক্ষণ তার দিকে বিস্মিত দৃষ্টিতে তাকিয়ে থাকে। বোধহয় ছদ্মনামটা শুনে হাঁ হয়ে গেছে। তারপর বিস্ময়ের ধাক্কাটা সামলে নিয়ে সে-ও হাসল। মুচকি হেসে বলল—‘মন্দ কি! বেশ তো’।

—‘বুঝলেন কিনা, অ্যাঁ? মানুষের এমন শুদ্ধ চোখ...।’

গহন বোতল থেকে জল খাচ্ছিলেন। ‘শুদ্ধ চোখ’ শব্দটা শুনেই একটা মোক্ষম বিষম খেয়েছেন।

কণারও প্রচণ্ড হাসি পাচ্ছিল। স্বামীর করুণ অবস্থা দেখে মুচকি হেসে ‘শুদ্ধ চোখে’-র সঠিক সংস্করণটি উচ্চারণ করলেন—‘সূক্ষ্ম চোখ’।

—‘হ্যাঁ... ওই তো শুদ্ধ চোখ! সবকিছুই খুঁচি খুঁচি করে দ্যাখে।’

পতিদেব এবারও হাঁ করে তাকিয়ে আছেন দেখে কৃপা হল তার। পরিমলবাবু বাংলাটা এরকমই বলেন। তার উরুশ্চারণের একটু দোষ আছে। কোনোমতে ফিশফিশ করে স্বামীর কানে কানে বললেন—‘খুঁচি খুঁচি মানে খুঁটিয়ে খুঁটিয়ে’।

গহন স্বস্তির নিশ্বাস ফেলেন। কণা দো-ভাষীর কাজটা চমৎকার করছেন। তিনি না থাকলে যে কী অবস্থা হত তার! বোধহয় হাঁড়ি চণ্ডালের দশা হত! কৃতজ্ঞতাপূর্ণ চোখে কণার দিকে তাকালেন তিনি। কণাও কৌতুকমিশ্রিত সপ্রেম দৃষ্টিতে স্বামীর সাধুবাদ গ্রহণ করলেন।

—‘বুঝলেন কিনা, অ্যা? মেয়ের জন্য কয়েক সেট জরায়ু কিনেছি। বড়োঘরে যাচ্ছে তো! যেমনি-তেমনি ভাবে মেয়ে তো পাঠাতে পারি না। পরিমলবাবু হাসলেন— তার সঙ্গে পাত্রপক্ষের দাবি, দশ ভরি সোনা দিতে হবে...।’

কবির ফের স্তম্ভিত! দশ ভরি সোনার ব্যাপারটা তবু বোঝা গেল, কিন্তু কয়েক সেট জরায়ু!

কণাই ফের উদ্ধারকর্তা হয়ে এগিয়ে এলেন— ‘দশ ভরি সোনাই তো যথেষ্ট ছিল। তার সাথে আবার জড়োয়ার সেট কিনলেন কেন? এত খরচ করছেন পরিমলবাবু! ছোটো মেয়ের বিয়েও দিতে হবে।’

ওঃ! জরায়ু মানে জড়োয়া! হাঁফ ছেড়ে বাঁচলেন গহন। ভাগ্যিস এই ভদ্রলোকের সঙ্গে নিয়মিত দেখা হয় না! দেখা হলে বোধহয় মাতৃভাষাটুকু ভুলে যেতেন!

পরিমলবাবুর মুখে বিষণ্ণতার ছাপ পড়ে— ‘কী করি বলুন দিদি। ভগবান আমাদের ঘরে পয়সা দেয় না। কিন্তু উৎপাত হাজারো! বউ-এর অন্ন, আমার ডাইবোটস! আরও কতকী! অসুখের পিছনেই অর্ধেক ব্যাতন যায়।’

—‘তবে?’

ভদ্রলোকের চোখ ছলছল করে ওঠে—‘মেয়েটা আমার বড় লক্ষ্মী দিদি। দেখতে শুনতে ভাল না ঠিকই। তবু বড়ো লক্ষ্মীমন্তর। কালো মেয়ের বাপ হওয়ার বড়ো যশুণা। কিন্তুক্ এবারে সম্বন্ধটা খুব ভালো। ছেলে এঞ্জিনিয়ার—বাপের এটু দাবি-দাওয়া আছে, তবে ছেলে হীরের টুকরো। এমন সম্বন্ধ আমাদের ঘরে ভগবান দেয় না। তবে ললিতা মায়ের গান শুনেই ছেলে কাত। তাই ভাবি। ভগবান যদি না—ও যদি লেখে— তবু ললিতার কপালে এ ছেলের নাম আমিই লিখব। তার জন্য ভিটে মাটি তো দূর, নিজের রক্ত, কিডনি বিক্রি করতে হয় তাই সই। কিন্তুক্ মেয়ের বিয়ে এই ছেলের সঙ্গেই দেব নিচ্চই।’

বলতে বলতেই তার চোয়াল শক্ত হয়ে ওঠে— ‘আর ছোটো মেয়েটা ফরসা-টরসা সোন্দর। আমি বেঁচে থাকলে ওরও গতি হবে।’

গহন অবাক হয়ে পরিমলবাবুর দিকে তাকিয়ে ছিলেন। একজন মধ্যবিত্ত মানুষের কা অদ্ভুত আত্মবিশ্বাস! ভাগ্যের বিরুদ্ধে রুখে দাঁড়ানোর সাহস একজন ছাপোষা কেরানিও রাখে!

—‘ললিতা ভারি সুন্দর গান গায়।’ কণা হাসলেন—‘ওর গলাটাই একটা অ্যাসেট! যে গুণের কদর বোঝে তার কাছে রূপ তুচ্ছ জিনিস মাত্র।’

—‘হ্যাঁ।’ পরিমলবাবুর মুখ গর্বে উজ্জ্বল হয়ে ওঠে — ‘মা আমার রবীন্দসংগীত বড়ো ভালো গায়। আর উশ্ণরগণও খুব ভালো। রবীন্দসংগীতে উচ্চারণটাই আসল বেপার। বুঝলেন কিনা, অ্যা?’

আরও কিছুক্ষণ পাড়ার সমস্ত খবরাখবর দিয়ে উঠলেন তিনি। কার মেয়ে কার সঙ্গে ‘পেম’ করছে, বাজারের ‘দর’ ভয়াবহ। কিছুই কেনার উপায় নেই। পাশের বাড়ির ‘নন্দীবাবুর’ চরিত্তির খারাপ—এইসব আর কী!

কণা গালে হাত দিয়ে অত্যন্ত মনোযোগী শ্রোতার মতো শুনছিলেন। গহনের বিরক্ত লাগছিল। এ তো মানুষ নয়— আস্ত ডেইলি গেজেট! পাড়ার কোথায় কি হচ্ছে— সব ঠোঁটস্থ! তিনি পরনিন্দা পরচর্চায় বিশেষ অভ্যস্ত নন। তাই ভাবছিলেন, কী অজুহাতে এখান থেকে পালানো যায়!

কিন্তু অত কষ্ট করতে হল না। একটু বাদেই গাত্রোখান করলেন পরিমলবাবু। বিয়ের কার্ড গহনের হাতে ধরিয়ে দিয়ে বললেন— ‘আসবেন দাদা। আপনারা এলে খুব খুশি হবে। ললিতাও খুশি হবে। আপনারা হলেন মন্যমান লোক! আপনাদের আশীর্বাদের দামই আলাদা—বুঝলেন কিনা, অ্যা?’

বলতে বলতেই বিদায় নিলেন ভদ্রলোক। গহন স্বস্তির নিশ্বাস ফেললেন। যাক অবশেষে ‘ডেইলি গেজেট’ বন্ধ হল! কণা তার দিকে তাকিয়ে মিটিমিটি হাসছেন—‘কী ভাবছ? বিয়েবাড়িতে যাবে না?’

—‘পাগল’!

—‘কেন? পাগলের কী আছে?’ তিনি বলেন— ‘বাড়ি বয়ে এসে নেমস্তন্ন করে গেলেন ভদ্রলোক। না গেলে অভদ্রতা হবে। আমি তো যাবই। আমার সঙ্গে তুমিও যাবে কিনা সেটাই জ্ঞানার বিষয়।’

গহন বিস্ময়িত দৃষ্টিতে তাকালেন—‘তুমি যাবে?’

—‘অফকোর্স। কতদিন বিয়ের নেমস্তন্ন খাওয়া হয়নি।’ তার মুখের হাসিটা তখনও মিলিয়ে যায়নি— ‘তার ওপর শুনলাম স্টার্টারে তন্দুরী চিকেন থাকছে। ...সঙ্গে মাট্‌ন বিরিয়ানি। এরকম সুযোগ কেউ ছাড়ে!’

—‘ভদ্রলোক কি তোমাকে মেনুটাও বলে গেছেন?’

—‘সে কী!’ কণা চোখ কপালে তুলেছেন—‘একটু আগেই তো বললেন, শোনোনি? অবশ্য শুনবে কী করে? তুমি তখন ফ্যানের দিকে তাকিয়ে তোমার নতুন প্রেমিকার কথা ভাবছিলে।’

কবি রাগত চোখে সহধর্মিণীর দিকে তাকিয়েছেন— ‘আমার কোনো প্রেমিকা নেই।’

—‘তাই বুঝি?’ কৌতুকে ভুরু নেচে উঠল কণার—‘তাহলে আজকাল অত কম্পিউটারে নাক গুঁজে কীসব করা হচ্ছে শুনি? সবসময়ই দেখছি মহাউৎসাহে কম্পিউটার অন করে খুটখুটাইপ করা হচ্ছে। কী উৎসাহ কবিমশাইয়ের। দিন নেই, রাত নেই—সবসময় কম্পিউটারের সামনে আসীন। বুড়ো বয়সে অরকুট বা ফেসবুকে কোনো অষ্টাদশী প্রেমিকা জুটিয়েছ। তার সঙ্গেই চ্যাটপর্ব চলছে।’ তার মুখে দুষ্ট হাসি— ‘হুঁ হুঁ বাবা... যতই লুকাও, ঠিক ধর ফেলেছি!’

—‘কি ধরেছি দেখবে?’ গহন কণাকে হাত ধরে টেনে বিছানা থেকে নামিয়ে এনেছেন।

—‘চলো দেখাচ্ছি তোমায়। আমার প্রেমিকা কে, আর তার সঙ্গে কি চ্যাট করছি—সব দেখাব।’

—‘অবশ্যই আমার দেখা উচিত।’ কণা বিনাপ্রতিবাদে তার পিছু পিছু চললেন—‘আমার স্বামীর গার্লফ্রেন্ড বলে কথা। আমারও তো পছন্দ-অপছন্দ আছে। যার-তার হাতে তো তোমায় তুলে দিতে পারি না।’

গহন ভুকুটি করেছেন। কণা হাসতে হাসতেই ঠোটে আঙুল দিয়ে বললেন— ‘শশশশ...!’
কম্পিউটারটা খোলাই ছিল। কবিতা ডটকমের থ্রেডটাও স্ক্রিনে ভাসছে। ‘একা মেঘ’
বলে জনৈক কবি লিখেছেন— ‘ভাঙা চাঁদ।’

কার্নিশে চড়ুইয়ের লাফালাফি
বিস্তৃতবসনার ঘামের বিন্দু ফেঁটায় ফেঁটায়...।
নির্জনে নির্বাসিত একা লাইট হাউস।
মেঘেরা মিজোরামে আজও কাঁদে।
শূন্য কলশিতে ধরা বালিয়াড়ি
পুঁইমাচাটা অবিন্যস্ত।
তার মধ্যেই ভেঙে গিয়েছিল আস্ত একাট চাঁদ...।
খুঁজে পেয়েছি তার দু-এক টুকরো কোনখানে...।
—‘একা মেঘটা কে? তোমার প্রেমিকা?’ কণা উৎসুক।
গহন বিষণ্ণ মুখে বলেন— ‘নাঃ। আমিই।’

—‘তুমি!’ তিনি হাঁ করে কিছুক্ষণ তাকিয়ে থাকেন স্বামীর দিকে— ‘তুমি আবার কবিতা
লিখছ! তাও ছদ্মনামে!’

তার কণ্ঠস্বরে স্পষ্ট উচ্ছ্বাস! সে উচ্ছ্বসিত সুরের রেশ কেটে গেল গহনের বেসুরো
জবাবে— ‘লিখছি। কিন্তু আর লিখব বলে মনে হয় না।’

—‘কেন?’

—‘কমেন্টগুলো পড়ে দেখো।’

সর্বমোট পাঁচশটা কমেন্ট পড়েছে। কেউ লিখেছে— ‘ধুত্তোর! ফের মাথার ওপর
দিয়ে গেল!’ কেউ বলেছে— ‘বুলস্য বুল।’ কেউ বা আবার মন্তব্য করেছে— ‘একই দিনে
দুটো ঘেঁটে ঘ করার মতো কবিতা। কাঁচাপ।’

কণার সবচেয়ে মজাদার লাগল বিশেষ দুটো কমেন্ট। প্রথমটা রামহনুর। সে লিখেছে—
‘ঠিক ব্যাপারটা বুঝলাম না। আমার মনে হল কবি কি কি সাবজেক্ট নিয়ে কবিতা লিখবেন
তার লিস্টটাই আগে পোস্ট করেছেন। কবিতাগুলো বোধহয় পরে আসবে। কবিতার
অপেক্ষায় রইলাম।’ তার পাশেই দাঁত বের করে হাসার স্মাইলি।

আর একটা জব্বর মন্তব্য দিয়েছে কুবলাশ্ব। তার বক্তব্য— ‘একটু আগেই মগনলালের
কবিতার থ্রেডে কুরুক্ষেত্র হয়ে গেছে। তাই বিশেষ কথা বাড়াতে চাই না। সম্ভবত এলিয়ট
বলেছিলেন, যে কবিতার অর্ধেক বোঝা যায়, অর্ধেক যায়না—সেটা ই আসল কবিতা।
যেটা পুরোটাই বোঝা যায় না, সেটা বোধহয় কবিতার চেয়েও উচ্চমার্গের জিনিস। তুরীয়
দশায় উত্তীর্ণ হওয়া ছাড়া বোঝার উপায় নেই দেখছি।’

মুমতাজ নামী একটি মেয়ে মৃদু প্রতিবাদ করেছে— ‘অমন বোলো না। কবিতার শেষ
দুটো লাইন আমার বেশ ভালো লেগেছে।’

উত্তরে কুবলাশ্ব বলেছে— ‘ভাই মুমতাজ, তোমার যদি শেষ দুটো লাইন ছাড়া বাকিটাও
কবিতা মনে হয় তাহলে কিছু বলার নেই।’

‘কেবিসিতে অমিতাভের নাচানাচি
ক্যাটরিনার আমসূত্রর ফোঁটায় ফোঁটায়
ফিল্ম থেকে নির্বাসিত একা রানী মুখার্জী
নিরুপা রায়েরা সিনেমায় আজও কাঁদে।
শূন্য বাংলা ফিল্মের ভাঁড়ে ধরা তামিলের মিস্সচার
ইমরান হাসমির দাড়ি অবিন্যস্ত....
আগেরটা যদি কবিতা হয়, তবে এটাও কবিতা।

কণা আর থাকতে পারলেন না, খিলখিল করে হেসে উঠলেন। গহন সবিস্ময়ে তার দিকে তাকিয়ে ব্যথিত কণ্ঠে বলেন ‘তুমি হাসছ !’

‘হাসব না!’ তিনি হাসি থামাতেই পারছেন না— কুবলাশ্বর সেল অব হিউমারটা কা মারাত্মক দ্যাখো কা সুন্দর তোমার কবিতার প্যারোডি বানিয়েছে! হিঃ... হিঃ... হিঃ...’!

গহন কিছুক্ষণ বাচ্চা ছেলের মতো গোঁজ হয়ে থাকলেন। তারপর দ্রুত পায়ে সেখান থেকে চলে গেলেন।

কণা বুঝলেন কবিবরের আঁতে ঘা লেগেছে! অমন মুখের ওপর হেসে ওঠাটা ঠিক হয়নি। ভুলটা বুঝতে পেরে সামান্য অনুতপ্তও হলেন। পরক্ষণেই অভদ্র হাসিটা ফের ‘অধিকার করে নিয়েছে তাকে। বেশ কিছুক্ষণ ফিকফিক করে হাসার পর ক্রমশ শান্ত হলেন। এবার রঙ্গ-রসিকতাকে দূরে সরিয়ে রেখে কর্তব্যপালনের পালা! কবির অর্ধাঙ্গিনী হওয়া সহজ কথা নয়।

আজও স্নিগ্ধ বৃষ্টি হচ্ছে। খুব জ্বোরে নয়, বরং মাখনের মতো ঝিরঝিরে মোলায়েম বৃষ্টি। তার সঙ্গে মিঠে সোনালি রোদ্দুর কখনও লাজুক বউয়ের মতো মুখ দেখায়। আবার পরক্ষণেই পাতলা মেঘের ঘোমটা টেনে দেয়। যখনই রোদ্দুরের আভা বৃষ্টির ফোঁটার ওপর পড়ছে, তখনই বিন্দুগুলো সোনালি হয়ে উঠছে। ঠিক যেন গলন্ত সোনা।

কণা ধীর পায়ে বেডরুমের দিকে গেলেন। মেজাজ খারাপ হলে গহন সচরাচর বিছানায় চুপ করে শুয়ে থাকেন। অথবা মিউজিক সিস্টেমে গান শোনেন।

এখন অবশ্য তিনি গান শুনছিলেন না। বরং জানলাগুলো বন্ধ করে, অন্ধকার ঘরে শুয়েছিলেন। বৃষ্টি তার পছন্দ হচ্ছে না। ইদানীং বর্ষাকালের ওপরেও খাপ্পা হয়ে আছেন।

কণা মনে মনে স্বীকার করলেন যে কবিদের মেজাজ মর্জি বোঝা ভগবানেরও অসাধ্য।

তিনি আন্তে আন্তে স্বামীর পাশে শুয়ে পড়েন। ঘন হয়ে আদুরে ভঙ্গিতে তার বুকে মুখ গুঁজেছেন। অন্যান্য দিন গহন আলগোছে তার মাথাটা জড়িয়ে ধরে, কপালে আলতো একটা চুমু এঁকে দেন। আজ একদম স্থির! নড়াচড়া নেই।

—‘কী হল? রাগ নাকি?’ দু-হাতে তাকে জড়িয়ে ধরে বলেন কণা— ‘কার ওপর এত গোসা কবিবর!’

রাগ নয়, হতাশা চুইয়ে পড়ল গহনের কণ্ঠস্বরে— ‘আমি আর কবি নই। আমি আর কবিতা লিখতে পারছি না কণা।’

—‘কে বলল লিখতে পারছ না?’ তিনি সন্তোষে তার মাথার চূলে বিলি কাটছেন— ‘কবিতা যে লিখছ তা তো নিজের চোখেই দেখে এলাম।’

—‘ধুস।’ অর্ধৈর্ঘ্য হয়ে মাথা ঝাঁকালেন গহন— ‘কমেন্টগুলো তো নিজের চোখেই দেখলে। ত্রিশ বছর ধরে কবিতা লিখছি। কিন্তু শটকির ভাষায় এমন ‘ঝাড়’ আগে কখনও খাইনি।’

—‘হ্যাঁ। নিজের চোখে দেখেছি। তাতে কী?’ তার শান্ত উত্তর।

—‘তাতেই সব।’

—‘সব নয় গহন। তুমি শুধু ঝাড়টাই দেখছ। কিন্তু ওরা যা বলেছে তা অবাস্তর কিছু নয়।’

—‘তার মানে?’ গহন উত্তেজিত—‘তার মানে তুমিও বলতে চাইছ আমি যা লিখেছি তার সবটাই ‘বুলস্য বুল’! কণা একদৃষ্টে তাকিয়ে আছেন তার দিকে।

—‘কি দেখছ?’

—‘একটা সত্যি কথা বলবে?’

—‘কী?’

—‘কবিতাটা লেখার আগে ঠিক কি ভেবেছিলে? মানে কি ভেবে লিখেছিলে? কণার কথায় থতোমতো খেয়ে গেলেন তিনি। এতক্ষণ কথাটা ভেবে দেখেননি। কবিতার সমালোচনার ঝালেই গা জ্বলছিল। কিন্তু কবিতার উৎপত্তি নিয়ে বিন্দুমাত্রও ভাবেননি।

—‘কিছুই ভাবেনি। তাই না?’ কণা নিজেই উত্তর দিয়ে দিয়েছেন— ‘যা মাথায় এসেছে, সুন্দর সুন্দর শব্দ দিয়ে সাজিয়ে তাই বসিয়ে দিয়েছে।’

গহন আস্তে আস্তে মাথা নাড়লেন— ‘আই মাস্ট কনফেস। ঠিক তাই।’

—‘এটাই তোমার প্রবলেম। না ভেবে, শুধু শব্দের জোরে, যা খুশি তাই লিখে পার পাওয়ার ক্ষমতা গহন দন্তগুপ্ত’র আছে। কিন্তু ‘একা মেঘের’ নেই। পাঠক অত বোকা নয়। তারা একটা বিরাট নামের সামনে বোকা সাজে বটে। কিন্তু আদতে অত নির্বোধও নয়। পঙ্ক্তিগুলো সুন্দর হচ্ছে অথচ স্পর্শ করছে না। সেইজন্যই এই রি-অ্যাকশন।’

—‘শুধু রি-অ্যাকশন নয়, রুড রি-অ্যাকশন!’

—‘স্বাভাবিক।’ কণার হাতদুটো গহনের মুখ তার বুকে চেপে ধরেছে। যেন মা সন্তানকে বুকে নিয়ে ভোলাচ্ছে।

—‘তোমার মনে আছে গহন? একদিন তুমি পার্কস্ট্রিট থেকে আমার মোবাইলে ফোন করেছিলে। আমি স্নানে গিয়েছিলাম। কলারটিউনে ‘সখী ভাবনা কাহারে বলে, সখী যাতনা কাহারে বলে’ গানটা বাজছিল। টয়লেট থেকে বেরিয়ে যখন ফোনটা রিসিভ করলাম, তখন তোমার রি-অ্যাকশন কি ছিল মনে আছে? কণা ফিক্ করে হেসে ফেললেন। তারপর গহনের বাচনভঙ্গি নকল করে বলেন— ‘তুমি বলেছিলে কি সব গান লাগিয়েছ! আমি এদিকে চাঁদিফাটা রোদে দাঁড়িয়ে গলগল করে ঘামছি— আর তোমার ফোনে বাজছে ‘সখী ভাবনা কাহারে বলে ‘সখী যাতনা কাহারে বলে’ সখী ভালোবাসা কারে কয়?’ এই পরিস্থিতিতে এইসব দার্শনিক প্রশ্ন শুনতে ভালো লাগে?’

ঘটনাটা গহনেরও মনে পড়ে গেল। অবিকল এই কথাগুলোই বলেছিলেন তিনি। ভাবতেই হাসি পেয়ে গেছে তার।

—‘তোমার ক্ষেত্রেও ঠিক তাই হচ্ছে। চতুর্দিকে মানুষের এত সমস্যা, এত যন্ত্রণা, এত

কষ্ট—অথচ কবিতায় তার কোনো ছাপই নেই। তোমার কবিতা নরম, আতুর, সুন্দর। কখনও ভাবের গভীরে ডুবে যাচ্ছে, কখনও দার্শনিকতার আকাশে উড়ছে। কিন্তু মাটিতে নেমে আসছে না।’ কণা স্নিগ্ধস্বরে বলেন—‘যে লোকটা সারাদিন হাড়ভাঙা পরিশ্রম করে, বসের খিঁচুনি খেয়ে, ট্রামে-বাসে ঝুলতে ঝুলতে বাড়ি ফিরছে, কিংবা যে ছেলেটি বা মেয়েটি বেকারত্বের জ্বালায় মরছে— তাদের কাছে ভাব, দার্শনিকতা বা সুন্দর শব্দ কোনোটিই আবেদন রাখে না। কারণ তুমি তো তাদের কথা কখনও বলোনি, তাদের যন্ত্রণাকে স্পর্শ করেনি।’

গহন কণার বুক মুখ ডুবিয়ে খুব মন দিয়ে কথাগুলো শুনছিলেন। তিনি জানেন কণা একদম ঠিক কথা বলছেন। এর চেয়ে চরম সত্য আর কিছু হতেই পারে না। তবু মনের কোথাও একটা যন্ত্রণা কাঁটার মতো বিঁধছিল।

—‘কিন্তু কণা, আমি যে কঠিন শব্দ, কষ্টের কথা, যন্ত্রণার কথা বলতে পারি না।’

—‘সে আবার কি কথা!’ কণা যেন শাসনের সুরে বলেন— ‘কেন পারো না! তোমার কলম আছে, শব্দ আছে, অনুভূতি আছে, ক্ষমতাও আছে। তবে পারবে না কেন?’

—‘হঁ’

—‘হঁ নয় হ্যাঁ।’ তিনি বললেন— ‘আজকে যে মানুষটি আমাদের নেমস্তন্ন করে গেলেন, সেই মানুষটি তোমাকে স্ত্রী গুণী মানুষ বলে জানেন। কিন্তু তোমার কোনো কবিতা কখনও পড়েছেন কি? পড়েননি। তার কারণ এই নয় যে তুমি ইন্টেলেকচুয়ালদের জন্য লেখো। না পড়ার একমাত্র কারণ, কখনও তাঁর কথা লেখানি তুমি। কবিতা মানেই তো দুর্বোধ্য জিনিস নয়। যা মানুষকে ভাবায়, অনুভূতিকে ধাক্কা মারে— তাই কবিতা। যার অনুভূতি আছে, আবেগ আছে সে-ই কবিতা পড়বার যোগ্য। সেই অনুভব থেকে ওকে বঞ্চিত করবে কেন? ওনার অপরাধ কী? উনি আঁতেল নন, সাংঘাতিক ডিগ্রি নেই এটাই কি অপরাধ?’

গহন চুপ করে থাকলেন। এ প্রশ্নের জবাব দেওয়া যায় না। সত্যি বলতে কি এর উত্তর তার কাছে নেই। সবসময়ই ভেবে এসেছেন কবিতা শুধু শিক্ষিত পাঠকদের জন্য। যাদের কাব্যচর্চা করার অভ্যাস আছে তারাই একমাত্র পাঠক হওয়ার উপযুক্ত। কিন্তু আজ মগনলালের প্লেডে, স্বর্ণাভ গুপ্তর এই একই কথার উত্তরে কুবলাশ্বর একটি পোস্ট তাকে ভাবাচ্ছে। কুবলাশ্বর লিখেছিল—‘কবিতা চর্চা করার অভ্যাস পুরো ভাঁটের কথা। মায়ের পেট থেকে পড়ে কেউই কাব্যচর্চা করতে শুরু করে না। আমাদের সকলের কবিতা চর্চা শুরু হয় ‘জল পড়ে পাতা নড়ে’ থেকে। তারপর একটু একটু করে বড়ো হওয়ার সঙ্গে সঙ্গে ই সাথেই পরিচয় হয় মাইকেল মধুসূদন দত্ত, রবীন্দ্রনাথ ঠাকুর, কাজী নজরুল ইসলাম, জসীমউদ্দীন, মোহিতলাল মজুমদারের সঙ্গে। তারপর জীবনানন্দ, সুকান্ত ভট্টাচার্যরাও এসে পড়েন। এই অবধি সব মানুষই অল্পবিস্তর পড়ে থাকেন। কারণ এরা আমাদের সিলেবাসের অন্তর্ভুক্ত। তার মধ্যে যারা একেবারে মাথামোটা, তাদের কথা বাদই দিলাম— কিন্তু যাদের অল্পবিস্তর সূক্ষ্ম অনুভূতি আছে, তারা এর রস্বাস্বাদনও করতে পারে। সুতরাং যাকে বেস বলে তা তাদের তৈরি হয়ে যায়। অতএব অল্পবিস্তর সব মানুষেরই কবিতা পড়ার অভ্যাস থাকে। তারা হয়তো কবিতার ল্যাজা মুড়ো, ছন্দ অলংকার নিয়ে মাথা ঘামায় না। কিন্তু অনুভব করার ক্ষমতা রাখে।’

এর উত্তরে স্বর্ণাভ গুপ্ত'র তীক্ষ্ণ ব্যঙ্গোক্তি—‘সেই অনুভব করার ক্ষমতা কি ইন্টেলেকচুয়াল কবিদের কবিতা বোঝার পক্ষে যথেষ্ট?’

কুবলাশ্ব'র ফের বাঁঝালো উত্তর—‘ইন্টেলেকচুয়াল কবি বলতে আপনি যদি নিজেকে ও মগনলালকে বোঝান—তবে অনুভব তো দূর, কোনোকিছুই যথেষ্ট নয়। কিন্তু যখন শঙ্খ ঘোষ বলেন, ‘আমার সন্ততি স্বপ্নে থাক’ কিংবা শক্তি চট্টোপাধ্যায় বলে ওঠেন—‘ভালোবাসা পেলে সব লভভন্ড করে চলে যাবো’ অথবা সুনীল গঙ্গোপাধ্যায় হাহাকার করে বলেন—‘কেউ কথা রাখেনি’—তখন আমরা অনুভব করতে পারি। কবিতা তখন আমাদের বুকে ধাক্কা দেয়। কাঁদায় হাসায়! যখন উচ্চারিত হয় ‘কাল ছিল ডাল খালি/ আজ ফুলে যায় ভরে/ বল দেখি তুই মালি’/ হয় সে কেমন করে’ তখন বিস্মিত হই। আপনি কি বলেন? এগুলো কি কবিতা নয়? না কবিরা আপনার মতে যথেষ্ট ইন্টেলেকচুয়াল নন।

স্বর্ণাভ গুপ্ত এখানেই ক্ষান্ত দিয়েছিলেন। মডারেটর ব্যাসদেবও বিপদ বুঝে থ্রেডটাই ক্রোজ করে দিয়েছেন। কিন্তু গহনের মাথায় কথাগুলো তখন থেকেই ঘুরছিল। আর এই মুহূর্তেই কণা ঠিক ওই ভাষাতে না হলেও, মোটামুটি কাছাকাছি বক্তব্যই পেশ করেছেন।

—‘কী ভাবছ?’

গহন কণার দিকে তাকিয়ে হাসলেন—‘ভাবছি এত কথা শিখলে কোথায়!’

—‘বা-রে’! তিনি ঠোট ফুলিয়েছেন—‘আফটারঅল আমি কবিপত্নী। গহন দত্তগুপ্ত’র বউ বলে কথা! বুঝলেন কিনা, অ্যা?’

গহন হেসে ওঠেন। আদর করে স্ত্রীর স্মুরিত অধরে চুমু ঝঁকে দিলেন—‘এটা তার পুরস্কার।’

—‘পুরস্কার তো বুঝলাম! কিন্তু মাথায় কিছু ঢোকাতে পেরেছি কি?’

—‘মাথায় কি ঢুকিয়েছ তা একমাত্র গহন দত্তগুপ্ত’র বউয়ের স্বামী ছাড়া কেউ বুঝবে না।’ তিনি কণার কোমর ধরে টেনে তুলে এনেছেন বুকের ওপর।

—‘এসো। দেখি, আমার নদীটা কেমন আছে।’

কণা গহনের বুকে আলতো করে কিল মারলেন। লাজুক হেসে বললেন ‘অসভ্য’!

—‘থ্যাঙ্কস্ ফর দ্য কমপ্লিমেন্ট।’

—‘আচ্ছা, একটা কথা বলবে?’

কণার চুল আদরে এলোমেলো করে দিতে দিতে বললেন গহন—‘বলো।’

—‘তুমি রোমান্টিক কবিতা ছাড়া অন্য কিছু লেখো না কেন? বাস্তবকে এত ভয় কীসের?’

তিনি কণাকে ঘনভাবে জড়িয়ে ধরেছেন। তার মনে অদ্ভুত একটা স্ফোভ গুমরে মরছিল। তবু একটা মৃদু হাসি দিয়ে স্ফোভ ঢাকলেন। বললেন—‘এসো। একটু ভালোবাসি।’

কণা বুঝলেন যে প্রসঙ্গটা গহন এড়িয়ে গেলেন। গহনও বুঝলেন যে কণা বুঝেছেন। তবু যে কথাটা স্পষ্ট করে বলতে পারলেন না সেটাই যেন উচ্চারিত হল তার দীর্ঘশ্বাসে।

—‘বাস্তবকে ভয় পাই না কণা। বাস্তব যে আঘাত ছাড়া আর কিছু দেয় না, তা তোমায় কী করে বোঝাই।’

ঘড়িতে বারোটোর ঘণ্টা পড়ল!

সারাদিন ধরে নত্র হওয়ার দরুন এখন পরিবেশ ঠান্ডা। এই মুহূর্তে বৃষ্টি নেই। তবে একটা জোলো হাওয়া থেকে থেকেই ছু করে এসে আছড়ে পড়ছে। আকাশে একটা-দুটো পাতলা মেঘের স্তর খামখেয়ালিভাবে ঘুরে বেড়াচ্ছিল। তার মধ্যে দিয়েই শলমাজরির মতো নক্ষত্রেরা কৌতুকে চোখ টিপছে।

রাতের অন্ধকার মেখে ছাতে পায়চারি করে বেড়াচ্ছিলেন গহন। ছায়া ছায়া জ্যোৎস্না মাখা প্রেক্ষাপটে তাকে অতৃপ্ত আত্মার মতো মনে হয়। গন্ধরাজের মিষ্টি গন্ধ মাঝেমাঝেই নাকে আসছে। কণা ছাতের টবে গন্ধরাজ লাগিয়েছেন। তার পাশে লংকাগাছের সহাবস্থান। গন্ধরাজের সঙ্গে লংকাগাছের বুনো গন্ধও পাচ্ছেন গহন।

তিনি অন্যমনস্ক ভাবে হাত বাড়িয়ে দেন গাছটার দিকে। ঠান্ডা ভিজ়ে, ঈষৎ সঁাতসঁাতাতে পাতাগুলো তার স্পর্শে খসখস করে উঠল। যেন সামান্য উষ্ণতা পেয়ে উল্লসিত হয়ে উঠেছে।

গহন পরম স্নেহে হাত বোলাচ্ছিলেন গাছগুলোর গায়ে। নিজেদের কোনো সন্তান তো আর হল না। এরাই কণার সন্তান। কণা এদের স্নেহে, যত্নে বড়ো করে তুলেছেন। যখন প্রথম এ বাড়িতে এসেছিল তখন ছোট্ট ছোট্ট চারা ছিল। এখন বড়ো হয়েছে।

গাছগুলোও যেন বুঝতে পারে তাদের ভীষণ আপন কেউ এসেছে। স্পর্শে ঝুঁকে পড়ে অভিবাদন জানায়। লংকা গাছটা লংকার ভারে বিধ্বস্ত। তবু গহনের হাত স্পর্শ করে যেন বলছে— ‘দ্যাখো...আমি তোমাদের উপহার দেওয়ার জন্য প্রস্তুত। এই নাও আমার ফুল...এই নাও ফল...। স্পর্শ করো...অনুভব করো...।’

স্পর্শে যে কী আনন্দ তা আজ টের পেলেন গহন। অন্ধকারে ঠিকমতো দেখা যাচ্ছে না। তবু গাছটার অঙ্গপ্রত্যঙ্গ সব বুঝতে পারছেন! কোনটা পাতা! কোনটা ফুল! কোনটা ফল— সব অনুভব করছেন।

তার আনন্দ যেন প্রকৃতির গায়েও ছড়িয়ে পড়ল। টুপ টুপ করে নিঃশব্দেই কয়েক ফোঁটা জল পড়ল তার গায়ে। স্বাতী নক্ষত্রের জল নাকি! হাওয়া ছু করে বয়ে গেল তাকে ছুঁয়ে। বাড়ির সামনের বড়ো আমগাছটার ডালপালা এসে পড়েছে ছাতে। হাওয়ার দমকে তার পাতায় পাতায় মর্মরধ্বনি। বাড়ির পিছনে অন্ধ গলিতে জোনাকির ভিড়। স্পষ্ট ও জোরালো আলোয় গ্রিন সিগন্যাল দিচ্ছে। রাস্তায় ভিখিরি আর কুকুরের দ্বন্দ্বযুদ্ধের আওয়াজ! তার মাঝখানেই রাতজাগা প্রহরীর লাঠির ঠুকঠুক, ছইসেল এবং চিৎকার— ‘জাগতে রহো - ও-ও-ও-ও!’

সব মিলিয়ে আজ যেন পৃথিবী জীবন্ত হয়ে উঠে বলছে, ‘দ্যাখো ...চোখ মেলে দ্যাখো...আমার হাসি দ্যাখো...কান্না দ্যাখো...বেদনা-যন্ত্রণা-লজ্জা সব দ্যাখো। স্পর্শ করো...আমায় স্পর্শ করো...স্পর্শ করো...। অন্ধের মতো নয়, দার্শনিকের মতো নয়, মরমি মানুষের মতো স্পর্শ করো...।’

গহন দু-চোখ ভরে দেখলেন রাতের পৃথিবীকে। ছাত থেকে গোটা পাড়ার দৃশ্যই স্পষ্ট দেখা যায়। এতদিন আকাশের সৌন্দর্য দেখেছেন। এবার মাটির দিকে তাকালেন।

গহনের পাশের বাড়িতে তখনও আলো জ্বলছে। জানলা খোলা। কণার কাছে শুনেছেন, এ বাড়ির ছেলেটা রোজ রাতে মদ খেয়ে বাড়ি ফেরে। কাউকে হাতের কাছে না পেয়ে

অসহায় বউটাকেই বেদম পেটায়। মাঝেমাঝেই প্রবল চিৎকারও কানে আসে। নিতান্তই পি.এন.পি.সি ভেবে পান্তা দেন নি। তাছাড়া বিষয়টা তার কাছে বিরক্তিকর ঠেকেছে।

কিন্তু আজ স্বচক্ষেই দেখতে হল দৃশ্যটা। তিনি শিউরে উঠেছেন। এ কা মানুষ! না জানোয়ার! বেদম মারতে মারতেই ছেলেটা ঝাঁপিয়ে পড়েছে মেয়েটির ওপর। জোর করে ছিঁড়ে ফেলেছে তার ব্লাউজটা! শাড়ি অবিন্যস্ত। খাটটা যেন ভয় পেয়ে প্রবল নড়ে উঠল! পৈশাচিক দৃশ্য দেখে সে-ও নিজে কেঁপে কেঁপে উঠছে। মানবিক নয়, জাস্তব রিরংসা। পাশবিক মৈথুন!

গহন চোখ সরিয়ে নিলেন সেদিক থেকে। বুকের ভেতরে অসহ্য একটা অন্ধ রাগ, স্কোভ কাজ করছিল। দাঁতে দাঁত চেপে বললেন— ‘স্কাউনড্রেল।’

ছাতের উলটোদিকে বস্তির দৃশ্য! এখান থেকে খানিকটা দূরেই বস্তি অঞ্চল। বস্তির দু-একটা ঘরে তখনও আলোর আভা। বেশ খানিকটা কালো ধোঁয়া উড়ে উড়ে ছড়িয়ে পড়ছে আকাশে। এত রাতে কারুর বাড়িতে হাঁড়ি চড়েছে। যখন সমস্ত মানুষ পেট ঠেসে খেয়ে স্বপ্নের দেশে পাড়ি দিচ্ছে, তখন হয়তো দুটো ভাতের জন্য লালায়িত হয়ে বসে আছে কেউ!

বস্তির কালো ধোঁয়া যেন উজ্জ্বল চাঁদকে ম্লান করে দেয়। গহন আকাশের দিকে তাকালেন না। আর ভালো লাগল না। বুকের ভেতরে একটা অব্যক্ত কষ্ট। ভীষণ অসহায় লাগছে নিজেকে। তিনি ফের চোখ ফিরিয়েছেন পাশের বাড়ির জানলায়। আলো নিভে গেছে। কিন্তু ল্যাম্পপোস্টের আলো নিষ্প্রভ বেদনার মতো পিছলে পড়েছে জানালার ওপরে। সেই ক্ষীণ আলোয় দেখতে পেলেন মেয়েটি জানলার গরাদে মুখ ঠেকিয়ে দাঁড়িয়ে আছে। তার দু-চোখে নিষ্প্রাণ শূন্য দৃষ্টি! পাথরের মূর্তির মতো নিষ্প্রাণ। ভঙ্গি দেখে মনে হয়, বোধ হয় সে বেঁচে নেই!

অত ক্ষীণ আলোতেও বুঝতে অসুবিধে হল না, তার কপালে, গালে কালসিটে! এলোমেলো চুলের ফাঁকে, ঠোঁটের কোণে ক্ষীণ রক্তরেখা, গলায় সিগারেটের ছাঁকার দাগ!

গহন দেখলেন মেয়েটির স্থির চোখ বেয়ে ফোঁটা ফোঁটা জল গড়িয়ে পড়ছে। ল্যাম্পপোস্টের আলো পড়ে ঝিকিয়ে উঠল অশ্রুবিন্দুরা! মনে হল যেন বলছে— ‘দ্যাখো আমায়...স্পর্শ করো...চোখের জল স্পর্শ করো...অনুভব করো কালসিটের ব্যথা...স্পর্শ করো...।’

গহনের চোয়াল শক্ত হয়ে ওঠে। কিন্তু মেয়েটির দিকে তাকাতে অস্বস্তি বোধ করছেন। তার চোখে চোখ রাখার সাহস পাচ্ছেন না। দৃশ্যটা সহ্য হচ্ছে না। তাই আস্তে আস্তে তার দিক থেকে চোখ সরিয়ে নিয়ে, ছাত থেকে চুপিসাড়ে নেমে গেলেন গহন। একরকম পালিয়েই গেলেন।

সাথে কি গুঁটকি তাকে বলে— এসকেপিস্ট !

‘চালচুলো নেই তার, নেই তার চেনা বা অচেনা
 আদমসুমারি হলে তার মাথা কেউ গুনবে না।
 তার ভোট চাইবে না গণতান্ত্রিক কোনো প্রার্থী।
 সরকারের দরকার নেই, তাই নিজের সুড়ঙ্গ—
 পাগল,... পাগল, সাপলুডো খেলছে বিধাতার সঙ্গে।’

ফ্ল্যাটের ঘরটা অন্ধকার! অদ্ভুত আলোহীন বিবরের মতো। হঠাৎ করে দেখলে মনে হয় এ ঘরে বোধ হয় আলো ঢোকে না। ঢোকেনি কখনও! প্রাচীন সুড়ঙ্গের অন্দরে যেমন নির্নিমেব রাত্রি ছড়িয়ে থাকে, ঠিক তেমনই অন্ধকার তার স্থায়িত্ব কায়ম রেখেছে এখানে।

ঘরে প্রধান শব্দ বলতে শুধু কবীর সুমনের গান। এছাড়াও খুঁটিনাটি দু—একটা ক্ষীণ শব্দ মাঝমধ্যে মাথাচাড়া দিয়ে উঠছে। কখনও—বা সেটা ঘড়ির কাঁটার টিকটিক। কখনও বাথরুমের কলে জলের টুপটাপ। আবার কখনও বা দেশলাই জ্বালানোর আওয়াজ। ঘন অন্ধকারের মধ্যেও সিগারেটের আগুনে মুখটা তীব্র ধবধবকে আলো নিয়ে জ্বলছিল;

—‘জগতে যা কিছু আছে, কিছু নেই তার অনুমুখে
 পাগল...পাগল...সাপলুডো খেলছে বিধাতার সঙ্গে...।’

গানটা শেষ হয়ে যেতেই আরেকটা নতুন শব্দ যোগ হল। তরলে বরফ পড়ার ছলাৎ আওয়াজ। তার পেছন পেছন একটা কণ্ঠস্বর—

—‘রুমা।’

কোনো উত্তর নেই।

—‘কথা বলবে না? রাগ করেছ?’

এবারও কোনো উত্তর এল না। শুধু রকিং চেয়ারটা যেন একটু দুলে উঠল।

রকিং চেয়ারার ঠিক সামনের ডিভানটাতে বসেছিল শুটকি। বিকেল থেকেই প্রচুর মদ খেয়েছে সে। কথা বেশ অস্পষ্ট। জড়িয়ে জড়িয়ে যাচ্ছে।

—‘আজ একটু বেশি খেয়ে ফেলেছি। মাফ করে দাও।’

চেয়ারটা আরএকটু নড়ল। শুটকির মনে হল চেয়ারে বসা নারীমূর্তির মুখ বিষণ্ণ।

—‘সরি রুমা।’ সে অপরাধীর মতো মাথা নীচু করেছে—‘জানি আমি ভীষণ খারাপ। মদ খাওয়ার অভ্যেসটা ছাড়তেই পারি। কিন্তু ছেড়ে দিলে তুমি তো আর বারণ করতে আসবে না।’

এবারও অন্যপক্ষ নিশ্চুপ! তার এই মৌনতার পিছনে রাগ লুকিয়ে না দুঃখ—তা বোঝা মুসকিল।

—‘বুবাই কেমন আছে? বড়ো হয়েছে?’ শুটকি উৎসাহ ভরে জানতে চায়—‘এখন কি বাবা বলে ডাকতে পারে? ওকে তুমি আমার কথা বলেছ?’

টুপ টুপ করে শুধু কোথায় যেন জল পড়ে যায়। আর কোনও শব্দ নেই।

—‘বলোনি তাই না?’ সে যেন একটু হতাশ হল—‘আচ্ছা, পরে বলে দিয়ো। বোলো ওর বাবা খুব দুষ্ট। মাকে খুব ব্যথা দিয়েছিল। তাই মা তাকে ছেড়ে চলে গিয়েছে। কিন্তু বাবার ওকে দেখতে ইচ্ছে করে। খুব আদর করতে ইচ্ছে করে। ওর জন্য বাবা একটা ঘর সাজিয়ে

রেখেছে।' তার কণ্ঠস্বর ফের উৎসাহিত হয়ে ওঠে— 'গোলাপি রঙের দেয়াল, জানলায় মিকি মাউসের ছবিওয়ালা পর্দা। নরম গদির ছোট্ট একটা ধবধবে বিছানা।...হ্যাঁ তার দুদিকে রেলিংও লাগিয়ে দিয়েছি রুমা। বুবাই পড়ে যাবে না। একটা দোলনাও আছে। আর আছে অ-নে-ক পুতুল। টেডি বিয়ার, বাঘ, সিংহ, বেন-টেন না কি যেন—অনেক খেলনা।'

বলতে বলতেই চুপ করে গেল শূটকি। কুষ্ঠাভরা কাতর গলায় বলে— 'ও কি একবার বাবার কাছে আসবে? আমি শুধু একবার ওকে দেখব। কথা দিচ্ছি, সেদিন একটুও মদ খাব না। বাজে খিস্তি দেব না। তুমি বলতে যে বাচ্চাদের সামনে খিস্তি দিতে নেই! বুবাই এলে শুধু ভালো ভালো কথাই বলব। অনেক বেলুন কিনে আনব ওর জন্য। আমরা দুজনে শুধু খেলব। তোমার কোনো ব্যাপারে আর কোনোদিন জোর করব না। একটুও জ্বালাব না রুমা...।' তার কথায় তীব্র আকৃতি— 'ওকে শুধু একবার নিয়ে এসো...আনবে না?'

এমন প্রার্থনায় বোধহয় ঈশ্বরের মনও দ্রবীভূত হয়। কিন্তু ওপ্রান্তের মানুষটা এবারও কোনো কথা বলল না। শান্ত নীরবতায় ভরে আছে গোটা ঘর। হানুহানার মিষ্টি গন্ধ আচ্ছন্ন করে রেখেছে আবেশে। রুমা এলেই এই গন্ধটা পায় শূটকি। সে জানে রুমার গা থেকেই গন্ধটা আসে।

বেশ খানিকক্ষণ নীরবতা। সে চুপ করে উত্তরের প্রতীক্ষা করছে। ওপ্রান্তের মানুষটি এখনও নীরব। বৃকের ভেতরে দীর্ঘশ্বাসটা কোনোমতে চাপল শূটকি। তার মধ্যে হতাশা ক্রমাগতই গুমরে মরছিল। এখনও কি ক্ষমা পাওয়া যাবে না? আজও কি ক্ষমা করবে না রুমা? সে তো কোনোদিন রুমার সঙ্গে খারাপ ব্যবহার করেনি! কোনোদিন গায়ে হাত তোলেনি! তুলবেই বা কেন! সে যে রুমাকে ভীষণ ভালোবাসত। আজও বাসে। শুধু একটা দিনের ভুল...মুহূর্তের ভুল। ক্ষণিকের মতিভ্রম...।

হঠাৎই মোবাইল ফোনটা বেজে উঠল। রিংটোনে একটা বাচ্চা খিলখিলিয়ে হাসছে। শূটকি একটু বিরক্ত হয়েই ফোনটা তুলে নেয়। গহনের ফোন! এই রাত দুটোর সময় তার আবার কী হল!

—'সরি রুমা।' সে অনুতপ্ত স্বরে ক্ষমা প্রার্থনা করে— 'গহন ফোন করেছে। গহনকে তো চেনো তুমি। ফোন না তুললে হারামজাদা অভিমান করে বসে থাকবে। তুমি একটু বোসো, ...আমি ওর সঙ্গে কথা বলেই আসছি।'

ফোনটা হাতে নিয়ে বারান্দায় চলে এল শূটকি। কলটা রিসিভ করেই বলল— 'রামছাগল কোথাকার...এত রাত্রে ফের নাকে কান্না জুড়েছিস! ঝাড় সহ্য না হলে লেখা বন্ধ করে দে। মগজমারি খতম। আমায় জ্বালাচ্ছিস কেন?'

গহনের কণ্ঠস্বরটা আজ অন্যরকম শোনাল— 'না শূটকি, আমি লিখব।'

শূটকি হাসে— 'ঝাড় সহ্য করেও লিখবি! বাঃ। এবার আর পালাবি না! বাঘ! বাঘ! গহন দত্তগুপ্ত আর পালাবে না! গ্রেট!'

—'না।' গহন দত্তগুপ্ত নয়, গহন শান্তভাবে বলেন— 'গহন দত্তগুপ্ত-ই হচ্ছে সব নষ্টের গোড়া। আমি বুঝতে পারছিলাম যে সমালোচনা প্রয়োজন, অথচ সমালোচনা সহ্য করতে পারছিলাম না। এই দ্বিচারিতার কারণ ওই গহন দত্তগুপ্ত নামটাই। ওই নামটা তার ইগোর

পাহাড় নিয়ে বারবার বাধা দিচ্ছিল। এখন আমি আর গহন দত্তগুপ্ত-ই নই। কল মি একা মেঘ।’

‘বাঃ।’ সে হেসে উঠল—‘তবে আজ তোর নবজন্ম হল।’

—‘বলতে পারিস। অথবা নিউ জার্নিও বলা যায়।’

—‘যাইহোক।’ শুটকি আন্তরিক স্বরে বলে—‘শেষ পর্যন্ত তুই জিতবিই।’

—‘তোর মুখে ফুল-চন্দন পড়ুক।’

—‘ইয়ে...তার সঙ্গে একটু তুলসীপাতা, একটু এসেঙ্গ, একটা খাটিয়া, আর এক-প্যাকেট ধূপও। বুঝতেই পারছিস্ ‘খরচ বেঁচে যায়।’

গহন বিরক্ত হলেন—‘এই রাত দুটোর সময় ফের আজীবাজে কথা শুরু করেছিস!’

—‘কেন? রাত দুটোর সময় তুই জন্মাতে পারিস, আর আমি মরার কথা ভাবতে পারি না?’ সে বলে—‘এমনিতেও আমাদের মরাটা কোনো ইস্যু নয়। চোখ বুজলে চশমার দোকানের কাস্টমারগুলো হাঁফ ছেড়ে বাঁচবে। বড়োজোর মদের দোকানের মালিকগুলো একফোঁটা-দু-ফোঁটা চোখের জল ফেলতে পারে। একটা ভালো খদ্দের কমে গেল কিনা।’

—‘আমাকে বাদ দিয়ে গেলি!’

—‘তুই!’ শুটকি হা হা করে হেসে ওঠে — ‘শালা, তোকে আমি চিনি না! তুই মহা হারামি মাল! আমি মলে একটুও কাঁদবি না। বরং খাতাপেন নিয়ে কবিতা লিখতে বসবি।’

গহন ব্যথিত কণ্ঠে বললেন—‘এতদিনে তুই আমায় এই চিনলি!’

—‘খামোখা সেন্টু দিস্ না খুড়ো। তোকে আমি ঠিক চিনেছি। এখন আর জ্বালাস না। রুমার সঙ্গে কথা বলছি। ‘তোর জন্য প্রেমটা চটকে গেল শালা!’

গহন চুপ করে গেলেন। কিছুক্ষণ নীরব থেকে আন্তে আন্তে বললেন—‘ঠিক আছে। তোরা কথা বল। আমি রাখছি।’

লাইনটা কেটে দিয়ে ফোনটাকে সুইচ অফ করে দেয় শুটকি। রুমার সঙ্গে কথা বলার সময় কেউ তাকে জ্বালাতন করুক তা চায় না। এই সময়টুকু তার একান্ত নিজস্ব। শুধু তার আর রুমার! মাঝখানে আর কাউকে সে বরদাস্ত করবে না।

শুটকি ফোনটাকে পকেটে পুরে রুমার কাছে ফিরে এল। গাঢ় স্বরে বলল—‘গহন আবার কবিতা লিখতে শুরু করেছে জানো? মালটার একটু ঝাড় খাওয়ার দরকার ছিল। এতদিন স্রেফ ফাঁকি দিয়ে ‘আম গাছ-জাম গাছ’ লিখে পাতা ভরিয়েছে। উদ্দা খিস্তি খাওয়ার পর এবার সত্যিকারের কবিতা আবার ওর হাত থেকে বেরোবে। তার মুখে একটা স্মিত হাসি ভেসে ওঠে—‘আমিও অবশ্য লুকিয়ে চুরিয়ে একটু-আধটু কবিতা লিখছি। সব কবিতাই তোমাকে নিয়ে। পাবলিশারের সঙ্গে কথাও বলেছি। চার ফর্মা, মানে চৌষটি পৃষ্ঠার বই না হলে সেটা বই বলে ধরাই হয় না। এখনও পর্যন্ত চল্লিশটা কবিতা লিখেছি। পাবলিশার বলেছে ছাপান্ন থেকে আটান্নটা কবিতা চাই। আর ষোলোটা কবিতা লিখে ফেলতে পারলেই আমারও বই বেরোবে রুমা। আমিও কবি হয়ে যাব। শুটকি কবি হবে!’ কথাটা বলেই হা হা করে হেসে ফেলল সে। যেন খুব বড়ো একটা রসিকতা করেছে! হাসতে হাসতেই চোখে জল এসে গেছে। দু-হাতে চোখের জল মুছে বলল—‘আজও একটা লিখেছি। শুনবে?’

ওপারের জমাট নিস্তরতা থেকে কোনো ইতিবাচক সাড়া এল না। তবু শুটকি মহা উৎসাহে আবৃত্তি করতে শুরু করল

পুড়ব বলেই কাব্য লিখি সহজ মন,
তরাই ঘুরে, আদর করে আসল জল।
তিস্তানদীর বুকের ভাষায় মাদল শোন
যে কথাটা বলবি ভাবিস, আজকে বল।
ভিড় পড়েছে জংশনে আর চৌমাথায়
কে জানে কোথায় যাচ্ছি ভেসে কে জানে!
হিজবিজিয়ে ছন্দ ওঠে আজ মাথায়,
দেয়াল লিখন কালের কাছে হার মানে।
কলকাতাতে ট্রাফিক—আলোর রূপকথা।
ফুটপাথে ঐ স্বপ্নপোড়ার জ্বলছে ঘুম!
গাভ্রদাহ আজ শহরের চুপকথা
তাই বেপাড়ার নষ্ট মেয়ের সাজের ধুম
দিব্যি দিলেও তিস্তাপাড়ে ডুবব না,
ভেসে বাঁচার, বেঁচে ভাসার মন্ত্র চাই।
গীতার বাণী আর কিছুতেই শুনবো না।
প্রেম বলে তাই কাম শরীরে আজ জাগাই!
তবুও কেন তিস্তাপারে রঙিন ফুল
ফুটছে মনে, স্বপ্নকোণে আজ বদল!
যে কথাটা বন্দি, ঠোটে তোর আঙুল,
চুপ করে সেই গোপন কথাই আজকে বল।

শুটকির আবৃত্তি শেষ হল। আবার পিন পতনের স্তরতা ফিরে এসেছে। বেসামাল হাওয়ায় ঘরের সাদা পর্দাটা ছুঁ করে উড়ছিল। একটা টিকটিকি কোথা থেকে যেন মৃদু আওয়াজ দিয়ে ওঠে— ‘ঠিক... ঠিক... ঠিক...।

—‘তোমার দিঘার রাতটার কথা মনে আছে রুমা?’ সে আপনমনেই বলে—‘তখন পূর্ণিমা ছিল। চাঁদের আলোয় সমুদ্রের সাদা ফণা চিকচিক করছিল। ভরা কোটালের জল ফুলে ফুলে উঠছিল। বড়ো বড়ো ঢেউ এসে আছড়ে পড়ছিল তোমার পায়ের কাছে। চোখে-মুখে নোনতা জলের ছিটে...’ তার চোখ স্বপ্নিল। যেন সেই মুহূর্তটা আবার এসে দাঁড়িয়েছে চোখের সামনে। সমুদ্রের নোনা গন্ধ, উত্তাল হাওয়া সবই যেন তার অনুভবে ধরা দেয়— ‘তোমার কোলে ছ-মাসের বুবাই। চাঁদের আলোয় দুধসাদা শাড়ি হিমজুইয়ের মতো বলমল করছিল। হাওয়ায় এলোমেলোভাবে তোমার চুল উড়ছিল। শাড়ির আঁচল উড়ছিল। তুমি জানো না, সমুদ্রের সামনে দাঁড়ালে তোমাকে ভেনাসের মতো দেখায়। আমি বলছিলাম—‘চলো সমুদ্রে নামি’। তুমি ভয় পেয়েছিলে। ভেনাসের সমুদ্রকে ভয় কী! জোর করে হাত ধরে টেনে জলে নামালাম। তোমার শাড়ি ভিজে গেল। ভয়ও খানিকটা কাটল। খুব মজা পেয়েছিলে। বুবাইকে শক্ত করে

ধরে এক পা এক পা করে কোমর জলে নামলে। সমুদ্র কোমর ছুঁয়ে, শাড়ি ছুঁয়ে কলকল—
ছলছল করে বয়ে যাচ্ছিল। আর আমি গান ধরেছিলাম। কোন গানটা বলো তো?’

শুটকি উদাস্ত গলায় গান গেয়ে ওঠে। ফ্ল্যাটের ঘরটায় অনুরণিত হতে লাগল তার
কণ্ঠস্বর। চোখ বুজে, গলার শিরা ফুলিয়ে একমনে গেয়ে যাচ্ছে সে— ‘সাগরসঙ্গমে সাঁতার
কেটেছি কত, কখনও তো হই নাই ক্লাস্ত/ তথাপি মনে মোর প্রশান্ত সাগরে উর্মিমালা
অশান্ত...।’

একই লাইন ঘুরিয়ে-ফিরিয়ে গাইছিল শুটকি। তার গলায় বিশেষ সুর নেই। কথাও জড়িয়ে
জড়িয়ে যাচ্ছে। তা সত্ত্বেও কী অদ্ভুত জেদে, জোর করে গেয়ে যাচ্ছিল। কথাগুলো আস্তে
আস্তে বিকৃত হয়ে আসে। গলাও কী যেন অজ্ঞাত কারণে ধরে এসেছে। ভেঙে যাচ্ছে বারবার,
তবু বারবার ফিরে ফিরে গাইছিল— ‘তথাপি মনে মোর প্রশান্ত সাগরে উর্মিমালা অশান্ত/
সাগরসঙ্গমে...।’

আস্তে আস্তে গান সুরহীন হয়ে এল। একসময় হারিয়ে গেল কথাগুলোও। হা হা করে
কঁদে উঠল শুটকি। প্রবল আবেগে চেয়ারের পায়ের কাছে বসে পড়েছে সে। ক্ষমাপ্রার্থনার
ভঙ্গিতে হাহাকার করে বলল— ‘আমায় ক্ষমা করো রুমা...আমি জানতাম না, হঠাৎ একটা
বিরাট ঢেউ বেসামাল হয়ে আচমকা এসে আছড়ে পড়বে...জানতাম না, যে বোল্ডারগুলো
অত শক্ত! তোমার, বুবাইয়ের যে অত ব্যথা লাগবে আমি জানতাম না...জানতাম না...।’

হানুহানার গন্ধ মাখা একঝলক হাওয়া স্খ করে তাকে ছুঁয়ে যায়। রকিং চেয়ারটা দুলে
উঠল কয়েকমুহূর্তের জন্য।

কবিতা ডট কমের পেজগুলো খুলে খুলে সবার কবিতা পড়ছিলেন গহন। এমনকি কমেন্টগুলোও
বাদ দিচ্ছিলেন না।

এতদিন যেন বুকের ওপর একটা পাথর চেপে ছিল। গহন দত্তগুপ্ত নামটার অহংবোধ
তাকে অন্যদের কবিতা পড়া থেকে সবসময়ই বিরত রেখেছে। ভাবটা এমন ছিল, যেন এই
সাইবার জগতের একটা গুরুত্বহীন সাইটে কবিতা পোস্ট করে সবাইকে ধন্য করেছেন। কিন্তু
যে মুহূর্তেই সাইটটার গুরুত্ব বুঝতে পারলেন সেই মুহূর্তেই নতুন লড়াই শুরু হল। গহন
দত্তগুপ্ত-র নয়। ‘একা মেঘের’। যাকে কেউ চেনে না, জানে না। নাম শোনেনি কখনও।
নিতান্তই ভাগ্যাস্বেষী এক কবি। তার ইগো নেই। সে যেখানে খুশি যেতে পারে, যা খুশি বলতে
পারে, সবার কথা শুনতেও পারে। তার কোনো অহংবোধ নেই।

কবিদের মধ্যে ‘জোনাকি’, ‘আকাশনীল-এর কবিতা বেশ ভালো লাগল তার। কিন্তু আশ্চর্য
কিছু লাগল না। লিখেছে ভালোই। অথচ মনে তেমন দাগ কাটছে না। অন্যদিকে মনে মনে
অবাকও হচ্ছিলেন। কবিতাগুলো কেমন যেন চেনা চেনা লাগছে। মনে হচ্ছে এধরনের কবিতা
আগেও পড়েছেন।

এমন মনে হওয়ার কারণটা খুঁজছিলেন গহন। উত্তর পেতেও অবশ্য দেরি হল না।
কমেন্টগুলো পড়তে পড়তেই রামহনুর বক্তব্যে পেয়ে গেলেন ইঙ্গিত উত্তর। রামহনু স্পষ্ট

লিখেছে — ‘কবিতা ভালো লাগল। তবে নতুনত্ব কিছু পেলাম না। বরং শব্দ চয়ন, স্টাইল, রোমান্টিসিজ্মে প্রখ্যাত কবি গহন দত্তগুপ্ত’র অদ্ভুত প্রভাব। ‘জোনাকি’, ‘আকাশনীল’কে গহন দত্তগুপ্ত-র ক্ষুদ্র সংস্করণ বলা যেতে পারে। কিন্তু মৌলিকতা নেই।’

কমেন্টটা পড়ে চমকে উঠলেন তিনি। বিস্মিত ভাবে কবিতাগুলো আবার পড়ে দেখলেন। রামহনুর কথা সম্পূর্ণ সঠিক! কবিতাগুলোর নীচে অনায়সেই গহনের নাম লিখে চালিয়ে দেওয়া যায়! কেউ কোনো পার্থক্য বুঝতেও পারবে না। শুধু উক্ত দুজনেরই নয়, আর অনেকের কবিতাই পড়ে দেখলেন। প্রত্যেকের রচনাশৈলীই প্রায় একরকম। একই রকম বিরহ, একইরকম প্রেম, একইরকম সুন্দর সুন্দর শব্দচয়ন। শুধু কুবলাশ্ব-র কবিতাটা এর থেকে কিছুটা আলাদা। সে কিছু আঞ্চলিক আটপৌরে শব্দ ব্যবহার করেছে বলেই বোধহয় বেশি ভালো লাগল কবিতাটা।

তু হমার মরদ বটিস্ -লয় ?

...মেয়েটা ভাবে।

‘আপন করম ভায়েক ধরম’ গানে
তাল মিলিয়েই গোটা পরব যাবে।
কেনি রে তু চাস না হামার পানে ?’
সোহাগ রঙের অভিমानी মেয়ে,
আকুল ব্যথায় ঈষৎ এলোমেলো
চাঁদকে ভেবে সওদাগরের আলো
বলছে কেঁদে—‘দেখলি না তু চেয়ে’!
নীলচে আভা নীল পাহাড়ের গায়ে,
চাঁদ চলে যায় তেপান্তরের পারে।
আকুল ব্যথা ফিরল দখিন বায়ে
‘টুকুনখানিও দেখলি না তু হা রে!’
শালের বনে জ্যোৎস্না ঝরে পড়ে
মঞ্চল মাতাল—ধূপ জ্বলেছে বুঝি!
চাঁদ জানে না, করছে খোঁজাখুঁজি
এক মেয়ে, তার প্রেমিক সদাগরে।
জ্যোৎস্না বুকে পাথর হল মেয়ে
টুকুনখানিও দেখল না চাঁদ চেয়ে

তিনি ‘একা মেঘ’ নামে কবিতার নীচে মন্তব্য লিখে দিলেন— ‘কবিতায় আঞ্চলিক ভাষার প্রয়োগ সত্যিই প্রশংসনীয়। শব্দের চালাকি নেই। সোজাসাপটা সরল ভাষায় একটি রূপকথার মতো কবিতা। আদ্যন্ত সুন্দর।’

তার মন্তব্যের একমিনিট পরেই রামহনু মন্তব্য করল— ‘ঠিক বলেছেন। আপনাকে দ্বিত্ব দিলাম।’

গহন অবাক হয়ে পালটা মন্তব্য করেন— ‘দ্বিত্ব ! মানে?’

রামহনু একটা স্মাইলি দিয়েছে— ‘এ পাড়ায় নতুন তো! তাই সব কথার মানে বুঝতে একটু সময় লাগবে। আপাতত এইটুকু বলতে পারি—দ্বিভ্র মানে, সেকেন্ড করা।’

—‘ও’।

—‘বাই দ্য ওয়ে, আপনাকে কী বলে ডাকব? ‘একাদা’ বা ‘একাদি’ বলে ডাকা যাবে? না মেঘ বা মেঘদি বলব?’

গহন হেসে ফেলেন। এই রামহনুর বিরূপ মন্তব্যেই রাগ হয়েছিলেন তিনি। কিন্তু এখন আর রাগ নেই।

—‘মেঘদাটাই বেটার। আমি কোনোভাবেই দিদি নই।’

—‘বেশ, ‘মেঘদা’ই বলব তবে।’ ‘রামহনু লিখল’ —‘রাতে কতক্ষণ অনলাইন থাকবেন? একটু আড্ডা মারা যাবে?’

—‘নিশ্চয়ই।’

—‘তাহলে আড্ডার খেঁড়ে আসুন।’ সে আবার স্মাইলি দিয়েছে —‘নয়তো কুবলাশ্ব কাল সকালে কুরুক্ষেত্র করবে। কবিতার খেঁড়ে পার্লিক গল্পে করলে ওর একদম পছন্দ হয় না। ব্যাটাকে আমি বড্ড ভয় পাই। বড়ো কড়া লোক।’

গহনের বেশ মজা লাগছিল। তিনি উত্তরে টাইপ করলেন— ‘সে কি! কুবলাশ্ব ব্যাটা নাকি? আমি তো ভেবেছিলাম বেটি!’

‘বেটি! বলেন কী! কুবলাশ্ব বেটি হতে যাবে কোন দুঃখে!’

—‘কবিতা পড়ে তো বেটিই মনে হল। তা ছাড়া ছদ্মনাম তো মুখোশের মতো। তার পিছনের আসল লোকটাকে দেখা যায় না। অবশ্য আমার ধারণা ভুলও হতে পারে।’

রামহনু উত্তরে আরও কিছু টাইপ করার আগেই এই সাইটের মডারেটর ‘ব্যাসদেব’ স্ক্রিনে আবির্ভূত হলেন— ‘মেঘবাবু ও হনু, কুবলাশ্বর জেন্ডার নির্ণয় ও ওই বিষয়ক আরও কিছু গুরুত্বপূর্ণ কথা থাকলে আড্ডাঘরে গিয়ে বলুন। আমি অদরকারি পোস্টগুলো ডিলিট কবব’।

—‘আহা দাদা, এমন জব্বর পোস্টগুলো ডিলিয়ে দেবে। কুবলাশ্ব-র দেখা উচিত যে ওকে কেউ মেয়ে বলেছে। তারপর ঘোড়াটা কি কুকথা বলে সেটাই দেখার!’

রামহনুর কথার উত্তরে ব্যাসদেব বললেন - ‘হনু, কবি ছেলে কি মেয়ে সেটা বড়ো কথা নয়। শেষপর্যন্ত সে কবিই। আমি পোস্টগুলো ডিলিয়ে দিচ্ছি। আড্ডাঘরে এসো।’

গহন চমৎকৃত হচ্ছিলেন। দু-তিনটে লোক কম্পিউটার স্ক্রিনের দিকে চোখ রেখে বসে আছে। তারা ছেলে না মেয়ে, সুন্দর কি অসুন্দর, লম্বা না বেঁটে, বড়ো না জোয়ান— তা কেউ জানে না। কেউ কাউকে চেনে না। অথচ কেমন সুন্দর আন্তরিকভাবে আড্ডা মারছে। সাইবার ওয়ার্ল্ডের কি অসীম ক্ষমতা!

কয়েক মিনিটের মধ্যে তিনজনের আড্ডা জমে গেল। ব্যাসদেব দুঃখ করে বলছিলেন— ‘আজকাল কবিতার আর সেই দিন নেই। এই কবিতা ডটকমেই একসময় কীসব আসাধারণ কবিতা পোস্ট হত! এখন সব কপিক্যাট আর চোরদের জায়গা হয়েছে।’

গহন বিস্মিত— ‘কপিক্যাট আর চোর মানে?’

রামহনু ব্যাপারটা বুঝিয়ে দেয় — ‘বেশিরভাগ কবিতাগুলোই কোনো না কোনো বিখ্যাত কবির স্টাইলে লেখা। নিজস্ব স্টাইল এখানকার খুব কম লোকেরই আছে। যেমন আজকাল ট্রেন্ড চলছে গহন দত্তগুপ্ত-র। ভদ্রলোক বহুদিন কবিতা লিখছেন না। কিন্তু তাঁর অভাব আমরা টেরই পাচ্ছি না। কারণ ‘জোনাকি’ ‘আকাশনীল’ বা আরও কিছু কবি হুবহু গহন দত্তগুপ্ত-র স্টাইলেই লেখে। ওদের কবিতা পড়লেই মনে হয় বকলমে গহন দত্তগুপ্তই লিখে দিয়ে গেছেন কবিতাগুলো। সেই সাবজেক্ট! একই ভঙ্গি। নতুনত্ব কিছু নেই। বুঝলাম, যে ওরা কবির অন্ধভক্ত। তাই বলে তাঁকেই সবসময় কপি পেস্ট মারতে হবে!’

রামহনুর কথার রেশ টেনেই ব্যাসদেব জানালেন— ‘সত্যিই তাই, মৌলিকতা কিছু নেই। ইনফ্যাক্ট ওদের কবিতাগুলো যদি পরপর কবির নামছাড়া পোস্ট করে দেওয়া হয়— তাহলে কোনটা কার কবিতা আলাদা করে আইডেন্টিফাই করা যাবে না। সবই একরকম। কবির সিগনেচারের অভাব যাকে বলে আর কী!’

গহন আস্তে আস্তে টাইপ করেন— ‘ও’।

— ‘কিছু পার্লিক তো তার চেয়েও আরও উচ্চস্তরের ঝাড়ু।’

— ‘ঝাড়ু ! মানে ঝাঁটা?’

— ‘না...না...।’ রামহনু একটা চোখ টেপার স্মাইলি দেয়— ‘ঝাড়ু মানে ঝাড়া বিদ্যায় এক্সপার্ট।’

ব্যাসদেব একটা কাঁদো কাঁদো মুখের ইমোটিকন দিয়েছেন— ‘সেই চিরাচরিত সমস্যা। প্রেগিয়ারিজম্। আজকাল তো ব্লগে ব্লগে শখের কবির কবিতা পোস্টাচ্ছে। কথা নেই বার্তা নেই— একজন তার মধ্যেই একটা কবিতা বেমালুম ঝেঁপে দিয়ে এখানে নিজের নামে পোস্ট করে দিল। ব্যাস, সেই নিয়ে চলল মারপিট। দুই কবিই একটা কবিতাকে নিজের বলে দাবি করছে! সে প্রায় প্রাণান্তকর পরিস্থিতি!’

যত জানতে পারছিলেন গহন, ততই তার চোখ ব্রহ্মতালুতে গিয়ে ঠেকছিল। এরকমও হয়।

— ‘তোমরা কেউ জানো না।’ রামহনুর মস্তব্যে এবার ভুরু কৌচকানো রাগি মুখের স্মাইলি— ‘ভানুসিংহের পদাবলির গোটাটা আমি আগের জন্মে লিখেছি। দাদু ঝেঁপে দিয়েছে! উঃ, কী দুঃখু।’

তার মস্তব্যের ভঙ্গিতে তিনি হেসে ফেলেছেন। তার মাথায় তখন অন্য একটা চিন্তাও ঘুরঘুর করছিল—

— ‘আচ্ছা, এদের কেউ কিছু বলে না?’

ব্যাসদেব উত্তর দিলেন— ‘প্রেগিয়ারিজম্ হলে চোরের আই.পি. অ্যাড্রেসটাকে ব্যান করে দেওয়া হয়। তার অ্যাকাউন্টও ব্লক করা হয়। কিন্তু কপিক্যাটদের নিয়ে কী করবেন? এরা প্রত্যেক বইমেলাতেই কবিতার বই বের করে। কোন প্রকাশনী যে বের করে, আর কারা যে পড়ে তা ভগবানই জানেন! কিন্তু অহংকারে মাটিতে পা পড়ে না। কার কটা বই হয়েছে তা নিয়েও কম্পিটিশন! এদের কারুর পঁয়ত্রিশটা বই, কারুর-বা আবার চল্লিশটা। সব স্বঘোষিত ‘মহান কবি।’ কালেভদ্রে যদি একটা বা দুটো কবিতা কপালগুণে ‘স্বদেশ’-এ ছাপা হয়ে যায়

তবে তো কথাই নেই! বাবফটাইয়ের চোটে টেকাই যায় না। আর যদি না হয় তাহলে আঙুরফল টক।’ বলে বেড়াবে— ‘আমি প্রাতিষ্ঠানিকতার বিরুদ্ধে।’

গহন নিজের মনেই সজ্বরে হেসে উঠলেন। এমন প্রজাতির বিশেষ অভাব নেই। সকলেই অসিতবরণ চৌধুরীর মতো নিঃস্বার্থ নয়। এমনকি সেই স্বেচ্ছা-নির্বাসিত কবিও হাসপাতালের বেড়ে শুয়ে আক্ষেপ করেছেন, আর এরা তো নিতান্তই ভেকধারী। আর বইয়ের সংখ্যাও প্রচুর! তিনি আপনমনেই গুনতে শুরু করেন—আদৌ তার নিজের অতগুলো বই আছে কি?

রামহনু যোগ করে —‘এদের প্রচুর পোষা ভাই-বোনও আছে। দাদাদের অঙ্ক ভক্ত। দু-লাইন লিখলেই একেবারে ‘বাঃ বাঃ’ করে পিঠ চুলকোতে শুরু করে। আর কি বলব। এসে যখন পড়েছেন তখন সবই স্বচক্ষে দেখতে পাবেন। চিন্তা নেই।’

আরও কিছুক্ষণ কথাবার্তা বলে গহন লগ আউট করেন। কম্পিউটার শাট ডাউনও করেছেন। কিন্তু তখনই শুতে গেলেন না। বরং অশান্ত মনে পায়চারি করছেন।

তার মাথায় একটা চিন্তাই ঘুরেফিরে আসছিল। বারবার ভাবছিলেন এই জোনাকি, আকাশনীলদের সঙ্গে তার তফাতটা কোথায়? ওদের বইয়ের সংখ্যা তার থেকেও বেশি। ওদেরও ‘বাঃ, বাঃ’ করার জন্য ভক্তবৃন্দ আছে! এমনকি তিনি ঠিক যেমন কবিতা লেখেন, এরাও অবিকল তেমনই লেখে। পার্থক্য কোথায়? তবে আকাশনীল কেন ‘আকাশনীল’? আর তিনিই বা কেন তিনি?

রাতের ছায়ায় নিভৃত আসনে বসে বারবার নিজেকে প্রশ্ন করতে থাকেন কবি— ‘আমি কে? আমি কোথায় আলাদা? ...আমি কেন আমি?...’

হঠাৎ মনে পড়ে গেল পরিমলবাবুর কথা। কণা বলেছিলেন— ‘ওঁর কথা কখনও লেখেনি তুমি...’

তার কপালে ভাঁজ পড়ল। কী ভেবে যেন খাতা কলম নিয়ে বসে গেলেন। কয়েকটা মিনিট স্তব্ধতা। তারপরেই সাদা পাতার ওপর কলম খসখস করে চলতে শুরু করল।

—‘ওঃ ঈশ্বর! তুই এখনও টয়লেটে!’

প্রায় রোজই বাবার এই ডায়লগটা শুনে শুনে বোর হয়ে গেছে মন্দার। ভদ্রলোক তো মানুষ নন, ‘মার্কিজ্‌ল’-এর(Murphys law) চলতা ফিরতা উদাহরণ। যেদিন তিনি ছাতা নিয়ে বেরোবেন না, সেদিনই বৃষ্টি নামবে! যেদিন গুরুত্বপূর্ণ মিটিং থাকবে, সেদিনই প্রয়োজনীয় কাগজপত্র খুঁজে না পেয়ে ‘লেট হচ্ছে...লেট হচ্ছে...’ বলে নাচতে শুরু করবেন। এবং অবধারিত ভাবেই সেদিন তার গাড়ির টায়ার পাংচার হবে ও স্টেপনি থাকবে না!

সেইসব অমোঘ নিয়মগুলোর অন্যতম হল, যেদিন মন্দারকে তাড়াতাড়ি বেরোতে হবে, এবং সে বাথরুমে ঢুকে বসে থাকবে, ঠিক তখনই বাবার নিম্নচাপ ও গ্র্যাভিটেশনের চূড়ান্ত হবে।

মন্দারের এমনিতেই আজ মেজাজ খিঁচড়ে ছিল। ভোররাতে আবার একটা দুঃস্বপ্ন-র গুঁতো খেয়েছে। আজ অবশ্য লোকটা তাকে মারেনি। শুধু যখন উশ্রীকে ‘ভালোবাসি’ বলতে

যাচ্ছিল, ঠিক তখনই টপকে পড়ে উশীর মাথার একটাল চুল ধরে টান মেরে বলল— ‘এইবার!’

মন্দার হতভম্ব হয়ে দেখে যে কালো মুষকো লোকটার হাতে উশীর পুরো চুলটাই উঠে এসেছে! তার মাথায় টাক! উশীকে এমন কুশী আগে কখনও লাগেনি! চুল ছাড়া একটা মেয়েকে যে এত খারাপ লাগতে পারে তা তার ধারণাতেই ছিল না। সে বোধহয় হার্টফেলই করত! ভাগ্যক্রমে ঘুমটা তার আগেই ভেঙে গেল।

এই শনিপুজোই তার কাল হয়েছে। ব্রাশে পেস্ট লাগিয়ে খুচুর-খুচুর করে দাঁত মাজতে মাজতে দুঃস্বপ্নগুলোর কথাই ভাবছিল সে। কালো পালোয়ানটা তাকে কিছুতেই ‘ভালোবাসি’ শব্দটা বলতে দেয় না কেন? বাস্তবে প্রপোজ করার মতো সাহস এখনও জুটিয়ে উঠতে পারেনি। কিন্তু স্বপ্নে তো ‘ভালোবাসি’ বলে ফেলতেই পারে! অথচ প্রত্যেকবার বলার আগেই ওই কেলে মোষটা এসে কিছ-না-কিছু কাণ্ড ঘটাবেই।

আসলে দোষ লোকটারও নয়। সব দোষ ওই কুবলাশ্বর। কাল একটা চমৎকার কবিতা লিখেছিল সে। যথরীতি সে কবিতার নায়িকা উশী। তার রেশমি চুলের বর্ণনাও দিয়েছিল চমৎকার। কিন্তু সব মাটি করল ওই হতভাগা। কবিতাটা পড়েই ড্রাম করে মস্তব্য করল—

—‘আপনারা কবিরা এত প্রেমিকার চুল ধরে টানাটানি করেন কেন বলুন তো! মেয়েদের মাথায় চুল থাকলে সুন্দর দেখায় নিঃসন্দেহে। কিন্তু তা নিয়ে এত আদিখ্যেতা করার কি আছে? সে বিশেষজ্ঞের মতো বলে— ‘কবির প্রেমিকার মাথায় ঘন চুল থাকাটা মাস্ট।’ জীবনানন্দও তো বলেছেন— ‘চুল তার কবেকার অঙ্ককার বিদিশার নিশ্চ’।

—‘সে জীবনানন্দ বলেছেন... বলেছেন। উনি তো এ-ও বলেছেন... ‘মুখ তার শ্রাবস্তীর কারুক্য’। ‘শ্রাবস্তীর কারুক্য’ মুখে তখনই থাকতে পারে যখন প্রেমিকার মুখময় ব্রণ থাকে। তাই বলে কি সব কবির প্রেমিকার মুখই ‘শ্রাবস্তীর কারুক্য’ হতে হবে। এবার বলুন, ওটাও মাস্ট।’

মন্দার বুঝতে পরছিল না, সে সামান্য একটা বিষয়কে নিয়ে এত টানাহাঁচড়া করছে কেন? কোনোমতে জানায়—

— ‘না ... আসলে প্রেমিকার ঘন লম্বা চুল কাব্যিক!’

— ‘এ আবার কী কথা! কোনো কবির প্রেমিকা কি বয়কাট ববকাট কাটতে পারে না? মাশরুম ছাঁট বা ভেজ ছাঁট যে মেয়েরা মারে, তারা কি সুন্দরী নয়? অথবা যে মেয়ের মাথায় টাক আছে সে কি কবির প্রেমের যোগ্য নয়?’

টাকলু মেয়ে! তার প্রায় বিষম খাওয়ার দশা। এসব কী উদ্ভট উদ্ভট কথা বলছে লোকটা!

সে কথা বলতেই ‘কুবলাশ্বর’ কড়া জবাব — উদ্ভট নয়, আসলে আপনারা চিরকালই বাহ্যিক সৌন্দর্যের পূজারি। আপনাদের কাছে প্রেমের যোগ্য মেয়ে মাত্রই সুন্দরী হতে হবে। আর তার সৌন্দর্যের একমাত্র মাপকাঠি ঘন, কালো, লম্বা চুল। ডাবর আমলা কেশ তেলের মডেল।

মন্দারের মনে সন্দেহ ঘনীভূত হয়। ‘একা মেঘ’ বোধ হয় ঠিক কথাই বলেছিল। কুবলাশ্বর নামের পিছনে নির্ধাৎ কোনো ববছাঁট চুলের মেয়ে আছে। সেইজন্যই এমন সদ্য তেলে ফেলা বেগুনের টুকরোর মতো ছাঁক ছাঁক করছে।

সে আর কথা বাড়ায়নি। চেপে গিয়েছিল। আর তারপরই এই দুঃস্বপ্নটা। উশীর মাথায় টাক!

—‘কী হল? আর কতক্ষণ?’ বাইরে থেকে বাবার প্রাণান্তকর হাঁক—‘ওরে, এটা কি অর্ডিনারি না ফেভিকল?’

এরপর আর বেশিক্ষণ বাথরুম আটকে রাখা যায় না। অগত্যা মন্দার বেরিয়ে এল। মানে বেরোতেই হল তাকে।

বাবা তখন যথারীতি মেঝের ওপর গড়াগড়ি খাচ্ছিলেন। তার দিকে তাকিয়ে বলল সে—‘এমন জব্বর টাইমিং ফিক্স করো কি করে একটু বলবে? যখনই আমি টয়লেটে ঢুকি ঠিক তখনই তোমার ধাক্কাধাক্কি শুরু হয়। পাঁচ মিনিট আগে বা পরে এই ঘটনাটা ঘটে না কেন?’

বাবা কুঁই কুঁই করে উত্তর দেন—‘টাইমিং ফিক্স করার আমি কে! আমার কোলনকে জিজ্ঞেস কর!’

—‘মানতেই হবে যে তোমার কোলনের টাইমিং শটীন তেডুলকরের চেয়েও ভালো। যাও’।

বাবা দৌড়োলেন। সে তোয়ালে দিয়ে মাথা মুছতে মুছতে রান্নাঘরের দিকে চলল। আজ নাকি টিকলি একটা এক্সপেরিমেন্টাল ডিশ তৈরি করবে। এই এক্সপেরিমেন্ট— এর গিনিপিগ অবধারিতভাবেই সে আর বাবা! এর আগের সপ্তাহে টিকলি ‘মাশরুম চিচিঙ্গা’ নামের একটা ডিশ তৈরি করেছিল। সেটা খেতে কেমন হয়েছিল তা টের পাওয়া গিয়েছিল পরদিন সকালে। মন্দার আর বাবা দুজনই সেই ডিশের ধাক্কা টয়লেটে প্রায় ইট পেতে রেখেছিল।

রবিঠাকুর বোধহয় টিকলির ডিশের কথা ভেবেই লিখেছিলেন— ‘শুধু যাওয়া আসা... শুধু স্রোতে ভাসা...’।

আজও ডিশের নামে আর-একখানা মূর্তিমান জোলাপ তৈরি হচ্ছে! সে ভয়ে ভয়ে রান্নাঘরে ঢুকে দেখল টিকলি মুখখানা হাঁড়ি-পানা করে ভাজা মাছের দিকে তাকিয়ে আছে। সে মুখে সদ্য সদ্যই দই মেখে সাদা ভূত সেজেছে। আজকাল বেশ রূপচর্চার দিকে ঝোক গেছে বেটির! মূলতানি মাটি, বেসন, চন্দন— কিছুই বাদ যাচ্ছে না!

কিন্তু আজ কি হল! এমন ‘কলহাস্তরিতা’ নায়িকার মতো মাছের দিকে তাকিয়ে আছে কেন? মন্দারের সন্দেহ হয়। তবে কি দইটা মাছের গায়ে পড়ার কথা ছিল? ভুল করে নিজের মুখে মেখে ফেলেছে!

—‘কী হয়েছে?’ থাকতে না পেরে প্রশ্নটা করেই ফেলে সে— ‘মুখে অমন হসন্ত দিয়ে রেখেছিস কেন?’

টিকলি কোনো কথা না বলে ভাজা মাছের দিকে আঙুল তুলে দেখায়।

মন্দার সবিস্ময়ে দেখে, মাছগুলোকে কেমন যেন অদ্ভুত লাগছে। কোন বাজারে এ ধরনের মাছ পাওয়া যায়! এ কা জিনিস বাজার থেকে এনেছে বাবা! কুচকুচে কালো! মাছ না অন্যকিছু!

—‘সব পুড়ে গেছে!’ টিকলি প্রায় কেঁদে ফেলেছে— ‘আমি কড়ায় বসিয়ে মুখে দই মাখতে গিয়েছিলাম...সেই ফাঁকে!’

আর গর্বর্বর্ধু! জ্বলন্ত ইজ্জতের মুখে ফুঁ! প্রেস্টিজে গ্যাম্বলিন। উর্মি পর্যন্ত আওয়াজটা শুনতে পেয়েছে। তার মুখে স্মিত হাসি।

—‘মধ্যপ্রদেশে এমন কোলাহল কেন? ব্রেকফাস্ট হয়নি?’

—‘না...না...!’ মন্দার অপ্রস্তুত। মাথা চুলকে বলে— ‘হয়েছে...মানে...।’

পেটটা বোধহয় ঠিক করেছে যে করেই হোক তার মুখে চুন কালি মাখিয়ে ছাড়বে। সে এবার আরও তীব্র প্রতিবাদ জানাল— ‘ঘূর্ র্ র্ ... ঘুট্ ...ঘুট্ ...ঘুট্...। অর্থাৎ ‘মিথ্যাবাদী! ব্রেকফাস্ট কী খেয়েছিস? হরিমটর!’

মন্দার পারলে এক্ষুনি অভদ্র পেটটাকে কেটে বাদ দেয়! উর্মি আড়চোখে তার পেটের দিকে তাকিয়ে মিটিমিটি হাসছে। মাথায় জড়ানো ওড়নাটা বারবার মুখের ওপর এসে পড়ছিল। একহাতে সেটাকে সরিয়ে বলল— ‘কেমন হয়েছে তা ঘুঁ ঘুঁ ...ঘুট্ ঘুট্ শুনেই বুঝতে পারছি।’

মন্দার লক্ষ করেছে যে উর্মির সঙ্গে সবসময়ই একটা ঢাউস ব্যাগ থাকে। উর্শীর মেকআপ বক্স, এক্সটা আউটফিট, পারফিউম, জলের বোতল ইত্যাদি ক্যারি জন্যই ব্যাগটা ব্যবহৃত হয়।

সেই ব্যাগ থেকে একটা টিফিন বক্স বের করে এগিয়ে দিল উর্মি।

—‘এই নাও।’

—‘কী এটা?’ মন্দার বিস্মিত।

—‘খাবার।’ সে মৃদু হেসেই উত্তর দেয়— ‘আমার স্পাইসি ফুড খাওয়ার একদম অভ্যেস নেই। এখানে লাঞ্চে রীতিমতো লংকার গুঁড়ো দেওয়া খাবার দেয়। তাই নিজের লাঞ্চে আমি সবসময়ই ক্যারি করি।’

মন্দারের দ্বিধা তবু কাটে না—‘এটা তো তোমার খাবার!’

—‘হ্যাঁ, আমার কথা ভেবেই বানিয়েছিলাম।’ সে আবার হাসল— ‘কিন্তু আজ না হয় তুমিই টেস্ট করে দ্যাখো।’

—‘কিন্তু তুমি...?’

—‘আমি আজ তোমার লাঞ্চে ভাগ বসাব।’ ওড়নাটা ফের তার চোখের ওপর এসে পড়েছে। সেটাকে বাঁ হাতে সরিয়ে হাসে উর্মি ‘আশা করি অসুবিধে হবে না।’

একটু কিন্তু কিন্তু করতে করতেই টিফিন বাস্কেট খুলল মন্দার। ভেতরে জ্বলজ্বল করছে সাদা ফকফকে পাতলা রুটি, বেগুনভাজা আর আলুর তরকারি। রুটির এককোনা ছিঁড়ে আলুর তরকারি সুন্ধু মুখে দিতেই মনে হল—অমৃত! সাধারণ একটা খাবারও যে এত সুস্বাদু হতে পারে তা জীবনে এই প্রথম জানল সে!

—‘তরকারিটা তুমি করেছ!’ মন্দার বিস্ময় আর প্রশংসা মাথা দৃষ্টি উর্মির দিকে ছুঁড়ে দিয়েছে— ‘ডেলিশিয়াস!’

উর্মি দু-চোখে স্নেহ মাখিয়ে তার দিকে তাকিয়ে আছে। অদ্ভুত একটা বাৎসল্য তার হাসির মধ্যে ফুটে ওঠে। মন্দারের মনে হল—এমনভাবে বোধহয় একমাত্র মেয়েরাই হাসতে পারে! অভূক্ত সন্তানের সামনে নিজের খাবারটুকু তুলে দিয়ে এমন তৃপ্তিমাখা হাসি হাসার ক্ষমতা শুধু গর্ভধারিণীরই আছে।

সে মুগ্ধ হয়ে উর্মির মুখের দিকেই তাকিয়ে ছিল। এমন হাসি উর্শীর মুখে কখনও দেখেনি। তার হাসিতে আকর্ষণী শক্তি আছে, মদিরতা আছে, কুহক আছে—কিন্তু স্নেহ, মমতা নেই!

কেন কে জানে, এই প্রথম তার বৃকে অব্যক্ত একটা কষ্ট হচ্ছিল। মনে হচ্ছিল, এমন হাসি কেন উর্শী হসে না।

‘কী হল? খাও!’

উর্মির কণ্ঠস্বরে সংবিৎ ফিরল মন্দারের। যিদেও পেয়েছিল খুব। প্রায় চেটেপুটেই রুটি, বেগুনভাজা, আলুর তরকারি শেষ করে ফেলেছে। খাওয়া শেষ করে খালি টিফিন-বস্তুটা এগিয়ে দিয়ে বলল—

—‘থ্যাক্স উর্মি।’

—‘ওয়েলকাম।’

—‘দাঁড়াও...তোমাকে একটা জিনিস দেখাই।’ মন্দার হাত-মুখ ধুয়ে এসে ব্যাগ খুলতে খুলতে বলল —‘দ্যাখো তো জিনিসটা কেমন? উর্শীর পছন্দ হবে? আমি আবার মেয়েদের পছন্দ-অপছন্দ ঠিক বুঝি না।’

সে বাস্তু খুলে হিরের আংটিটা দেখায়। এবার অবাক হওয়ার পালা উর্মির। হিরেটা আঙনের ছোট্ট কণার মতো দুটি ছড়িয়ে জ্বলছিল। সেদিকে তাকিয়েই বিস্মিত গলায় বলল—
কী সর্বনাশ! এ তো খাঁটি ডায়মন্ড! কার জন্য কিনেছ? এত দামি জিনিস...!’

মন্দার সমস্ত কথা উর্মিকে খুলে বলে। কার জন্য কিনেছে, কেন কিনেছে, কীভাবে কিনেছে—সব। উর্মি তার সব কথা শুনতে শুনতে অন্যমনস্ক হয়ে পড়েছে। সব কথা যেন ঠিক মাথায় ঢুকছে না।

মন্দারের কথা শোনার পর সে কিছুক্ষণ চুপ করে থাকে। অদ্ভুত বিষণ্ণতা তাকে ছেয়ে আছে।

—‘কী হল? উর্শীর কী পছন্দ হবে না গিফটটা?’

মন্দারের শঙ্কিত কণ্ঠস্বরে শুনে একটু যেন বিষণ্ণ হাসি হাসে উর্মি— ‘অপছন্দ হওয়ার মতো জিনিস তো নয়। কিন্তু মন্দার, তুমি কী কখনও উর্শীকে তোমার ফিলিংসের কথা বলেছ?’

—‘না।’ মন্দার একটু চিন্তা করে জবাব দেয়—‘সেভাবে কখনও বলিনি। কিন্তু ভ্যালেন্টাইনস্ ডে, রোজ ডে বা নিউ ইয়ারে সবসময় দামি দামি গিফট দিয়েছি। ও রিফিউজ করেনি কখনও।’ উর্মি চুপ করে কিছুক্ষণ কী যেন ভাবল। তারপর আস্তে আস্তে বলল—
‘অন্য দামি গিফটের কথা বলছি না। তবে হিরের আংটির ব্যাপার আলাদা। হিরেটার নিশ্চয়ই অনেক দাম। কিন্তু তার দামের চেয়েও বেশি দামি তোমার ফিলিংস। এটার পিছনে তোমার রক্ত, ঘাম, কৃচ্ছসাধন জড়িয়ে আছে। এটা হিরের আংটি নয়, আসলে তোমার সমস্ত জীবন, সমস্ত অনুভব। কার হাতে যাবে সেটা বড়ো কথা নয়। বড় কথা, সেই হাতের এই আংটি পরার যোগ্যতা আছে কিনা।’

মন্দার উর্মির কথা শুনছিল। তার বিরক্ত লাগছে। হঠাৎ করে করে উর্মি এমন ভাষণ দিতে শুরু করেছে কেন? বিরক্তিতা সম্ভবত তার মুখেও ছাপ ফেলেছিল। উর্মি সেটা লক্ষ করেই ফের বিষণ্ণ হাসিটা হাসে — ‘আমি তোমায় জ্ঞান দিতে চাই না মন্দার। শুধু এইটুকু

বলতে চাই তোমার ফিলিংস যেন কারুর কাছে 'টেকেন ফর গ্রাণ্টেড' হয়ে না দাঁড়ায়। দ্যাটস্ অল।"

বলতে-বলতেই তার কণ্ঠস্বরের গাণ্ডীর্ঘটা সরে গেছে। তার বদলে এখন একটা ছেলেমানুষি ভাব— 'আর শুধু উশ্রীর জন্য গিফট আনলেই হবে? আমার জন্য কী এনেছ?'

সে আশ্চর্য হয়ে বলে — 'তোমার জন্য?'

— 'হ্যাঁ, আমার জন্য।' উর্মি মিটিমিটি হাসে— 'জানো না? উশ্রী আর আমি টুইন্স্। আমাদের জন্ম একই দিনে। উশ্রী আমার থেকে দু-মিনিটের বড়ো। অর্থাৎ আজ আমারও জন্মদিন।'

মন্দার অপ্রস্তুত। এমন সম্ভাবনার কথা তার মাথায় আসেনি। উশ্রী আর উর্মি পরস্পরকে নাম ধরে ডাকে, 'তুই তোকারি' করে। কিন্তু উশ্রী সর্বত্র উর্মিকে 'বোন' হিসেবে পরিচয় দেয়। সে পরিচয়টাই জানত মন্দার। ওদের দুজনের চেহারা, স্বভাব, ব্যক্তিত্ব সম্পূর্ণ আলাদা! তাই কখনও মনে হয়নি ওরা যমজ বোনও হতে পারে।

— 'ওঃ ... আই অ্যাম সরি...।' সে আমতা আমতা করে বলে— 'আমি জানতাম না... আই মিন... বুঝতে পারিনি। তোমাদের দেখতে তো...।'

— 'একদম একরকম।' উর্মি মুখ টিপে হাসল... 'শুধু বাইরের লোক সেটা দেখতে পায় না।' সে একটু থেমে ফের বলে— 'কই, আমার গিফট তো দিলে না?'

উর্মির কথায় ভ্যাভাচ্যাকা খেয়ে গিয়েছিল মন্দার। দুজন একরকম দেখতে! বলে কী! ওদের দুজনের চেহারায় আকাশ-পাতাল তফাত!

বিস্ময়টা কোনোমতে গিলে ফেলে সে বলল — 'তোমার জন্য তো কিছু আনিনি। সরি উর্মি।'

— 'সরি বললে তো শুনছি না।' উর্মি টাউস ব্যাগটা খুলে একটা বিরাট ডায়ারি বের করে এনেছে। ডায়ারির একটা পাতা খুলে এগিয়ে দেয়— 'দাও।'

মন্দার বিহুল — 'কী?'

— 'গিফট। উদীয়মান কবির সই সহ একটি তাৎক্ষণিক কবিতা।' সে বলল— 'বলা যায় না, কোনোদিন হয়তো তুমি বিশাল নামি কবি হবে। আমাদের চিনতেই পারবে না। তখন এই গিফটটাই সবাইকে সগর্বে দেখিয়ে বলব— 'মন্দার ভট্টাচার্য একসময় আমাকে চিনতেন।'

— 'গাছে কাঁঠাল গোঁফে তেল!' মন্দার ফিক করে হেসে ফেলেছে। হাসতে হাসতেই তার ডায়ারিতে জন্মদিন উপলক্ষ্যে কয়েক লাইনের একটা ছড়া লিখে দিল—

এই মরেছে, এই মরেছে, এই হয়েছে কেলো!

হেডিমণির জন্মদিনে কেকটা কোথায় গেল?

ফেট্রিবাঁধা দুষ্টুবুড়ি

মিষ্টি কথায় মিছরি ছুরি

রূপের ঠ্যালায় কোথায় লাগে অ্যাঞ্জেলিনা, জেলো!

কেক আনিনি, গিফট আনিনি, তাই তো বাজাই বাজা,

ট্যাকের কৃপায় আমি সদাই বোম্বাগড়ের রাজা।

এমন সাধের জন্মদিনে

নাই বা দিলুম কিছুই কিনে

দিদিমণি, তুমিই সত্য, বাদবাকি সব গাঁজা!

— ‘ও-মা! লিমেরিক!’ উর্মির মুখ খুশির হাসিতে ঝলমল করে উঠেছে— ‘কী সুন্দর হয়েছে!’

— ‘পছন্দ হয়েছে তোমার?’

— ‘ভীষণ... ভীষণ... ভীষণ’ সে ছেলেমানুষের মতো উচ্ছ্বসিত— ‘তুমি আজকের পার্টিতে আসবে তো? আমার সব বন্ধুদের আমি কবিতাটা পড়ে শোনাব...’।

— ‘পার্টি’!

— ‘হ্যাঁ, পার্টি’ উর্মি একটু যেন অবাক হয়— ‘কেন? উশ্রী তোমায় ইনভাইট করেনি?’ মন্দার কিছু বলার আগেই উশ্রী এসে পড়ল। তার মুখে তখনও মেক-আপ। শট দিয়ে বেশ ক্লান্ত হয়ে পড়েছে। মন্দারের দিকে তাকিয়ে অল্প হেসে বলল— ‘হাই মন্দার’।

— ‘হাই উশ্রী’ সে হিরের আংটির বাস্কেটা তার দিকে এগিয়ে দিয়েছে— ‘হ্যাপি বার্থ ডে। ভেরি ভেরি রিটার্নস্ অফ দ্য...’

— ‘কী এটা?’ উশ্রী নিরুৎসুকভাবে বাস্কেটা খুলল। বাস্কের ভেতর হিরেটা ঝলমলিয়ে উঠেছে।

অথচ সেই ঝলমলানির কণামাত্রও উশ্রীর মুখে দেখতে পেল না মন্দার। ভেবেছিল আংটিটা তাকে পরিয়ে দেবে। কিন্তু সে নিজেই আংটিটা পরে ফেলেছে। বেশ কিছুক্ষণ নেড়েচেড়ে দেখে তার ভুরু কঁচকে গেল। উর্মির দিকে তাকিয়ে বলল— ‘কী মনে হয়? এটা এক ক্যারাট হবে?’

উর্মির হাসি ঝলমলে মুখ যেন ফ্যাকাশে হয়ে যায়। মন্দারের মনে হল শনিদেব নয়, এবার চড়টা তাকে উশ্রীই মেরেছে।

— ‘না।’ তার গলা দিয়ে আওয়াজ বেরোচ্ছিল না। তবু কোনোমতে বলল— ‘ফরটি ফাইভ সেন্ট’।

অদ্ভুত তাচ্ছিল্যের হাসি হেসে উশ্রী বলে— ‘এক ক্যারাটের নীচে হিরে হিরেই নয়।

— ‘উশ্রী, ...।’ উর্মির মুখ রাগে ধমধম করছে— ‘এটা কী জাতীয় ভদ্রতা? তুই জানিস্ কত কষ্ট করে এই আংটিটা ও কিনেছে?’

— ‘দ্যাটস্ নট মাই প্রবলেম।’ উশ্রীর মুখে সেই কুহকমাখা হাসি। মন্দারের হঠাৎ মনে হল এমন-কুৎসিত নির্বোধ হাসি আগে কখনও দেখেনি।

— ‘একটা মিডলক্লাস ঘরের সাধারণ স্প্রিষ্টরাইটারকে আমি হিরে গিফট দিতে বলিনি।’ সে তার ঘন চুলে হাত বোলায়— ‘এনিওয়ে আই অ্যাম টায়ার্ড।’

মন্দারের মুখ কালো হয়ে গিয়েছিল। এমন অপমানিত সে কখনও হয়নি। সকাল থেকে কত কিছুই না কল্পনা করেছে। কেউ যেন সেই কল্পনাকে এক হাতুড়ির বাড়ি মেরে খানখান করে দিল।

তার চোখ বাম্পাচ্ছন্ন। নাক-কান দিয়ে আঙনের হলকা বেরোচ্ছে। তবু দাঁতে-দাঁত চেপে বলল— ‘আমি জানতাম না উশ্রী, তুমি আমার সম্পর্কে এরকম ভাবো!’

— ‘কাম্ অন... গ্লো আপ মন্দার!’ উশ্রী খিলখিলিয়ে হেসে ওঠে— ‘এরকম, ওরকম তো দূর। আমি তোমার সম্পর্কে কিছুই ভাবি না! তোমাকে নিয়ে ভাবার সময় আমার নেই।’

বলতে-বলতে সে উঠে দাঁড়িয়েছে— ‘আমার কাজ আছে। অ্যান্ড মন্দার, থ্যাঙ্কস্ ফর দ্য গিফট।’

মন্দার দেখল উর্মি তার দিকে ব্যথিত দৃষ্টিতে তাকিয়ে আছে। হঠাৎ করে মনে পড়ে গেল একটু আগেই তার বলা কথাগুলো।

—‘এটা হিরের আংটি নয়, আসলে তোমার সমস্ত জীবন, সমস্ত অনুভব!’ কার হাতে যাবে সেটা বড়ো কথা নয়। বড়ো কথা, সেই হাতের এই আংটি পরার যোগ্যতা আছে কিনা।...’

তখন ভাষণ ভেবে বিরক্ত হয়েছিল সে। কিন্তু...।

—‘দাঁড়াও উশ্রী।’ কোথা থেকে তার মধ্যে এত জোর এল, মন্দার জানে না। কিন্তু সে বিদ্যুৎগতিতে উঠে গিয়ে উশ্রীর সামনে দাঁড়িয়েছে। তার চোখে চোখ রেখে বলল— ‘আংটিটা ফেরত দাও’।

উশ্রী যেন তার কথাটা বুঝতে পারেনি। থতোমতো খেয়ে বলে— ‘সরি’...।

—‘আই অ্যাম সরি উশ্রী।’ তার কণ্ঠস্বরে জেদ, রাগ, ফ্লোভের মিলিত প্রকাশ— ‘এই আংটিটা তোমার জন্য নয়। ফেরত দাও।’

উশ্রীর ফরসা মুখ লাল হয়ে ওঠে। সে বিনাবাক্যব্যয়ে সঙ্গে সঙ্গেই হাত থেকে খুলে আংটিটা ছুড়ে দিয়েছে তার মুখের ওপর। খপ করে সেটাকে লুফে নিল মন্দার। শান্ত স্বরে বলল— ‘থ্যাঙ্ক ইউ।’

আমার অ্যান্টাসিডের শিশি,
দাঁতে সকালবেলার মিশি,
বউয়ের বাসি মুখের কিসি
নিয়ে মধ্যবিস্ত আমি।

হাতের বাবরি আমল ছাতায়,
প্রভুর চিত্রশুপ্ত খাতায়
ভুঁড়ি ইন্দ্রলুপ্ত মাথায়
নিয়ে নিটোল গৃহস্বামী।

আবেগ নেয় না কোনো ঝুঁকি,
তোমায় ডিস্কো প্রণাম ঠুকি,
তবু দেয় না কপাল উঁকি
প্রভু আধকপালী ছেড়ে,—

মেশে রক্তে চিনি স্নেহ।
তবু পাঁঠামৃতই দেহো!
যতই বাড়ুক মধুমেহ,
ডোবা কবজি তোলে কে রে!

বহর ছোট্ট লম্বোদরো।
 কাব্যে সখী আমায় ধরো।
 ফিলিম মোগ্যাম্বো গব্বরও
 আমার ডেইলি হাতিমতাই।

ঘরে বৌ-মায়ে কারগিল
 আমি বিষণ্ণ চাটিল
 ইস্যু তাল হয়ে যায় তিল
 'প্রভু নষ্ট হয়ে যাই।'

আমি বাসে ট্রামে চড়ি
 কনুই হিলের গুঁতোয় মরি
 আজও স্বপ্নে দেখি পরি
 পাঁচীর সঙ্গে খাটে শুয়ে...!

তোমার বৈকুণ্ঠে বাতি
 আমার লোডশেডিংই সাথী।
 যতই হই না আমি পাতি
 ঝড়ে পড়ছি না তো নুয়ে।
 তোমার একটেরে চোখ খোলা
 আশিস তাদের জন্য তোলা
 যাদের ব্যাংকে টাকার গোলা
 দেশের শুভ-নিশুভ।

আমি সবার জন্য আছি
 একা যুদ্ধ করেই বাঁচি।
 যতই দাও না পাছায় কাঁচি
 জমি ছাড়ছে না কুম্ভ।

যারা লক্ষহিরা ছড়ায়
 তোমায় বুর্জোয়া - পাঠ পড়ায়
 সোনা রুপোর মুকুট গড়ায়
 তাদের বাড়ুক তসিল খান!
 ধনে থাকি বা নাই থাকি

মনে ডাকছে অচিন পাখি
নিজের জীবন নিজেই আঁকি
আমিই মধ্য ভগবান।

— ‘পথিক, তুমি কি পথ হারাইয়াছ?’

শুটকি অধনির্মীলিত দৃষ্টিতে গহনের দিকে তাকিয়েছে— ‘কবিতাটা লিখেছিস ভালো। এটাও ঘটনা যে তোর পরিচিত রাইটিং স্টাইল ভেঙে বেরিয়েছিস।’ কিন্তু প্রশ্নটা সেই একই জায়গায়— ‘পথিক তুমি কি পথ হারাইয়াছ?’

গহন অসহিষ্ণু হয়ে বলেন— ‘তুই ও কপালকুণ্ডলা নোস, আমিও নবকুমার নই। তাহলে হঠাৎ করে বন্ধিমবাবু এসে পড়লেন কেন?’

— ‘বন্ধিমবাবু আসেননি। প্রশ্নটা এসেছে।’ শুটকি বলল— ‘তুই ভাবছিস যে পরিচিত ছক ভেঙে বেরিয়েছিস। তা বেরিয়েছিস ঠিকই। কিন্তু নিজের পরিচিত ছক ভাঙতে গিয়ে অন্য একটা ছকে ঢুকে পড়েছিস। যেটা আমাদের কাছেও সমান পরিচিত।’

— ‘মানে?’

— ‘কমেন্টগুলো দ্যাখ।’

‘কবিতার নীচে বড়ো বড়ো ব্লকে ত্রিশটা কমেন্ট পড়েছে। ‘আকাশনীল’ লিখেছে— ‘আরে, এ তো পুরো ঝিনু চিকু। মিঠুনের ফিল্মে রঞ্জার নৃত্য! একেবারে স্বপ্নিলীয় স্টাইল।’

ব্যাসদেব বলেছেন— ‘এতদিনে একটা অন্যরকম কবিতা পড়লাম। শব্দচয়ন দুর্ধর্ষ। ছন্দ জমে ক্ষীর! আপনি কি স্বপ্নিল আচার্যের ফ্যান?’

নিধিরাম সর্দারের মন্তব্য— ‘পুরো চম্পা মাল মামা।’ স্বপ্নিল, স্বপ্নিল গন্ধ! পাগলা, ক্ষীর খা কুলস্য কুল।’

গহন সবকটা কমেন্টেই চোখ বোলালেন। তারপর বিভ্রান্তভাবে বলেন— ‘এতে দেখার কী আছে? এতদিন ‘কুলস্য কুল’ ছিলাম। এখন ‘কুলস্য কুল’ হয়েছে।’

— ‘এই!’ শুটকি চেয়ারের হাতলে আল চাপড় মারে— ‘এই হচ্ছে তোর পলায়নপর মনোবৃত্তি। ভালো ভালো জিনিসগুলো দেখলি— অথচ আসল জিনিসটাই দেখলি না!’

— ‘কি দেখিনি?’

— ‘প্রত্যেকেই কবিতাটা ভালো লেগেছে। কিন্তু ...!’ সে পায়ের ওপর পা তুলে বসেছে— ‘প্রত্যেকেই বলেছে যে কবিতাটায় ‘স্বপ্নিল’,... ‘স্বপ্নিল’ গন্ধ আছে। নতুন প্রজন্মের ফেমাস কবি স্বপ্নিল আচার্য ঠিক এইরকম ভাষাতে, এইরকম স্টাইলেই কবিতা লেখেন। কবিতাটা ভালো হয়েছে নো ডাউট। তোর অন্যান্য লেখার থেকে আলাদা হয়েছে তা-ও ঠিক। কিন্তু স্বপ্নিলের কবিতার মতো হয়েছে। তুই নিজেকে ভাঙতে গিয়ে অন্য একজনের মতো করে গড়ে ফেলেছিস।’

গহন কপালে হাত রেখে শুটকির কথা শুনছিলেন। সে বিন্দুমাত্রও বাড়িয়ে বলছে না। কবি স্বপ্নিল আচার্যের অনেক কবিতা পড়েছেন তিনি। লেখার সময়ে মনে হয়নি যে, সেই আদলেই কবিতাটা গড়ে উঠছে। কিন্তু এখন বুঝতে পারছেন সত্যিই ওটা স্বপ্নিলীয় স্টাইল হয়ে গেছে!

—‘নিজেকে ভাঙছি’ ভাঙ।’ শূটকি বলে— কিন্তু নিজের মতো করে ভাঙ। নিজের মতো করে শব্দ বেছে নে। অন্যের মতো নয়। দাঁড়া, ‘একটা জিনিস দেখাই তোকে।’

সে চেয়ার ছেড়ে উঠে গেল। গহন দেখলেন শূটকি তার লাইব্রেরির দিকে যাচ্ছে। নির্ধাত এখনই কোনো বই এনে বলবে— ‘তোমার এটা পড়া উচিত। কিংবা কোনো বইয়ের রেফারেন্স এনে সুদীর্ঘ ভাষণ দেবে। বলবে, কবিতা কাকে বলে, কবিতা কী জন্য কবিতা— এইসব।’

ভেবেই মনে মনে আতঙ্কিত হয়ে উঠছিলেন গহন। শূটকির লোকচার হজম করা রীতিমতো কঠিন কাজ। সে শুরু করতে জানে, থামতে জানে না।

বাস্তবে অবশ্য সেসব কিছুই ঘটল না। শূটকি দলামোচা পাকানো, হলদে হয়ে যাওয়া একটা কাগজ নিয়ে এসেছে। গহনের দিকে এগিয়ে দিয়ে বলল— ‘পড় এটা।’ গহন সবিস্ময়ে দেখলেন হলুদ হয়ে যাওয়া কাগজে নীল অক্ষরে গোটা গোটা হরফে একটা কবিতা লেখা আছে—

—‘এ কী!’ তিনি বিস্মিত চোখজোড়া তুলে তাকালেন বন্ধুর দিকে— ‘এ তো...’।

—‘হ্যাঁ, তোমারই কবিতা।’ শূটকি বলে— ‘আজ থেকে প্রায় ত্রিশ বছর আগে, তুমি নিজেকে লিখে ডাস্টবিনে ফেলে দিয়েছিলি। কুড়িয়ে রেখেছিলাম। এটা অন্যদিক দিয়ে ইউনিক গহন। কারণ এমন কবিতা তুমি আর কখনও লিখিসনি। যদিও তোমারই লেখা উচিত ছিল।’

গহন চোখ বুজলেন। তিনি জানেন এবার সে কী বলবে—

—‘তোকে আমি এসকেপিষ্ট কেন বলি জানিস?’ শূটকি বলে— ‘কারণ তুমি চিরকাল জীবনের সেই দিকটার দিকে পিঠ ফিরিয়ে রেখেছিস, যে দিকটা তোমার চেয়ে ভালো আর কেউ জানে না।’

সে চুপ করে গেল। গহনও স্তব্ধ। তিনি আন্দাজ করতে পারেন শূটকি কোন্ দিকের কথা বলছে। যে সময়ের কথা ভুলে যেতে চান, ঠিক সেই সময়ের কথাই বলছে সে।

মুখ নীচু করে গৌজ হয়ে বসেছিলেন গহন। শূটকির দিকে না তাকিয়েও বেশ বুঝতে পারছেন যে তার তীক্ষ্ণ দৃষ্টি এদিকেই নিবন্ধ। ভেতরে ভেতরে একটা তীব্র প্রতিবাদ জন্ম নিচ্ছিল। যে প্রতিবাদে একদিন সেই সময়টার দিক থেকে মুখ ফিরিয়ে নিয়েছিলেন, ডুবে গিয়েছিলেন রোমান্টিসিজমে। মনে হয়েছিল— ‘কেন লিখব? যে ক্ষত বুকে আছে তা থাক। ভিথিরির মতো দেখিয়ে বেড়াব কেন? সে অসুখের কথা ভুলে যেতে চাই, তাকে ফিরিয়ে আনব কোন যুক্তিতে?’

—‘তুমি শুধু রোমান্টিক কবিতাই লিখিস কেন?’ সে তীব্র দৃষ্টিতে গহনকে দেখছে— ‘খুব অল্প বয়সে একটা অশান্ত সময় দেখেছিস। যদিও সে সময়কে বোঝার মতো বয়েস তখন তোমার বা আমার—কারুর ছিল না। কিন্তু সেই সময়টা তোকে একটা জোরদার খাঙ্কা দিয়ে গেছে। ছাপ ফেলে গেছে। আজও তেমন একটা সময় আসছে গহন। আবার একটা অস্থির সময়। তার মধ্যে দাঁড়িয়েও চাঁদ-তারা- ফুল- পাখির সৌন্দর্যে নিজেকে জোর করে ডুবিয়ে রাখবি! কেন তাকাবি না সেই অস্থিরতার দিকে?’

—‘আমি কবিতা লিখতে চাই।’ গহন যেন একটু উত্তেজিত ভঙ্গিতে বলেন— ‘স্লোগান লিখতে চাই না।’

তিনি আরও কিছু বলতে যাচ্ছিলেন। তার আগেই বাধা পড়ল। একটি বারো-তেরো বছরের ছেলে ঘরে এসে ঢুকেছে। গহন দেখেই চিনতে পারলেন। এই সেই ছেলেটা। যে সেদিন ‘জুতা আবিষ্কার’ কবিতাটা আদ্যোপান্ত মুখস্থ বলেছিল। তিনি অবাক! ছেলেটা এখানে কী করছে? শুটকির সংসারে নতুন অতিথি!

—‘কহো গোপাল...।’ শুটকির সন্নেহ চোখ ছেলেটার দিকে ফিরল— ‘কী সমাচার?’

গোপালকে এখন আর চেনাই যায় না। পরনে ঝকঝকে তকতকে জামা। মাথায় শ্যাম্পু আর গায়ে সাবান পড়েছে। তবে মাথার উকুনগুলোর রাজত্ব বোধহয় এখনও কায়েম। সে মাথা চুলকাতে চুলকাতে বলে— ‘ভাত কি বসিয়ে দেব?’

শুটকির ভুরু কঁচকে গেছে। ভ্রুকুটি করে বলল— ‘তোকে কি আমি ভাত রাঁধতে বলেছি? যা করতে বলেছি সেটা কতদূর?’

মুখ কাঁচুমাচু করে বলল গোপাল — ‘দীর্ঘইটা লিখতে পাচ্ছিলে কো।’

—‘দীর্ঘইটা লিখতে পারছ না, তাই ভাত রাঁধার এত তাড়া।’ সে ধমক দেয়- ‘যা। লেখার চেষ্টা করগে। না পারলে দেব এক কানের গোড়ায়...।’ ছেলেটা বাংলার পাঁচের মতো মুখ করে চলে গেল। গহন গোটা ঘটনাটা সবিস্ময়ে দেখছিলেন। এবার মুখ খুললেন—

—‘তুই কি স্বাক্ষরতা অভিযানে নেমেছিস শুটকি!’

—‘আরে, নাঃ।’ শুটকি মৃদু হাসে— ‘ঠিক তা নয়। ব্যাটাকে পুষি নিয়ে নিলাম, বুঝলি?’

—‘কিন্তু হঠাৎ...।’

—‘হঠাৎ নয়। হিন্দি আছে। গত বুধবার রাতে দোকান বন্ধ করে ফিরছি, চোখে পড়ল ব্যাটা রাস্তার ওপরে বস্তা পেতে ঘুমোচ্ছে’। সে আড়চোখে দেখে নেয় যে গোপাল ধারে’ কাছে আছে কিনা। তারপর দরজা বন্ধ করে একটা সিগারেট ধরিয়ে বলল— ‘হ্যাঁ, যা বলছিলাম। গোপাল রাস্তার ওপরে ঘুমোচ্ছিল। আর ওর ঠিক পাশেই কি যেন একটা চিকচিক করছে। রাস্তার আলোয় দেখি চকচকে জিনিসটা অল্প অল্প নড়ছেও।’

—‘তারপর?’

—‘তারপরই তো কেলো! সন্দেহ হল! কাছে গিয়ে টর্চের আলো ফেলে যা দেখলাম, তুই জাস্ট ভাবতে পারবি না।’ শুটকি চোখ বড়ো বড়ো করেছে— ‘একটা আস্ত গোখরো সাপ! কলকাতার রাস্তার কোথা থেকে এল কে জানে। কিন্তু দিব্যি ফণা গুটিয়ে গুড়িগুড়ি মেরে গোল হয়ে শুয়ে আছে! একবার ভেবে দেখ, বাচ্চা ছেলেটা ঘুমিয়ে আছে। তার পাশে একটা গোখরো সাপ! একটু নড়াচড়া করলেই কামড়ে দিত।’

কলকাতার যীশুদের হেতালের লাঠির দরকার পড়ে না!

ভাবতেই গা শিরশির করে ওঠে গহনের। দৃশ্যটা তিনি কল্পনাও করতে চান না!

—‘তাড়াতাড়ি গিয়ে সাবধানে গোপালকে ডেকে তুললাম। প্রথমে তো উঠতেই চায় না। তারপর ঘুম ভেঙে পাশের প্রাণীটিকে দেখেই ‘আই বাবা’ বলে চৈচিয়ে উঠে আমাকে জড়িয়ে ধরল। শুটকি বিষণ্ণ হাসল— ‘বাবা’ শব্দটা এই প্রথম শুনলাম জানিস। বুবাই কখনও বলেনি। বড়ো ছোট্ট শব্দ। কিন্তু মায়াবী। মায়ায় জড়িয়ে গেলাম। ভাবলাম আমিও একা, ওরও জগতে কেউ নেই। দুই কপালপোড়া মিলেই না হয় একসঙ্গে থাকি। ভাতে

ভাত, ডাল-ভাত আমার যা জোটে, ওরও দুটো যাহোক করে জুটে যাবে। ব্যাস, তারপর থেকেই গোপাল বাবাজির এখানে অধিষ্ঠান। সব ভালো, শুধু পড়তে বললেই হাই ওঠে— এই যা দোষ।’

গহন আপন মনে কী যেন ভাবছিলেন। ঠিক গোপালের অর্ধেক বয়সেই গোখরো সাপের চেয়েও বিষাক্ত কিছু হেবল খেয়েছিলেন তিনি। শুটকির দিকে তাকিয়ে তার চোখে রুধির জমছিল। যেন সপ্রশ্ন দৃষ্টিতে জানতে চাইছেন — ‘আমাকেও তো সাপে কামড়েছিল! তখন তুই কোথায় ছিলি শুটকি!’

‘যে পিতা সন্তানের লাশ শনাক্ত করতে ভয় পায়
আমি তাকে ঘৃণা করি
যে ভাই এখনও নির্লজ্জ স্বাভাবিক হয়ে আছে
আমি তাকে ঘৃণা করি
যে শিক্ষক বুদ্ধিজীবী কবি ও কেরানি
প্রকাশ্য পথে হত্যার প্রতিশোধ চান না
আমি তাকে ঘৃণা করি’ ...

সকাল থেকেই দিনটা থমথমে। বাবা সাত দিন হল বাড়ি ফেরেননি। বাড়িতে একা মা; যুবতি মেয়ে আছে আর ছ-বছরের ছেলে। বাচ্চাটা জানে না বাইরে ঠিক কী হচ্ছে! বাবা কেন বাড়ি ফেরেন না তা-ও তার জানার কথা নয়! মাঝেমাঝেই দরজায় কড়া নাড়ার শব্দ শুনে মা আর-দিদি কেন চমকে ওঠে, সে সম্পর্কেও তার কোনো ধারণা নেই। সে শুধু জানে, কিছুদিন যাবৎ একটা বন্দিজীবন তাকে ঘিরে ধরেছে। স্কুলে যাওয়া বন্ধ। বন্ধুদের সঙ্গে মাঠে খেলতে যাওয়া বারণ। শুধু স্যাঁতস্যাঁতে দেয়ালের চৌহদ্দির মধ্যেই তার দিন কাটছে।

এ বাড়ির ভেতরে রোদ ভুলেও উঁকি মারে না। সবসময়ই একটা স্থির শীতলতা। কেন যেন তার মনে হয়—শীত শীত ভাবটা একদিনে আরও বেড়েছে। আগে এই চত্বরটা সরগরম থাকত। ফুচকাওয়ালার দোকানের ভিড়ে, পানের দোকানে, চায়ের ঠেকের জমজমাট আড্ডায় গমগম করত চতুর্দিক।

কিন্তু বেশ কিছুদিন হল দৃশ্যপটের পরিবর্তন হয়েছে। কার অদৃশ্য ইশারায় যেন সন্ধে সাতটার পরই চুপিসাড়ে পড়ে যায় দোকানের বাঁপ। শুনশান হয়ে যায় রাস্তা। দু-একটা বেওয়ারিশ কুকুরের ‘ভৌ ভৌ’ নিস্তব্ধতাকে আরও বেশি প্রকট করে তোলে।

কখনো-কখনো অবশ্য গভীর রাতে কিছু বিজাতীয় শব্দ শুনতে পায় ছেলেটা। হঠাৎ করেই রাতের থমথমে নৈঃশব্দকে চিরে বেজে ওঠে তীক্ষ্ণ বাঁশি। দুমদাম করে কান ফাটানো আওয়াজ! বারুদের উৎকট গন্ধ! দুপদাপ করে কয়েক জোড়া ভারী বুট শব্দ তুলে ছুটে যায়। তারপরই ‘দুডুম’ করে আরও একটা শব্দ!

ছেলেটা চমকে ওঠে। জানলা দিয়ে উঁকি মারতে চায়। কিন্তু মা তাকে বাধা দেন।

—‘ওটা কীসের শব্দ মা?’

ছেলের উৎসুক প্রশ্নের উত্তরে মা তার মাথায় হাত বোলাতে বোলাতে বলেন—

—‘কিছু না বাবা। ছেলেটা বাজি ফাটাচ্ছে।’

—‘বাজি ফাটাচ্ছে। আজ কি পূজো?’

—‘হ্যাঁ।’

—‘আমি পূজো দেখব মা...।’

মা অদ্ভুত আতঙ্কে ছেলেকে জড়িয়ে ধরেছেন— ‘না খোকা। এ পূজো দেখতে নেই!’

পূজো কেন দেখতে নেই এ প্রশ্নটা খোকায় মাথায় বারবার ধাক্কা মারতে থাকে। মা তাকে বুঝিয়ে বললেন যে, এটা বড়োদের পূজো। ছোটোদের দেখতে নেই। ছোটোরা দেখলে ঠাকুর পাপ দেয়। ছেলেটা মায়ের বুকে মাথা রেখে মশারির দিকে তাকিয়ে কতকিছুই না ভাবে।...বড়ো হয়ে সে বাবার সঙ্গে বড়োদের পূজো দেখতে যাবে। বাবা ফিরে এলে বলবে রাত্রে মাঝে মাঝে যে বাঁশি বাজে, সেইরকম বাঁশি কিনে দিতে...দিদিকে মেলা থেকে লাল কাচের চুড়ি কিনে দেবে। লাল রং পরলে দিদিকে খুব সুন্দর লাগে...।

ঘুমে দু-চোখ বুজে আসার আগে ক্ষীণভাবে কানে আসে জানলার বাইরে কাদের যেন ফিশফাশ। কিছু একটা ঘষটে টেনে নিয়ে যাওয়ার শব্দ! তার ঘুমে অসাড় হয়ে আসা মস্তিষ্ক তা নিয়ে প্রশ্ন তোলে না।

এমন করেই কেটে যাচ্ছিল দিন। ছেলেটার জীবনে তেমন কিছু পরিবর্তন হয়নি। তবে তার কৈশোরের স্বভাবজাত কৌতূহলে মনে কিছু প্রশ্ন এসে ভিড় জমাচ্ছিল। বাবা কোথায়? কবে বাড়ি ফিরবে? মধ্যরাত্রে কারা যেন এ বাড়ির চতুর্দিকে লঘু পায়ে হেঁটে বেড়ায়। ফিশফিশ করে কথা বলে। ওরা কারা? মা আর দিদি হাসে না কেন? বাইরে বেরোনো বারণ কেন?

অনেক জিজ্ঞাসা করেও প্রশ্নের জবাব কখনও পায়নি সে। তার পক্ষে বোঝা সম্ভব ছিল না যে, এ আসন্ন প্রলয়ের ইঙ্গিত! কখনও অনুভব করতে পারেনি আজকাল হাওয়াও বড়ো সাবধানে বয়। গাছের পাতাও খুব সন্তর্পণে নিঃশব্দে ঝরে পড়ে। চতুর্দিক গুমোট হয়ে এসেছে। অবধারিতভাবে ঝড়ও আসবেই।

আসন্ন ঝড়ের পূর্বাভাস সম্পর্কে সম্পূর্ণ অনবহিত ছেলেটা তখন সূর্যোদয়ের ছবি আঁকছিল! কমলা রঙের সূর্য পাহাড়ের মাথায় উঁকি মারছে। সাদা বরফে ঢাকা পাহাড় সোনালি হয়ে উঠেছে। তার পায়ের কাছে একটা রূপোলি নীল রঙের নদী। নদীর জলে সোনা রঙের আভা!

সে রাতেও সে বড়ো যত্ন নিয়ে ছবিটা আঁকছিল। কমলা, গোলাপি আকাশে হালকা কালো রং দিয়ে একঝাঁক পাখির উড়ে যাওয়া চিহ্নিত করছিল ছেলেটা।

হঠাৎ নিঝুম রাতের নিস্তব্ধতাকে ভেঙে দিয়ে প্রচণ্ড বোমার শব্দ! বন্ধ দরজার বাইরে কয়েকজোড়া ভারী বুটের কর্কশ আওয়াজ! পরক্ষণেই কড়া নাড়ার পরুষ শব্দ!

মা আর দিদি চমকে উঠে পরস্পরের দিয়ে ভয়ানক দৃষ্টিপাত করছে। ছেলেটা ভাবে, ওরা এত ভয় পাচ্ছে কেন? বাবা হয়তো ফিরে এসেছে। সে উল্লসিত হয়ে ওঠে। বাবা এলে তাকে এই নতুন ছবিটা দেখাবে। জানতে চাইবে— কেমন হয়েছে?

দরজায় ফের প্রবল কড়া নাড়ার শব্দ। মা কাঁপা কাঁপা গলায় বললেন ‘কে’?

—‘পুলিশ। দরজা খুলুন।’

মা উঠে গিয়ে দরজা খুলে দিতেই বাড়িতে যেন ঝড় বয়ে গেল। একদল উর্দিপরা লোক ভেতরে ঢুকে পড়ে গোটা বাড়ি তছনছ করতে লাগল। জলের কলশি ভেঙে, বাবার বইয়ের টেবিল উলটে ফেলে, তক্তপোষের চাদর ছিঁড়ে, বালিশ ছুড়ে ফেলে দিয়ে অসম্ভব প্রতিশোধম্পৃহায় কী যেন খুঁজছে।

মুহূর্তের মধ্যে বাড়িটাকে লম্বভঙ্গ করে প্রায় ধ্বংসস্তূপে পরিণত করল তারা। কিন্তু যা খুঁজছিল তা হয়তো পেল না। ভীষণ আক্রোশে মুখ লাল করে এসে মাকে বলল— ‘মাস্টার কোথায়?’

ছেলেটা দেখল মায়ের মুখ শক্ত। কঠিন দৃষ্টি অন্যদিকে নিবন্ধ। জোরালো গলায় বললেন— ‘জানি না।’

প্রচণ্ড একটা শব্দ! সে বিস্ময়িত চোখে দেখে যে, উর্দিপরা একটা লম্বা-চওড়া লোক মাকে চড় মারল। দাঁতে দাঁত পিষে বলল— ‘হারামজাদি! ছেনালিপনা হচ্ছে! মাস্টার কোথায়? কোথায় লুকিয়ে আছে?’

মায়ের গালে পাঁচ আঙুলের ছাপ। ঠোঁট কেটে রক্ত পড়ছে। ব্যথায় চোখে জল এসে গেছে। তবু সেই জলেই যেন আগুন জ্বলল। রুদ্রাণীর মতো অগ্নিদৃষ্টিতে তাকিয়েছেন তিনি।

—‘জানি না। জানলেও বলব না।’

—‘খান্‌কি মাগী!’

আবার একটা জোরালো থাপ্পড়! লোকটা মায়ের চুলের মুঠি চেপে পরেছে। হিড় হিড় করে টানতে বলল— ‘চল থানায় চল। বেশি চর্বি হয়েছে না? সব চর্বি নামিয়ে দেব শা-লী!’

মা কাঁকিয়ে উঠলেন। অসহায়ভাবে চুলের গোছা ছড়ানোর ব্যর্থ চেষ্টা করছেন। কিন্তু পাষণ্ড লোকটার হাত থেকে নিষ্কৃতি নেই।

আর-একটা লোক চেপে ধরল দিদিকে। সে ঘরের এককোণে দাঁড়িয়ে কাঁপছিল। তাকেও মেঝেতে ঘষটাতে ঘষটাতে টেনে নিয়ে চলল ওরা। অমানুষিক প্রতিশোধম্পৃহায় অশ্লীল সব গালিগালাজ দিচ্ছিল লোকগুলো।

—‘ডব্‌কা রান্‌ডি বাড়িতে পুষেছে শালা! গতরে এত গরম! তোর সব গরম আজ ঠান্ডা করব মাগী। নাও কোথায় জানো না! মুখ না খুললে চামড়া খুলে নেব! থানায় চল। মাস্টার পুলিশ খুন করে লুকিয়ে বেড়ায়। আর মাগীরা ছেনালিপনা দেখাচ্ছে।’

ছেলেটা এতক্ষণ স্তম্ভিত হয়ে দেখছিল। ঠিক যেন একটা দুঃস্বপ্ন দেখছে! এমন বাস্তবে হয় না! হতে পারে না! সে তো আজ সকালেও দেখেছে পায়রারা ঝাঁক বেঁধে আকাশে মনের সুখে উড়ে বেড়াচ্ছে। আজও কৃষ্ণচূড়া গাছটা ফুলে ফুলে লাল হয়ে আগুন ছড়াচ্ছিল! বিকেলেও তুলসীতলায় প্রদীপ স্নিগ্ধ নীল শিখায় জ্বলে উঠেছে, শাঁখ বেজেছে, ধূপের শাস্ত সৌরভে চতুর্দিক ‘ম’ ‘ম’ করেছে। তার মধ্যে এই লোকগুলোর আসুরিক অস্তিত্ব কোথায়!

সে ছুটে গিয়ে বাধা দেওয়ার চেষ্টা করে। যে লোকটা মাকে টেনে নিয়ে যাচ্ছিল তার ওপর ঝাঁপিয়ে পড়েছে। মায়ের হাত টেনে ধরে কাতরগলায় বলে— ‘তোমরা আমার মাকে কোথায় নিয়ে যাচ্ছ! ছেড়ে দাও...ছেড়ে দাও।’

কিন্তু ব্যর্থ প্রচেষ্টা! উদ্ভ্রান্তের মতো সে একবার দৌড়ে যাচ্ছে মায়ের দিকে, আর-এবার

দিদির দিকে। লোকগুলোর হাত ধরে টেনেও ছড়াতে পারল না কাউকে। নিস্তব্ধ রাত্রির বুক চিরে কতগুলো পাশবিক লোকের উন্মত্ত গালিগালাজ, দুই অসহায় নারীর আর্তচিৎকার আর একটি বাচ্চা ছেলের কান্না ধ্বনিত-প্রতিধ্বনিত হল চতুর্দিকে।

ছেলেটা তখন একজনের পা চেপে ধরেছে। হাউ হাউ করে কাঁদতে কাঁদতে বলল—
‘আমার মাকে, দিদিকে নিয়ে যেয়ো না...ওদের ছেড়ে দাও...ছেড়ে দাও...।’

লোকটা এক লাথি মেরে সরিয়ে দিয়েছে তাকে। শক্তবুটের লাথিটা তলপেটে পড়েছে। একটা কাতর শব্দ করে ছিটকে পড়ল সে। ভীষণ ব্যথা লেগেছিল। মনে হচ্ছিল, এক্ষুনি মরে যাবে। তবু সামনের পৈশাচিক দৃশ্য অমন শাস্ত ছেলেটাকেও হিংসা শিথিয়ে দিল। সে উন্মত্ত বনবিড়ালের মতো লোকগুলোর ওপর ঝাঁপিয়ে পড়ে আঁচড়ে-কামড়ে দিচ্ছে। যেন পারলে নখ-দাঁত দিয়ে টুকরো টুকরো করে ফেলে তাদের!

—‘ছেড়ে দাও...ছেড়ে দাও...আমার মাকে...দিদিকে...ছেড়ে দাও।’

—‘শুয়োরের বাচ্চা!’

কানের তলায় একটা মোক্ষম ঘুসি। চোখে আচম্কা অন্ধকার দেখল ছেলেটা! কান বেয়ে তরল, উষ্ণ কী যেন একটা চুইয়ে পড়ছে!

সম্পূর্ণ অচেতন হওয়ার আগে টের পেল কতগুলো শক্ত ভারী বুট তাকে নেড়ে-চেড়ে দেখছে। কেউ যেন ফশফিশ করে বলে—

—‘মরে গেল নাকি স্যার!

‘থুঃ’ করে তার মুখে একদলা থুতু ছিটিয়ে দিয়ে বলল আর-একজন— ‘হারামের পিন্না’! বেঁচে থাকলে তো বাপের মতো হারামি হত! মরাই ভালো।’

তারপর আরকিছু মনে নেই ছেলেটার! কতক্ষণ অজ্ঞান হয়েছিল জানে না।

শুধু মনে আছে, ভোর রাতে একটা জিপ বাড়ির সামনে ছুড়ে দিয়ে গিয়েছিল দুটো ছিন্নভিন্ন দেহকে! দেহ দুটো তখনও জ্যাস্ত ছিল। কিন্তু প্রাণহীন।

মা তারপর থেকে আর কোনো কথা বলেননি। চোখের সামনে যে বীভৎস দৃশ্য দেখতে হয়েছিল তা বর্ণনা করার জ্বালা সহ্য করতে হয়নি তাকে। সে রাতের পর থেকে তিনি মুক, স্থবির পাথরে পরিণত হয়েছিলেন।

ছেলেটা ঝাপসা চোখে দেখেছিল, দিদি দেয়ালে ঠেস দিয়ে বসে আছে। তার শাড়ি ছিন্নভিন্ন। কপালে কালসিটে। গলায় জমাট রক্ত। কামড়ের দাগ! ঠোঁটের কোণ বেয়ে জমাট রক্তের ধারা শুকিয়ে আছে। চুল অবিন্যস্ত। ব্লাউজটা ছেঁড়া! শাড়ির নিম্নদেশ রক্তে ভিজ়ে গেছে।

—‘দিদি!’

কান্নাজড়ানো আর্তসুরে ডেকেছিল সে। তার সর্বাপেক্ষে ব্যথা। তবু কোনোমতে দেহটাকে ছেঁচড়ে ছেঁচড়ে টেনে নিয়ে গেল দিদির কাছে। দু-হাতে দিদির ক্ষতবিক্ষত মুখ ধরে ব্যাকুল স্বরে ডেকেছিল— ‘দিদি...দিদি...দিদি...।’

দিদি কোনো উত্তর দেয়নি। কেমন যেন শূন্য দৃষ্টিতে তাকিয়েছিল অন্যদিকে। ভাই তাকে ছেড়ে দিতেই কাত হয়ে পড়ে গেল!

ঠিক তার পাশেই সেই সূর্যোদয়ের ছবিটা পড়ে আছে! সে অসহায় জলভরা চোখে দেখল,

কমলা রঙের সূর্য, সাদা সোনালি পাহাড়, রুপোলি নীল রঙের নদী, গোলাপি আকাশ— সব লাল হয়ে গেছে! সব লাল!...

দিদিকে লাল রঙে ভারি সুন্দর লাগত! সেই দিদিই দেহের লাল তরল অংশকে ভীষণ যেম্মায় ত্যাগ করেছিল। যে দিদিকে লাল চেলি পরলে উর্বশী মনে হত, সেদিন সে সাদা হয়ে গিয়েছিল।

‘এই মৃত্যু উপত্যকা আমার দেশ না
এই জ্বালার উল্লাসমঞ্চ আমার দেশ না
এই বিস্তীর্ণ শ্মশান আমার দেশ না
এই রক্তনাত কসাই খানা আমার দেশ না।

বাবা, দরজাটা খুলে দাও—
চাবুকগুলো অনেকদিন বাইরে দাঁড়িয়ে আছে—
আমি এখনও অন্ধকার ঘরে অরণ্যদেব... অরণ্যদেব খেলি
সাদা ধুলোর আন্তরণে ঢাকা পায় ভাঙা চেয়ারটাকে
সাদা ঘোড়া ভাবি।

দরজাটা খুলে দাও, ওরা ভিতরে আসুক
কষাঘাতে কষাঘাতে ফিরিয়ে দিক রক্তাক্ত সন্ধ্যা!

বাবা, আমাদের দেশ গণতান্ত্রিক পদ্ধতিতে চলে।
‘জনগণমন অধিনায়ক জয় হে ভারত ভাগ্যবিধাতা’—
যারা তোমার লাশ হয়ে যাওয়া মাংসের পিণ্ডটাকে
জুতোর তলায় চেপটে দিয়েছিল
তারা কি জানত ‘জনগণমন’ কাকে বলে?
যে মাছিগুলো ভনভন করে মুখের রক্ত চেটে খাচ্ছিল,
শুকিয়ে যাওয়া মৃত্যুকালীন রক্তবমি, আর তিন দিনের
পচা-বাসি লাশের দুর্গন্ধে
স্বাধীনতার স্বাদ পেয়েছিল তারা!

বাবা, তুমি জানো না, স্বাধীনতা মানে রোজ সকালে বমি করে
অন্ন-পিণ্ড উগরে দেওয়া!

স্বাধীনতা মানে—রোজকার হাণ্ড—মুতু,
এক নারীকে মছন অথবা ধর্ষণ করে বীষপতনের অধিকার।
অথবা নীলছবি দেখে উত্থিত শীর্ষসবল শীৎকারে হস্তমৈথুন!
ভড়কা থেকে রাম, চুমু থেকে সিগারেট, —সব স্বাধীনতা!

শুধু যে বাঞ্ছনাত বলে ‘আমি আমার মতন দেশে বাঁচতে চাই’
গুলি করে মারো তাকে।

যে লোকটা শেখায় স্বাধীনতার মানে সবার সমানাধিকার
 হুঁসে দাও তার পৌঁদে পয়েন্ট আটত্রিশ বা বাইশ!
 যে হতভাগা তার সন্তানকে একটা
 সুস্থ দেশে জন্ম দেওয়ার স্বপ্ন দেখে, তার
 লিঙ্গ কেটে দাও—সন্তানের স্বপ্ন যেন সে না দেখতে পারে!
 বেচুবাবুদের বলো, ঘর, আসবাবপত্র, এমনকি
 নিজেদের মা-বোনকেও বিক্রি করতে;
 তবু ভুলেও যেন স্বপ্ন বিক্রি না করে!
 ধর্মশিক্ষা, যৌনশিক্ষা সব চলবে।
 সবাই জানুক কীভাবে, ঈশ্বর বানাতে হয়
 কীভাবে আর-একটা মূঢ় মানুষের বাচ্চা বানাতে হয়,
 সাবান থেকে ন্যাপথলিন—সব বানাতে শেখাও।
 কিন্তু যে হারামজাদা দেশ বানাতে শেখায়
 তার গিলোটিনে চড়া নিশ্চিত!

বাবা, দরজাটা খুলে দাও—
 তোমার দলামোচা শরীরটা ওরা আজও টেনে আনছে!
 ওই পচা-গলা, দুর্গন্ধময় লাশ
 মাসের পর মাস, বছরের পর বছর...
 গাধার মতো টেনেই চলে!
 গলে গলে খসে পড়া অঙ্গপ্রত্যঙ্গগুলো
 কেটে দেখে বারবার।
 পচা হৃদয়, গলিত বৃক্ক, পাকস্থলীর পুতি দুর্গন্ধে গা গুলোয়,
 তবু নষ্ট দেহটাকে হাতড়ে হাতড়ে তন্নতন্ন করে খোঁজে
 —‘আদর্শটা কোথায়! ফরেনসিক রিপোর্টে তার
 কথা তো কেউ লেখেনি!’

বাবা, ওই দরজাটা খুলে দ্যাখো—
 এক কিশোর ধানের খেতের দিকে তাকিয়ে স্বপ্ন দেখছে।
 কিংবা ওর চোখ দিয়ে তুমি দেখছ—
 দু’ চোখে তাচ্ছিল্য, গ্রীবায় ঔদ্ধত্য।
 বৃকেব ভিতরে তাজা হাওয়া নিয়ে
 অঙ্কুরে অঙ্কুরে ছড়িয়ে দিচ্ছে সাম্যবাদের ঘ্রাণ
 একদিন তোমাদের মতো করেই সূর্যকে মুঠোয় ধরবে সে
 ছুড়ে দেবে জ্বলন্ত প্রতিবাদ

স্টেনগানের তিলক মাথায় নেওয়ার জন্য জন্ম হয়েছে তার।
 প্রতিটা বুলেট বুকে নিয়ে মৃত্যুর পরও প্রাণ রেখে যাবে—‘আদর্শ কোথায়?’
 শকুনগুলো ওর নিখর দেহ ঠুকরে ঠুকরে খুঁজবে আদর্শ।
 আর মাটি ছুঁয়ে জেগে উঠবে আরও একটা স্বপ্নের চারাগাছ।

বাবা, দরজাটা খুলে দাও।
 চারাগাছটা আমার জন্য বাইরে অপেক্ষা করছে।

ছ-বছরের ছেলেটার ব্যথিত চোখ আস্তে আস্তে পূর্ণবয়স্ক হয়ে ওঠে। গহন তখনও যেন একচল্লিশ বছর আগেকার দিনটাতে পড়ে আছেন। যে দিনগুলোর কথা বারবার ভুলে যেতে চেয়েছেন, যে কষ্টকর গ্লানিময় অভিজ্ঞতার কথা অস্বীকার করার চেষ্টা করেছেন— এক টুকরো কাগজ তাকে আবার সেই দিনগুলোতেই ফিরিয়ে নিয়ে গেল।

তিনি হলুদ কাগজটার দিকে তাকালেন। কবিতাটা লিখে নিজেই ফেলে দিয়েছিলেন। শটকি কুড়িয়ে নিয়েছে। পঁচিশ বছর ধরে নিজের কাছেই আগলে রেখেছিল। আজ ফেরত দিল।

—‘দেখ গহন।’ শটকি বলেছিল— ‘যতই ক্যামোফ্লেজ করিসনা কেন, এই হচ্ছিস আসল তুই। আমি এতদিন ধরে এটাকে সামলে রেখেছি একটাই কারণে। জানতাম, মুখোশ পরে থাকতে থাকতে একসময়ে নিজেই বিরক্ত হয়ে যাবি। তখন তোকে এটা দেখাব।’ তার মুখে একচিলতে হাসি মিঠে রোদ্দুরের মতো ভেসে ওঠে— ‘আজ তোকে তোর সঙ্গেই দেখা করিয়ে দিলাম। এবার ঠিক কর— কী লিখবি। শ্লোগান না কবিতা!’

গহন চোখ বুজলেন। দীর্ঘদিন ধরে নিজেকে লুকিয়ে রাখা বড়ো ক্লাস্তিকর। যতই পালাতে চাও, কোন-না কোনোসময় অতীত সামনে এসে দাঁড়াবেই। এতদিন তিনি চোখ বুজে সূর্যটাকে অস্বীকার করার চেষ্টা করেছিলেন। এবার সে তার গনগনে উত্তাপ নিয়ে একেবারে মুখোমুখি এসে দাঁড়িয়েছে।

হাতের কাগজটাকে টেবিলের ওপর রেখে তিনি উঠে দাঁড়ালেন। আস্তে আস্তে বাথরুমে গিয়ে চোখে-মুখে জলের ঝাপটা দিচ্ছেন। জলের বিন্দু তার মুখ চুঁইয়ে ঝরে পড়ে। সেই জলের ফোঁটাগুলোর দিকে তাকিয়ে হঠাৎ বিন্দু বিন্দু রক্তের স্রাব পেলেন! এমন ফোঁটা ফোঁটা রক্ত দিদির ঠোঁট বেয়ে পড়ছিল।

বুকের ভেতরে একটা অশান্ত উচ্ছ্বাস। ছ-বছরের ছেলেটার অনুভূতিগুলো আবার ফিরে এল গহনের মধ্যে। অনুভব করলেন, হাত-পা কাঁপছে। একটা তীব্র অসহায়তা, রাগ কান্না গলার কাছে জমে উঠেছে। চোখটা কড়কড় করছিল। গহন চোখে জলের ঝাপটা দিলেন। তবু জ্বলুনি কমল না। ফ্রিজ থেকে ঠান্ডা জলের বোতল বের করে মাথায়, মুখে ঢেলে দিয়েছেন। তা সত্ত্বেও অনির্বাণ জ্বালা ভেতর থেকে বেরিয়ে এসে জ্বালিয়ে- পুড়িয়ে খাক করে দিতে চায়—প্রশমিত হয় না। অশান্তভাবে হলঘরে পায়চারি করে বেড়াচ্ছিলেন তিনি। কণা যেন গভীর ঘুমে আচ্ছন্ন। তাই যথাসম্ভব নিঃশব্দেই হেঁটে বেড়াচ্ছেন।

বুকের ভেতরে ভূমিকম্প হচ্ছিল। একান্তর সালের সেই অভিশপ্ত দিনটা পুরোনো ক্ষতকে খুঁড়ে বের করেছে। বারবার মনে পড়ছে শূটকির কথাগুলো—

—‘আজও তেমন একটা সময় আসছে গহন। আবার একটা অস্থির সময়! তার মধ্যে দাঁড়িয়েও চাঁদ-তারা-ফুল-পাখির সৌন্দর্যে নিজেকে জোর করে ডুবিয়ে রাখবি!...’

পাশের বাড়ির নিত্যনৈমিত্তিক চিলচিৎকারে চিন্তাসূত্র ছিঁড়ে গেল গহনের। ফের শুরু হয়েছে মারধর। এরপর কী হবে তা জানেন। কয়েকদিন আগে স্বচক্ষেই দেখেছেন। প্রথমে মার খাবে মেয়েটি, তারপর ধর্ষিত হবে একটা মদ্যপ পশুর হাতে।

দৃশ্যটা কোনোদিন দেখতে চাইতেন না গহন। চিরদিন এইসব কুৎসিত ছবিগুলো থেকে চোখ সরিয়ে নিয়েছেন। আজও তাই হওয়াই স্বাভাবিক ছিল। কিন্তু হল না!

গহন দ্রুত পায়ে চলে গেলেন ছাতে। সেখানে দাঁড়িয়েই গোটা দৃশ্যটা দেখলেন। অসম্ভব কষ্ট হচ্ছিল। অসহ্য যন্ত্রণা অনুভব করছিলেন। তবু আগের দিনের মতো চোখ সরিয়ে নেননি। স্তম্ভিত, নির্বাক, যন্ত্রণাকাতর দৃষ্টিতে সোজা তাকিয়ে রয়েছেন জানলার দিকে।

অনেক রাতে, ঘরের আলো নিভে যাওয়ার পর মেয়েটি ফের এসে দাঁড়াল জানলার সামনে। ল্যাম্পপোস্টের আলো তার ফুলে ওঠা কপালের কালসিটে, রক্তাক্ত ঠোঁট ছুঁয়ে গেল। প্রাণহীন দৃষ্টিতে তাকিয়ে আছে বাইরের দিকে।

গহন এই প্রথম তার চোখে চোখ রাখেন। মনে মনে যেন স্পর্শ করতে চাইছেন তার ক্ষতবিক্ষত মুখকে। যেমনভাবে কচি কচি হাত দুটো ছুঁয়েছিল তার দিদির মুখ! মেয়েটির চোখে অবিকল দিদির দৃষ্টি! জাগতিক সবকিছু ছাড়িয়ে কোন অসীমের দিকে যেন অজ্ঞাত বেদনায় তাকিয়ে আছে।

ও-প্রান্তে এক নির্বাক বিস্ময়বসনা! এ-প্রান্তের মানুষটি কখন যেন পৌঁছে গেলেন একচল্লিশ বছর আগের দিনটায়। জলে ভরল তার চোখ! সমস্ত প্রতিরোধ ছাপিয়ে বেরিয়ে এল অসহায় কান্না! দু-চোখে জল নিয়ে, চোয়াল শক্ত করে, দৃঢ় হাতের মুঠোয় রেলিং ধরে দাঁড়িয়ে আছে সেই ছ’বছরের ছেলে! নিজের দেহে অনুভব করছে দিদির ক্ষতগুলোর যন্ত্রণা! মনে মনে বারবার স্পর্শ করছে সেই নারীকে! আর ডাকছে— ‘দিদি...দিদি...দিদি...’।

‘আ-বে শালা!’

সর্বশক্তি দিয়ে গাড়িতে ব্রেক কষল শূটকি। বরাতজোরে অল্পের জন্য গাড়ির তলায় চাপা পড়তে পড়তে বেঁচে গেছে ছেলেটা। আর-একটু হলেই ওর আজকে ‘রাম নাম সত্য’ হত!

রোজকার মতোই চশমার দোকান থেকে রাতে ফিরছিল সে। গোপালের জন্য একবাক্স আইসক্রিম, চকোলেট, আপেল, আর চিপ্‌স্‌ কিনেছে। মহা ত্যাগদেহে। কিছু খেতে ইচ্ছে করলেই চালের ড্রাম খুলে একমুঠো কাঁচা চাল মুখে চালান করে দেয়। অথবা ভাতের ফ্যান গিলে নেয়। যেন মহাসুস্বাদু জিনিস! শত বকেবকেও তার এই অভ্যাস ছাড়াতে পারছে না। তাই এখন কূটনৈতিক রাস্তা ধরেছে শূটকি। বিকেলে প্রায়ই তাকে পিৎজা, এগরোল, চাউমিন ঘুস দিচ্ছে। ভালো ভালো খাবার খেয়ে যদি তার এই বদভ্যাসটা পালটায়!

আগে শুটকির ফ্রিজ মদের বোতল, চানাচুর ছাড়া আর কিছুই থাকত না। এখন সেখানে শোভা পাচ্ছে : ড্রিংকস, ফ্রুট জুস, দুধের বোতল, কেক এবং অন্য রকমারি খাওয়ার জিনিস। গোপালের সৌজন্যে মদের বোতল বাড়িতে ঢুকছে না। বাচ্চাটা তাকে মদ খেতে দেখলে বাজে শিক্ষা পাবে, এই কথা ভেবেই একদিন সকালবেলায় উঠে সিদ্ধান্ত নিল— ‘ধুস্তের, আর মদ খাবই না।’ সেদিন থেকে আর মদ স্পর্শও করেনি সে। এমনকি সিগারেট খেলেও বাথরুমে লুকিয়ে বা দরজা বন্ধ করে খায়। গোপালকে বিশ্বাস নেই। বাপ-মা মরা ছেলে। এতদিন মাথার ওপরে কেউ ছিল না। রাস্তার ছেসেদের সঙ্গেই মিশত। কে বলতে পারে, শুটকিকে দেখে হয়তো তারও শখ হল সিগারেট টান মারার! অতএব ‘সাধু সাবধান’। ছেলের বাপ হওয়ার ঝঙ্কি নেহাত কম নয়!

আজও নিয়মমতো মার্কেটিং করে ফিরছিল সে। গোপালের দেখাশোনা করার জন্য এক মধ্যবয়স্কা গভর্নেসকেও রেখেছে। শুটকির দোকানে থাকার সময়টুকু সেই ওকে স্নান করার, খাওয়ায় দাওয়ায়, পড়ায়। শুটকি ফিরলে তার ছুটি।

আজ বেরোতে বেরোতে একটু দেরিই হয়ে গিয়েছিল। তার ওপর রাস্তার জ্যাম। কোনোমতে জ্যামটা কাটিয়েই গাড়ি ফুলস্পিডে চালাচ্ছিল। ন-টার মধ্যে তাকে বাড়িতে পৌঁছোতেই হবে। নয়তো গোপাল না খেয়ে বসে থাকবে। বাচ্চা হলে কি হবে, জেদ আছে ছেলের।

হয়তো সময়মতো বাড়ি পৌঁছতে বিশেষ অসুবিধেও হত না। কিন্তু সব বিগড়ে দিল এই উটকো ছেলেটা। কোথা থেকে যেন হুড়মুড় করে এসে টপকে পড়ল গাড়ির ঠিক সামনে!

গাড়িটা কোনোমতে সাইড করেই সে একেবারে তেড়ে ফুঁড়ে ছুটে গেল ছেলেটার দিকে।

—‘হারামজাদা! মরার জন্য আমার গাড়িটাই পেয়েছিলি তুই!’ শুটকি তাকে এই মারে তো সেই মারে! ছেলেটা চোখ কঁচকে তার দিকে তাকিয়ে আছে। অল্প অল্প টলছেও!

—‘অ্যান্ড্রিডেন্ট হয়ে গেলে কী হত? তুই তো যমরাজের কোলে বসে হাওয়া খেতিস— আর আমি জেলখানায়!’

ছেলেটার বয়েস বেশি না। তাকে বেশ অপ্রকৃতিস্থও লাগছে। কোনোমতে বলল—‘আই অ্যাম সর্‌ররি! দেখতে পাইনি।’

তার মুখ থেকে একটা পরিচিত গন্ধ পেল শুটকি। সে তীক্ষ্ণদৃষ্টিতে ছেলেটাকে মাপছে। ব্যাটার শরীর কাঁপছিল। ‘দেখতে পাইনি’ বলেই রাস্তার ওপর হুড়হুড় করে বমিও করে ফেলে।

শুটকি আস্তে আস্তে মাথা নাড়ে। ঠিকই ধরেছে। মাতাল! কিন্তু একেবারে নবিশ! সদ্য সদ্যই মদ ধরেছে। পঁচিশ-ছাব্বিশ বছরের যুবক। ছেলেটার মুখটা মিষ্টি। ভারি কচি কচি নিষ্পাপ। এ ছেলের মদ খাওয়ার কথা নয়!

সে দীর্ঘশ্বাস ফেলল। মাতালরা জাতে রক্তবীজের বংশধর। একটা মরলে, আর-একটা জন্মাবে! শুটকি নিজে মদ ছেড়ে দিয়ে ভেবেছিল— হয়তো দুনিয়ায় একটা মাতালের সংখ্যা কমাতে পেরেছে! কিন্তু কোথায় কি? সে ছেড়েছে, আর এই ব্যাটা ধরেছে।

—‘নাম কী?’ শুটকি এবার খানিকটা নরম সুরে জানতে চায়।

—‘উশ্বী!’

সে ছেলেটার নামই জানতে চেয়েছিল। কিন্তু উদ্ভট উত্তর পেয়ে হিস্তিটা বুঝতে অসুবিধে হল না তার। ছেলেটার দিকে স্থির দৃষ্টিতে তাকিয়ে বলল— ‘টাইটেল?’

—‘জানি না’

—‘থাকে কোথায়?’

—‘জানি না।’

—‘দিনে ক-বার খায়, কী দিয়ে ভাত মাখে, ক-বার পটি করে, কী সাবান ইউজ করে, ক-বার পার্লারে যায়, কি পেস্ট দিয়ে দাঁত মাজে, চোখে পিচুটি হয় কিনা, মাথায় কতটা খুশকি আছে, সর্দির হাত, পাইরিয়া বা আমাশা আছে কিনা জানিস?’

ছেলেটা কেমন বিস্মিত দৃষ্টিতে তার দিকে দেখছে! যেন শুটকি এইমাত্র মঙ্গলগ্রহ থেকে খসে পড়ল! শুটকি কিছুক্ষণ চূপ করে তাকে দেখল। মনে মনে কিছু স্থির করছে! পরক্ষণেই সপাটে এক থাপ্পড়!

—‘ফা-জ-লা-মি হচ্ছে! যার সম্বন্ধে আরকিছু তো দূর, টাইটেলটাও ঠিকমতো জানিস না তার জন্য মাল খেয়ে বাওয়ালি করছিস। গর্দভ। ইডিয়ট!’

চড়টা খেয়ে হকচকিয়ে গেল ছেলেটা। বিড়বিড় করে বলল— ‘ফের শনিদেব!’

—‘কী!’

সে সামলে নেয়! চড় খেয়ে নেশাটা চটে গেছে। জেদি উত্তেজিত গলায় বলল— ‘আমি শুধু এইটুকু জানি যে আমি ওকে সত্যিই ভালোবাসতাম।’

‘বাল ভালোবাসতি!’ শুটকি প্রায় তাকে তেড়ে মারতেই যায়—সত্যিই ভালোবাসলে ‘ভালোবাসতাম’ বলতি না! বলতি ‘ভালোবাসি’। ভালোবাসার কোনো অতীত ভবিষ্যৎ হয় না। এ কি জুতো পেয়েছিস যে পুরোনো হলেই ‘এককালে সত্যিই পরতাম’ বলে অতীত করে দিবি!’

সে একটু থামল। কয়েক মুহূর্ত পর ফের নীচু স্বরে বলে— ‘বাবা জানে?’

—‘কী?’

—‘তুই মদ খাস।’

ছেলেটা প্রতিবাদ করে— ‘আমি মদ খাই না। খাইনি কখনও।’

—‘তাহলে তোর মুখ থেকে কীসের গন্ধ আসছে? দুধের? আমায় ছাগল পেয়েছিস?’

—‘না।’ কচি কচি মুখটা দৃঢ় হল— ‘আজ খেয়েছি।’

—‘কেন খেয়েছিস?’

—‘আমি উশ্রীকে ভুলতে চাই...ওকে মন থেকে মুছে ফেলতে চাই...।’

—‘গা-ড়ো-ল কোথাকার!’ শুটকি ধমকে ওঠে—‘কোথাকার অশিক্ষিত রে! মদ খেলে লোকে ভোলে? ছাতা ভোলে! মদ খেলে আরও বেশি মনে পড়ে! যত নেশা করবি, স্মৃতিগুলো বাস্তবকে ছাপিয়ে আরও কাছে আসবে। যা ভুলতে চাস, সেগুলোই যখন চোখের সামনে নাচবে— তখন ভালো থাকবি তুই? আর যখন তোর বাপ-মা দেখবে, ছেলে মাতাল হয়ে গড়াগড়ি দিচ্ছে, তখন তারা খুব খুশি হবে— তাই না?’

ছেলেটা তার দিকে কিছুক্ষণ তাকিয়ে থাকে। তারপরই কথা নেই বার্তা নেই ফুঁপিয়ে ফুঁপিয়ে কেঁদে ওঠে। কান্নার চোটে তার নাকের জল, চোখের জল, মুখের লালা সব মিলেমিশে শার্টে পড়ছে।

—‘যা ক্বাবা! এ তো টোটাল ইমোশনাল!’ শুটকি রাগ ভুলে গিয়ে ছেলেটাকে বুকু টেনে নেয়। শক্ত করে জড়িয়ে ধরে বলে— ‘কাঁদছিস কেন বাবা! এইটুকুতেই ভেঙে পড়লে চলবে! অ্যা?’

তার আলিঙ্গনের আন্তরিকতায় ছেলেটার বোধহয় আরও কান্না পেয়ে গেল। বুকু যখন ব্যথার পাহাড় জমে তখনই একটু উষ্ণ স্পর্শের প্রয়োজন হয়। তার কান্না আরও উচ্ছ্বসিত হয়ে উঠেছে। শুটকি তাকে কাঁদতে দিল। কাঁদুক। কান্না দুঃখকে অনেকটাই তরল করে দেয়। প্রাণ ভরে কেঁদে নিক।

বেশ কিছুক্ষণ কান্নার পর আস্তে আস্তে শান্ত হল সে।

—‘হয়েছে? এবার মুখ মুছে নে। চোখ মুখের কী অবস্থা করেছিস! জল খাবি একটু?’
মাথা নেড়ে সম্মতি জানায় ছেলেটা।

গাড়ি থেকে জলের বোতল বের করে এনে তার চোখে-মুখে জল ছিটিয়ে দিল শুটকি। কয়েক টোক জল খেয়ে সে একটু ধাতস্থ হয়।

—‘নাম কী তোর?’

ক্ষীণস্বরে উত্তর এল— ‘মন্দার।’

—‘মন্দার। বেশ নাম। বোস। তোর সঙ্গে একটু কথা বলি।’

বলতে বলতেই শুটকি রাস্তার ও পরে বসে পড়েছে। মন্দারও একদম বাধ্য ছেলের মতো তার পাশে বসল। পিচের মসৃণ রাস্তার একদিক আটকে রেখেছে দুটো লোক। পিছন থেকে একরাশ গাড়ির অধৈর্য ভোঁ ভোঁ-পোঁ পোঁ-পিঁপ-পিঁপ ভেসে এল। হেডলাইটের তীব্র আলো চোখে এসে পড়ায় শুটকি বিরক্ত হয়— ‘ধুর মশাই, ভেপু বাজাচ্ছেন কেন? অতখানি রাস্তা ফাঁকা আছে দেখতে পাচ্ছেন না! ওদিক দিয়ে যান!’

একটি অল্পবয়সি মেয়ে ব্রহ্মব্যস্ত হয়ে গাড়ি থেকে নেমে আসে। আতঙ্কিত স্বরে বলে— ‘দাদা, এ রাস্তা দিয়ে কি যাওয়া যাবে না? কিছু হয়েছে নাকি?’

‘না মামণি কিছু হয়নি। এটা রাস্তা রোকো নয়’। ছোট্ট একটা মিটিং ... আইমিন গজল্লা। সে কান ঝাঁটো করা হাসি হাসে— ‘আসলে এখানে তো আর কোথাও বসার জায়গা নেই। সাইডে গাড়ি থামিয়ে গল্পো মারলে পুলিশ প্রথমে টর্চ মেরে ভেতরের সিন দেখার চেষ্টা করবে। দু’জন পুরুষ মিলে আর কী সিন করব! জড়াজড়ি- চুম্মাচাটি কিছুই দেখতে পাবে না। অতএব ব্যর্থ হয়ে খেপে গিয়ে ফাইন করবে। তাই রাস্তাকেই বসে পড়েছি।’

মেয়েটির মুখে একটা কিল্ভুতকিমাকার এক্সপ্রেশন ফুটে ওঠে। যেন শুটকি নয়, এক্সহস্টিসের ভূত তার সঙ্গে কথা বলছে।

দুজন মানুষকে সাইডে রেখে হুশুশ করে বিনাপ্রতিবাদে গাড়িগুলো চলে গেল। সবারই এখন বাড়ি ফেরার তাড়া। তাই ঝামেলা করতে চায়নি। শুটকি মন্দারের দিকে তাকিয়ে চোখ টেপে— ‘মেয়েটা রাপচিক ছিল—তাই না? বয়েসটা অল্প হলে ওর সঙ্গে একটু ফস্টিনস্টি করতাম।’

মন্দার বিষণ্ণ— ‘জানি না। দেখিনি।’

—‘সে কী! তুই কী রে!’ সে চোখ কপালে তুলে ফেলেছে— ‘রাস্তায় চলন্ত গাড়ি দেখতে পাস না! সামনে সুন্দরী মেয়ে দেখতে পাস না। পাগল না কবি!’

—‘কবিদের সম্পর্কে এরকম মন্তব্য করবেন না।’ মন্দার ফোঁস করে ওঠে— ‘আমার ভালো লাগে না।’

শুটকি কুলকুল করে হেসে ফেলল— ‘শালা, জাতে মাতাল তালে ঠিক! বুঝেছি, তুই কবি। এবার বল ঘোঁটালাটা কী?’

মন্দার লোকটাকে চেনে না। জীবনে কখনও দেখেনি। আর কখনও দেখবে কিনা ঠিক নেই! তবু মনে হল ওর কাছে সব কথা বলা যায়। যা এখনও পর্যন্ত কাউকে মুখ ফুটে বলেনি, সেই আন্তরিক ব্যথার কথাও বলে ফেলা যায় এই মানুষটির কাছে। এই রাতের বেলায়, মেইন রোডের ওপর বাবু হয়ে বসে কী করছে সে জানে না! কেন বলছে, কীজন্য বলছে তা ও জানা নেই। শুধু এইটুকুই জানে, এই লোকটির সঙ্গে তার এই মুহূর্তে খুব প্রয়োজন।

সব ঘটনাই ধৈর্য ধরে শুনল শুটকি। তারপর কিছুক্ষণ চুপ করে থেকে বলল— ‘বোঝো! যাকে জানলি না, চিনলি না, ভালোবাসলি না— তার জন্য মাল খেয়ে শহরের রাস্তার ল্যাড খাচ্ছিস।’

—‘ভালোবাসিনি। কে বলল আপনাকে?’

—‘ভালোবাসার মানে জানিস তুই?’ সে বলল— ‘ইনটারনেটে একজন হরিদাস পাল নামের কবি দু-লাইনের একটা কবিতা পোস্ট করেছিলেন— ‘ভালোবাসা স্বপ্নের মতো, জেগে গেলে মাথা যায় না/ ভালোবাসা পটির মতো, বেগে এলে চাপা যায় না’। প্রেমের নিয়মই হচ্ছে নিজেকে প্রকাশ করা। সে সবসময়ই চিৎকার করে বলতে চায়— আমি তোমাকে ভালোবাসি’। সেখানে তুই মেয়েটার কাছেই বেমালুম চেপে গিয়েছিস। তাহলে ভালোবাসলি কবে?’

মন্দারের মনে পড়ল স্বপ্নেও কখনও ‘ভালোবাসি’ শব্দটা বলতে পারেনি সে। যখনই বলতে চেয়েছে, তখনই কালো, মুষকো লোকটা থাপ্পড় মেরে ঘুম ভাঙিয়ে দিয়েছে। তবু নাছোড়বান্দা হয়ে বলে— ‘কিন্তু আমি তো সবসময়ই ওকে ভালো ভালো গিফট দিয়েছি, ওকে নিয়ে কবিতা লিখেছি..’

—‘কবিতা যে বোঝে না, তাকে নিয়ে কবিতা লেখা, আর শুয়োরকে বিরিয়ানি খেতে দেওয়া— দুইই সমান।’ শুটকি হাসল— ‘তা ছাড়া যতদূর শুনলাম, তাতে মনে হল মেয়েটার মাথায় গিফটের দামটা যত ভালোভাবে চুকেছে, কারণটা ততটাই মাথার ওপর দিয়ে গেছে। তুই তো কবি। যে এত সহজ ব্যাপারটাই বোঝে না,— এমন মাথামোটা মেয়েকে বিয়ে করতে যাবি কোন্ দুঃখে’।

মন্দার থমকে যায়। ব্যাপারটা এভাবে সে ভেবে দেখেনি।

—‘কবি আর তার বউ হবে টেনিস প্লেয়ারের মতো।’ সে হাসতে হাসতে বলে— ‘কবি এদিক থেকে ‘ঠুক’ করলে সে-ও ওদিক থেকে সমান তালে ‘ঠাক’ করবে। বিজনেসম্যান, কর্পোরেট কর্তারা ‘শো পিস’ নিয়ে ঘর করতে পারে। কিন্তু তোর তো বাবা রক্তমাংসের মেয়ে দরকার। কাচের সুন্দর মূর্তি নিয়ে কাব্য করতে পারিস, ঘর করবি কীভাবে?’

বলতে বলতেই সে সিগারেট ধরায়— ‘নিজের ওজনটা আগে বোঝা বাচ্চা। যে-কোনো শিক্ষিত বা অশিক্ষিত পয়সাওয়ালা লোকের পায়ে তেল মাখাতে অনেকেই চায়। পা টিপে

দিতে পারে, এমনকি পা চাটতেও পারে। তবে সবে পিছনেই কিছু-না-কিছু-স্বার্থ থাকে। কিন্তু কবি, সাহিত্যিক প্রজাতিটা একটু আলাদা। লোকে তাদের পায়ের কাছে মাথা ঝোকায়। প্রশংসা করে। এবং বিনা স্বার্থেই করে। এ দুটোর মধ্যে পার্থক্য বুঝিস ?

মন্দার চুপ করে শুনছিল। এতদিন কেউ তাকে এসব বলেনি। বাড়িতে বা শুটিঙের সেটে ঝাড় খেতে খেতে কখনও মনে হয়নি যে সে আলাদা। কেউ কখনও বলে দেয়নি— ‘মন্দার, তুমি স্পেশাল’!

সে কথা বলতেই শুটকি মুখ টিপে হাসে— ‘এখানেই কবি কেঁদেছেন! একজন বলেছে। কিন্তু তুই এমনই বুদ্ধ যে বুঝতেই পারিসনি। অথবা গুরুত্ব দিসনি।’

কার কথা বলছে লোকটা! মন্দারের মাথায় সব তালগোল পাকিয়ে যায়।

—‘ভালোবাসা নয়, তুই একটা ধাক্কা খেয়েছিস। কচি বয়েসে একটা ব্যথা পেয়েছিস। সেই ব্যথাকে ব্যবহার কর। কবিতা লেখ।’ সে হেসে ওঠে—‘যন্ত্রণা ছাড়া কি সৃষ্টি হয়? মদ নয়, কবিতা ধর। মদ তোকে কষ্ট দেবে! আর কবিতা শক্তি। যাকগে, অনেক কথা বলেছি-এবার বল-! তোর বাড়ি কোথায়?’

—‘কেন?’

—‘সারারাত এখানে বসে আড্ডা তো মারতে পারি না। নিজে বাড়ি যেতে পারবি? না ড্রপ করে দেব?’

মন্দারের নেশা প্রায় কেটেই গিয়েছিল। সে মাথা নাড়ে— ‘না, আমি যেতে পারব।’

—‘গুড। বিন্দাস্ বাড়ি যা! ভালো করে একটা ঘুম দে। তারপর কাল সকালে উঠে কথাগুলো মন দিয়ে ভেবে দেখবি।’

—‘আচ্ছা।’

সে উঠে দাঁড়ায়। শুটকিও দাঁড়িয়ে পড়ে জামা-প্যান্ট ঝাড়ছে।

—‘থ্যাঙ্কস-দাদা।’ মন্দার তার দিকে কৃতজ্ঞতাপূর্ণ দৃষ্টিপাত করে চলে যাচ্ছিল। পিছন থেকে ডাক এল— ‘এই শোন।’

সে সচকিত হয়ে ওঠে— ‘কিছু বলবেন?’

—‘মেয়েটার বোনটার নাম কি যেন?’

—‘উর্মি।’ মন্দার বিস্মিত —‘কেন?’

শুটকি রহস্যময় হাসি হাসল— ‘ওর টাইটেল আর ঠিকানা জেনে নিস। পারলে বাকি ডিটেলস্গুলোও। কাজে লাগবে। চল বাই।’

স্তম্ভিত মন্দারকে সেখানেই রেখে হনহন করে চলে গেল সে।

তার গাড়িটা এক সাইডেই দাঁড় করানো ছিল। ড্রাইভিং সিটে বসতেই অচমকা একটা মৃদু মিষ্টি গন্ধ তাকে ছুঁয়ে গেল। হানুহানার গন্ধ!

—‘রুমা!’ যুগপৎ বিস্ময় ও আনন্দ মেশানো কণ্ঠে ডেকে উঠেছে শুটকি! পাশের সিটে এক নারীর ছায়া ছায়া অবয়ব!

—‘কখন এসেছ?’ সে একটু অনুতপ্ত হয়ে বলে— ‘অনেকক্ষণ অপেক্ষা করছ তাই না.? সরি, আসলে ওই ছেলেটা... কি নাম যেন, তাকে জ্ঞান দিতে গিয়েই দেরি হয়ে গেল। আজকের

ছেলে পুলেগুলোও পারে! শুধু অ্যাট্রাকশনকেই প্রেম ভেবে বসে থাকে। তারপর ল্যাং খেয়ে কুপোকাত! আসল প্রেম যে কী জিনিস, তা বোঝার আগেই লাইফ বরবাদ করে ফেলে।’

বলতে বলতেই হাসল শুটকি— ‘আসলে কি জানো? আমার কাছে বুবাই, গোপাল— এইসব ছেলেগুলো, সবাই একরকম। যদি বুবাই কখনও এরকম কাণ্ড ঘটাত— তোমার, আমার ভালো লাগত? ওই ছেলেটার মা-বাবাও তো আমাদেরই মতো। তাই একটু বোঝাচ্ছিলাম।’

বলতে বলতেই তার চোখে স্বপ্নিল আচ্ছন্নতা ভেসে উঠেছে। দু-চোখে বলমলে আকাশ নিয়ে সে বলল— ‘দেখো রুমা, যেদিন ও সত্যিই প্রেমে পড়বে, সেদিন চতুর্দিক হানুহানার গন্ধে ভেসে যাবে। সেদিন ওর রক্তে রক্তে মন্ত্রার বাজবে। সেই মুহূর্তটা জীবনে ও কখনও ভুলতে পারবে না... কোনদিনও ভুলতে পারবে না... আমার মতো... যেমন আমি পারিনি...।’

শুটকির মনে হল নারীমূর্তিটা হেসে উঠেছে। তার ঠোঁটে বলমল করছে খুশির হাসি। একটা ছায়া ছায়া হাত শুটকির হাত জড়িয়ে ধরেছে। যেন বলতে চাইছে— ‘আমি আছি’।

—‘এসো, তোমায় সিটবেন্ট পরিয়ে দিই।’ সে ছায়ামূর্তিকে বেন্ট পরাতে পরাতে বলে— ‘তারপর চলো, বাড়ি যাই। আমাদের বাড়ি। যেখানে তুমি আছ, আমি আছি, বুবাই আছে আর গোপাল আছে।’

ছায়ামূর্তি আবার হাসল। হানুহানার গন্ধে ভরে উঠল মুহূর্তটা!

দেখতে দেখতে একমাস কেটে গেল। আবহাওয়া বদলাল। বদলাল রাজনৈতিক পরিস্থিতি। বাজারদর আরও কয়েক ধাপ চড়ল। প্রেমিক-প্রেমিকার মধ্যে সম্পর্কের দিশা বদলাল। জীবন নানা মোড় নিল।

বদলাল না শুধু কবিতা ডটকম। আর তার নিত্যনৈমিত্তিক কাদা ছোড়াছুড়ি।

—‘কবিতায় অশ্লীল শব্দ ব্যবহারের আমি বিরোধী নই। কলোকিয়াল শব্দ, খিস্তি ব্যবহার করেও দারুণ সব কবিতা লেখা যায়।। কিন্তু এ আবার কী! কবি যেভাবে চ-কার শব্দটি অকারণে ব্যবহার করেছেন তাতে একটা ট্যান্সিওয়ালারও উত্তেজনা হবে না!’

—‘চ-কার শব্দটিকে কুবলাশ্ব অশ্লীল কেন বলতে চাইলেন বুঝতে পারলাম না। এটি যথেষ্ট ভালো শব্দ। বাংলা অভিধানে এর অর্থ, শারীরিক মিলন বা সঙ্গম’।

—‘স্বর্ণাভদা, তাহলে ‘মিলিত হত’ লিখলেই তো ল্যাঠা চুকত। ওই শব্দটি ব্যবহার করার দরকার পড়ল কেন? সমস্ত কবিতাটির ভাষা প্রায় রাবীন্দ্রিক। হঠাৎ করে তার মধ্যে ফাঙ্কুনী রায়, মলয় রায়চৌধুরীদের ঢুকে পড়ার কারণ কী! তা-ও আবার একটি শব্দের জন্য! একবারের জন্য ভেবেছিলাম, হয়তো ভুল করে শব্দটি লিখে ফেলেছেন। কিন্তু ষষ্ঠ লাইনটি পড়ে চক্ষু চড়কগাছ। ওই একই শব্দ ডেলিবারেটলি ফের ষষ্ঠ লাইনে লিখেছেন তিনি। এমনকি পরের লাইনেও! নগ্ন নারীর ছবি আঁকা দোষের নয়। শুধু পায়ে মোজা পরানোটা মেনে নিতে পারলাম না।’

কবিতা ডটকমে-এ আজ আবার খামচাখামচি শুরু হয়েছে। কবি ‘অন্য কেউ’ একটা কবিতা পোস্ট করেছেন। সে কবিতাটা আপাতদৃষ্টিতে বেশ নিরাহ। বেশ সুন্দর রাবীন্দ্রিক ছিমছাম রোমান্টিসিজম নিয়ে শুরু হয়েছিল। কিন্তু পঞ্চম লাইনে এসেই পিলে চমকে গেল।

ববীন্দ্রনাথ যদি হঠাৎ জোকা টোকা ছেড়ে, মাইকেল জ্যাকসনের পোশাকে মুন ওয়াক করতে শুরু করেন তাহলে যা হয় আর কী। রোমাণ্টিসিজম ও আতুর শব্দাবলি ছেড়ে কবি একেবারে সোজাসুজি চ-কার ব্যবহার করেছেন। আর সেটা নিয়েই স্বর্ণাভ গুপ্ত অ্যান্ড কোং-এর সঙ্গে কুবলাশ্বর অবধারিত ঠোকাঠুকি।

মন্দার নিজেও কবিতাটা পড়ে আঁতকে উঠেছিল। খিস্তি দেওয়া, গালিগালাজ দেওয়া বুদ্ধিদীপ্ত কবিতা সে অনেক পড়েছে। দেখেছে যে কীভাবে কলোকিয়াল, তথাকথিত ‘অশ্লীল’ শব্দকে ও শিল্পের পর্যায়ে নিয়ে যাওয়া যায়। কিন্তু এমন গোদা পদ্ধতিতে সুড়সুড়ি দেওয়ার প্রচেষ্টা দেখে, সে হাসবে না কাঁদবে ভেবে পাচ্ছিল না।

—‘কুবলাশ্ব কি আগে কখনও কবিতায় অশ্লীল শব্দের প্রয়োগ দেখেননি? তাকে হাংরি জেনারেশনের কবি মলয় রায়চৌধুরীর কবিতা পড়ে দেখার অনুরোধ করছি। কবি ব্রাত্য রাইসুর একটি কবিতার লাইন যদি — ‘ঘরের ভিতর ভাউয়া ব্যাঙে করছে চোদাচুদি’ হতে পারে, তবে ‘অন্য কেউ’ কি দোষ করেছেন?’

—‘স্বর্ণাভদা’, কবি মলয় রায়চৌধুরী যে বিশেষ কাব্যগ্রন্থের দিকে ইঙ্গিত করছেন, সেই ‘প্রচণ্ড বৈদ্যুতিক ছুতার’, আমিও পড়েছি। সমস্যাটা মলয় রায়চৌধুরী বা ব্রাত্য রাইসুর কবিতা নিয়ে নয়। যে কবি লেখেন—‘কেন আমি পিতার আত্মমৈথুনের পরে তার পেছাপে বয়ে যাইনি/ কেন আমি রক্তস্রাবে মিশে যাইনি শ্লেষ্মায়’ সেই কবি কখনোই দাবি করেননি যে তিনি মাইকেল মধুসূদনের বংশধর। কবি ব্রাত্য রাইসুর যে কবিতাটির কথা আপনি বলেছেন, সেই কবিতার কাব্যগ্রন্থটির নাম থেকেই কবি বুঝিয়ে দিয়েছেন যে তিনি স্বভাব ফিচেল। যাঁর কাব্যগ্রন্থের নাম ‘আকাশে কালিদাসের লগে ম্যাঘ দেখতাসি’, তিনি এমন কবিতা লিখবেন তাতে আর আশ্চর্য কী! যাঁর কবিতার লাইন এরকম—‘কাউয়া বলে কা-কা / কলা বলে কলা খা’ কিংবা ‘চেয়ার বহনকারী দুইজন নারী/ চেয়ারের চেয়ে তারা ভারী...’ তিনি যতই কালিদাসের সঙ্গে মেঘ দেখুন, নিজেকে কালিদাসের রি-ইনকারনেশন বলেননি। তাই তার ফিচেল মুড বা রাইটিং স্টাইলে ‘ভাউয়া ব্যাঙের চোদাচুদি’ চলে যায়। কিন্তু কবি ‘অন্য কেউ’ যেভাবে পাইরেটেড রবীন্দ্রনাথ হওয়ার ভণ্ডামি দেখান সেখানে হঠাৎ চ-কারের অনুপ্রবেশ সহ্য হয় না!

মন্দার হাঁ! ‘কুবলাশ্ব’-কে ভালো লাগত বটে। কিন্তু সে যে স্বর্ণাভ গুপ্ত’র মতো আঁতেলকেও শুইয়ে দেওয়ার ক্ষমতা রাখে তা জানা ছিল না। এতদিন লোকটার প্রতি তার একটা অদ্ভুত ভালো লাগার অনুভূতি ছিল। এবার যুক্ত হল শ্রদ্ধা! লোকটা রীতিমতো শিক্ষিত। হয়তো মন্দারের চেয়েও বেশি পড়াশোনা করা মানুষ!

এবার উলটে পড়া গুরুদেবকে টেনেটেনে তোলার জন্য মগনলাল এসে হাজির হয়েছে—
‘কুবলাশ্ব আসলে কী বলতে চান? তার কোনটায় আপত্তি? কবিতাটায় না শব্দটায়?’

কুবলাশ্ব নিশ্চয়ই উত্তর দিত। কিন্তু তার আগেই তাকে কভার করল ‘একা মেঘ’।

—‘মগনলাল, আপনি কি এতক্ষণ ঘুমোচ্ছিলেন? না কুবলাশ্ব হিব্রুভাষায় কথা বলছেন? যে-কোনো রচনার একটা নিজস্ব ভাষা থাকে। এখানে প্রথম কয়েকলাইন এতটাই মসৃণ যে আচমকা বিশেষ শব্দটিতে পাঠক হেঁচট খাচ্ছে।’

মন্দারও আর থাকতে পারল না। সে ‘রামহনু’ হয়ে নেমে পড়ল যুদ্ধক্ষেত্রে—‘মেঘদা

আপনি শুধু হাঁচট খেলেন! আমি যে চেয়ার থেকে পড়েই গেনু!

প্রতিপক্ষ ক্রমশই শক্তিশালী হয়ে উঠছে দেখে স্বর্ণাভ-র দলবলও তেড়ে আসে। স্বর্ণাভ-র অতিপ্রিয় ই-ভগিনী ‘তুর্কি’ এমনিতে মহা নাকউঁচু মহিলা! নিজের কবিতা দিয়ে আপামর জনগণকে ধন্য করাই তার স্বভাব। আর বেছে বেছে নিজেদের দাদাদের কবিতাতেই মন্তব্য করে। তথা পিঠ চুলকায়। অন্য কারুর কবিতা পড়েও দেখে না!

এই সাইবার কবিতা জগতে মেয়েদের বড়োই সুবিধা। মেয়ে কবির সংখ্যা অপেক্ষাকৃত কম বলে মেয়েরা কবিতা লিখলেই ছেলেরা প্রশংসা করার জন্য লাফিয়ে পড়ে। যতই ‘ঝুলসু ঝুল’ লিখুক না কেন, সবাই মিলে ‘বাঃ বাঃ’ বলে হাওয়া দিতে থাকে।

তুর্কি তেমনই গরম হাওয়ায় ভরা ফানুস! মাঝেমাঝে ওর ওই ফোলানো পশ্চাদদেশে পিন ফুটিয়ে দেওয়ার লোভ হয় তার। আজকে আচমকা সে সুযোগ জুটেও গেল।

—‘কবির কি শব্দচয়নের স্বাধীনতা নেই! তিনি হয়তো মোলায়েম শব্দগুচ্ছ ছেড়ে এক্সপেরিমেন্টাল কিছু করতে চেয়েছেন। আমার মনে হয় এই প্রচেষ্টা যথেষ্টই গঠনমূলক।’

তুর্কি যে স্বর্ণাভদেরই সাপোর্ট করবে তা জানাই ছিল। মন্দার ‘রামহনু’ হয়ে লিখল— ‘তুর্কিদেবী, এক্সপেরিমেন্ট করতে হলে শুরু থেকেই সেটা করা উচিত। কবিতার মাঝখানের শুধু একটি শব্দের ওপরই তাকে এক্সপেরিমেন্ট করতে হল? এ কেমন এক্সপেরিমেন্ট! বন্ধিমচন্দ্র যদি এমন এক্সপেরিমেন্ট করে কখনও লিখতেন— প্রাতঃকালে মুখপ্রক্ষালনাদি সমাপন করিয়া, ভোজন পর্ব সমাধা করিয়া, অশ্বারোহন পূর্বক অবস্তীনগরে প্রত্যাবর্তন মাত্রই ক্লাস্তদেহে বৃক্ষতলে ধপ্পৎ কইরা ছইয়া পড়লাম,— তাহলে সেটা কি জাতীয় ইতিবাচক এক্সপেরিমেন্ট হত?’

তার কথাকে সমর্থন করেই কুবলাশ্ব দাঁত বের করা একটা স্মাইলি দিয়েছে। মন্দার স্ক্রিনের দিকে তাকিয়ে হাসল। মনে মনে বলে—‘চলো শুরু একসঙ্গে লড়ি।’

এই নিয়েই বেশ কিছুক্ষণ আকচাআকচি চলল। কুবলাশ্ব চিরকালই ভালো লড়িয়ে। কিন্তু একা মেঘ আর রামহনুও যেন আজ রুদ্রমূর্তি ধরেছে। স্বর্ণাভ-র দল তখন পালানোর পথ পাচ্ছে না!

অবশেষে কবি ‘অন্য কেউ’ স্বয়ং আবির্ভূত হলেন। বললেন— ‘আসলে আমি বাংলা ভাষায় ঠিক সড়গড় নই। ইনফ্যান্ট দীর্ঘ তিনবছর ধরে একটা বাংলা কবিতাও লিখিনি। ইংলিশ ইজ্ মোর কমফর্টেবল্। ইংবেজির শব্দভাণ্ডার অনেক সমৃদ্ধ। আমি কবিতাটায় রাফ রাস্টিক টাচ্ আনতে চেয়েছিলাম। কিন্তু বাংলা ভাষায় তেমন শব্দ খুঁজে পেলাম না’।

ন্যাকামি দেখে মন্দারের মাথা গরম হয়ে গেছে। সে খটখট করে টাইপ করে— ‘এটা কি জাতীয় ড্যামনামি? বাংলায় রাফ অ্যান্ড রাস্টিক শব্দ নেই! স্বর্ণাভদা একটু আগেই মলয় রায়চৌধুরীর রেফারেন্স দিচ্ছিলেন কুবলাশ্বকে। আপনাকে দেননি? আর বাংলা ভাষার প্রতি যদি এতই অনীহা তবে বাংলা কবিতা লিখতে আসেন কেন?’

এবার বোধহয় ‘অন্য কেউ’ কেঁদেই ফেলেছেন। লিখলেন— ‘ও খুড়ো, কেন আমায় বারবার লিখতে বলো! দেখছই তো আর কবিতা লিখতে পারি না। এ গালাগালি আর সহ্য হয় না!’

তুর্কি একেবারে বীরঙ্গনা মাতঙ্গিনী — ‘ড্যামনামি! একজন কবিকে এ কি জাতীয় বিশেষণ দেওয়া হচ্ছে! আমি অ্যাভিউস রিপোর্ট করছি।’

স্বর্ণাভ লিখল— ‘আমিও অ্যাবিউস রিপোর্ট করছি’।

যা! নালিশ কর। নালিশ করে বালিশ পাবি। মন্দার কম্পিউটারকে টার্ন-অফ করে দেয়। সে জানে এরপর কী হবে। ‘অন্য কেউ’ নাকে কেঁদে বেড়াবেন, আর মডারেটর ব্যাসদেব তার পিছনে পিছনে টিস্যুর দলা নিয়ে ঘুরবেন।

বাইরে তখন ফটফটে রোদ আমগাছের পাতায় পাতায় লুকোচুরি খেলছিল। তার মধ্যে একটা লম্বা নারকেলগাছের শান্ত ছায়া ঝিরঝির করে এসে পড়েছে। সেদিকে তাকিয়ে অন্যমনস্ক হয়ে গেল মন্দার। প্রায় এক মাস হয়ে গেল সে স্ক্রিপ্ট-রাইটারের কাজ ছেড়ে দিয়েছে। সেদিন যে লোকটা মাঝপথে প্রায় দেবদূতের মতো এসে হাজির হয়েছিল, তার প্রতিটি কথা পরদিন মন দিয়ে ভেবে দেখেছে। ভাবতে ভাবতেই সে অদ্ভুতভাবে আবিষ্কার করেছিল নিজেকে। আবিষ্কার করেছিল এগারোশো স্কোয়্যার ফিটের ফ্ল্যাট, ব্যাংক ব্যালেন্স, গাড়ি—কোনোটাই তার নিজের স্বপ্ন ছিল না! এর কোনোটাই সে আসলে চায়নি। উশ্রীকেও ভালোবাসেনি। ভালোবাসার জন্য যতখানি চেনার প্রয়োজন, ততটা পরিচয় কখনোই উশ্রীর সঙ্গে তার হয়নি। সে শুধু একটা মোহ ছিল। যেমন ওয়ার্ল্ডকাপ জেতার উন্মাদনা। একটা সোনালি-রুপোলি কিংবা-প্ল্যাটিনামের সুদৃশ্য কাপ! জেতার আগে মনে হয় কী দুর্মূল্য জিনিস! অথচ জেতার পর সেটার মূল্য শুধু শো-কেসই বোঝে।

উশ্রী মন্দারের কাছেও তেমনই। একটা সুদৃশ্য অধরা কাপ! যাকে জয় করার জন্য এগারোশো স্কোয়্যার ফিট, গাড়ির স্বপ্ন দেখতে বাধ্য হয়েছিল সে।

ওই সিড়িঙ্গে লোকটা তার জীবনে এসে পড়ে বুঝিয়ে দিয়ে গেল, প্রেম আর উন্মাদনা দুটো সম্পূর্ণ আলাদা জিনিস! জানিয়ে গেল যে কবির সবচেয়ে বড়ো মাহাত্ম্য এগারোশো স্কোয়্যার ফিটে নয়! তার ছোট্ট আসনে সে নিজেই মহান।

যেদিন মন্দার চাকরি ছাড়ল, ছেড়ে দিল উশ্রীকে— সেদিন মনে হয়েছিল বুক থেকে একটা বিরাট পাথর নেমে গেল! টালিগঞ্জ ট্রাম ডিপোয় দাঁড়িয়ে বুক ভরে উন্মত্ত জীবনের শ্বাস নিয়েছিল সে। আর পৌঁছানোর তাড়া নেই, পান্ডা তথা পেভুলামের দাঁত খিঁচুনি নেই, বোকা বোকা ডায়লগ লিখে আর আত্মধিকারে ভুগতে হবে না। ‘কবি’ বলে কেউ তাকে অপমান করবে না। কাউকে পাওয়ার জন্য টাকার পিছনে র্যাটরেসে নামার আর দরকার নেই।

তবে চাকরি ছেড়ে সে একেবারে হৃদ বেকার হয়ে বসে নেই। চাকরিটা ছেড়ে দেওয়ার তিনদিন পরেই একটা অজানা নম্বর থেকে ফোন এল মন্দারের মোবাইলে।

—‘হ্যালো!’

ও প্রান্তে রহস্যময়ী নারীকণ্ঠ— ‘বলো তো কে?’

মন্দার নিজেই আশ্চর্য হয়ে গেল। এ গলা তার চেনার কথাই নয়! কারণ গলার মালিক কোনোটাই তাকে ফোন করেনি। কিন্তু এই দুষ্ট দুষ্ট হাসিমাখা গলাটাকে চিনতে তার কোনো অসুবিধেই হল না!

—‘উর্মি! তুমি!’

—‘ইয়েস স্যার। উর্মি’ও প্রান্তে সজোরে হসে উঠেছিল— ‘আমার টিফিনবস্ত্রটা তোমায়

খুব মিস্ করছে। তাই ভাবলাম, খবর নিই। কেমন আছ?’

—‘চাকরি ছেড়ে একটা দামড়া ছেলে বাপের হোটেলের যেমন থাকে— তেমনই আছি’।

উর্মি ফের হাসল— ‘তার মানে তুমি খই ভাজছ!’

—‘হ্যাঁ, ভাজছি। খাবে তো চলে এসো।’

সে যেন এই প্রস্তাবটার জন্য তৈরিই হয়েছিল। প্রায় তড়াক করে লাফিয়ে উঠে বলল—
‘ঠিকানাটা বলো। এক্ষুনি আসছি।’

মন্দারকে স্তম্ভিত করে সত্যি সত্যিই সেদিন তার বাড়ি চলে এসেছিল উর্মি। তাকে দেখে প্রথমেই ‘থ’ হয়ে গিয়েছিল সে। চিনতেই পারেনি! বরং প্রথমে উশ্রী ভেবেই ভুল করতে যাচ্ছিল। অবিকল একইরকম দেখতে। শুধু চুলের স্টাইলটা অন্যরকম, আর চেহারাটা একটু বাক্সি! এ ছাড়া দুজনের চেহারায় কোনো বাহ্যিক তফাত নেই! এ মেয়েটা এমন সুন্দরী! তবে ওরকম বিটকেল জামাকাপড় পরে থাকত কেন?

মুগ্ধ দৃষ্টিতে তার দিকে তাকিয়েছিল মন্দার। তাকে হাঁ করে তাকিয়ে থাকতে দেখে হেসে ফেলে উর্মি। মন্দার তখনই বুঝল— উশ্রীর পক্ষে এমন হাসি হাসাই সম্ভব নয়। চোখে সপ্রতিভ অথচ শান্ত গভীরতা, হাসিতে স্নেহ-মমতা বারে পড়ছে—উর্মিকে উশ্রীর চেয়ে অনেক বেশি সুন্দরী মনে হল তার!

অথচ এই মেয়েটা দিনের-পর-দিন মাথায় ওড়না বেঁধে, ভুরু ঢাকা মোটা ফ্রেমের চশমা পরে, ঢলঢলে আউটফিট পরে বসে থাকত! নিজের সৌন্দর্যকে একটা আবরণের পিছনে লুকিয়ে, সুন্দরী দিদির পাশে নিজেকে অসুন্দর প্রমাণ করার চেষ্টা করত।

—‘তুমি তো একদম...।’

—‘উশ্রীর মতো দেখতে। তাই না?’ খিলখিল করে হেসে ওঠে উর্মি— ‘আগেই তো বলেছিলাম, আমাদের দু-জনকেই একরকম দেখতে। শুধু বাইরের লোক বুঝতে পারে না।’

—‘কী করে বুঝবে?’ সে বলল— ‘মাথায় ফেট্রি বেঁধে, নাকে পাঁউরুটি ফ্রেমের চশমা চাপিয়ে, ভুরু ঢেকে, তাঁবুর মতো সালোয়ার কামিজ পরে বসে থাকলে বোঝাও সম্ভব নয়।’

উত্তরে উর্মি মুখ টিপে হাসে— ‘তাহলে দেখো, সৌন্দর্য ব্যাপারটা কতটা আপেক্ষিক। আউটফিটের সঙ্গে সঙ্গে রং বদলায়।’

কয়েক মিনিটের মধ্যেই সে দিব্যি মা, বাবা আর টিকলির সঙ্গে ভাব জমিয়ে ফেলল। আধঘণ্টা পর মায়ের তৈরি ব্রেড রোলে কামড় দিতে দিতে মন্দারের বিছানায় দিব্যি ঠ্যাং তুলে ঠাকুরানির মতো বসে বলল— ‘তারপর চাকরিবাকরি ছেড়ে কী করবেন ভেবেছ?’

—‘আপাতত ঘাস সাপ্লাই করা ছাড়া আর তো কোনো অপশন দেখছি না।’

—‘হুমমম... ব্রেড রোলটা দারুণ।’ মন্দারের চোখের সামনেই গোটা প্লেটটাই একা সাবাড় করে দিয়ে বলে উর্মি— ‘ঘাস সাপ্লাইটা মেইন বিজনেস হিসাবে রাখতে পারো। তবে তার সঙ্গে একটা পার্ট-টাইম জব করলেও মন্দ হয় না। তোমারও খারাপ লাগবে না। আর-একজনেরও উপকার হয়।’

‘কীরকম?’

উর্মি তখনই তাকে অফারটা দিয়েছিল। তার এক কাকা নামকরা একটি পাক্ষিক পত্রিকার

এডিটর। ওই পত্রিকার সম্পাদকীয় বিভাগে বাংলা সাহিত্যে পারদর্শী ছেলে-মেয়ে লাগবে। সপ্তাহে পাঁচদিন অফিস। সময়ের তেমন কড়াকড়ি নেই। শনি-রবিবার ছুটি।

— ‘কিন্তু হঠাৎ আমাকে নিয়ে পড়লেন কেন...? তুমিও তো চাকরিটা করতে পারতে!’ মন্দার বলে— ‘নাকি সারাজীবনই উশীর সেক্রেটারির চাকরি করে যাবে!’

— ‘একদম না’। উর্মি হাসল — ‘আমি কারুর সেক্রেটারি নই, বরং হোন মিনিস্টার হওয়ার তালে আছি। তা ছাড়া ওসব চাকরিবাকরি আমার পোষাবে না।’

— ‘তাহলে কী পোষাবে?’

— ‘আপাতত আর-একটা ব্রেডরোল।’ উর্মি ধনুকের মতো ভুরু নাচায়— ‘হবে?’

উর্মির ধাক্কা খেয়েই কপাল ঠুকে কাজটার জন্য অ্যাপ্রাই করে দিয়েছিল মন্দার। ছোটোবেলা থেকে বাংলা-ইংরেজি দুটো ভাষাই তার সমান দখলে। চাকরিটা পেতেও বিশেষ অসুবিধে হয়নি। দারুণ ইনটারভিউ দিয়েছিল।

আপাতত সেই কাজটাই করছে সে। স্যালারি খুব বেশি নয়। তবে ভদ্রস্বভাবে চলে যাওয়ার পক্ষে যথেষ্ট। কিন্তু কাজটা করতে খুব ভালো লাগছে। বিশেষ করে কবিতার বইয়ের রিভিউ-এর দায়িত্বটা নিয়ে সে খুব খুশি। কত নামকরা কবি, সাহিত্যিকের সঙ্গে দেখা করার সুযোগ হচ্ছে। তাদের সঙ্গে কথা বলার সুযোগ হচ্ছে!

একমাস আগে যখন উশীর প্রত্যাখ্যানে ব্যথিত হয়ে মদ খেয়ে মাতলামি করছিল, তখন কি জানত জীবন এভাবে সুন্দর একটা বাঁক নেবে! ওই লোকটা আচমকা এসে থাপ্পড় না মারলে সে হয়তো আজও মাতাল হয়ে কোনো নর্দমার পাশে পড়ে থাকত। জীবন এমন সুন্দর—তা জানা হত না। বন্ধুত্ব এত সুন্দর তা ও অজানা থাকত। উর্মির বন্ধুত্ব, নিজের মনের মতো কাজ করার আনন্দ—কোনোটাই পেত না সে।

আজকাল স্বপ্নে শনিদেব এসেও আর হামলা করছেন না। সবমিলিয়ে বড়ো শান্তিতে আছে মন্দার। সবকিছুই ভালো লাগছে। এমনকি টিকলির ভয়ংকর এক্সপেরিমেন্টাল ডিশগুলোও খুব সুস্বাদু মনে হয়। অফিস থেকে ছুটি হওয়ার পর উর্মির সঙ্গে রাস্তায় দাঁড়িয়ে ফুচকা বা কুলফি খেতে ভালো লাগে। ভালো লাগে তার সঙ্গে পার্কে বসে চিনেবাদাম চিবোতে। সে বীরপুঙ্গবের মতো জানায় আজকে কোন কোন কবিকে রিভিউতে একহাত নিয়েছে। উর্মি মুখে সম্ভেহ হাসি নিয়ে সব শোনে। আবার মন্দারের কথা শুনে যে ‘কবিতা ডট কমের কবিতাও’ পড়তে শুরু করেছে। সে বিষয়ে আলোচনা হয়।

সব মিলিয়ে সময়টা বড়ো সুন্দর। যে কন্ডাক্টরটা রোজ বেজকি নিয়ে ঝামেলা করে, কখনো কখনো তাকেও চুমু খেতে ইচ্ছে করে মন্দারের! নেহাত সেটা সম্ভব নয় বলে চেপে গেছে।

নারকেল গাছের তিরতির ছায়াটার দিকে তাকিয়ে আপনমনেই নিজের কথা ভাবছিল সে। এত সুখ, এত আনন্দ হঠাৎ কোথা দিয়ে এল! একমাস আগেও যে জীবনটাকে ফ্যাকাশে মনে হচ্ছিল, সে কোথা থেকে এত রং নিয়ে এসে হাজির হল! জীবন কি এমনই! কোথায়, কোন বাঁকে কি লুকিয়ে রাখে— তা কেউ জানে না!

আরও কি কি ভাবত কে জানে, কিন্তু তার আগেই মোবাইল সশব্দে বেজে উঠেছে। মন্দার ডিস্প্রেন্ডে চোখ রাখল। উর্মির ফোন।

—‘হ্যা, বলো।’

ওপ্রান্ত থেকে উর্মির উচ্ছ্বসিত স্বর ভেসে আসে— ‘শিগগির হোটেল রু স্টারে চলে এসো। দারুণ খবর আছে।’

— ‘কী খবর? তুমি বিয়ে করছ?’

—‘খ্যাৎ!’ উর্মি ঝাঁঝিয়ে উঠেছে— ‘তুমি একটা গাগোল। তাড়াতাড়ি এসো বলছি’।

—‘গাগোল।’ মন্দার বিস্মত—‘সেটা কী!’

—‘গাডোল আর ছাগলের মিস্রচার। তুমি আসছ কিনা! আমি আর আধঘণ্টা অপেক্ষা করব। তারপর স্ট্রেট তোমার বাড়ি চলে যাব’।

—‘কী এমন সুখবর যে আর তর সহিছে না!’ মন্দার ফিচেল হাসি হাসে— কোনো হতভাগা তোমার প্রেমে পড়েছে নাকি!’

—‘ডেন্ট ক্ৰ রাবিশ।’ আমি রাখছি তোমার হাতে আর আধঘণ্টা সময় আছে। হরি আপু।’

‘হরি আপু’ শুনে মন্দার প্রায় হারি পটারের ঝাঁটার মতোই দ্রুতবেগে ‘রু’ স্টারে পৌঁছোল। উর্মির সব ভালো। কিন্তু বড্ড জেদি! সময়মতো না পৌঁছালে হয়তো সত্যি সত্যিই বাড়ি এসে হামলা করবে। আজ দুপুরে মা কষিয়ে চিকেন রান্না করেছে। সে আবার ভয়ানক খেতে ভালোবাসে। মাকে ‘কাকিমা...কাকিমা’ করে পটিয়ে পাটিয়ে ঠিক মুরগির ঠ্যাংটা বাগাবে! মন্দার তার জাঙিয়াও লোকের সঙ্গে শেয়ার করতে পারে— কিন্তু মুরগির ঠ্যাং নয়।

অগত্যা ‘রু স্টারে’ গেল সে। মানে যেতেই হল তাকে। হোটেলের বাইরে পিংক কালারের কুর্তি আর ব্ল্যাক জিন্স পরে দাঁড়িয়ে আছে উর্মি। আজকে সে বেশ সেজেছে। চোখে লাইনার। গালে গোলাপি আভা। ঠোটে মেরুন রঙের লিপস্টিক।

—‘কী ব্যাপার! এমন মাঞ্জা মেরেছী যে!’

—‘বলছি...বলছি...’ উর্মি আঙুল নেড়ে বলল— ‘তার আগে কাকিমাকে ফোন করে বলে দাও যে, তুমি আজ বাড়িতে লাঞ্চ করবে না।’

—যান্তরা! মন্দার মনশক্ষে দেখতে পেল রান্না করা মুরগিটা তার আস্ত ঠ্যাং নিয়ে পালিয়ে যাচ্ছে!

—‘কেন?’

—‘কারণ তুমি আর আমি আজ রু-স্টারে লাঞ্চ করব...।’

—‘বাট...!’

—‘নো বাট...নো ইফ...জাস্ট সেলিব্রেশন...।’

সেলিব্রেশন! কীসের সেলিব্রেশন! গোটাটাই মাথার ওপর দিয়ে গেল! মেয়েটা কি পাগল হয়ে গেছে!

—‘আর ইউ ওকে উর্মি?’ সে ভয়ে ভয়ে জানতে চায়।

—‘নো। আই অ্যাম নট ওনলি ও কে।’ উর্মি দু-চোখ বঁজে বলল— ‘আই অ্যাম ভেরি ভেরি মাচ ও কে।’

‘ও কে-র আগে এতগুলো ‘ভেরি...ভেরি...ভেরি-র ভেরী বাজছে কেন কে জানে! মন্দার মাথামুণ্ডু কিছুই বুঝতে পারে না! মেয়েটা বোধহয় সত্যিই পাগল হয়ে গেছে!’

—‘ব্যাপারটা কী একটু খোলসা করে বলবে?’

—‘ব্যাপার এই...।’ নাটকীয় ভঙ্গিতে একটা চকচকে ম্যাগাজিন মন্দারের দিকে এগিয়ে দিয়েছে উর্মি। মন্দার দেখল সেটা ‘স্বদেশ’-এর তাজা সংখ্যা।

—‘হ্যাঁ। স্বদেশের এবারের সংখ্যাটা এখনও আমি পাইনি।’ সে অবাক হয়ে বলে—
‘কিন্তু এটা দেওয়ার জন্য এমন তাড়া মেরে আমাকে টেনে আনলে। আমি তো কাল-পরশুই এটা পেয়ে যেতাম...।’

বলতে বলতেই মন্দার বিরক্তমাখা মুখে ‘স্বদেশ’ প্রথম পাতাটা খোলে। উর্মির এ কি জাতীয় রসিকতা! শুধু এই পত্রিকাটা দেওয়ার জন্য এমন ছড়া মারল।... পাগল না...

ভাবতে ভাবতেই সে থমকে গেছে! একি! পত্রিকাটার মাথায় লেখা ‘কমপ্লিমেন্টারি কপি!’ ভেতরে একটা খাম গোঁজা।

—‘এটা কী?’

—‘খুলে দ্যাখো।’

মন্দার তখনও বুঝতে পারেনি ঘটনাটা ঠিক কী ঘটছে। কিংকর্তব্যবিমূঢ়ের মতো খামটা খুলে দেখল তার ভেতর পাঁচশো টাকার একটা চেক! পাঠিয়েছে ‘স্বদেশ’ কর্তৃপক্ষ। প্রাপকের নাম মন্দার ভট্টাচার্য!

সে স্তম্ভিত! তার আঙুল কাঁপছে। ‘স্বদেশ’ তাকে চেক পাঠিয়েছে! কেন? কীজন্য?

দ্রুত হাতে কবিতার পাতা খুলে ফেলেছে উর্মি। কবিতার পাতার প্রথম কবিতাটার ওপর আঙুল রেখে বলল— ‘দ্যাখো।’

মন্দারের শ্বাসরুদ্ধ হয়ে যায়! সে নিজের চোখকেই বিশ্বাস করতে পারছে না। পাতার প্রথমেই জ্বলজ্বল করছে কবিতার নাম— ‘ছেঁড়া রামধনু’! তার নীচেই কবির নাম— ‘মন্দার ভট্টাচার্য!’

যখন হিরের মতো জ্বলেছিল দ্যুতি
তোমার ও মুখে পানপাতা ধোয়া জল
কোথাও শিশির কেঁদেছিল সারারাতে
তাকেই দূ চোখে ধরেছি যে নিষ্ফল।
এ পাকদণ্ডী ধোঁয়া দিয়ে আজও ঢাকা
পাকে পাকে শুধু তুমি গিয়েছিলে উঠে
সারে গা ডোরেমি ডুবে মরেছিল বিলে
যখন সে গান গেয়েছিলে অস্ফুটে।

আজও ছেঁড়া তারে বাজাব কি রামধনু?
আজও কি বর্ষা নেমে আসে এলোচূলে?
তুমি কি এখনও মেঘ রঙে ডুবে থাকো,
অস্তরাগের অলকার উপকূলে?

তুমি কি জেনেছ কেউ রোজ মরে যায়—
ফের বেঁচে ওঠে স্মৃতির পদক্ষেপে!
লাল তিল আজ অন্য সোহাগমালা...

থির বিদ্যুতে তেমনই কি ওঠে কেঁপে?
 যদিও অতীত ছাপিয়েছে সেই দ্যুতি
 আমার এ বুকে বাঁধভাঙা নোনাজল
 তবুও মেঘের ঠিকানাটা রাখি চোখে
 বৃষ্টিহীনের এটুকুই সম্বল।

—‘উর্মি!...উর্মি...এটা কে পাঠাল! এটা!’ মন্দারের ভীষণ কান্না পেয়ে যায়। এই সেই কবিতা যেটা সেই কষ্টের রাতে লিখেছিল! লোকটা বলেছিল মদ শুধু কষ্ট দেয়, আর কবিতা শক্তি। তাই বুকের যন্ত্রণাকে মুক্তি দিয়েছিল শব্দে শব্দে।

—‘সরি, তোমায় জানতে পারিনি।’ উর্মি হাসতে হাসতেই বলল — ‘কবিতা ডটকম-এ কবিতাটা দেখে আর লোভ সামলাতে পারলাম না। কপি করে প্রিন্ট আউট নিয়ে স্ট্রেট পাঠিয়ে দিয়েছিলাম ‘স্বদেশ’-এর ঠিকানায়। তখন তোমার ঠিকানা জানতাম না। তাই নিজের বাড়ির ঠিকানাই দিতে হল। আর আজই এটা এসে পৌঁছেছে। কেমন সারপ্রাইজ বলো?’

মন্দার ভেতরে ভেতরে কাঁদছিল। এ তার স্বপ্ন! এ তার বহুদিনের প্রচণ্ড আকাঙ্ক্ষা! আজ সফল হল।

—‘তুমি অনেক বড়ো কবি হবে মন্দার।’ উর্মির দু-চোখে যেন মন্দারের স্বপ্ন ডানা মেলে দিয়েছে— ‘একদিন সব বড়ো জায়গায় তোমার কবিতা ছাপা হবে। কিন্তু এই দিনটার কথাই সবাইকে গর্ব করে বলে বেড়াব। বলব যে মন্দার ভট্টাচার্যকে গড়ে উঠতে আমি দেখেছি।’

মন্দার এবার কান্না মাখা হাসি হাসল। ভীষণ সুখে তার চোখে জল এসে গেছে। চোখ নীচু করে চোখের জল লুকোতে লুকোতে বলল— ‘হোটেলে লাঞ্চ করবে উর্মি? কিন্তু হোটেলের কুক যে তোমার পছন্দ অপছন্দ জানে না। তবে আমি জানি, আজকে আমাদের বাড়িতে চিকেন কষার একটা জব্বর লেগপিস্ আছে। আর তার সঙ্গে তুমি লুচি খেতে ভালোবাসো—তাই না?’

ভোরবেলায় হঠাৎ লোকজনের সম্ভ্রান্ত কোলাহলে ঘুম ভেঙে গেল গহনের! তার সঙ্গে অ্যান্থলেপের ছটারের আর্তস্বর!

আজকাল সকালে ঘুম ভাঙতে চায় না তার। রোজ রাতে জেগে থাকটাই রুটিন হয়ে গেছে। যখন সবাই ঘুমিয়ে পড়ে, ল্যাম্পপোস্টের বাতিগুলোও জ্বলে জ্বলে ক্লান্ত পিঙ্গল আভা ছড়াতে শুরু করে, তখন তিনি চুপিসারে ছাতে উঠে যান। নির্বাক তাকিয়ে থাকেন উলটোদিকের বাড়ির দিকে। ও বাড়ির জানালায় এক নারীমূর্তি স্থির হয়ে দাঁড়িয়ে থাকে। তার মুখোমুখি দাঁড়ান এক কবি। আর প্রতিরাতে নিজেকে চাবুক মারেন। অসহায়ভাবে ক্ষমা চেয়ে যান সারারাত ধরে। উলটোদিকে বস্তু থেকে কালো ধোঁয়া ক্রমাগতই আচ্ছন্ন করে দেয় চাঁদের ঔজ্জ্বল্য। ঘুরতে ঘুরতে ছড়িয়ে পড়ে আকাশে।

মেয়েটির নাম জানেন না গহন। কণার কাছে জানতে চাইতে পারতেন। কিন্তু প্রয়োজন বোধ করেননি। ওর নাম, বয়েস, যোগ্যতা কোনোটাই জানার দরকার নেই— শুধু আসল কথাটা প্রতি রাতেই অমোঘভাবে জানতে পারেন তিনি। যখন সে ক্ষতবিক্ষত শারীটাকে টেনে

এনে জানলার সামনে দাঁড়ায়, কী এক ব্যাকুল প্রার্থনায় চেয়ে থাকে অনির্দিষ্টের উদ্দেশ্যে—
তখন তার ইতিহাস সম্পূর্ণ জানা হয়ে যায়।

মেয়েটি কখনও গহনকে লক্ষ্য করেনি। সে জানেও না যে এক মধ্যবয়স্ক ব্যক্তি রোজ তাকে দেখার জন্য ছাতে এসে দাঁড়ান। তবু গহন অপেক্ষা করেন, যদি সে একবারও তার দিকে তাকায়! যেমন একটা ছ-বছরের ছেলে আবুলভাবে তাকিয়েছিল তার দিদির নিথর দেহের দিকে। মনে ক্ষীণ আশা নিয়ে অপেক্ষা করছিল, যদি দিদির দৃষ্টি একবার তার দিকে ফেরে...!

সে আশা অধরাই থেকে গিয়েছিল। দিদি আর কখনও তাকায়নি তার দিকে। এই মেয়েটিও তাকায় না। গহন মরিয়া হয়ে শুধু কাতর প্রার্থনা করে গেছেন। কিন্তু সে প্রার্থনা সফল হয়নি।

গতকালও দেখা হয়েছিল দু'জনের। কাল মেয়েটির হাবভাব অন্যরকম ছিল। অন্যদিনের মতো উদাস, ব্যথিত দৃষ্টিতে শূন্যে তাকিয়ে থাকেনি। বরং তার চোখে আগুন জ্বলছিল। কাল সে কাঁদেনি। বরং ল্যাম্পপোস্টের আলো তার চোখে পড়ে ধিকি ধিকি স্ফুলিঙ্গ জাগিয়ে তুলেছিল। একটা হাত তলপেটে রেখে কী যেন অনুভব করার চেষ্টা করে সে। তার মুখ অদ্ভুত এক সংকল্পে দৃঢ় হয়ে উঠেছে।

গহন ভয় পেয়েছিলেন। ও কাঁদছে না কেন? তবে কি চোখের জলও বুকের আগুনে বাষ্প হয়ে গেছে! তলপেটে হাত দিয়ে কী অনুভব করতে চায়! তবে কি...!

প্রায় তিনটে অবধি ওভাবেই দাঁড়িয়েছিল সে। তারপর জানলা বন্ধ হয়ে গিয়েছিল। জানলার পাল্লা বন্ধ হওয়ার আগে একবালক তার মুখ দেখতে পেয়েছিলেন। বিস্মিত হয়ে দেখেছিলেন, কান্না নয় এই প্রথম সে হাসছে! অদ্ভুত একটা বঙ্কিম হাসি! হাসিটা যেন তীক্ষ্ণ ব্যঙ্গ নিয়ে এসে বিঁধল! এমন হাসি লোকে চরম প্রতিশোধ নেওয়ার আগে হাসে।

গহনের বুক দুরু দুরু করে উঠেছিল। সেই হাসিটা কিছুতেই ভুলতে পারছিলেন না। বিছানায় শুয়ে ক্রমাগতই এপাশ-ওপাশ করতে করতে ভোরের দিকে ঘুমিয়ে পড়েছিলেন। তবু অবচেতনে একটা আশঙ্কা ছিলই।

সেই নিরাকার আশঙ্কাই আজ সকালে রূপ নিল লোকজনের কোলাহলে আর অ্যাম্বুলেন্সের ছটারে!

ঘুম ভেঙে ধড়মড় করে বিছানায় উঠে বসলেন তিনি। ছটার বাইরে নয়, যেন তার বুকের ভেতরে বাজছে। সাইরেনের বিপদসংকেত!

দ্রুত পায়ে বিধ্বস্ত অবস্থায়, উশকোখুশকো চলে উদ্ভ্রান্তের মতো ছুটে গেলেন বারান্দার দিকে। কণা বারান্দায় দাঁড়িয়ে বাইরের দিকে তাকিয়েছিলেন। উদবিগ্ন কণ্ঠে তাকেই প্রশ্নটা করলেন— ‘কণা, কী হয়েছে?’

কণা স্বামীর দিকে তাকিয়েছেন। তার চোখে উদ্বেগের ছাপ পড়ল—

—‘তুমি এত সকালে উঠে পড়েছ যে! চা দেব?’

— ‘কথা ঘুরিও না। কী হয়েছে?’

কণা চোখ নামিয়ে নিয়েছেন— ‘তেমন কিছু নয়। বোধহয় কেউ অসুস্থ হয়ে পড়েছে। যাই, তোমার চা ...!’

তার পথ আটকে দাঁড়ালেন গহন। দৃঢ় স্বরে বললেন— ‘কি হয়েছে?’

কণা মুখ নীচু করেছিলেন। যখন মুখ তুললেন তখন তার ঠোঁট কাঁপছে। চোখে রক্তিমভা। কোনোমতে বললেন— ‘ওই মেয়েটা কাল ভোর রাতে সুইসাইড করেছে... গলায় দড়ি দিয়ে... মেয়েটা প্রেগন্যান্ট ছিল...!’

শেষ কথাটা যেন তিরের মতো বিঁধল বুকে। কণার দু-চোখ বেয়ে জল পড়েছে। উগ্র কান্নাকে দমন করার চেষ্টা করছেন।

গহন কিছুক্ষণ বারান্দায় দাঁড়িয়ে দৃশ্যটা দেখলেন। অ্যান্ডুলেঙ্গে মৃতদেহ তোলা হচ্ছে। ক্ষিপ্ত জনতা মারমুখী হয়ে উঠেছে! মেয়েটির স্বামীকে পেড়ে ফেলে এলোপাথাড়ি মারছে। লোকটা মার খেয়েই মরে যেত। কিন্তু তার আগেই পুলিশ এসে তাকে কোনোমতে বাঁচাল।

সমস্ত ঘটনাই চুপচাপ দেখলেন গহন। তারপর নিত্যনৈমিত্তিক অভ্যাসমতো প্রাতরাশও সারলেন। কিন্তু সবটাই নিশ্চুপে। আজ শব্দে হারিয়ে গেছে। বলার কিছু নেই। শব্দ তিনি বড়ো ভালোবাসতেন। নরম লিরিক্যাল শব্দে কতবার সাজিয়ে দিয়েছেন পঙ্ক্তির-পর-পঙ্ক্তি।

কিন্তু আজ মনে হল, সেসব শব্দের মানে কি! কতগুলো মূঢ় ফ্যান্টাসি! যে লাশটা ঘাড় মুচড়ে সাদা চাদরের তলায় পড়েছিল—তার কাছে শব্দের কোনো অর্থই নেই। যে ছোট্ট প্রাণটাকে আর জীবনের দায়ভার বহিতে হল না, মাতৃগর্ভের নৈঃশব্দ্যকে সম্বল করেই ফিরে গেল অনন্ত অন্ধকারে— সে শব্দের কী বোঝে! তার মধ্যেও কোথায় যেন একটা অন্ধ রাগ জন্ম নিচ্ছিল। কেন রাগ, কীসের রাগ তা নিজেও জানেন না। একটা অন্ধকার সমুদ্র পাঁজরের ওপর প্রচণ্ড রোষে ঝাঁপিয়ে পড়ছে! ভেতরে ভেতরে পাড় ভাঙার শব্দ পাচ্ছিলেন গহন।

—‘কোথায় যাচ্ছ?’

প্রাতরাশ শেষ করে বেরোনোর জন্য তৈরি হচ্ছিলেন তিনি। কণা সভয়ে তার দিকে তাকিয়ে বলেন— ‘কোনো জরুরি কাজ...?’

—‘শুটকির কাছে যাচ্ছি। ফিরতে রাত হবে। দুপুরে ওর বাড়িতেই খেয়ে নেব। চিন্তা কোরো না।’

তিনি স্বামীর দিকে তখনও একদৃষ্টে তাকিয়ে আছেন। যেন আরও কিছু বলার আছে। কিন্তু ইতস্তত করছেন।

—‘কিছু বলবে?’

—‘না...’। কণা ইতস্তত করতে করতেই জবাব দেন—‘মানে ... ‘স্বদেশ’-এর সম্পাদক ফোন করেছেন। তোমার সঙ্গে কথা বলতে চাইছেন। ওঁদের এবার একটা স্পেশাল সংখ্যা বেরোবে। তোমার লেখা চাইছিলেন...।’ কথাটা বলে ফেলেই আস্তে আস্তে বাকি শব্দগুলো উচ্চারণ করলেন তিনি—

—‘তুমি কি কথা বলবে?’

—‘না।’

এত রূঢ় ও স্পষ্টভাবে প্রত্যাখ্যান করলেন তিনি, যে কণাও চমকে ওঠেন। গহন একবারে সপাটে ‘না’ বলার লোক নন। গত পাঁচ বছর ধরে তিনি কোনো ম্যাগাজিনেই লিখছেন না। আক্ষরিক অর্থেই লেখা ছেড়ে দিয়েছেন। অথচ সবসময়ই সম্পাদকদের সঙ্গে কথা বলেছেন।

সবিনয়ে নিজের অক্ষমতার কথা জানিয়ে নিরস্ত করেছেন তাদের। কিন্তু 'না' শব্দটা এত তীক্ষ্ণভাবে কোনোদিন বলেননি।

কণা ভয়ার্ত দৃষ্টিতে তাকে একবার দেখে নিলেন। তারপর আরও নশ্ব সুরে বললেন—
'তাহলে কি ওঁকে বারণ করে দেব? বলব যে, তুমি লিখতে পারছ না...'

—'না।' দ্বিতীয়বার আবার সেই শব্দটাই উচ্চারণ করলেন তিনি। শার্টের বোতাম আটকাতে আটকাতে বললেন — 'জেনে নাও কবে দিতে হবে। কবিতা দেব আমি।'

কণাকে আর কিছু বলার সুযোগ না দিয়েই ঘর ছেড়ে বেরিয়ে গেলেন তিনি। এক্ষুনি শটকির কাছে পৌঁছাতে হবে। তাকে এই মুহূর্তে ভীষণ দরকার।

শটকি তখন বাড়িতেই ছিল। আজ সে দোকানে যাবে না। তার কবিতার কোটা প্রায় পূর্ণ হয়ে এসেছে। আর একটা লিখলেই ছাপান্নটা হয়ে যাবে। তাহলেই একটা চার ফর্মার বইয়ের মালিক হবে সে। কবি হবে। শটকি তার পাণ্ডুলিপির পাতাগুলো সযত্নে গুছিয়ে নিচ্ছিল। আর তার পায়ের কাছে বসে গোপাল গড়গড় করে 'বীরপুরুষ' কবিতাটা আবৃত্তি করছে।

কিন্তু আবৃত্তিতে বাধা পড়ল। গহন দ্রুতপায়ে হুড়মুড় করে ঘরে ঢুকেছেন। শটকি বিস্মিত দৃষ্টিতে তাকে দেখে নেয়। তিনি একটা কথাও না বলে সোজা সোফার ওপরে বসে পড়েন। কোনোদিকে খেয়াল নেই। চোখে-মুখে কাঠিন্য। নিশ্বাস দ্রুত। চোয়াল শক্ত করে কী যেন ভাবছেন।

গোপাল একবার শটকির মুখের দিকে তাকাল। একবার গহনের দিকে। বুঝতে পেরেএছ এই মুহূর্তে তার এখানে থাকার উচিত নয়। সে আস্তে আস্তে ঘর থেকে বেরিয়ে গেল।

গোপাল একবার কিছুক্ষণ বন্ধুর তাকিয়ে থাকে। তারপর ফের কাগজপত্র গুছোতে ব্যস্ত হয়ে পড়ে। পঞ্চাশটা কবিতা একের-পর-এক ক্রমানুযায়ী সাজাচ্ছে। একটা আস্ত লোক যে সামনে 'থ' হয়ে বসে আছে— সেদিকে কোনো খেয়াল নেই!

নিজের বন্ধুকে সে খুব ভালোভাবেই চেনে। গহন এইমুহূর্তে কিছুক্ষণ একা থাকতে চান। কিছু একটার সঙ্গে মনে মনে মোকাবিলা করছেন। যখন তার ইচ্ছে হবে তখন নিজেই কথা বলবেন।

প্রায় আধঘণ্টা এভাবেই কাটার পর অবশেষে গহনই মুখ খুললেন। এখন তিনি অনেকটা শান্ত।

— 'কী করছিস?'

শটকি হেসে আবৃত্তি করার ভঙ্গিতে বলল— 'শূন্যের ওপর দিয়ে হেঁটে হেঁটে ফিরছিলাম আমি/ আমার কৈশোর ছিল অর্থহীন/ আমার যৌবন ছিল বেমানান— ফাঁকা।/ কীভাবে এত যে বিষ আমি চেখেছিলাম জীবনে/ আছে কি জীবন বলে আজও কিছু?—/ ছাই। শুধু ছাই।'

গহন বিস্ময়বিস্ফারিত দৃষ্টিতে বন্ধুর দিকে তাকিয়ে থাকেন। শটকি কি ম্যাজিক জানে? অথবা সে অন্তর্যামী!

— 'জল খাবি?'

তিনি প্রশ্নটার উত্তর না দিয়ে আত্মমগ্নভাবে বললেন— 'ভাস্কর চক্রবর্তী। তাই না?'

— 'হ্যাঁ, জিরাফের ভাষা। 'ছয় নম্বর কবিতা।'

গহন ফের অন্যমনস্ক! একটা বড় এতক্ষণ বুকের মধ্যে ঘুরে বেড়াচ্ছিল। এখন যেন অঝোরে বৃষ্টি নামল। শটকি বেছে বেছে এই কবিতাটাই আবৃত্তি করল কেন?

— 'জল খাবি কিনা বললি না তো!'

প্রসঙ্গ পালটে ফেললেন গহন— ‘অতগুলো কাগজপত্র নিয়ে কি করছিস?’

সে রহস্যময় হাসি হাসছে— ‘কবিতার বই ছাপাব। তারই প্রস্তুতি নিচ্ছি।’

—‘তুই! কবিতার বই ছাপাবি!’ বিস্ময়ে প্রায় বাকরুদ্ধ হয়ে গেছেন তিনি— ‘আগে বলিসনি তো!’

—‘বলে কী হবে?’ শূটকি হাতের কাগজপত্র সরিয়ে রেখেছে — ‘তোকে তো বইয়ের কপি দিতে পারব না। কবিতা পড়াতেও পারব না। জানতে পারলে খিস্তি দিবি। তাই বেমালুম চেপে গিয়েছিলাম’।

—‘কপি দিতে পারবি না মানে! বই ছাপাবি মানে মিনিমাম-দুশো-তিনশো কপি বেরোবে। তার মধ্যে একটা কপি আমাকে দিবি না! ফাজলামি হচ্ছে!’

—‘ওই দেখ। তুই কিছু না জেনেই ফের সেন্টু খেতে লেগেছিস! ‘সে বলে —! ‘আসল ব্যাপারটা একটু আলাদা। এ বইয়ের দুশো, তিনশো কপি আদৌ হবে না! হবে মাত্র এক কপি।’

—‘এক কপি!’ পুরো ব্যাপারটাই মাথার ওপর দিয়ে গেল গহনের— ‘এতগুলো টাকা খরচ করে তুহ শুধু এক কপি বই ছাপাবি! তোর কি মাথা খারাপ হয়ে গেছে!’

—‘মাথা আর কবে ঠিক ছিল? আমি হচ্ছি লগনচাঁদা ছেলে।’ সে হো হো করে হেসে উঠেছে— ‘এক কপিই আমার পক্ষে যথেষ্ট।’

গহনের মনে হল গোটা ব্যাপারটাই তার মাথায় তালগোল পাকিয়ে যাচ্ছে। শূটকির কথার মাথামুণ্ডু কিছুই বুঝতে পারছেন না।

শূটকিও বোধহয় বুঝতে পারে যে গহন কিছুই বোঝেনি। তার পক্ষে বোঝা সম্ভবও নয়। একজন প্রখ্যাত কবি কি করে বুঝবেন যে সে কেন পয়সা খরচ করে মাত্র এক কপি বই ছাপাবে? এই বইটা সবার জন্য নয়। শুধু রুমার কাছেই শূটকি কবি হতে চায়। রুমাকে না-বলা কথাগুলো সে কবিতায় সাজিয়েছে। তা বারোয়ারি হবে কেন? এ শুধু তার আর রুমার নিভৃত সংলাপ! অন্যলোকের পড়ার অধিকার নেই। এমনকি গহনেরও নেই!

শূটকি মনে মনে চিন্তা করে, বইটাকে সে বাঁধিয়ে রাখবে। সামনে লাল ভেলভেটের মলাটের ওপর সোনার জ্বলে নাম লেখা থাকবে তার। প্রতিটি পাতা ল্যামিনেটিড হবে। যেদিন জানালা দিয়ে জ্যোৎস্নার ফটফটে রূপোলি আলো এসে পড়বে বিছানার ওপর, হুঁ করে দখিনা বাতাস আছড়ে পড়ে তৈরি করবে অদ্ভুত মূর্ছনা, হান্নুহান্নার মদির গন্ধ ছড়িয়ে রুমা চুপি চুপি এসে বসবে রকিং চেয়ারে, সেদিন তার খোঁপায় জুঁইফুলের মালা পরিয়ে দেবে শূটকি। জুঁইফুল বড়ো ভালোবাসে রুমা। আর সারারাত ধরে একের-পর-এক কবিতা শুনিতে যাবে। এ কবিতাগুলো শুধু তার আর রুমার। আর কারুর নয়।

—‘আমার কথা ছাড়। নিজের কথা বল। নতুন কোনো কবিতা লিখলি?’

গহন মাথা নাড়ালেন। তার চোখ যেন জ্বলে ওঠে— ‘এখনও লিখিনি। তবে এবার লিখব’।

—‘এই তো চাই! সা-বা-শ!’ শূটকি খুশি হয়ে চেয়ারের হাতলে চাপড় মারে— ‘এবার তবে অঙ্ককারে যা গহন। অঙ্ককারে যা। অঙ্ককার তোকে ঠিক পথ চিনিয়ে দেবে। সঠিক পথ!’

পূর্ণদৃষ্টিতে তার দিকে তাকালেন গহন— ‘সেইজন্যই তোর কাছে এসেছি। একটু অঙ্ককার দিতে পারিস আমায়? নিস্তরঙ্গ অঙ্ককার?’

সে তার দিকে তাকিয়ে সম্মতীসূচক হাসি হাসে।
—‘একটু বোস।’

‘মিথ্যে দিয়ে ঘেরা এই পৃথিবীর শেষ সত্য দেখতে চাই আমি
যে হিংস্রতা আমাকে পোড়ায় প্রতিদিন
যে নিষ্ঠুরতার কাছে প্রতিদিন হেরে যাই আমি—
স্নায়ুহীন আলোর সমাজে
একটি ওঙ্কার ধ্বনি টের পেতে চাই আমি।
এই শুধু, শুধু মাত্র এই।’

সামনে নিঃসীম অন্ধকার। ঘরের সব জানলা বন্ধ। কোনোদিক দিয়ে সামান্য আলোর ক্ষীণ
রশ্মিও আসছে না। চতুর্দিকে স্থির নিস্তব্ধতা। মাতৃজঠরের মতো শব্দহীন, আলোহীন শান্তি।
কবি অন্ধকারে কিছুই দেখতে পাচ্ছিলেন না। অবশ্য দেখতেও চাইছিলেন না। অস্থিরভাবে
ঘুরে বেড়াচ্ছেন অন্ধকারে। হেঁচট খাচ্ছেন। ঠোঁকর খাচ্ছেন। মাঝেমাঝেই অপ্রয়োজনীয় কিছু
কঠিন বস্তু ধাক্কাও মেরে যাচ্ছে। তবু সামলে নিচ্ছিলেন।

কবির ঠিক সামনে একটি কাচের আয়না ছিল। আরকিছু টের না পেলেও আয়নাটার
মসৃণ অস্তিত্ব টের পেয়েছেন। দেখতে না পেলেও আন্দাজ করতে পারেন, সেই আয়নাটায়
এখন এক নগ্ন অন্ধকারের প্রতিবিম্ব পড়েছে।

হাত দিয়ে সেই অন্ধকারের প্রতিবিম্বকে স্পর্শ করতে চাইলেন গহন। অন্ধকার মানুষ চেনে।
চেহারা নয়, কণ্ঠস্বর নয়, তার অন্দরের উলঙ্গ সত্ত্বাকে চিনে নিতে অসুবিধে হয় না। গহনের মনে হল
তার আঙুলগুলো সেই স্থির আঁধারে আস্তে আস্তে ডুবে যাচ্ছে। আঙুলগুলো স্পর্শ করছে এক অনাবিল
বাস্তবকে। স্পর্শ করছে সেই শব্দগুলোকে যা আজ সকালেই শুনেছেন।

মেয়েটা প্রেগন্যান্ট ছিল!

এক ফিনিঞ্জ পাখি জন্ম নিতে চেয়েছিল।

প্যাভোরার বাঞ্চে বন্দি অনুভূতির রাজ্যে

দু-ফোঁটা চোখের জল ফেলতে চেয়েছিল সে।

রোজ চেতনার সতীচ্ছদ ছিন্নভিন্ন করে নপুংসকের দল—

বিষাক্ত ঔরস রক্তাক্ত যোনিবর্ষে অনুপ্রবেশ করে

জন্ম দিতে চায় আর একদল মেফিস্টোর!

তবু জন্মাতে চেয়েছিল ফিনিঞ্জ পাখিটা

তখন কালীঘাটের বস্তিতে তাড়ি সহযোগে বিষ পান করেছে

ক্লাস্ত অর্ফিযুস।

পার্কস্ট্রিটের আলোঝলমলে চোখে কখন যেন আচমকা

ভেসে উঠেছিল একলা হ্যামলিন!

তার জন্মক্ষণে কেউ বাঁশি বাজায়নি।

জলভরা থলিতে শুয়ে সে শুনেছিল মাতালের চিৎকার।

আর কতদিন রাংতা মোড়া আলেয়ায়

নিষ্ফল পদচারণা করে যাব!
 আর কতদিন নেঁচে, কুঁদে মৈথুনিয়ে— ব্যর্থ শুক্রকীটের
 মতো ভেসে বেড়াব নীল গহুরে!
 স্বপ্নের সমাধিতে প্রস্রাব করে বলব—‘আমি
 পৃথিবীর শেষদিন পর্যন্ত বাঁচতে চাই!’
 রমানাথ মিস্ত্রির, ছেদীলাল পিয়ানের ধর্ষকামী রিরংসার জ্বালায়
 সিতিমার অশ্রু দেখে লাফিয়ে উঠব নিজের আবিষ্কারে—‘আহা চাঁদে জল আছে’!

ফিনিঞ্জ পাখিটা জন্ম নিতে পারত।
 ঝলমলে ডানায় রোদের টুকরো নিয়ে
 সাজিয়ে দিতে পারত পাতায় পাতায়।
 অথচ জ্বলে পুড়ে খাক হয়ে গেল নির্নিমেষে!
 স্বপ্ন পুড়ে যাওয়ার আগে
 নিজেকেই ভস্মীভূত করে গেল নীরব প্রতিবাদে।

এই দ্যাখো, সেই ভস্মে হাত রেখেছি আমি—
 ভস্মাচ্ছাদিত হয়ে দাঁড়িয়েছি প্রপ্নের মুখোমুখি!
 যে আঁধার অকুতোভয়ে সহ্য করেছে বীভৎস পাশবিকতা
 আজ সেই অনঙ্গ অন্ধকার প্রপ্ন হয়ে ছাত থেকে বুলছিল

একা!

আমি দেখেছি তার গর্ভে ফিনিঞ্জের পচাগলা শব।
 আমি মেখেছি তার ছাইভস্ম।
 প্রপ্নটা মৃত মাছের দৃষ্টিতে দেখছিল আমায়
 দেখো না —ভয় পাই!

গহন থামলেন। তার হাত কাঁপছিল। একটা কান্না গলা পৌঁচিয়ে পৌঁচিয়ে উঠছিল বারবার। আর
 থাকতে পারলেন না। একটা ভাষাহীন কাঁপুনি তাকে ভেঙে দিচ্ছিল। টুকরো টুকরো করে দিচ্ছিল।...

পুরো ছাপ্পানটা!

শুটকির আজ বড়ো আনন্দের দিন। গতকাল রাতেই শেষ কবিতাটা লিখে ফেলেছে।
 আজই পাবলিশারের কাছে যাবে। তার মনের ভেতরে অস্থিরতা! যতদিন লেখা সম্পূর্ণ হয়নি
 ততদিন ধৈর্য ছিল। কিন্তু এখন ধৈর্য জবাব দিয়ে দিয়েছে। সে মনে মনে ভাবছিল, কতদিনে
 বইটা হাতে পাবে। কেমন দেখতে হবে! বুবাইয়ের ভূমিষ্ঠ হওয়ার দিনে ঠিক যেমন একটা
 ভয়— উঠকণ্ঠা মেশানো আনন্দ তিরতির করে কাঁপছিল, তেমনই একটা উত্তেজনা খেলে
 বেড়াচ্ছিল তার রক্তে।

—‘গোপাল, বল তো আজ কোন দিন?’

গোপাল মাথা চুলকে জবাব দেয়— ‘বিষুদ্বার।’

—‘ধুর পাগল, আজ যে বৃহস্পতিবার তা আমিও জানি।’ সে হেসে বলে— ‘আর কি বল তো?’

গোপাল বিমূঢ় হয়ে মাথা নাড়ে। আজ স্বাধীনতা দিবস নয়। হলে পাড়ার ছেলেরা মোড়ের মাথায় তিনরঙা পতাকা টাঙাত। আজ ভ্যলেন্টাইন ডেও নয়। তাহলে হোর্ডিঙে— ছেলেমেয়েরা মাথা, মুখ ঠোঁকাঠুকি করত। তবে আজ কী দিন?

সে আমতা আমতা করে বলে— ‘তালে’?

—‘আজ আমার জন্মদিন।’ শুটকি হাসল— ‘বল বিকেলে কী খাবি?’

গোপালের সপাট উত্তর — ‘মাছ-ভাত’।

—‘বোঝো!’ তার হাসি পেয়ে যায়— ‘মাছ-ভাত তো রোজই খাস। আজ কী খাবি? যা বলবি তাই খাওয়াব।’

গোপাল অনেক ভেবেচিন্তে উত্তর দিল— ‘মাছ-ভাত’।

শুটকি হাল ছেড়ে দেয়। গোপালের দোষ নেই। জীবন ওর গ্রামাফোনের পিন-টা মাছভাতের ওপরই আটকে রেখেছে। যতই জিজ্ঞাসা করা হোক রেকর্ডে ‘মাছ-ভাত’-ই বাজবে।

সে মনে মনে ঠিক করে বিকেলে দোকান থেকে ফেরার পথে বিরিয়ানি কিনে আনবে। গোপাল কখনও বিরিয়ানির স্বাদ পায়নি। আজ একবার চেখেই দেখুক।

—‘ঠিক আছে। বিকেলে ভেবে দেখব খন’।

কোনোমতে স্নান করার নামে কয়েক মগ জল গায়ে ঢেলে, নাকে-মুখে দুটো গুঁজে সে তৈরি হয়ে নিল। প্রথমে কিছুক্ষণের জন্য চশমার দোকানে হাজিরা দেবে। তারপর সিধে কলেজস্ট্রিট।

আজ রাস্তাতে ট্র্যাফিকের করুণ দশা! অন্যান্য দিনও যে খুব ভালো পরিস্থিতি থাকে তা নয়। কিন্তু আজকের চাপটা একটু অস্বাভাবিক। স্কুল-অফিসের তাড়া, সবই ঠিকঠাক আছে। তবু সবকিছুর মধ্যে অদ্ভুত একটা সম্ভ্রান্ত ভাব!

কোনোমতে দোকানে পৌঁছোতেই থমথমে পরিবেশের কারণটা বোঝা গেল। তার এক কর্মচারী বিশু জানাল— ‘দাদা, আইজ আমি তাড়াতাড়ি ঘর ফিরুম। দুইটার আগে আমারে ছুটি দেন।’

শুটকি তখনও ভালোভাবে নিজের চেয়ারটাতে বসতে পারেনি। তার আগেই এ-হেন আবদার শুনে তার ভুরু কঁচকে গেছে। আজ কি সকলেরই বিশেষ দিন নাকি!

—‘কেন?’

—‘টি.ভি.-তে দ্যাখেন নাই’? বিশু অস্বাভাবিক জানায়— ‘সরকারি প্যাট্রি লোকেরা বিরোধীর তিনটারে মারসে। দুফর দুইটায় প্রতিবাদ মিছিল বাইরইবে। ম্যালা বক্কারি। তার আবার পায়ে বাত। যাইতে সময় লাগবনে। আমি চাল নিমু না। দুইটার আগেই শ্যালদা পারাইয়া যামু।’

সে ভুরু কঁচকে কি যেন ভাবছিল। তিনটের সময় তার কলেজস্ট্রিট পৌঁছোনের কথা। পাণ্ডুলিপি জমা দিতে হবে। ‘শিয়ালদা’ নামটা শুনে তার মাথায় তিনজন মানুষের খুন হওয়ার কথা মনে পড়ল না। মনে পড়ল না প্রতিবাদ মিছিল ও তার আনুষঙ্গিক সমস্যার কথা। শুধু মনে হল কতক্ষণে পৌঁছোতে পারবে! রাস্তায় যদি ট্র্যাফিকের চাপ থাকে তবে সময়মতো

অ্যাপয়েন্টমেন্ট রাখতে পারবে তো!

শুটকির কপালে চিন্তার ভাঁজ পড়ে। অন্যমনস্কভাবে বিশুকে বলল—‘ঠিক আছে, তুই আগেই বেরিয়ে যাস।’

—‘আইচ্ছা।’ সে খুশি হয়ে মাথা নেড়ে কাউন্টারে ফিরে যায়। সহকর্মীদের সঙ্গে দেশের হাল নিয়ে আলোচনা করতে শুরু করে।

বেলা পড়ার সঙ্গে সঙ্গেই দোকানে ক্রেতাদের ভিড় বাড়ছিল। সেদিকে মন নেই শুটকির। আজ কাউকে ধরে কবিতা শেখানোর ইচ্ছেও দেখা গেল না তার। অস্থির হাতটা মাঝেমধ্যেই ব্যাগের ভিতরের কাগজের তাড়াটাকে স্পর্শ করছে। ওদিকে ঘড়িটাও আজকে বড়ো আন্তে চলছে। সেকেন্ড, মিনিট, ঘণ্টার কাঁটা যেন আর নড়তেই চায় না।

—‘হ্যাঁ রে।’ অনেকক্ষণ উশখুশ করে শেষপর্যন্ত আর থাকতে না পেরে, পাশে দাঁড়িয়ে আরেক কর্মচারীকেই জিজ্ঞাসা করে বসল সে— ‘কটা বাজে? আমার ঘড়িটা বোধহয় স্লো যাচ্ছে।’

কর্মচারীটি বিস্মিত দৃষ্টিতে তার হাতের ঘড়িটার দিকে তাকায়। তারপর আন্তে আন্তে বলে— ‘বারোটা কুড়ি দাদা।’

—‘এখনও সাড়ে বারোটা বাজেনি!’

এলাহাবাদ থেকে শুরু করে অক্ষরেকা- দ্রাঘিমাঝেখা সবার ওপরই বিরক্ত হল শুটকি। এ কি জাতীয় চক্রান্ত! আজ কি সময়টা একটু তাড়াতাড়ি এগোতে পারে না! না তারও পায়ে বাত ধরেছে!

সে অন্যমনস্কভাবে বলে— ‘তোরা দোকানট দেখ, আমি একটু বেরোচ্ছি।’

প্রত্যুত্তরের অপেক্ষায় না থেকে দোকান থেকে বেরিয়েই পড়ল শুটকি। বাইরে তখন কাঠফাটা রোদ্দুর। শোরুম থেকে বেরিয়ে আসতেই চোখ ধাঁধিয়ে গেল তার। তপ্ত কাঞ্চনবর্ণ রোদ নির্বিচারে উষ্ণতা ঢেলে যাচ্ছে শহরের ওপর। পিচের গরম রাস্তার ওপরে দাঁড়িয়ে ভুঁড়িওয়াল ট্রাফিক পুলিশ নিরন্তর মুকাভিনয়ে ব্যস্ত। তার মধ্য দিয়েই কখনও রুপোলি, কখনও সোনালি কখনো-বা চেরি রঙের ঝিলিক মেরে বিদ্যুৎগতিতে বেরিয়ে যাচ্ছে গাড়ি।

—‘বাবা, শ্যালদা যাবে?’

সে তখন ফুটপাথে দাঁড়িয়ে দাঁড়িয়েই ভাবছিল কোথায় যাবে! শোরুমের এ.সি.র নিষ্প্রাণ শীতলতা ভালো লাগছিল না। চশমার কেনা-বেচা ফ্রেমের ডিজাইন, লেন্সের পাওয়ার, ক্যাশবাক্স, পাঁচশো, হাজার টাকার নোট—কোনোটাই এই মুহূর্তে অভিপ্রেত নয়। জাগতিক বস্তুর মোহ থেকে সে যে আজ বহুদূরে দাঁড়িয়ে, সে কথা কে বুঝবে!

তাই ভাবছিল যে এখন থেকে তিনটে অবধি কোথায় যাবে, কী করবে। কিন্তু কোনো সিদ্ধান্তে আসার আগেই ভাবনায় ছেদ পড়ল।

এক বুড়ি পরনে জন্মের নোংরা কাপড়চোপড়! হাতে দগদগে একটা ভীষণদর্শন ঘা। হাতের পুঁটলিটা তার জামাকাপড়ের চেয়েও নোংরা। চামড়া ওঠা বলিরেখাময় মুখে অসহায়তার ছাপ। কঁকড়ে যাওয়া মুখটাকে কুণ্ডায় আরও কঁকড়ে বলল— ‘দশটা ট্যাকা নয় বেশি দেব! শ্যালদা যাবে বাবা?’

শুটকি প্রথমে অবাক হল। কথাটা বলেই পিচুটিমাথা পিটপিটে চোখে তার দিকে দেখছে বুড়ি। সর্বনাশ! ট্যাক্সি ড্রাইভার ভেবেছে নাকি! হঠাৎ মনে পড়ল যে, আজ সে অ্যাশ কালারের

সাফারিসুট পড়েছে। আর চেহারাটাও ট্যান্ড্রি ড্রাইভারেরই অনুকূলে।

সে হেসে ফেলে। বুড়ির ভুলটা ভাঙিয়ে দিতেই যাচ্ছিল! তার আগেই সে খুনখুন করে বলল— ‘না হয় পনেরো ট্যাকাই বেশি নিয়ো। কিন্তু পৌঁচে দাও। আল্লা তোমার ভালো করবেন। আমি দোয়া করব।’

শেষ দুটো কথা শূটকির বড়ো ভালো লাগল। সে ঈশ্বরবিশ্বাসী নয়। কিন্তু পনেরো টাকা বেশি দেওয়ার মধ্যে যে দুনিয়াদারির ছোঁয়া ছিল, শেষ দুটো বাক্যের আন্তরিকতা তাকে আদ্যন্ত মুছে দিল। আপাতদৃষ্টিতে দোয়ার চেয়ে টাকাটা অনেক বেশি লোভনীয়। কিন্তু পরেব জিনিসটার জন্য বড়ো লোভ হল শূটকির। প্রার্থনা কার কাছে করা হচ্ছে সেটা বড়ো নয়। কিন্তু তার জীবনেও প্রার্থনা করার কেউ আছে, তার জন্যও ‘দোয়া’ করতে একজোড়া হাত অসীমের দিকে উঠবে- এটা ভেবেই খুশি হল।

—‘বেশ।’ সে এক মুহূর্তেই সিদ্ধান্ত নিয়ে ফেলে। নিজের গাড়ির পিছনের দরজা খুলে দিয়েছে—‘এসো বড়োমা।’

বুড়োমা গাড়ি দেখে হকচকিয়ে গেছে। সে একটা কালো হলুদ রঙের ট্যান্ড্রি আশা করেছিল। তার জায়গায় একটা স্টিল কালারের জেন!

শূটকি তার মনোভাব বুঝল। শান্তস্বরে বলে— ‘আমার ট্যান্ড্রিটা গ্যারাজে গেছে। এটা মালিকের গাড়ি। তুমি উঠে এসো।’

বুড়ি ভয়ে ভয়ে পিছনের সিটে বসেছে। তার ছোট্ট শরীরটা আরও গুটিয়ে আছে। যেন সে অচ্ছুৎ! গাড়ির গায়ে তার হাত লাগলেই পুরো গাড়িটা অপবিত্র হয়ে যাওয়ার আশঙ্কা।

—‘আরাম করে বসো। অত ভয় পাচ্ছ কেন?’

শূটকি তাকে আশ্বস্ত করে। একটু একটু করে বুড়োমার জড়তা কাটে। তারপর আস্তে আস্তে জানায় তার ইতিহাস।

সে ট্রাফিক সিগন্যালের সামনে বসে ভিক্ষে করে। আগে তার এত দুরবস্থা ছিল না। তার বুড়ো শিয়ালদায় রিকশা টানত। একবার সেই যে মুখ খুবড়ে পড়ল, আর উঠল না। তারপর থেকেই এই দুর্দশা! আজ ঠা ঠা রোদে শরীর খুব খারাপ লাগছে। সকাল থেকে যে টাকা জমেছে তা সম্বল করেই ট্যান্ড্রি ধরার দুঃসাহস দেখাতে হয়েছে। কিন্তু কোনো ড্রাইভারই যেনায় তাকে গাড়িতে তুলতে চায় না। আল্লার অনেক মেহেরবানি যে শূটকির মতো মানুষও পৃথিবীতে আছে!

শূটকি তার ইঙ্গিত জায়গায় তাকে নামিয়ে দিল। বুড়ি পুঁটুলি থেকে কয়েকটা নোট বের করে এনেছে।

—‘বুড়োমা, টাকা তোমার কাছেই থাক।’ সে হেসে বলল— ‘আমার’ ‘দোয়াই যথেষ্ট।’

বুড়ির শুকনো চোখ বেয়ে কয়েক ফোঁটা জল গড়িয়ে পড়ে। কী বলবে যেন ভয় পায় না। কোনোমতে ধরা গলায় বলে— ‘তোমার সব খোয়াব সাচ্চা হোকবাবা। তোমার মধ্যে খোদা আছে। তোমায় খোদা ভালোবাসেন। তার প্যায়ার সবসময় সঙ্গে থাকুক।’

শূটকি তার দিকে তাকিয়ে হাসতে হাসতেই ফের টের পেল পরিচিত মিষ্টি গন্ধটা। সামনের আয়নায় দেখল বুড়োমা যেখানে বসেছিল, ঠিক সেখানেই বসে হাসছে রুমা। এখন আর সে ছায়া হয়ে নেই। বরং ঝাপসা ঝাপসা অবয়ব নিয়ে এসে। যেন ঘষা কাচের ওপাশে বসে আছে।

সে-ও তার দিকে তাকিয়ে হাসল। দিনটা আজ বড়ো সুন্দর। আজ রুমাকে সবচেয়ে বড়ো উপহার দেবে। রুমা আর রাগ করে থাকতে পারবে না। ফিরে আসতেই হবে তাকে। ফিরে আসতেই হবে...।

‘ফুরায় না তার যাওয়া, এবং ফুরায় না তার আসা,
ফুরায় না সেই একগুঁয়েটার দুরন্ত পিপাসা।
সারাটা দিন আপনমনে ঘাসের গন্ধ মাখে
সারাটা রাত তারায় তারায় স্বপ্ন ঐকে রাখে।
ফুরায় না তার, কিছুই ফুরায় না,
নটেগাছটা বুড়িয়ে ওঠে, কিন্তু মুড়ায় না।
ভালোবেসে মেঘলা আকাশ দেবে,
কিংবা চোখে অনন্ত মৌসুমী?
ভালোবাসা কান্না ভালোবাসে
এ কথা কি জানতে আগে তুমি?’

কবিতা ডটকমের ‘আকাশনীল’ কবিতাটা আজ সকালেই পোস্ট করেছে। মন্দার একঝলক দেখেই চোখ সরিয়ে নেয়। তার আজ কিছুই ভালো লাগছে না। কবিতাও নয়।

সামনে বেশ কয়েকটা বই পড়ে আছে। ওগুলো পড়ে রিভিউ লিখতে হবে। ল্যাপটপে জ্বলজ্বল করছিল ‘কবিতা ডটকম’। তবু কিছুতেই শান্তি নেই। আগে কখনও এমন হয়নি মন্দারের। শুধুমাত্র একটি মানুষের অনুপস্থিতি যে সমস্ত কিছুকেই ব্যর্থ করে দিতে পারে, এ ধারণা তার ছিল না। এমনকি—উশ্রী যখন তাকে প্রত্যাখ্যান করেছিল তখন একটা চিড়বিড়ে জ্বালা তাকে জ্বালিয়ে মারছিল। কিন্তু এখন কোনো জ্বালা নয়, কোনো যন্ত্রণা নয়, ব্যর্থতা আর হতাশা এসে জমেছে বুকে। অদ্ভুত একটা ব্যথা যার বর্ণনা করা সম্ভব নয়—তেমনই একটা ব্যথা বারবার চিনচিন করে উঠছে।

এই নিয়ে সাতদিন হল উর্মি ফোন করেনি। তার ফোন তোলেনি। কথা বলেনি, দেখা করেনি। মেসেজের উত্তরও দেয়নি। এমনকি শুটিং-এও হানা দিয়েছিল সে। কিন্তু উর্মি সেখানেও নেই! মন্দারের মনে হচ্ছিল সারা দুনিয়ায় এখন আগুন লাগুক, সুনামিতে ভেসে যাক সমস্ত ভারতবর্ষ। উর্মির সাড়া না পেলে, সঙ্গ না পেলে সব অর্থহীন উর্মি না থাকলে—সব ফাঁকা।

কী অন্যায় মন্দার? উর্মির সঙ্গে মিশতে মিশতে হঠাৎই তার মনে হয়েছিল জীবন বড়ো সুন্দর! একদিন আবিষ্কার করল, উর্মিকে তার প্রয়োজন। ভীষণভাবে প্রয়োজন! শুধু একঘণ্টা-দু-ঘণ্টায় তার মাথুর্ঘটুকু যথেষ্টভাবে উপভোগ করা হচ্ছে না। সারাজীবন ধরে সে তাকে পাশে চায়। ওই নরম হাত তার হাতদুটো জড়িয়ে ধরুক। সারাজীবন পাশে পাশে হাঁটুক। ফুচকা, চিনেবাদাম খেয়ে টাইম পাস করুক—কিন্তু লাইফ টাইমের জন্য।

এক সুন্দর বিকেলে সাহস করে মনের কথাটা বলে ফেলেছিল সে। উর্মির স্পর্শ যে তার দেহে বিদ্যুৎ সঞ্চারণ করে, সে হাসলে মনে হয় সব জ্বালা ভুলে গিয়ে উর্মির নরম কোলে মুখ গুঁজে দেয়—সব বলেছিল। ভীষণ আবেগে তার হাত দুটো নিজের হাতে নিয়ে বলেছিল—

‘তুমি আমার জীবনে এসো উর্মি। আমি তোমাকে চাই।’

উর্মি তড়িদাহতের মতো চমকে ওঠে। হাতদুটো সজোরে ছাড়িয়ে নিয়ে বলে— ‘কী বলছ? পাগল হয়ে গেলে নাকি?’

—‘এখনও হইনি।’ মন্দার তার হাতদুটো ফের জড়িয়ে ধরেছে— ‘কিন্তু একবার হ্যাঁ বলে দ্যাখো। আনন্দে সত্যি সত্যিই পাগল হয়ে যাব। পার্কস্ট্রিটে দাঁড়িয়ে চিৎকার করে বলব— ‘আমি উর্মিকে ভালোবাসি।’ ‘দরকার পড়লে পেঙ্গুলামকেও চুমু খেয়ে থ্যাঙ্কস জানাব। উর্মি, তুমি আমার জীবনে এলে আমি পাগল হতেও রাজি।’

উর্মির চোখে জল জমেছিল। সে দৃঢ় গলায় বলে— ‘তা হয় না।’

—‘কেন?’

—‘তুমি আমার সম্বন্ধে কতটুকু জানো?’

এ প্রশ্নটার জন্য তৈরি ছিল মন্দার। সেই লোকটা আগেই তাকে বলে রেখেছিল।

—‘তোমার সারনেম চ্যাটার্জি, সাউথ সিটিতে মা, বাবা, দিদির সঙ্গে থাকো, ঝাল সহ্য করতে পারো না, কিন্তু, খাদ্যরসিক। হলুদ আর কমলা রং পছন্দ, তোমার রাশি কন্যা, কবিতা পড়তে ভালোবাসো—এসব তো আমি জানি।’

—‘না সবটা জানো না।’ রাগে উর্মির নাকের পাটা ফুলে ওঠে— ‘আসল জিনিসটাই জানো না। ‘তুমি জানো আমার অতীত কী?’

—‘দরকার নেই উর্মি। আমি শুধু জানি তোমাকে ছাড়া আমি এক পাও এগোতে পারব না।’

উর্মি শুধু দৃঢ়স্বরে বলে— ‘না।’

মন্দার ব্যথা পেল। ব্যথিত স্বরে বলল—‘না কেন? তুমি আমায় পছন্দ করো না? ভালোবাসো না?’

—‘না, সে অধিকার আমার নেই।’

—‘অধিকারের প্রশ্ন উঠছে কোথা থেকে?’

তার দিকে তর্জনী তুলে বলল উর্মি— ‘তুমিই তুলেছিলে প্রশ্নটা।’

—‘আমি!’

মন্দার কিছুই বুঝে উঠতে পারেনি। উর্মি কি বলছে! ভালোবাসার অধিকার! প্রশ্ন!

—‘জানতে চাও তুমি কাকে ভালোবাসো?’ সে উত্তেজিত গলায় বলে— ‘দেখে নাও তবে...।’

বলতে বলতেই নিজের মাথার চুল ধরে টানল! মন্দার স্তম্ভিত! গোটা চুলের গোছাটাই উর্মির হাতে! আসলে ওটা উইগ! উর্মির মাথায় একটা চুলও নেই! সম্পূর্ণ খাঁখাঁ করছে।

সে চমকে উঠেছিল। কিন্তু আরও চমক বাকি ছিল। নিজের হাতেই তার ধনুকের মতো ভুরু দুটোও খুলে ফেলল উর্মি। সেদুটোও নকল। তার ভুরুও নেই! মন্দারের সামনে দাঁড়িয়ে আছে এক বিরলকেশ, ভুরুহীন নারী।

মন্দারের মুখে কোনো কথা জোগায় না। সে বাকশক্তিহীন। ভাষা হারিয়ে ফেলেছে।

—‘ষোলো বছর’ বয়সে একটা রোগ হয়েছিল। ‘অ্যালোপেশিয়া ইউনিভার্সালি’ বলে রোগটাকে। গলা কাঁপছে— ‘উর্মির খুব বড়ো ক্ষতি কিছু হয়নি। শুধু মাথার চুল, ভুরু, গায়ের

লোম —সব ঝরে গিয়েছিল। আর কখনও গজায়নি।’

বলতে বলতেই সে কান্নায় ভেঙে পড়ে —‘রোগটা না হলে লোকে আমায় উশীর মতোই সুন্দরী বলত। কিন্তু আমি একটা কুশিসিত বাস্তব। এক অসম্পূর্ণ নারী। ঘর সংসার সন্তানের স্বপ্ন দেখার অধিকার নেই আমার। কাউকে ভালোবাসতে পারি না, কবির কল্পনা হওয়ার যোগ্যতাও নেই। কখনও মাথায় ফেট্টি বেঁধে, ডুরুঢাকা চশমা পরে, কখনও বা বিদেশি উইগ, নকল ভুরু পরে একটা নকল জীবনযাপন করি। এবার বলো, কবির প্রেমিকা হওয়ার যোগ্যতা আছে আমার?’

উর্মি একটু থামল, মন্দার তখনও তার দিকে অবাক হয়ে তাকিয়ে আছে। সে তখন অন্যকথা ভাবছিল। স্বপ্নে একবার উশীরকে এমনই বিরলকেশ অবস্থায় দেখেছিল। চুল ছাড়া তাকে জঘন্য দেখাচ্ছিল।

কিন্তু উর্মিকে তো অত খারাপ লাগছে না! বরং অভিমানাহত ভিজে চোখের দৃষ্টিতে, স্মুরিত অধরে তাকে আরও সুন্দরী মনে হচ্ছিল! মন্দারকে ওভাবে তাকিয়ে থাকতে দেখে ফুঁসে উঠেছিল উর্মি। —‘এবার কথা বেরোচ্ছে না কেন মুখ থেকে? তুমিই তো আমার প্রশ্নের উত্তরে বলেছিলে যে ‘কবির প্রেমিকার মাথায় ঘন চুল থাকটা মাস্ট’ প্রেমিকার মাথার ঘন চুলটাই কাব্যিক। ‘মনে পড়ে?’ তার চোখ কান্নায় লাল হয়ে গেছে। কোনোমতে বলল— ‘আর কখনও আমার সঙ্গে যোগাযোগ করো না মন্দার। আমি কবির প্রেমিকা হওয়ার যোগ্য নই।’

বলতে বলতেই সে ছুটে চলে গিয়েছিল। মন্দার নির্বাক হয়ে তার চলে যাওয়া দেখে। কী বলল উর্মি! এসব কথা মন্দার তাকে কবে বলেছে? সে তো এগুলো কবিতা টড্‌কমে কুবলাশ্বকে বলেছিল! তবে উর্মি... তার মাথায় বিদ্রুৎ খেলে যায়। বিস্মিত স্বরে আপনমনেই বলে— ‘উর্মি কুবলাশ্ব!’

উর্মিই যে আসলে কুবলাশ্ব হতে পারে তা সে কখনও সে কল্পনা করতে পারেনি। যখন জানল তখন প্রথমে স্তম্ভিত হয়েছিল। পরে উর্মির ল্যাপটপ নিয়ে বসে থাকা, কবিতা সম্পর্কে গভীরতা, বিস্তারিত আলোচনা— সব একের-পর-এক মিলিয়ে দেখছিল। উর্মিকে সে ভালোবাসে, আর কুবলাশ্বকে শ্রদ্ধা এবং সমীহ —দুটোই করে। উর্মি কুবলাশ্ব না হলে তাকে ব্যথা পেত মন্দার। কিন্তু এখন হারানোর কথা ভাবতেই পারছে না!

সে আবার ডায়াল করল উর্মির নম্বর। ক্রমাগতই বেজে যাচ্ছে! তুলছে না কেউ। কেটে দিয়ে আবার ফোন করল। এবারও ফোন নিরন্তর! মন্দারের মুখ শক্ত হয়ে ওঠে। আজই ব্যাপারটার এম্পার কি ওম্পার করে ছাড়বে সে। উর্মিকে তার সঙ্গে আজ কথা বলতেই হবে। সব সিদ্ধান্ত সে একা নিতে পারে না। মন্দারের কথাও তাকে শুনতেই হবে। শুনিয়েই ছাড়বে তাকে।

সে ঘড়ির দিকে তাকায়। প্রায় তিনটে বাজতে যায়। স্টুডিওতে এখন উশীর সঙ্গে যায় না উর্মি। অতএব তাকে বাড়িতেই পাওয়া যাবে।

অসময়েই অফিস থেকে বেড়িয়ে পড়ল মন্দার। তার মনে তখন অটুট সংকল্প! আজ উর্মিকে ছাড়বে না সে। মুখোমুখি দাঁড়াতেই হবে। তার সব প্রশ্নের জবাব আজ সে পাবে। আজ মন্দার তাকে কোনোমূল্যেই ছাড়ছে না!

—‘তুমি!’

দরজা খুলেই প্রায় ভূত দেখার মতো চমকে উঠল উর্মি। সে সপাটে মুখের উপর দরজা বন্ধ করতে যাচ্ছিল। তার আগেই দরজার ফাঁকে পা গলিয়ে দিয়েছে মন্দার।

—‘দাঁড়াও।’

উর্মির চোখে সেই পাঁউরুটি ফ্রেমের চশমা, মাথায় ফেট্রি। তার মুখ লাল হয়ে উঠেছে—
‘কেন এসেছ? তোমার এত বড়ো সাহস!’

—‘সাহসের এখনও কিছুই দ্যাখোনি তুমি।’ মন্দার অদ্ভুত রকমের বেপরোয়া! সে এক ঝটকায় দরজা খুলে ফেলে জোর করেই ভেতরে ঢুকল— ‘কিন্তু আজ দেখবে।’

উর্শী এখন শুটিঙে। উর্মির মা-বাবা এই সময়ে অফিসে থাকেন। উর্মিকে বাড়িতে একা পাওয়ার সম্ভাবনাই বেশি ছিল। মন্দার দেখল, তার আন্দাজ সম্পূর্ণ সঠিক। বাড়ি একদম ফাঁকা। সে পিছন ফিরে দরজায় ছিটকিনি তুলে দেয়। উর্মি ভয়ানক দৃষ্টিতে তাকে লক্ষ্য করছে। কোনোমতে বলে— ‘কী করছ?’

—‘যা অনেক আগেই করা উচিত ছিল।’

—‘মন্দার, পাগলামি করো না।’

—‘আমি বিন্দুমাত্রও ‘পাগলামি’ করছি না।’ সে উর্মির দিকে এগোতে থাকে— ‘আমার চোখের দিকে তাকিয়ে দ্যাখো। সেখানে পাগলামি নেই।’

মন্দারের চোখে অদ্ভুত জেদ! উর্মি ভয় পেয়ে পিছোতে থাকে।

—‘আমি চ্যাচাব মন্দার...এগিয়ো না...।’

—‘আজ স্বয়ং ঈশ্বর এলেও আমাকে ঠেকাতে পারবে না।’ সে দাঁতে দাঁত চেপে বলল—
‘চ্যাচাও...কত চ্যাচাতে পারো।’

বলতে বলতেই মন্দার জাপটে ধরেছে উর্মিকে। তার বাহুবন্ধনের মধ্যে বনবিড়ালের মতো খণ্ডযুদ্ধ করছে মেয়েটা। হাতের নখে ছড়ে গেল মন্দারের গাল। তবু সে তাকে বুকের ওপর আরও শক্ত করে চেপে ধরেছে।

—‘ছেড়ে দাও...।’ ছটফট করতে করতে বলল উর্মি...— ‘আমার লাগছে।’

—‘চোপ!’

প্রেম মানুষকে হয়তো বন্য করে তোলে। করে তোলে শক্তিশালী। যে মন্দার আগে উর্শীর সামনেই দাঁড়াতেই ভয় পেত, সে যে কখন ছেলে থেকে পুরুষ হয়ে গেল তা কেউ জানে না! প্রেম শেখায় যে তার নিজের, তাকে যে-কোনো মূল্যে পেতে হবে। তার জন্য অল্প বলপ্রয়োগও দোষের নয়!

শাস্তিশিষ্ট হিসাবে পরিচিত মন্দারের উগ্র ধমক খেয়ে উর্মি হতভম্ব! মন্দার তখন মাথার ফেট্রি টান মেরে খুলে ফেলেছে। চশমাটাও একটানে চোখ থেকে সরিয়ে নিয়েছে।

—‘আর কতদিন নিজেকে লুকিয়ে রাখবে?’ সে ফুঁসতে ফুঁসতে বলে— ‘নিজের আসল সৌন্দর্য কোথায় সেটা নিজেই জানো না! স্টুপিড কোথাকার! তুমি অসম্পূর্ণ? তোমার ভালোবাসার অধিকার নেই? তোমাকে আমি শিক্ষিত, ইনটেলেকচুয়াল, অসাধারণ ভাবতাম। কিন্তু তুমি তো একটা অশিক্ষিত, মধ্যযুগীয় মেয়ে ছাড়া কিছুই নও!’

সে উর্মিকে ছেড়ে দিল। উদ্বেজনায তার নিশ্বাস জোরে জোরে পড়ছে। উর্মি দু-হাতে মুখ ঢেকে ফেলে। ভুরুহীন কেশবিরল কুৎসিত মুখ কাউকে দেখাতে চায় না।

—‘মুখ ঢেকেছ কেন?’ মন্দার তার হাতদুটো জোর করে সরিয়ে দিয়েছে। নিজের দুই হাতে তার মুখ চেপে ধরে — ‘ভুরু থাক বা না থাক চুল থাক বা না থাক এ মুখ এখন আমার। দেখতে দাও আমায়।’

দু-মিনিট সব চূপচাপ। মন্দারের চোখে অদ্ভুত মুগ্ধতা! উর্মির মুখের দিকে তাকিয়ে থেকেও যেন তার সাধ মেটে না। এমন গভীর নদীর মতো চোখ, স্নেহস্রা দৃষ্টিতে অদ্ভুত বিস্ময়, প্রেম আর কাণ্ডা! চোখের জলেও এত সুখের রং থাকে তা সে আগে কখনও দেখেনি। উর্মির ঠোঁটজোড়া প্রজাপতির মতো থিরথির করে কাঁপছে। এ নারী কুৎসিত নয়! এ নারী অন্য প্রজাতির! সম্পূর্ণ আলাদা।

—‘কবির প্রেমিকারা কেউ নারী নয় উর্মি। আমি বুঝতে পেরেছি, আসলে তারা শুধু একটা আইডিয়া। তারা কারুর নয়। তারা আসলে কেউ নেই। কিন্তু তুমি আছ। তুমি আমার রক্তমাংসের নারী।’ মন্দার চিবুক ধরে তার মুখ সামান্য তুলে দেয়— ‘মন্দার ভট্টাচার্যকে গড়ে উঠতে দেখেই খুশি! গড়ে ওঠার পথে সঙ্গ দেবে না?’

উর্মি কেঁদে ফেলছিল। জীবনে এত সুখ কখনও সে পায়নি। আজ পর্যন্ত জেনে এসেছে কোনো পুরুষের ভালোবাসা পাওয়া তার ভাগ্যে নেই। সংসার, সন্তান, নিজের পুরুষ কোনোটাই তার জন্য নয়। কিন্তু আজ মন্দারের প্রেমসিক্ত মুখের দিকে তাকিয়ে হঠাৎ মনে হল— ও আমার!... ও শুধুই আমার! ওকে ঈশ্বর আমার জন্যই পাঠিয়েছেন।

মন্দারের মুখ তার মুখের কাছে ঘন হয়ে এসেছে। ঠোঁটের ওপর ঠোঁট। উর্মি বাধা দিল না। পরম সুখে তার চোখ বুজে এসেছে। ঠোঁট ঠোঁট ডুবিয়ে পাগলের মতো চুমু খাচ্ছে মন্দার। তার হাত দুটো বড়ো সযত্নে খুলে ফেলেছে নাইটি। আঙুলগুলো এমনভাবে স্পর্শ করছে যেন সে বড়ো দামি জিনিস। উর্মি বড়ো আনন্দে তার প্রেমিককে জড়িয়ে ধরল। মন্দার তাকে কোলে তুলে নিয়েছে। মিলনের আনন্দে দুজনেই অধীর। দুটো হৃৎপিণ্ড বড়ো কাছাকাছি, একসাথে স্পন্দিত হচ্ছে। যেন বলছে—

‘আমার কাছে আসতে বোলো
আমায় ভালোবাসতে বোলো
বাহিরে নয়, বাহিরে নয়
ভিতর জলে ভাসতে বোলো
আমায় ভালোবাসতে বোলো
ভীষণ ভালোবাসতে বোলো

বিছানায় মন্দারের বুকের ওপর মাথা রেখে শুয়েছিল উর্মি। আজ প্রমাণিত হয়েছে সে- নারী। সেও ভালোবাসতে পারে। অন্য মেয়েদের মতো রতিক্রিয়াতেও পারদর্শী। জীবনের এই নতুন আবিষ্কারে বারবার রোমাঞ্চিত হচ্ছিল সে।

—‘হাতটা দাও তো।’

মন্দারের কথা শুনে মুখ তুলে তাকায় উর্মি—‘কেন?’

—‘যোগ্য হাত যখন পেয়েছি, তখন এটাও পরিয়ে দিই।’

তার হাতে এককণা নীলাভ আগুন দ্যুতি ছড়িয়ে জ্বলে উঠল। এই সেই হিরের আংটি। তার অনামিকায় অতি যত্নে আংটিটা পরিয়ে চুমু খেল মন্দার—

—‘আমার সমস্ত জীবন, সমস্ত অনুভব তোমায় দিলাম। নিজের করে নেবে উর্মি।’
উর্মি লাজুক হেসে সম্মতিসূচক মাথা নাড়ল।

—‘মায় করু তো শালা, ক্যারেণ্টার টিলা হয়।’

কফি হাউসে বসে গুটকি কফির কপে চুমুক দিতে দিতে কবি অনুপম মিত্রের দিকে মস্তব্যটা ছুড়ে দিল। কথাটা বলেই সজোরে হেসে উঠেছে। অনুপম অপ্রস্তুত —‘কী বলতে চাইছ?’

—‘কী আর বলব?’ সে চিকেন স্যান্ডউচে আলতো কামড় বসায়—‘তুই তো বাবা, দিব্যি দোকান খুলে বসেছিস। এখনও আঁতেলগুলো ছাড়া কবি হিসাবে আর কেউ তোর নাম জানে না! শিয়ালদা স্টেশনে গিয়ে দশটা লোককে ‘অনুপম মিত্র’র নাম বললে ভাববে— তল্লাটে নতুন কোনো টিকিট চেকার এসেছে।’

অনুপমের মুখ রক্তাভ হয়ে ওঠে। কিন্তু রেগে গিয়েও কিছু বলার উপায় নেই। ইনফ্যান্ট বলার ক্ষমতাই নেই। গুটকিকে সমস্ত কবিই অল্পবিস্তর চেনে। কথার ঝাঁঝের জন্যও কুখ্যাত। বেশি কথা বললে এমন ডোজ দেবে যে পালাবার পথ পাওয়া যাবে না।

তাই সে মুখ বুজেই থাকল।

—‘অথচ এখনই বগলে মামণিদের নিয়ে ঘুরছিস। পরশু রাখি। তরশু মল্লিকা। কাল মুন্নি, আজ...?’

গুটকি কিছু বলার আগেই অনুপমের পাশের মেয়েটি নিজের নাম বলে দিল— ‘শীলা। শীলা ভাদুড়ি।’

—‘বাঃ। শীলাও চলে এসেছে!’ কৌতুকে তার চোখ নেচে ওঠে— ‘উইদ হার জওয়ানি!’ গুটকির দৃষ্টি মেয়েটির দিকে ফিরল— ‘তা মামণি, এত লোক থাকতে এই ভামটার সঙ্গে ঘুরছ কেন? দেখে তো বাচ্চা মেয়ে বলেই মনে হচ্ছে। নিশ্চয়ই কবিতা লেখো। আর এই মাকড়াটা বলেছে যে ওর সাথে ঘুরলে বড়ো বড়ো পত্রিকায় লেখার স্কোপ দেবে। তাই না?’

মেয়েটি অবাক হয়ে একবার গুটকির দিকে, আর একবার অনুপমের দিকে তাকায়। সে কী করে জানবে যে মার্কেটে সকলেই অনুপমকে হাড়ে হাড়ে চেনে! বয়েস চল্লিশ ছাড়িয়েছে। ঘরে স্ত্রী - ছেলে সবই আছে। তবু তার চুলকানি কমেনি। মহিলা কবি দেখলেই তাকে প্রোমোট করার প্রতিশ্রুতি দেয়। বলে— ‘আমার সঙ্গে লেগে থাকো। তোমার ব্যবস্থা করে দেব’। সে লেগে থাকার প্রসেস যে কেমন, আর শেষ পর্যন্ত ব্যবস্থা কী হয় তা কারুর অজানা নেই।

গুটকি মেয়েটির দিকে তাকায়। রীতিমতো সুন্দরী। সুন্দরীরা আবার কবি হলে নাক উঁচু হয়। এই মেয়েটির হাবভাবও তেমন। একটা অদ্ভুত ‘সবজাস্তা...সবজাস্তা’ ভাব।

তার মেয়েটিকে নিয়ে একটু মজা করার ইচ্ছে হল। সে আশ্তে আশ্তে বলে— ‘তা মামণি, কতদূর পড়াশোনা করা হয়েছে?’

—‘ইংলিশে এম.এ. করেছি।’ সপ্রতিভ উত্তর।

—‘তারপর? ফিউচারে কী করার ইচ্ছে আছে?’

—‘লেখালেখিই করব। কবিতা আমার প্যাশন।’

—‘কীরকম প্যাশন?’ শুটকি মুচকি হাসে।

মেয়েটি কফি হাউসের ছাতের দিকে তাকিয়ে বলে— ‘আই ইট পোয়েট্রি, ড্রিংক পোয়েট্রি, ড্রিম পোয়েট্রি...।’

—‘ওরে বাবা। তুমি তো দেখছি কবিতা শুলে খেয়ে ফেলেছ। বেশ, বেশ। তা বাংলা কবিতা লিখবে না ইংলিশ?’

—‘দুটোই’। মেয়েটা শুটকির সামনেই ফস করে একটা সিগারেট ধরাল। ‘আই ওয়ান্না বি আ বাইলিঙ্গুয়াল পোয়েট’।

—‘বাই লিঙ্গুয়াল! আ-হা!’ সে কী যেন ভাবছে— ‘তুমি নিশ্চয়ই প্রচুর পড়াশোনা করেছ। বাই লিঙ্গুয়াল পোয়েট হওয়া সহজ কথা নয়। তা বলো তো মা—এই লাইন গুলো কার?’

শুটকি আবৃত্তি করল— ‘I saw her as a sailor after the storm/ rudderless in the sea, spies of a sudden/ the grass green heart of the leacy island/ where were you so long? she asked ...’

মেয়েটি ভ্যাবাচ্যাকা খেয়ে অনুপমের দিকে তাকায়। অনুপমেরও ‘সসেমিরা’ অবস্থা। কবিতাটা সে-ও চিনে উঠতে পারেনি। গুরু ও শিষ্যার দ্বৈত কনফিউশন দেখে শুটকির হাসি পাচ্ছিল। তবু সে হাসি চেপে গভীর সপ্রশ্ন দৃষ্টিতে তাকিয়ে থাকে।

—‘টেনিসন?’

টেনিসন! শুটকি এবার হেসে ফেলেছে। হাসতে হাসতেই বলল— ‘নাঃ!’

—‘তবে? শেলী? বা ওয়ার্ডসওয়ার্থ?’

পাশ থেকে অনুপমও জানতে চায়—‘কীট্‌স?’

—‘বেচারি বায়রন বাদ গেল কেন?’ সে অনুপমের দিকে তাকিয়ে চোখ টেপে— ‘আফটার অল লোকটা ‘ডন জুয়ান’ লিখেছিল। যাকে এক কথায় তোর বায়োগ্রাফি বলা যায়!’

অনুপম অপমানিত বোধ করে। বিরক্ত গলায় বলে— ‘রহস্য ছেড়ে বলবে এটা কার লেখা? আমি কস্মিনকালেও পড়িনি...।’

—‘শিয়োর যে কস্মিনকালেও পড়িসনি?’ তার মুখে একটা রহস্যময় হাসি, চোখে কৌতুক—‘দাঁড়া, এটার বাংলা ভার্সানটা বলি। এবার দ্যাখ পড়েছিস কিনা!’

বলেই সে গড় গড় করে বলে গেল— ‘...হাল ভেঙে যে— নাবিক হারিয়েছে দিশা/ সবুজ ঘাসের দেশ যখন সে চোখে দেখে দারুচিনি দ্বীপের ভিতর/ তেমনই দেখেছি তারে অন্ধকারে, বলেছে সে, এতদিন কোথায় ছিলেন?...’

অনুপম প্রায় লাফিয়ে ওঠে— ‘পাখির নীড়ের মতো চোখ তুলে নাটোরের বনলতা সেন! জীবনানন্দ!’

—‘তাহলে দেখ কস্মিনকালেও পড়িসনি কথাটা ঠিক নয়! ‘শুটকি বলল—’ প্রথমটা চিদানন্দ দাশগুপ্তের অনুবাদ ছিল। ইংরেজি শব্দগুলোর মানে ভালো করে বুঝলেই বনলতা সেন’কে ধরতে তোর দুমিনিটও লাগত না। কিন্তু তোরা তো কবিতা পড়িস না— মুখস্থ করিস। মুখস্থ বিদ্যা গাল ভরে আওড়াতে খুব ভালো লাগে। কিন্তু চ্যালেক্সের মুখে পড়লেই ফুস্‌স্‌।’

বলতে বলতেই তার সহাস্য দৃষ্টি মেয়েটির দিকে ফেবে— ‘বুঝেছ মামণি?’ কবি হতে গেলে সিগ্রেট, মদ, দাদা, মামা, কিসু ধরার দরকার নেই। স্রেফ কবিতাকে ধরো। তাকে জলে গুলে খাওয়ারও দরকার নেই। শুধু বোঝা, অনুভব করো। কবিতাই পারে তোমাকে কবি বানাতে, দাদারা নয়। বিনে পয়সায় জ্ঞান দিলুম। নিলে নাও, নয়তো শীলা কি জওয়ানি’র চর্চাই করো। আটকাচ্ছে কে?’

দুই বিমূঢ় নরনারীকে রেখে সে হাসতে হাসতে কফি হাউস থেকে বেড়িয়ে গেল। এখন ঘড়ির কাঁটা পৌনে তিনটের ঘর ছুঁছুঁই। আর পনেরো মিনিট এদিক-ওদিক ঘুরে কাটিয়ে দেবে। কফি হাউসে বসলেও হত। কিন্তু অনুপম আর ওই কচি মেয়েটার ঢলাঢলি দেখার ইচ্ছে তার বিন্দুমাত্রও নেই।

কফি হাউসের সিঁড়ির ঠিক নীচে একটা সিগারেট-চুইংগাম চকোলেটের ছোট্ট দোকান আছে। সেখান থেকেই এক প্যাকেট সিগারেট কিনল শুটকি। কী ভেবে যেন গোপালের জন্য একটা চকোলেট বারও নিয়ে নিয়েছে। ব্যাটাকে আজ রাতে বিরিয়ানি খাইয়েই ছাড়বে।

আপাতত হাতে যখন সময় আছে তখন বিরিয়ানিটাও এই বেলাই কিনে নেওয়াই যাক। পরে মাইক্রোওয়েভে গরম করে নিলেই চলবে।

ভাবতে ভাবতেই বেরিয়ে পড়েছে সে। কিন্তু এগোতে গিয়েই বাধা পেল। ভেড়ার পাল লাইন করে চলেছে আমহাস্ট স্ট্রীটের দিকে। যেন ঠিক শেভিংক্রিমের ফেনা মেখে, গম্ভীর মুখে গুটগুটিয়ে যাচ্ছে। তার মধ্যে একটা গুটকির প্রায় গায়ের ওপরই উঠে পড়ছিল। কোনোমতে লাফ মেরে সরে গিয়ে এড়িয়েছে। তার বিরক্ত লাগে! এ কী রে বাবা! যাচ্ছে তো যাচ্ছেই। আর-একটু তাড়াতাড়ি হাঁটতে পারে না!

বিরক্ত হয়ে সে আরও কিছু ভাবতে যাচ্ছিল— তার আগেই একটা কানফাটানো আওয়াজ; প্রচণ্ড কোলাহল। তীব্র তীক্ষ্ণ সমবেত ভয়ার্ত চিৎকার! যেন হঠাৎ সচকিত হয়ে উঠল গোটা এলাকা। গাছে গাছে বসে থাকা কাকগুলো কর্কশস্বরে মহাশোরগোল ফেলে দিল। এবার ভেড়াগুলো দুড়দাড়িয়ে ছুটতে শুরু করেছে! তার পিছনেই মানুষের দল। ভেড়ার পালের মতোই দৌড়ে আসছে এদিকে। চোখে মুখে আতঙ্ক হল কী!

—‘কী হয়েছে দাদা?’

সে উর্ধ্বশ্বাসে ছুটে আসা একটি লোককে জিজ্ঞাসা করে। কিন্তু লোকটা উত্তর দেবে কি? সে গুটকিকে এক ধাক্কা মেরে বেরিয়ে গেছে সামনের দিকে। অসহায়ভাবে খুঁজছে একটা নিরাপদ আশ্রয়!

গুটকি দেখল ঝপঝপ করে সব দোকানের ঝাঁপ বন্ধ হয়ে যাচ্ছে! একদল যুবক-যুবতি তার পাশে দিয়ে দৌড়ে গেল। তাদেরই একজনের ভীত কর্কশস্বর শুনল গুটকি— ‘পুলিশ এসেছে... ফায়ারিং চলছে!’

ওর মনে পড়ে আজ সকালেই বিস্ম বলেছিল একটা প্রতিবাদ মিছিলের কথা। সম্ভবত সেই মিছিল এখানে এসে পৌঁছেছে। কফি হাউসে থাকাকালীন কোনো শব্দ পায়নি সে। কিন্তু বেরিয়ে একটা হালকা স্লোগানের শব্দ পেয়েছিল। কলেজ ইউনিভার্সিটির ছাত্রছাত্রীরা প্র্যাকার্ড ফেস্টুন হাতে নিয়ে একটু আগেই রাস্তা দিয়ে হেঁটে গেছে। সে তো কত কারণেই যায়। কলেজস্ট্রিট এলাকায় প্রায়ই স্লোগান, ভাষণ, জমায়েত লেগে। নিতান্তই পরিচিত দৃশ্য। তাই বিশেষ পান্ডা দেয়নি গুটকি!

এখনও যে গোটা ব্যাপারটা পরিষ্কার বুঝল, তা ও নয়। তবু আন্দাজ করতে পারল, হয়তো প্রতিবাদ মিছিল কোনো কারণে জনবিক্ষোভে পরিণত হয়েছিল। অথবা হত্যার বদলে

হত্যার রাজনীতি। বোধ হয় দুই রাজনৈতিক দল হিংসাত্মক সংঘর্ষে জড়িয়ে পড়েছে। ফলস্বরূপ পুলিশের এই পেশি প্রদর্শন।

পিলপিল করে লোক দৌড়োচ্ছে। শটকি ধাক্কার পর ধকা খেতে খেতে জনস্রোতের উলটো দিকে চলল। তারও পালানোই সমীচীন ছিল। কিন্তু অদ্ভুত কী এক কৌতূহলে সে অকুস্থলের দিকেই এগোল। একের -পর-এক ফায়ারিংয়ের শব্দ কানে আসছে! প্রবল চিৎকার চ্যাচামেচি! তার মধ্যেই স্লোগানের আওয়াজ।

একটু এগোতেই গোটা দৃশ্যটা চোখে পড়ে তার। কে কোন দলের তা এই মুহূর্তে বোঝা সম্ভব নয়! রাস্তায় লুটিয়ে পড়ছে ফেস্টুন! ধুলোয় গড়াগড়ি খাচ্ছে। আতঙ্কিত মানুষের পায়ের তলায় পিষে যাচ্ছে প্ল্যাকার্ড। খাকি উর্দি পরা একদল মানুষ এলোপাথাড়ি লাঠি চালিয়ে যাচ্ছে। বাইশ-তেইশ বছরের এক যুবক রক্তাক্ত দেহে এলিয়ে পড়েছে রাস্তার ওপরে। তবু স্লোগান দিয়ে যাচ্ছে! তার হাতের দৃঢ় মুঠি তখনও আকাশের দিকে অভ্রান্ত লক্ষ্যে স্থির। পুলিশের নিষ্ঠুর লাঠিও তাকে লক্ষ্যভ্রষ্ট করতে পারেনি।

শটকি স্থির হয়ে দাঁড়িয়ে ভাবছিল, এ কোথায় এসে পড়েছে! লাঠির বাড়ি খেয়ে কতগুলো তাজা মুখ রক্তাক্ত হয়ে যাচ্ছে, ঢলে পড়ছে মাটিতে! কেউ নির্বিবাদে মার খাচ্ছে, কেউ পালাচ্ছে! মিছিল ছত্রভঙ্গ। তবু পিছন থেকে কয়েকজন এসে পুলিশকে বাধা দেওয়ার চেষ্টা করল। দু-একটা ইট-পাটকেল উড়ে এল উর্দিধারীদের লক্ষ্য করে। লাগল হেলমেটে। প্রতিশোধস্পৃহায় যেন উন্মত্ত হয়ে উঠেছে লোকগুলো।

মেয়েদের ওড়না, সালোয়ার কামিজ ছিঁড়ে গেছে। জমে আছে চাপ চাপ রক্ত। সেই অবস্থাতেই তাদের চুলের মুঠি ধরে রাস্তার ওপর দিয়েই ঘষটাতে ঘষটাতে নিয়ে চলল পুলিশ ভ্যানের দিকে। উদ্ভ্রান্ত, আতঙ্কিত জনতা দিগ্বিদিকজ্ঞানশূন্য হয়ে দৌড়োচ্ছে। চতুর্দিকে শুধু আর্তনাদ, রক্ত, মৃত্যুর বিভীষিকা!

হঠাৎ মনে হল সে কিছু শুনতে পাচ্ছে না! কিছু দেখতে পাচ্ছে না! মুহূর্তের জন্য যেন সময় থমকে দাঁড়াল।

শটকি বিস্ফারিত চোখে দেখল ওই আতঙ্কিত মানুষের ভিড়ে, ক্ষতবিক্ষত দেহগুলোর মধ্যেই রাস্তায় বসে আছে এক দু'তিন বছরের পথশিশু!! যে-কোনো মুহূর্তে তাকে পদপিষ্ট করে চলে যাবে বিভ্রান্ত মানুষের দল! সে কিছুই বুঝছে না! ভয়ার্ত দৃষ্টিতে এদিক-ওদিক তাকিয়ে কাউকে খুঁজছে। আর চিৎকার করে অসহায়ের মতো কাঁদছে!

সে কান্নার ভাষা কী ছিল তা জানে না শটকি। কিন্তু তার মনে হল ওই অসহায়, বিপন্ন বাচ্চাটা — ‘বাবা...বাবা...’ বলে কাঁদছে। একদিকে জনতার রাশ। অন্যদিকে মারমুখী পুলিশের লাঠি! যে-কোনো মুহূর্তে ওর নরম খুলি দু-টুকরো হয়ে যাবে যেমন দিঘার বোম্বারে বুবাইয়ের মাথাটা!

সে দেখল— বুবাই রাস্তায় বসে দু-হাত বাড়িয়ে তাকে ডাকছে ও আর কেউ নয়! তার বুবাই! বুবাই কাঁদছে ‘বাবা...বাবা...’ করে অসহায় ভাবে ডেকে চলেছে। তাকেই খুঁজছে।

একমুহূর্তেই মাটিতে লুটোল এতদিনের পরিশ্রম! এতদিনের স্বপ্ন-কবিতার পান্ডুলিপি রাস্তাতেই গড়াগড়ি খাচ্ছে! শটকি ছুঁড়ে ফেলে দিল সবকিছু। উন্মাদের মতো সবলে জনস্রোতের বুক চিরে ছুটতে লাগল বাচ্চাটার দিকে! বুবাইয়ের মাথা লক্ষ্য করে উদ্যত হয়েছে শক্ত লাঠি! আবার চলে যাবে ও! বাবাকে ছেড়ে চলে যাবে!

যেতে দেব না তোকে...আর যেতে দেব না বাবা!

সে চিৎকার করে উঠে বাঁপিয়ে পড়ে বাচ্চাটাকে আড়াল করে। পুলিশ ক্ষিপ্ত হয়ে এলোপাথাড়ি লাঠি চালাচ্ছিল। এক বাড়িতেই ওইটুকু শিশুর মাথা চুরমার হয়ে যেত। হয়ে গেলেই বা কী হত! কত ভিথিরি মায়ের শিশু এভাবেই বছরের-পর-বছর মারা যায়। মৃতের সংখ্যা একটা বাড়ত বই তো কিছু নয়।

অথচ তার আগেই কোথা থেকে এক খ্যাপা এসে লাফিয়ে পড়ল তার ওপরে। বুক জড়িয়ে ধরেছে বাচ্চাটাকে। লাঠির মোক্ষম বাড়ি থেকে বাঁচল শিশু। কিন্তু লোকটা নিজেকে বাঁচাতে পারল না। জোরালো আঘাত পড়ল একেবারে মাথার পিছন দিকে। মস্তিষ্কের সবচেয়ে অরক্ষিত অংশে!

বাচ্চাটা দেখল তাকে যে মানুষটা বুক জড়িয়ে ধরেছিল, তার মাথা দিয়ে গল গল করে রক্ত পড়ছে। নাক দিয়ে ফোঁটা ফোঁটা রক্ত গড়িয়ে পড়ল শিশুটির মুখের ওপর। তা সত্ত্বেও লোকটা তার দিকে তাকিয়ে কেমন অদ্ভুতভাবে হাসছে। দু-হাত শক্ত করে ধরে তাকে বুকের নিরাপদ আশ্রয়ে রেখে, সে নিজে অবশভাবে কাত হয়ে পড়ল। ভয়ানক মানুষেরা তাকে মাড়িয়ে চলে যাচ্ছে। কিন্তু তার কোনো সাড়া নেই! সে স্থির দৃষ্টিতে কী যেন দেখছে!

শুটকি কেমন যেন অসাড় হয়ে যাচ্ছিল! তার মাথা থেকে ফিনকি দিয়ে রক্ত ছুটছে। কত রক্ত... কত রক্ত! অথচ রক্তের গন্ধ নেই তো! বরং হানুহানার গন্ধে ভরে যাচ্ছে চতুর্দিক!

শুটকি মুগ্ধ হল। তার রক্তে এত হানুহানার গন্ধ মিশে ছিল! শিরায় শিরায় এতদিন ধরে বয়ে চলেছিল রুমার সৌরভ! আজ সেই সুগন্ধ শুটকির দেহ থেকে ছড়িয়ে পড়ল হাওয়ায় হাওয়ায় সমস্ত কলেজস্ট্রিট জুড়ে আজ রুমার গন্ধ!

সে জানে মৃত্যু আসছে। সবাই বলে মৃত্যু বড়ো কষ্টকর। কিন্তু মৃত্যু কি রুমার মতো? নয়তো সামনে এসে ও কে দাঁড়িয়েছে! সাদা শাড়ি হাওয়ায় উড়ছে। উড়ছে খোলা চুল। সমুদ্রের সামনে দাঁড়ালে এ নারীকে ভেনাসের মতো দেখায়। এই মুহূর্তে ছায়া ছায়া নয়। নয় ঘবা কাঁচের পিছনের আবছায়া—একেবারে স্পষ্ট রুমা। হাত বাড়িয়ে তাকে ডাকছে!

শুটকি হাসতে চাইল। বলতে চাইল— ‘এসেছ।’

তার মুখটা হঠাৎ একটা হেঁচকি তুলেই শক্ত হয়ে গেছে। কিন্তু চোখদুটো তখনও হাসছে, ঠোঁটের কোণে মৃদু হাসি। বুকের ভেতর শিশুটাও টের পেলে মানুষটার বুকের ওঠাপড়া খেমে গেছে!

শুটকি দেখতে পেল না তার বড়ো সাধের কবিতার পাণ্ডুলিপিকে পিষে দিয়ে চলে গেল পুলিশের জিপ! সেই ভিথিরিনি জানতে পারল না যে তার প্রার্থনা ঈশ্বর এত তাড়াতাড়ি কবুল করে নিয়েছেন। মন্দার জানল না, যে মানুষটি তাকে বাঁচতে শিখিয়েছিল, সে আজকে মৃত্যুর কোলে ঢলে পড়েছে। আর কবিতা ডটকমের সদস্যরা কোনোদিনই হয়তো জানবে না যে, সাইটের মডারেটর ব্যাসদেবের প্রোফাইলটা থেকেই গেল, কিন্তু লোকটা নেই!

—‘তুই নাকি আবার কবিতা লিখছিস?’

ঘুঁটু চায়ের কাপে আলতো চুমুক দেয়। তার বছরের জন্য সে সবসময়ই ঘামে। তার কপালে ঘাম জমছিল। গহন সেটা লক্ষ করেই এ.সি. চালিয়ে দেন।

—‘কবিতা লিখছি কিনা জানি না— কিন্তু কিছু একটা লিখছি।’

—আমাকে ‘স্বদেশ’-এর সম্পাদক বললেন তুই ওঁদের স্পেশ্যাল ইস্যুতে কবিতা দিবি বলেছি।’
—‘ঠিকই শুনেছি।’ গহন শান্ত স্বরে বললেন— ‘তবে কবিতা লিখব বলিনি। বলেছি কিছু একটা লিখব।’

—‘তুই কবিতা ছাড়া আর কী লিখবি!’ ঘুটু অবাক।’

তিনি স্মিত হাসলেন— ‘এর আগেও কি আদৌ কবিতা লিখছিলাম! যাইহোক, এবার অন্তত কিছু লেখার চেষ্টা করব।’

‘তাহলে আমাদের ম্যাগাজিনে একটা কবিতা দে গহন। অনেকদিন তোর লেখা পড়িনি।’ ঘুটুর চোখ আমেজে বুজে আসে— ‘আহা, কী জলতরঙ্গের মতো শব্দ কী রোম্যান্টিসিজম, কী অদ্ভুত ছন্দ!... ভীষণ মিস্ করি তোর লেখা।’

গহন তার দিকে কিছুক্ষণ স্থির দৃষ্টিতে তাকিয়ে থাকেন।

—‘ঘুটু, তুই কি সত্যিই আমার লেখা চাস? না ফরমায়েশি লেখা চাইছিস?’

—‘ফরমায়েশি লেখা কখন চাইলাম!’ ঘুটু আকাশ থেকে পড়ে।

—‘এই যে বললি জলতরঙ্গের মতো শব্দ, রোম্যান্টিসিজম, ছন্দ-এটসেট্রা, এগুলো যদি বাদ দিয়ে দিই—তবেও কি আমার কবিতা চাইবি?’

সে অবাক হয়ে গহনের দিকে তাকিয়ে আছে। গহন আপনমনেই দীর্ঘশ্বাস ফেলেন। এরা তাকে রোম্যান্টিক কবির ট্যাগ লাগিয়ে দিয়েছে। এ ট্যাগ ভেঙে বেরোতেই হবে তাকে। তিনি প্রসঙ্গ পালটালেন— ‘অসিতদা কেমন আছেন?’ ঘুটুর মুখে হতাশার ছাপ পড়ল — ‘আছেন একরকম। কথাবার্তা বলেন না। ঠিকমতো চিনতেও পারেন না। হাতটা হয়তো ফিজিয়োথেরাপিতে খানিকটা ঠিক হবে। কিন্তু মানসিক অবস্থা খুব খারাপ। ডাক্তার বলছে—ডিপ্রেসন।’

গহনের মনে পড়ল অসিতদার বলা কথাগুলো। কথা নয়, যেন হাহাকার! তবে কি তার মনের অবচেতনে কোথাও অন্যকোনো সুপ্ত বাসনা ছিল? আদর্শের জন্য তাকে অবহেলা করেছেন? আর তাই হয়তো এই শেষ বেলায় অবহেলিত ইচ্ছেগুলো তাকে টেনে নিয়ে গেছে অবচেতনে। ঘিরে ফেলেছে নিরন্তর হতাশায়।

—‘এখন আর কবিতা লেখেন না?’

—‘ওটাই শুধু আছে।’ ঘুটু বলে— ‘হাতের কাছে কাউকে পেলেই তাকে ইশারায় খাতা পেন আনতে বলেন। তারপর লাইন-বাই-লাইন বলে যান। কবিতা শেষ হয়ে গেলে ফের কী চিন্তায় যেন ডুবে যান। আর কিছু বলেন না। এই তো ‘কালই এই কবিতাটা আমি কপি করেছি।’

সে ব্যাগ থেকে একটা নোটবুক বের করে আনে। গহন কবিতাটা পড়লেন—

আমাকে দিয়েছ তুমি বুদ্ধি, মন, ইন্ড্রিয়নিচয়;

শ্রেষ্ঠত্বের যত পরিচয়—

বিবেকের কষাঘাত, বুদ্ধির আলো

মনুষ্যত্ব বিকাশের সুবর্ণসুযোগ—

শব্দে শব্দে সন্ধির যোগ!

মনুষ্যত্ব বিকশিত হয়নি আমার

জীবনের গুরুভার বইতে পারিনি আর

আশ্চর্য ভাতের গন্ধে ভরেছিল আকাশ

তখন বসন্ত মাস।
 অহে। কী অবর্ণনীয় শোভা!
 ভাতের চেয়েও কি সে বেশি মনোলোভা!
 যে বালক উঠোনে বাঘবন্দি খেলত
 বসন্ত তার জীবনে এসেছে কখনও....
 কবিতা-আজ তুমি শোনো-
 মনুষ্যত্ব ছিল আমার,
 সুযোগ ছিল, ইন্দ্রিয় ছিল,
 ছিল বিবেক, বুদ্ধিও ছিল
 শুধু বিষ...বিষে ভরেছি অণু-পরমাণু
 আমি অমানুষ

তিনি কবিতা বড় পড়া শেষ করে দীর্ঘশ্বাস ফেললেন। নোটবইটা ঘুটুকে ফেরত দিয়ে বলেন—
 ‘তুই আমার কবিতা চাইছিলি না? তার জায়গায় এই কবিতাটা ছেপে দে।

—‘খেপেছিস!’ ঘুটু প্রায় লাফিয়ে ওঠে— ‘অসিতদা চিরকাল প্রতিষ্ঠানবিরোধী! আমি যদি পত্রিকায় এই কবিতা ছাপাই তাহলে উনি আত্মহত্যা করবেন! এমনিতেই মানুষটা আধমরা হয়ে আছে। তুই কি ওঁকে পুরোপুরি মারতে চাস গহন?’

গহন স্মিত হাসলেন। ঘুটুর কাঁধে হাত রেখে বলেন— ‘আমি আমার কথা বললাম। তুই ভেবে দেখ। তবে আমার মনে হয় না অসিতদা আত্মহত্যা করবেন!

ঘুটু আরও কিছুক্ষণ থেকে। কিছু চানাচুর আর কুকি ধ্বংস করে অবশেষে উঠে পড়ল। তাকে ফের অফিসে ফিরে যেতে হবে।

ঘুটুকে বিদায় দিয়ে নিজের ঘরে ফিরে এলেন গহন। টেবিলের ওপরে বইপত্র অগোছালো ভাবে পড়েছিল। শূটকির কাছ থেকে বেশকিছুই বই নিয়ে এসেছিলেন। সেগুলোকে সকাল থেকে পড়ছেন। কিন্তু নিরুপদ্রবে পড়তে পারছেন না। কী করে যেন চতুর্দিকে রাষ্ট্র হয়ে গেছে যে, কবি গহন দত্তগুপ্ত ফের লেখালেখি শুরু করেছেন।

ব্যাস, তারপর থেকেই একের-পর-এক ফোন। একের-পর-এক আবদার। কারুর পাঁচটি প্রেমের কবিতা চাই, কারুর নিশিগন্ধা সিরিজের নতুন কবিতা লাগবে, কারুর-বা আবার বক্তব্য— ‘দাদা, প্লিজ একটা কবিতা দিন। আপনার নামে বিজ্ঞাপন পর্যন্ত দিয়েছি। এখন কবিতা না পেলে নাক কাটা যাবে!’

কতজনের নাক রক্ষা করবেন গহন? মনে মনে বিরক্ত হয়ে উঠছিলেন। আশ্চর্য আক্কেল এদের! বিজ্ঞাপন দেওয়ার আগে একবার জিজ্ঞাসা করে নেয় না কেন? অনুমতি ছাড়াই তার নামে বিজ্ঞাপন দিয়ে বসে আছে! যেন ওদের নিজের ওপর নিঃশর্ত জোতদারি দিয়ে দিয়েছেন তিনি!

আলগোছে বইগুলো টেবিলের ওপর থেকে শোকেসে তুলে রাখছিলেন গহন। শূটকির বই বলে কথা! একটা আঁচড় লাগলেও সে গহনের মুণ্ডু চিবোবে।

কশা তখন বেডরুমে বসে টি.ভি দেখছিলেন। রোজ বিকেলে খবরটা দেখা তার প্রাত্যহিক অভ্যাস। কোথায় কী হচ্ছে তা না দেখলে রাতের খাবার হজম হবে না তার।

আজও চ্যানেল বদলে বদলে প্রাত্যহিক খবর দেখছিলেন তিনি। ফিলমের গসিপ, নায়ক

-নায়িকার ই স্টুপি স্টু রসিয়ে রসিয়ে পরিবেশন করছে উপস্থাপিকা। তিনি চ্যানেল বদলালেন। এসব চটুল খবর শুনেতে ভালো লাগে না।

পরের চ্যানেলে যেতেই টিভির ভেসে উঠল চতুষ্কোণ পর্দায় মারপিটের দৃশ্য। প্রতিবাদ মিছিলের ওপর অন্যায়ভাবে পুলিশের লাঠিচার্জ। পুলিশের পক্ষ থেকে জানানো হচ্ছে যে, প্রতিবাদ মিছিল সহিংস হয়ে উঠেছিল। তারা গাড়ি ভেঙেছে, বাস জ্বালিয়েছে, বিপক্ষ রাজনৈতিক দলের কর্মী হিসাবে পরিচিত মানুষদের মেরেছে। অগ্নিগর্ভ পরিস্থিতি ঠেকানোর জন্যই পুলিশের এই পদক্ষেপ।

পুলিশের দাবি, তারা ব্র্যাক ফায়ার করেছে। সরাসরি গুলি চালায়নি। অথচ সাংবাদিকের ক্যামেরায় বুলেটের আঘাতে নিহত যুবকের দেহ! কণা দেখলেন রাস্তার ওপরে রক্তাক্ত দেহের ভিড়! আশ্বলেঙ্গে তোলা হচ্ছে তাদের।

দেখতে দেখতেই তার চোখ বিস্ফারিত! এ কী দেখছেন হঠাৎ যেন শ্বাসকষ্ট হতে শুরু করল। সর্বশক্তি দিয়ে চিৎকার করে ওঠেন—‘গহন...’

তার আর্ত চিৎকার শুনেই গহনের হাত থেকে বইগুলো পড়ে গেছে। তিনি প্রায় দৌড়ে এসেছেন। কণার মুখ উত্তেজনায় লাল! দমকে দমকে উঠে আসছে কাশি। কিছু বলার প্রাণপণ চেষ্টা করছে। কিন্তু পারছেন না।

—‘কণা’...। গহন ব্যাকুলভাবে তাকে জিড়িয়ে ধরে মাথায়, গায়ে হাত বুলিয়ে শান্ত... করার চেষ্টা করছেন। কণা অত্যন্ত উত্তেজিত হয়ে পড়লে এরকম শ্বাসকষ্ট আর কাশি হতে থাকে। তিনি তাকে শান্ত করার আশ্রয় চেষ্টা করেন—‘কণা ...কণা কী হয়েছে? জল খাবে?’

কণা জোরে জোরে শ্বাস টানছেন। কোনোমতে আঙুল তুলে নির্দেশ করলেন টি.ভি.র দিকে।

—‘জল খাও।’

বিছানার পাশেই জলের গ্লাস ছিল। সেটা কণার হাতে ধরিয়ে টি.ভি.র দিকে তাকালেন তিনি। কি দেখে কণা এত উত্তেজিত হয়ে পড়েছেন সেটাই দ্রষ্টব্য বিষয়।

কিন্তু যা দেখলেন তাতে তারও চেতনা যেন কয়েকমুহূর্তের জন্য বিলুপ্ত হল! কর্লেজস্ট্রিটের রাস্তায় অনেকের মধ্যেই পড়ে আছে একটা পরিচিত মানুষের নিখর দেহ। তখনও বুকের মধ্যে বাচ্চাটা সুরক্ষিত! চোখদুটো স্থির!

তিনি ধপ করে বসে পড়লেন বিছানার ওপর। চোখে জল এল না। মনে হল চতুর্দিকের আলো নিভে গেছে। পায়ের তলায় মাটি কাঁপছে। অনাবিল অন্ধকার...! এখন শুধু অন্ধকার...! কোনো শব্দ নেই শব্দ নেই...!

বৃষ্টির ফোঁটা হতে চেয়েছিল, ভাসানে বৃষ্টি নয়
দু-এক পশলা ইলশেগুঁড়িতে একমুঠো পরিচয়।
যেমন বর্ষা ফিরে ফিরে আসে, শ্রাবণ আকাশ জানে
মন কেমনের মেঘ জমে ওঠে বাউলের গানে গানে
তেমনই মেঘে সে বুক ধরেছিল—অলীক রূপান্তর!
বৃষ্টি হওয়ার স্বপ্ন দেখেছে আমার বারিশ্কার।

লোকে বলে 'খাপা' বৃষ্টি কি আসে নাগরিক চিন্তনে ?
 পাগলটা তবু জল ছুঁয়ে যায় বর্ষার ইন্ধনে ।
 ছাতের উপরে মই লাগিয়েছে' মেঘ থেকে জল পাড়ে ।
 কখনো-সখনো গান গেয়ে ওঠে আবিষ্ট মন্নারে ।
 চালচুলো নেই, নেই কোনও দাবি; হতভাগা এমনে
 কখন শিরায় মেঘ নেমে আসে, শুধু সে প্রহর গোনে ।
 ছেড়ে যায় সুখ, কুয়াশায় ঢাকা নিভৃত বন্দর;
 দুঃখের সাথে কানামাছি খেলে আমার বারিশ্কার ।
 আমরা দালাল— হিরের মূল্যে বৃষ্টির কণা বেচি,
 কত হাঁকেডাকে শূন্য কুস্ত, কত ভাঁটে চোঁচ্যামেচি !
 ঝরিয়ে, ডুবিয়ে, ভাসিয়ে দেওয়ার নানাবিধ কারিকুরি
 আসলে সবাই বৃষ্টির নামে জলের আত্মা খুঁড়ি ।
 আমরা দেশের কৃতীসন্তান, অনোখা যুগন্ধর !
 ভিড় থেকে দূরে একা একা হাসে আমার বারিশ্কার
 সে লোকটা মারে তার রং লাল— যে লোকটা মরে নীল ।
 এ শালার দেশ শুধু রং চায়, রঙিন মুখ মিছিল !
 লাল, নীল, কালো কমলা হলুদ—পরিচয় রঙে বাঁধা !
 বারিশ্কারের কোনো রং নেই— আসলে সে এক ধাঁধা ।
 নয় সে মানুষ, নয় সে ক্যাডার ! দেবতা কদাপি নয়—
 নেই তার গুলি মারার সাহস, নেই মৃত্যুর ভয় ।
 কী জাতীয় লোক? মুখোশের ভিড়ে মুখ হয়ে কেন আসে ?
 এত কিছু ছেড়ে মানুষটা কেন বৃষ্টিকে ভালোবাসে !
 সত্যি পাগল ? অথবা কি কোনো হারামি ধুরন্ধর ?
 পরিচয় শুধু একটাই তার, আমার বারিশ্কার !
 অস্ত্রকে যারা বাগিয়ে ধরেছে ঢামনা সাপের রাগে
 নিজের পাছায় চালালে হত না, ধান্দাবাজির আগে ?
 আপদের লাঠি চেনে না মানুষ, শোনো না কান্না হাসি—
 দমনকারীর হাতে ফণা তোলে বিমূঢ় খুনপিয়াসী—
 বারিশ্কারের গ্রহে লাঠি নেই, আছে নির্জরা ফুল
 লাঠির প্রহারে হেসে উঠেছিল, আঘাতের এ কি ভুল !
 ফেটে গেল তার বুকের ধমনি ফেটে গেল হৃদশিরা !
 বুক ভাঙা শ্বাস ছড়িয়ে দিয়েছে জলের বিষম ব্রীড়া !
 লোহিত গন্ধী প্রতিঘাতে তার বৃষ্টির ছল ছল
 রক্ত কোথায় ! মানুষ কোথায় ! এ যেন গভীর জল !

হাওয়ায় হাওয়ায় ছড়িয়ে পড়েছে বড়োই স্বার্থপর
বর্ষায় আজ দু-চোখে নেমেছে আমার বারিশ্কার।

রামহনু মস্তব্য করল—‘এ কী লিখেছেন দাদা! কম্পিউটার স্ক্রিন ঝাপসা দেখছি! হ্যাটস অফ! টুপি বিয়োজন!’

কুবলাশ্ব লিখেছে—‘অসম্ভব মর্মস্পর্শী। ভীষণ মানবিক। অপূর্ব কবিতা। স্ট্যান্ডিং ওভেশন দিলাম।’

মুমতাজ জানাল—‘এটা বোধহয় এই সাইটে আমার পড়া অন্যতম শ্রেষ্ঠ কবিতা। কুডোস্।’

মস্তব্যগুলো পড়তে পড়তে চোখ সজল হয়ে উঠছিল গহনের। বুকের মধ্যে অদ্ভুত অপরাধবোধের ওঠাপড়া। ঘন অন্ধকার ঢেকে রেখেছে তার তার অবয়ব। গভীর রাতের নৈঃশব্দ্যে নিজের হৃদস্পন্দনের আওয়াজও পাচ্ছিলেন তিনি।

একটু দূরেই সোফার ওপরে ঘুমিয়ে আছে গোপাল। গত তিন দিন ধরে সে একটা কথাও বলেনি। শুটকির মুখাণ্ডি ওই বাচ্চা ছেলেটাই করেছে। ইলেকট্রিক চুল্লি যখন ওর দেহটা গিলে নিল, তখনও গহন একদৃষ্টে তাকিয়েছিলেন সেইদিকে। ভাবছিলেন, তার জীবনসঙ্গী আজ তাকে ছেড়ে চলে গেল।

শুটকির চশমার শোরুম আপাতত বন্ধ। ফ্ল্যাটে তালা লাগিয়ে এসেছেন গহন নিজেই। তার জিনিসপত্র কিছুই নাড়াচাড়া করেননি। শুধু গোপালকে সঙ্গে এনেছেন। ছেলেটা শুটকির মৃত্যুটা মেনে নিতে পারেনি। কেমন যেন হতভম্বের মতো ‘থ’ হয়ে বসেছিল। মৃতদেহের দিকে তাকিয়ে একফোঁটা চোখের জলও ফেলেনি সে। সকালে যে মানুষটা হাসতে হাসতে বাড়ি থেকে বেরিয়ে গেল, রাতে সে এমন নিথর হয়ে ফিরল কেন—এই জিজ্ঞাসা তার মনের মধ্যে নিরন্তর ঘুরে বেড়াচ্ছিল।

এই প্রশ্নের উত্তর বোঝার বয়েস ওর এখনও হয়নি। গহন তাকে কিছু বোঝানোর চেষ্টাও করেননি। শেষকৃত্য সম্পন্ন হওয়ার পর চুপচাপ তার হাত ধরে এনে তুলেছিলো নিজের বাড়িতে। কশা তাকে এ কদিন বুক দিয়ে আগলিয়েছেন। গোপাল নীরবে নতুন পরিবেশে, নতুন মানুষদের সঙ্গে মানিয়েও নিয়েছে। কিন্তু একটা কথাও বলেনি। যেন সে বোবা হয়ে গেছে।

কশা তার এই নীরবতায় শঙ্কিত—‘ও কাঁদছে না কেন গহন? কথা বলছে না কেন?’

গহন নিজেও আশঙ্কিত হচ্ছিলেন। ওই টুকু ছেলের মনের ভেতরে কী হচ্ছে কে জানে! শোকের এ প্রকাশ বড়োই গভীর। আশঙ্কাজনকও বটে।

তিনি কম্পিউটার শাট ডাউন করে গোপালের পাশে গিয়ে বসলেন। ছেলেটা শরীরটাকে কঁকড়ে অঘোরে ঘুমোচ্ছে। কী মনে করে তার মাথায় হাত রেখেছেন। স্নিগ্ধস্বরে ডাকলেন—‘গোপাল।’

গোপাল আধো তন্দ্রায় একবার নড়ে ওঠে। কিন্তু চোখ মেলে তাকাল না।

‘গোপাল।’

এবার সে মিটমিট করে তাকায়। গহন তাকে হাত ধরে টেনে তোলেন।

—‘আয়। তোকে একটা জিনিস দেখাই।’

নীরবে তার হাত ধরে সিঁড়ি বেয়ে উঠে এল বাচ্চা ছেলেটা। গহন কোনো কথা না বলে ওকে

ছাতে নিয়ে এলেন। চতুর্দিক এখন নিস্তন্ধ। একটা জ্বোলো হাওয়া শিরশির করে বয়ে যাচ্ছিল দু-জনকে ছুঁয়ে। আকাশে আজ মেঘ নেই। তারাগুলো ঘুম ঘুম চোখে সবিস্ময়ে তাকিয়ে আছে।

—‘ওই দেখ।’ গহন আঙুল দিয়ে একটি বিশেষ নক্ষত্রকে নির্দেশ করলেন। নক্ষত্রটা কৃশ। তার চোখ ধাঁধানো জ্বলজ্বলে দুটি নেই। কিন্তু অদ্ভুত এক নীলাভ আভায় উজ্জ্বল করে রেখেছে চতুর্দিক। সেই তারাটাকে দেখিয়ে বললেন— ‘ওই দেখ, তোর বাবা।’

গোপাল অবাক হয়ে গহনের দিকে তাকায়। তারপর নক্ষত্রটার দিকে। নক্ষত্রটা তখনও মায়াময় প্রভা ছড়িয়ে স্নিগ্ধ হাসছে। ঠিক যেন গোপালের দিকেই তাকিয়ে সকৌতুকে চোখ পিটপিট করছে। অবিকল শূটকির মতন।

এই প্রথম তার অধর স্ফুরিত হল। তারাটার দিকে তাকিয়ে অভিমানে গাঢ় হয়ে এল দৃষ্টি! একটা অস্ফুট ফোঁপানির শব্দ পেলেন গহন। কয়েক মুহূর্ত পরেই বুকফাটা কান্নায় ভেঙে পড়ল গোপাল। গহনকে জড়িয়ে ধরে সে কাঁদছে। অস্তুর থেকে একটা ভীষণ আন্দোলন নিয়ে উঠে আসছে যন্ত্রণাকাতর গোঙানি।

গহন তাকে বুক জড়িয়ে ধরলেন। তার চোখ বেয়েও অশ্রু টপটপ করে গড়িয়ে পড়ছে। মনে হল, কে যেন কানে ফিশফিশ করে বলল—‘দেখলি শালা! আমায় নিয়ে সেই কবিতা লিখতেই বসলি।’

তিনি নক্ষত্রটার দিকে তাকিয়েছেন। মনে মনে বললেন— ‘আমায় ক্ষমা করে দিস, শূটকি। আমি কবিতা না লিখে পারলাম না!’

‘একা মেঘ ও বারিশ্কার!’

বইটার নাম দেখেই চমকে উঠল মন্দার। কবির নাম গহন দত্তগুপ্ত! লোকমুখে আগেই শুনেছিল যে তিনি আবার লিখতে শুরু করেছেন। কিন্তু দু-মাসের মধ্যেই যে তার নতুন বই রিলিজ করবে তা জানা ছিল না।

চমকটা সেখানে নয়! ‘একা মেঘ’ এবং ‘বারিশ্কার’ দুটো শব্দই তার ভীষণ পরিচিত। ঠিক দু-মাস আগেই কবিতা ডটকম-এ ‘একা মেঘ’ ‘বারিশ্কার’ নামের একটা কবিতা পোস্ট-এ করেছিল!

সে বইটা আগাপাশতলা পড়ে ফেলল। পড়তে পড়তে তার বিস্ময় ক্রমাগতই বাড়তে থাকে। এই বইটার অস্তুর চারটে কবিতা ডট কম-এ ‘একা মেঘ’ পোস্ট করেছিল! ‘মধ্য ভগবান’ ‘চারাগাছ’ ‘ফিনিশের জন্ম’ এবং ‘বারিশ্কার!’

মন্দার স্তম্ভিত হয়ে কিছুক্ষণ বসে থাকে। তার মাথায় সব তালগোল পাকাতে শুরু করেছে।

‘একা মেঘ’ তবে....!

সে মোবাইল ফোনের ফোনবুক থেকে গহন দত্তগুপ্ত-র ল্যান্ডলাইন নম্বর বের করে ডায়াল করল। কিছুক্ষণ একঘেয়ে রিং টোন। তারপরই একটা মোলায়েম শান্ত পুরুষ কণ্ঠস্বর—‘হ্যালো।’

মন্দারের বুক টিপিটিপি করে। এ কণ্ঠস্বর তার পরিচিত। গহন দত্তগুপ্ত-র বাড়ির জমায়েতে আগে শুনেছে। তবু সংকোচে জানতে চায়—

—‘কবি গহন দত্তগুপ্ত...’?

—‘বলছি।’

তার গলাটা একটু কেঁপে যায়—‘আপনার নতুন বইটা পড়লাম। একটা প্রশ্ন করতে পারি?’

—‘বলুন।’

—‘আপনি কি কখনও ‘কবিতা ডটকম-এ’ কবিতা লিখতেন? মানে আপনিই কি... ‘একা মেঘ’? ও-প্রান্তে হাসির শব্দ। গহন দণ্ডুগু হাসছেন। হাসতে হাসতেই বললেন— ‘হ্যাঁ, আমিই।

আপনি?’

—‘আমি... মানে!’ মন্দারের তখনও বিশ্বাস হয় না। সে তখন নিজেকে রীতিমতো চিমাটি কাটছে—‘আমি রামহনু!’

— গহন ফের হেসে ফেললেন—‘হ্যাঁ, রামহনু। বলুন।’

—‘আমায় আবার বলুন কেন দাদা? তুমি করেই তো ডাকতেন।’

—‘বেশ। বলো।’

—‘ইয়ে... মানে।’ সে জিভ কেটে বলল— ‘আপনার সঙ্গে বড্ড অন্যায় করেছি। অনেক উলেটো-পালটা কথা বলেছি...।’

—‘উপকার করেছ ভাই।’ মোলায়েম স্বরে উত্তর এল—‘এর আগে আমার ‘বুলস্য বুল’ কবিতাগুলোকে কেউ এভাবে মুখের ওপর ‘বুলস্য বুল’ বলতে পারেনি। তুমি পেরেছ। থ্যাঙ্কস টু ইউ।’

মনে মনে আর-একবার জিভ কাটে মন্দার—‘আমি কি একবার আপনার সঙ্গে দেখা করতে পারি? জাস্ট একবার ‘সরি’ বলার জন্য।’

—‘সরি বলার জন্য এসো না। বরং এক কাপ চা খেতে আসতেই পারো।’

—‘তাহলে কবে আসব? আজ কি আপনার সময় হবে...?’

—‘নিশ্চয়ই।’ এককথায় রাজি হয়ে গেলেন গহন—‘এখনই চলে এসো। আমিও দেখি ‘রামহনু’ কিদৃশ জীব!’

—‘মন্দারও এবার হাসল।’ —‘ইয়ে... আর একটা রিকোয়েস্ট ছিল’

—‘বলো।’

—‘আপনার ডিডাকশনটা একদম ঠিক। ‘কুবলাশ্ব’ কোনো ব্যাটা নয়, বেটিই। আর... মানে...।’ সে একটু লজ্জিত ভাবে বলে... ‘আমরা দিন পনেরো আগেই বিয়ে করে ফেলেছি। তাই যদি অনুমতি দেন তবে ওকেও....।’

—‘কুবলাশ্ব আর রামহনু!’ এবার অট্টহাসির শব্দ—‘চমৎকার জুটি। সস্তীক চলে এসো। চায়ের নেমস্তন্ন রইল।’

ফোনটা কেটেই উর্মির নম্বর ডায়াল করে মন্দার। উর্মি তখন খুব মন দিয়ে কপালে সিঁদুরের টিপ পরছিল। মোবাইল ফোনটা বেজে উঠতেই চমকে উঠেছে। ফলস্বরূপ টিপটা ধেবড়ে গেল।

হাতের শাঁখা পলা, সোনার চুড়ি ঝনঝনিয়া ফোনটা ধরল সে— ‘বলো’।

—‘তুমি এখনই তৈরি হয়ে নাও।’ ওপ্রান্তে মন্দার উত্তেজিত— ‘আমি দশ মিনিটের মধ্যেই বাড়ি আসছি। তারপর তোমায় নিয়ে একজনের বাড়ি যাব।’

—‘কার বাড়ি?’

—‘এখন অত এক্সপ্লেইন করার সময় নেই। তাড়াতাড়ি রেডি হও। যেতে যেতে সব বলব। এখন সব কথা বলার সময় নেই সোনা।’ মন্ডার ফোন রাখার আগে ফোনেই একটা চুমু ছুঁড়ে দেয়— ‘ভালোবাসি।’

উর্মি লাজুক হয়ে বলে— ‘আমিও।’

“গহন দত্তগুপ্তের নতুন বই ‘একা মেঘ’ ও ‘বারিশ্কার’ সম্পর্কে বিশেষ কিছু বলার নেই। কবির স্বেচ্ছা-অবসর নেওয়ার সিদ্ধান্তই সঠিক ছিল। অন্তত সেক্ষেত্রে তাকে কবি হিসাবে লোকে মনে রাখত!”

—দৈনিক খবর

‘একা মেঘ’ ও ‘বারিশ্কার’ বইটি পড়ে অবাক হলাম। কবি গহন দত্তগুপ্ত প্রায় পাঁচ বছরের স্বেচ্ছা অবসর ভেঙে এই জাতীয় কবিতা লিখতে কেন ফিরে এলেন বুঝলাম না! তাঁর কবিতায় চিরকালই অদ্ভুত এক বিমূর্ত রোমান্টিসিজম থাকত। কিন্তু ‘একা মেঘ’ ও ‘বারিশ্কারের’ প্রত্যেকটি কবিতাই যেন ঝান্ডা তুলে চলেছে! কবি কি সম্প্রতি কোনো রাজনৈতিক দলের ঘনিষ্ঠ হয়েছেন?

—ভোরের কাগজ।

‘একা মেঘ’ ও বারিশ্কারের প্রতিটি কবিতাই প্রায় অ্যাখ্যানধর্মী। গহন দত্তগুপ্ত-র কলমে যেমন আতুর, নরম শব্দ গুচ্ছ পাওয়া যায়, এই কাব্যগ্রন্থের কবিতাগুলি সম্পূর্ণ তার বিপরীত। কবিতাগুলিকে কবিতার চেয়ে শ্লোগান বলেই বেশি মনে হয়।

—তাজা সংবাদ।

‘একা মেঘ’ ‘বারিশ্কার’ কাব্যগ্রন্থের কোনো কবিতাতেই গহন দত্তগুপ্ত তার নামের প্রতি সুবিচার করেননি। বরং কবিতার রহস্যময়তার সর্বনাশ করেছেন।

—পাঙ্কিক কুরুক্ষেত্র।

আজও বাইরে বৃষ্টি পড়ছিল। এই কয়েক মাসে বৃষ্টির চেহারায় বিশেষ কোনো পরিবর্তন হয়নি। শুধু প্রথমদিকে বেশ ছিপছিপে তরুণীর মতো সুললিত পায়ে আসত। টুপুর-টাপুর শব্দে সলজ্জ ভঙ্গিতে ঝরে পড়ত। আর এখন যেন ঘুসি পাকিয়ে পালোয়ানের মতো হুড়মুড়-দুড়দাড় করতে করতে আসে।

কণার বিছানার পাশের জানলা আজও খোলা ছিল। কিন্তু তিনি আজ বৃষ্টি দেখছেন না। বরং মেজাজটা বেশ বিগড়ে আছে। মুখ থমথমে। একপাশে খবরের কাগজ ও পত্রিকাগুলো অযত্নে পড়ে। এইমাত্রই ছুড়ে ফেলে দিয়েছেন।

—‘কী হল?’ গহন নম্রপায়ে এসে বসলেন বিছানার ওপরে। কণার মুখের দিকে তাকিয়ে মিটিমিটি হেসে বললেন—‘গোটা আকাশটাকেই নিজের মুখে টেনে এনেছ যে!’

কণা উত্তর দিলেন না। রাগের আঁচ তার মুখে। নাকের পাটা ফুলছে। গহন কাগজপত্রগুলো সযত্নে গুছোতে শুরু করেছেন দেখে রাগত স্বরে বললেন—‘ওগুলোকে ডাস্টবিনে ফেলে দাও!’ তার গলায় বিরক্তি ফুটে ওঠে—‘এই সমালোচকগুলো নিজেদের কি ভগবান ভাবে! যা খুশি তাই বলবে! কবিতার কী বোঝে ওরা?’

গহনের মুখে স্মিত হাসি—‘অন্যায় কি বলেছে?’

—‘তোমার কবিতাকে শ্লোগান বলে গাল দিয়েছে!’ কণা অবাক—‘আর তুমি হাসছ?’

—‘শুধু শ্লোগানই তো বলেছে।’ তিনি হাসতে হাসতেই বললেন—‘ঝুলস্য ঝুল’ বলেনি। কবিতার ভয়ংকর প্যারোডিও বানায়নি।’

কণা রাগতে গিয়েও পারলেন না। বরং উলটে তার মুখেও হাসির রেখা ভেসে ওঠে।

—‘ওই দুটো বদমাশ আজ আমাদের বাড়ি আসছে।’ গহন বলেন— ‘কুবলাশ্ব আর রামহনু। ওদের জন্য তোমার স্পেশাল পকোড়া বানিয়ে দেবে প্লিজ?’

—‘কথা ঘুরিয়ে না।’ কণা তীব্রদৃষ্টিতে মাপছেন কবিবরকে—‘এতদিন ধরে কবিতা লিখে এলে। এতদিন ধরে জেনে এলাম তুমি কবিতা লেখো। আর ওই লোকগুলো তোমার লেখাকে স্লোগান বলছে...।’

—‘বেশ করেছে।’ কবি শান্ত দৃষ্টিতে বাইরের দিকে তাকালেন—‘হয়তো সত্যিই আমি স্লোগান লিখেছি। অথবা লিখিনি। এতদিন ধরে কবিতা লিখে এলাম। এবার না হয় স্লোগানই লিখি।’ তার চোখজুড়ে স্বপ্ন পাখা মেলে দিয়েছে, নতুন কোনো স্বপ্ন— ‘স্লোগান লিখতে লিখতে একদিন স্লোগানকেই গান করে দেব, কবিতা করে দেব। দেখো কণা, আমি আরও লিখব। স্লোগানই একদিন কবিতা হবে। শুধু লিখেই যাব... যতদিন না এই লোকগুলোই ‘সাধু সাধু করে উঠবে। দেখো...আমি পারব...আমি লিখব...আরও লিখব...।’

বলতে বলতেই হো হো করে হেসে উঠেছেন তিনি। কণার দিকে তাকিয়ে বললেন— ‘এ তোমার কবিবরের নতুন লড়াই!’


কণা গর্বমাখা দৃষ্টি ছুড়ে দিলেন স্বামীর দিকে। গহন তখন বেডরুম থেকে বেরিয়ে হলঘরে যাচ্ছিলেন। চোখে পড়ল গোপাল হলঘরের জানলায় দাঁড়িয়ে দু-হাতে বৃষ্টির জল ধরছে। তার চোখে মুখে উপছে পড়ছে কৈশোরের আনন্দ।

গহন তার পাশে এসে হাঁটুগেড়ে বসলেন। স্নেহসিক্ত কণ্ঠে বললেন— ‘ভিজবি গোপাল?’

কণার ঘরের জানলা দিয়ে বাইরের দৃশ্য দেখা যাচ্ছিল। তিনি স্তম্ভিত হয়ে দেখলেন বাচ্চাছেলেটার সঙ্গে হাত ধরাধরি করে বৃষ্টিতে ভিজছেন গহন! যে মানুষটা কিছুদিন আগেও বৃষ্টিকে ঘৃণা করত সেই মানুষটাই আজ জলে ভিজছে! কবি ভিজ্জে ঘাস পায়ে মাড়িয়ে ছেলেমানুষের মতো ছোটোছুটি করছেন গোপালের পিছন পিছন। দু-হাত বাড়িয়ে বৃষ্টি ধরছেন। তার মুখ, মাথা, চিবুক চুঁইয়ে হাজার হাজার জলবিন্দু ঝাঁপিয়ে পড়ছে পরম আনন্দে।

‘আরো বেদনা আরো বেদনা,
প্রভু, দাও মোরে আরো চেতনা।
দ্বার ছুটায় বাধা টুটায়
মোরে করো ত্রাণ মোরে করো ত্রাণ।
আরো প্রেমে আরো প্রেমে
মোর আমি ডুবে যাক নেমে
সুধাধারে আপনারে
তুমি আরো আরো আরো করো দান।।
প্রাণ ভরিয়ে তৃষা হরিয়ে...’।

ঠিক তখনই বাড়ির গেট দিয়ে ঢুকেছিল মন্দার আর তাঁর দিকটা ওর দিকটা কবি ভিজছেন....!





সায়ন্তনী পূততুগুর জন্ম ১৯৮৫,
কলকাতায়। শিক্ষা যাদবপুর
বিদ্যাপীঠ স্কুল, প্রেসিডেন্সি কলেজ
ও কলকাতা বিশ্ববিদ্যালয়। বাংলা
ভাষা ও সাহিত্যে স্নাতকোত্তর।
কিছুদিন সাংবাদিকতা করার পর
বর্তমান জীবিকা লেখালেখি ও ফ্রি-
ল্যান্সিং। স্কুলে পড়ার সময়েই
সাহিত্যচর্চায় হাতেখড়ি, ১৯৯৭
সালে একটি দৈনিকে ছোটোগল্পের
মাধ্যমে প্রথম প্রকাশ। শিশু সাহিত্য
পত্রিকা 'সাহানা'-য় গোয়েন্দা গল্প
ও থ্রিলার ছোটোগল্পের কাছে সমাদৃত
হয়েছিল। বাংলাদেশের অমর
একুশে গ্রন্থমেলায় প্রকাশিত হয়
প্রথম গ্রন্থ-ত্রিমূর্তি যখন ভয়ংকর
(২০১১)। বইটি পাঠকের
অভিনন্দন-ধন্য।
শারদীয়া আনন্দলোক পত্রিকায়
(২০১১) প্রকাশিত 'আনন্দধারা'
উপন্যাসটিই পাঠকের দরবারে
প্রথম বৃহত্তর আত্মপ্রকাশ।

ISBN : 978-93-84265-47-2



9 789384 265472